

荻阳外史集

郑真

文硕阁

wenshuoge.com

目录

关于我们	5
提要	7
卷一	8
卷二	9
卷三	10
卷四	11
卷五	12
卷六	13
卷七	14
卷八	19
卷九	25
卷十	31
卷十一	37
卷十二	43
卷十三	51
卷十四	56
卷十五	57
卷十六	58
卷十七	59
卷十八	60
卷十九	61
卷二十	62
卷二十一	63
卷二十二	69
卷二十三	74
卷二十四	81
卷二十五	87
卷二十六	94
卷二十七	102
卷二十八	107
卷二十九	113
卷三十	115
卷三十一	120
卷三十二	121
卷三十三	122
卷三十四	128

卷三十五	133
卷三十六	140
卷三十七	147
卷三十八	155
卷三十九	161
卷四十	170
卷四十一	177
卷四十二	181
卷四十三	186
卷四十四	193
卷四十五	194
卷四十六	198
卷四十七	208
卷四十八	215
卷四十九	222
卷五十	228
卷五十一	235
卷五十二	239
卷五十三	245
卷五十四	249
卷五十五	258
卷五十六	261
卷五十七	271
卷五十八	277
卷五十九	278
卷六十	279
卷六十一	287
卷六十二	295
卷六十三	300
卷六十四	311
卷六十五	320
卷六十六	331
卷六十七	342
卷六十八	346
卷六十九	347
卷七十	348
卷七十一	349
卷七十二	350

卷七十三		351
卷七十四		352
卷七十五		353
卷七十六		354
卷七十七		355
卷七十八		356
卷七十九		357
卷八十		358
卷八十一		359
卷八十二		360
卷八十三		361
卷八十四		362
卷八十五		363
卷八十六		364
卷八十七		365
卷八十八		369
卷八十九		371
卷九十		386
卷九十一		398
卷九十二		412
卷九十三		426
卷九十四		440
卷九十五		451
卷九十六		455
卷九十七		461
卷九十八		473
卷九十九		483
卷一百		494
附录		501

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书

集部六

荥阳外史集

别集类五

明

提要

臣等谨案荥阳外史集一百卷明郑真撰真字千之鄞县人成化四明郡志称其研穷六籍尤长于春秋吴澄尝策以治道十二事皆经史之雋永真答之无凝滞洪武四年乡试第一授临淮县教谕陞广信府教授真与兄驹弟凤并以文学擅名真尤以古文着初与金华宋濂声价相埒尝与濂共作裴中着存堂记真文先成濂为之阁笔後濂致位通显黼黻庙廊真偃蹇卑栖以学官没世故声华閤寂传述者稀今观所录不能与濂并骛词坛而义有根柢词有轨度与濂实可肩随未可以名位之升沈定文章之优劣也原集百卷明代已佚其三十卷今所存者亦多残缺失次讹不胜乙或至於不可句读殆世不甚传故莫为是正其不全佚者幸耳今推验文句各为校定其必不可通者则仍原本录之庶不失阙疑之义焉

乾隆四十六年十月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

卷一

●钦定四库全书

荜阳外史集卷一

（明）郑真 撰

（阙）

荜阳外史集卷一

卷二

●钦定四库全书

荜阳外史集卷二

(明) 郑真 撰

(阙)

荜阳外史集卷二

卷三

●钦定四库全书

荜阳外史集卷三

(明) 郑真 撰

(阙)

荜阳外史集卷三

卷四

●钦定四库全书

荜阳外史集卷四

（明）郑真 撰

（阙）

荜阳外史集卷四

卷五

●钦定四库全书

荜阳外史集卷五

(明) 郑真 撰

(阙)

荜阳外史集卷五

卷六

●钦定四库全书

荜阳外史集卷六

(明) 郑真 撰

(阙)

荜阳外史集卷六

卷七

●钦定四库全书

荥阳外史集卷七

（明）郑真 撰

○记

听竹轩记

姑苏陈君仲良来居凤阳之临淮萧散夷旷有林野之趣构一室内列图画书史及古彝器等物外设崇栏环以奇石植竹数十本虚心劲节整比森密大者若幽人贞士特立而不可屈挠小者若门人弟子恭肃而不可狎玩仲良葛中野服宴坐其中披閱今古或时至夜分一气孔神万虑不作而凉飈时来竹之声鏦鏦铮铮珑珑玲玲如钧天广乐交奏并作宫商调而律吕谐也如蓬莱列仙湘江帝子乘龙驷凤佩玉鸣而琤璫击也由是境与心融心与意会怡然涣然有不知其所以然者乃扁其室曰听竹轩云夫大钧播物块圪无垠因所植而形生焉因所触而声生焉声之发也入乎耳警乎心徐而察之其声何如哉万化本乎一理而万理会於一心竹之动而静以听之生物之情於是见矣托兴之士所谓声与静相宜者盖在於此岂但清风故人想像於彷彿间也耶呜呼若仲良者其观物察理者欤虽然至人遗物独与道俱仲良学道者也一斋坐忘形泯迹化彼吹万不同有若天籁地籁者固已相忘於无何有之乡矣竹声云乎哉予家东海上万竹林立耳存目注清思如洗时异事殊芜废不治久矣及来濠梁与仲良所居为近每促膝过从旧梦为醒庶几朝夕问竹之平安以及其人听竹之声以妙悟於无声不亦可乎哉

梅雪山房记

壽州蒙城县主簿林君孔嘉士宾广西人也年三十余神气清莹襟怀疏爽早以才调见知名公鉅卿得为广西行省行人进退周折必以规矩而应对从容举措闲雅行李使命之重不违其时尝度庾岭时固陰沍寒见梅已着花而大雪盈尺山川林壑远近一色徘徊凝伫喟然叹曰天下之物有如梅雪之清而白者乎猥以不才服劳於公清白之操慎终如始其殆庶几哉於是扁所居曰梅雪山房寢处笑语朝斯夕斯既调官壽阳仍以旧扁揭之介乡友亳县簿叶君伯兴求文以记夫士之托兴於物者非私所嗜而溺所好也用以比德焉尔桃李之卉之华而夭艷无取霜雪积陰所致而变异或臻士君子所贵重者梅与雪而已夫梅不徒清也岁寒之孤芬有以坚所守也雪不徒白也阳春之寡和有以励所学也昔之名哲有若何逊宋璟林逋苏武袁安之流或以梅或以雪抒幽发兴极其所至以砥砺名节天下後世固有闻风兴起者矣士宾南海之英名在宦籍而芳香自珍光洁有耀澹澹乎静且幽而藐藐不得入也凛凛

乎凝且重而尘氛不得杂也呜呼其非托物之君子哉且夫俗尚不同人品或异知愚贤不肖不能以相一也然而人之生也眇然一身万物皆备反身而诚乐莫大焉梅雪云乎哉而世之重功名崇道德者犹以调商鼎之梅立程门之雪为当时美谈不识士宾尝用意於斯否耶予忝教临淮于今有年异日或得以公事道过壽阳造其所居闻所闻而见所见斯可乎记之

乾坤一草亭记

姑苏吴庠孟周谪于濠水之上相地一区空濶高爽斩木诛茅构为一亭檐牙轩翥阶级静深虚其牖以资凭览崇其径以通出入外不设藩篱内不施帷幃琴樽书史度置左右孟周游息其中仰高俯深乾端坤倪开豁呈露心有所悟物亦随之因题曰乾坤一草亭云人有诤之者曰乾坤至大也草亭至微也以草亭而系诸乾坤毋乃管窥蠡测不知量者耶孟周曰此以迹言者也乾坤之道大不能外小莫能违乾坤诚大矣吾从而观之则乾坤皆在吾草亭之内吾不知其孰为大孰为小也寓形宇内与乾坤上下相为流通而万事万变皆得以傲睨而从容焉谓之乾坤一草亭不亦可哉予闻而解之曰孟周其学圣门者欤夫乾天之道也坤地之道也乾言健而坤言顺也乾坤之大周髀不能测章亥不能步也草亭之在乾坤何啻沧海一粟哉孟周朝夕其中观夫二仪之运四时之行日月星辰之耀风雨露雷之变山岳之峙河海之流其理之所以然必有合於心之所同然者矣且人与天地参者也天地之心即吾之心天地一太极吾心亦一太极也天地无有限量吾心亦无限量也囿乎方寸之中而极乎六合之内静而与乾坤同其体也动而与乾坤同其用也大而裁成辅相小而人伦日用何莫非乾坤之所为哉是故由乾坤而视草亭草亭实乾坤之一物由草亭而视乾坤则乾坤亦草亭一物尔物我两忘显微无间非知道之君子其孰能与於斯且夫乾坤莫外於易居室之宜取诸大壮乾坤之理已存於中矣然而一亭之微不如万间之盛简陋俭朴非有雕刻粉饰之富而君子有取於孟周者岂非以天地万物之理萃其心欤昔临川吴文正公作草屋数间而题其牖曰抱膝梁父吟浩歌出师表程公雪麓扁之曰草庐盖以孔明期之也公既登金门上玉堂着书立言以道德文章自任学者称为草庐先生其名实之允称矣孟周其迪光前烈也哉孟周谢曰先生之望我至矣譾焉末学其能底於是也耶予嘉其言让而有礼也记诸亭上而去

梅堂记

东南多奇葩异卉求其铁心石肠凌厉於风霜雪月间莫梅若也是以君子比德焉书称若作和羹用汝作盐梅其取譬精矣後世名臣贞士若何逊宋玉林逋之流模写而形容之非夸大其词以炫耀流俗也盖其心意所适有至理存焉乃若堂构基图祖孙相继手植所存恭敬弗怠亦足以观世泽之深厚永久矣凤阳府壽州儒学正潘先生怀玉世为三山閼阅盖宋太师河南郑王美之後由郑王而下峩豸台端相继号四叶中丞传及数世曰徵曰衢者在祥符间联登进士第有司号其乡曰二难里曰同荣又传及十有八世讳继贤字彦能号梅堂处士者则怀玉先大父也处士生於咸淳末年入元以先世为宋显官杜门求志不嗜仕进尝筑堂三水上而对磨石山控引形胜种梅百本巾屨逍遥吟咏自适今去处士数十年根深本固而梅堂故无恙缙绅之士过其下者为之徘徊顾瞻而不忍去想夫晚节岁寒万木僵仆正人心永保贞固之时也而梅作其花皜素呈露固有以见阳春之泽无有间断宁息矣天日卓午鸟语

风微传盃索笑芳馨静幽天地造化之心於是乎在矣梅乎梅乎处士其有得於兹乎怀玉以处士嫡孙之贤封而殖之升堂肃躬顾盼流睐灵游燕娛锡兹祉福其可量哉唐李德裕自着平泉记以为坏一草一木非吾子孙况祖考神明道德之所在者乎然则保有先泽与其家相为无穷在怀玉有不容辞矣予家居四明去闽中为远每从缙绅论东南文献故家於处士每想其风范而以生晚不及亲炙为恨今越在淮海与怀玉同在斯文安得捫衣上堂心领神会於暗香疎影间耶是为记

竹林庵记

永嘉金氏代为儒族其始祖宁甫氏在宋时自闽之赤岸来居平阳金洲以积善有名所居东南厥地爽垲野水分流林麓掩映遥山迤邐起伏如龙虎如象如龟如鼈如琴如几如珠如印皆在远近数十里间以曾杨之学揆之信为风气所聚由是增土为壠潏水为沼环以松柏杂以荷芰清飈徐来香气■〈芬上羽下〉勃仰高俯深孔乐斯土以窆以窆是为始祖之藏尔来二百余年矣元至正末所在构兵郡将缮修城郭士卒樵采不禁合抱之木为所伐者八九金氏有谷汶父者聚族谋曰斤斧之祸乃至此乎衆心为动相与出资财赂之得还故物遂命族人伯贤督工构屋三楹列为两庑外置庖湑旁储祭器深广高下悉如其度别置田若干亩以供祭祀岁时殷荐家聚族於斯乡缙绅大老叹美称慕以金氏不乏人焉以其地多竹扁之曰竹林庵云洪武十三年夏四月谷汶之子壽以俊选为国学生试艺高等授凤阳府光州固始县主簿以其家君命来求为记予惟礼莫重於亲亲尊祖所以重本亲亲之至也谷汶其知所本者哉周礼家人凡祭为尸汉制定为上陵食举之仪下至公侯士大夫家皆得有事於墓墓也者体魄之所藏也墓之有祭尚矣然非有栋宇之制其何以肃位奠之诚哉且墓必树木种木者期之於百年之前用之於百年之後谷汶念其始祖之手植在我後人培而植之而不忍用之也然而事变之来势莫能遏幸而购得於军旅摧挫之余择其礼之宜事之可者行之亦足以慰始祖之神矣矧夫华构翬飞林泉美观灵游宴喜者哉想夫霜露之交少长咸在自谷汶一身观之有伯叔诸父焉有子姓羣从焉樽累酒醴之馨俎豆菓殽之荐洁盥兴俯其中仪式精神血气之交胥鬯幽冥之格固有如见其笑貌闻其容声者矣享事既彻饮福荐酢或有倡言於衆者曰祖宗余庆庶其在此诗书礼义之遗堂构菑播之责其保有弗坠矣至於患难贫贱有背礼废恩者乎彝伦日用有见利忘义者乎闻者惕然惧耸然悟勉用力不辱其先矣此固谷汶之志也岂徒谓万竹之林立以为一日游观之乐哉昔者诗人作淇澳之诗美卫武公先师子曾子赞以为盛德至善民不能忘金氏以竹林名庵慨思先德信乎其不能忘矣子子孙孙弗替引之其不在兹耶予忝同泐产兴教淮山间金洲之胜为向慕兴起异日幸得一至其处咏歌猗猗之间亦云幸矣姑为之记以遗壽使刻之山中以传之壽清修俊迈种学绩文见用於时如木向荣金氏始祖之泽殆未艾也

兰亭记

草之种类不一惟兰以国香见珍易言同心之言其臭如兰春秋传言梦兰离骚言纫秋兰以为佩夫其一草之微见於经传若此得非芳香修洁类君子之德乎自世好不明薰蕕莫辨珍萧艾而蕢蒺施者天下皆是也其孰有重夫兰者哉君子则不然於其先世之所好者培而植

之先世之德斯在矣岂徒采芳挹馨以资耳目之娱哉凤阳府颍州学正括苍叶先生主善老成问学之士也其先在宋时有名贺孙字味道号西山謚文修者官至殿讲以考亭高第着书立言道德闻望称於一时至其先大父肥遯先生当宋革命时手植崇兰号所居曰兰室下帷讲授学者多出其门後五十年而主善克承厥志仍以旧扁揭之梁间後进之士过其下者如见肥遯主善既来颍阳求予为文记之夫前人之灵在天其芳馨之德固已被之人人矣後之人不嗣而承之则前人之德亦将湮昧而不明矣譬如兰焉自根而茎而叶森然而倩秀郁然而芳茂雨露之滋以生以息薰蒸秀彻芬芳至今而不絶庶几其德之似矣然则主善其迪光前烈者哉世言与善人交如入芝兰之室主善典教颍阳其以善淑诸人多矣况於周旋交际者哉异日名列縉绅升之兰台署之兰省所以仰其风仪被其容接者奚止今日一室之内一席之间哉予家四明山中尝独行崖谷间比兰为贞人逸士踌躇眷恋至不能去闻有生於海上普陀山者尤芳酷可爱每使人涉险求之不啻金玉也今越在淮海芜荒茅塞其能忘情於中耶安得与主善从容是室之下泛九畹之光风作猗兰操授琴鼓之发怀古之一慨哉姑书以为之记

萍轩记

水草之产非一独萍也泛然无根着岂造物者之偏也耶世之君子去乡里远亲戚者每取以自况其心之所适意之所得胡可以浅近观哉姜君孟起好古博雅士也少家越之新昌侍其父羽仪先生游吴为东南都会声明文物之盛耳闻目覩者不可胜纪矣际今圣运遭家多艰自吴中来凤阳怀远卜居荆山之麓覆茅缚竹为燕息之所扁曰萍轩予尝过焉求其所谓萍者无有孟起谢曰吾年四十余去家二千里由越而吴而楚徘徊展转若浮萍随波上下而莫适所止也夫君子素其位而行不愿乎其外吾萍梗之踪得此以寄其身之所安足矣去住天也何敢必哉惟静以俟之耳以萍而辱吾轩自吾之出处言之非有半池一水浮青点紫可以凭栏檻而纵心目也予应之曰子可谓托物君子矣夫寓物而不拘於物士君子所以乐其天也屈平之於兰渊明之於菊濂溪之於莲岂直以芬芳艳丽之为哉盖其物理之适与造化相为流通尔萍虽微物亦气化使然者即其飘荡留连随所在而克遂夫生生之妙殆有若君子无入而不自得焉观物察理者宁不有得於兹乎乃若心融意会物我两忘视夫天地上下皆我室我閤也曾何根蒂之有此固孟起命名之意而世徒欲以形迹求之不亦过哉予家四明越在海上亦泛萍者也与孟起相遇於淞产为同乡於斯文为同志论辨往复亦足以释羈旅之怀矣异日幸涉江东归或得萍实献诸是轩之下孟起剖而食之其甘如蜜斯有以信吾昔者先圣所言矣因书以为记轩在荆山为楚卞和得玉处南则涂山大禹朝诸侯之地其下长淮直走东海云

拙守斋记

四明王先生汉章卜居舜江上扁其斋居曰拙守前天台刘公羽庭着记而信安汪公（阙）会稽杨公铁崖或述之赞或勒之铭於拙守之义无余蘊矣先生佩服其言端居静念朝夕经史且取曾伯祖尚书公曾祖常博公遗书手泽玩诵而肄习之於性理之微文章之懿典故之详莫不究其源委订其指归凡世之华采相胜巧伪相倾譸张变幻以墮名败节辱先丧家者

视之若浮云然际今圣朝有司强荐起之入京师两以母老辞归洪武初年以博学召试既中选力辞归养明年复召覆试得知英山县事既到任以旧扁揭之楣间士大夫过者谓之曰公今有民社之寄簿书期会将奔走不暇顾欲以拙守之不亦疎乎先生曰巧而能为不若拙而能守吾天性本拙将守之终身矣催科刑政莅官临民以拙守之民苟如吾之拙宁有犯礼非义之患哉吾幸以拙守其先泽得至於此赖天之灵获归丘壠保其遗绪全真养素以终吾天年斯亦不媿夫拙矣予闻而韪之曰是其得守身之本者哉昔者南轩张子曰士病於不拙也久矣而考亭朱夫子亦曰拙者顺其理而不去也拙之时义大矣拙之守道之守也可舍而他哉先生之守也非有田园第宅之守也亦非有金玉宝货车马服乘之守也从容乎仁义涵咏夫道德循其自然之正安乎固有之天使累世文献引而不替岂非古君子之用心哉乃使学优而仕将使百里之内淳古敦朴跻乎仁壽之域如无怀葛天氏之民焉斯有以见其所养所存矣且夫圣门之学曾参以鲁得之王氏诗书之传先生守之以拙庶几於参之鲁乎抑闻之博学名科古以待天下异闻之士宋宝佑开庆间尚书公常博公兄弟继登是科世以麟凤目之常博公早世惟尚书公岿然为馆阁冠冕尚书公厚斋先生也自尚书公四传至先生复以博学出宰畿邑斯固拙守之明效也使得进司纶綍如公登两制三字之选表章仪法如公在夕卿宗伯之列据事直书如公之於实録起居直词正色如公与二三执政论事大廷名遂身退如公之着书满家传之天下後世斯所谓绳祖之武者矣拙守云乎哉念予懵学无闻其於自守盖汉陰抱灌之具拙於所用不免为浮俗所诮然与先生有同乡亲契之厚庶几志同道合焉者故为着其说如此用以志期望之私云（汉章答云承着拙守记文尤深感佩至舟中细玩中间论议抑扬发明拙守二字无余蘊诚佳作也且博学一科古以待天下名士旭忝窃是科非独有愧於古人抑深有愧於先公而又愧於当世斯文多矣复承録示遂初老人志铭中间叙事及荅文清公濂洛关闽之语似非老阕之輩直理吉氏家传诚史笔也使当时史迁见之亦必低首许与）

荥阳外史集卷七

卷八

●钦定四库全书

荥阳外史集卷八

（明）郑真 撰

○记

豫斋记

忠翊校尉漕运庆绍所工户韩侯将名其斋居之室取连山易筮之得雷出地之兆筮史曰吉是其繇曰茫茫堪輿至阳发舒君子得之利厥攸居动无不顺佚乐舒徐悠哉优哉造化与俱斯其为豫之义矣乎於是以前以豫名斋而属记於予予谓圣人作易以前民用有象焉有占焉侯以象占而定居室之宜其有得於圣人作易之旨哉予尝读四圣之易而以连山参之则知造化之理载诸简册者一而已矣豫者安和悦乐之名豫之为卦上震下坤一阳居四而五陰随之有豫说之义焉侯之於是斋也温清之暇终日宴坐心念澄默得夫坤之静者也及其事为之际则发奋果毅期於必行是又得夫震之动者也静而动动而顺顺而成其为豫何如哉虽然豫固以说为义矣然溺於骄肆则鸣豫而致凶失於中正则盱豫而有悔之二者侯固无是矣其尚慎其诚矣乎九四之爻辞曰勿疑朋盍簪盖以至诚不疑则同类合而从之其为豫盖无大於此者然则侯之斋居盖不特为一己之豫而已其必将由已而致天下於豫者乎以是观之筮者之言於是是有徵矣连山之易岂欺我哉侯名（阙）字（阙）昔受知於今丞相康里公以千夫长戍于瓯粤间遂以功陞读书有文章幼尝受易於乡先生骆君伯善先天之学心传面命故予敢诵其所闻者以谄之是为记

方斋记

莆田吴先生义孚年五十余龐厚老成学贯经史而尤邃於书隐居深山中杜门立言以自见乃洪武壬子有司敦迫就试闽省遂领荐书计偕春官中书省臣议以中都兴龙之地教职之重宜使进士为之於是先生来为凤阳府学教授既至日进诸生训以性命道德之说退治一室寢席其中织芦以为盖障架以横板上下书史旁设几案置觴豆之属外编竹为篱植丛菊数本客至对坐清晤有酒辄醉不吝也尝曰兹室虽陋然审势面阳位正而方正吾儒者居之且吾尝以执方忤物而不变更也将守此以终身焉於是扁以方斋而命真为记夫方者圆之对方圆规矩之器也天下之物举不能违之然圆凿方枘昔人固知其齟齬而难入矣况夫後世俗尚之趋其有不喜圆而恶方者乎且夫士之处世不过言行动静四者而已随时而圆转之其有合於理者耶有人焉立心以正守道不回言行方也动静亦方也不偏焉不倚焉顺理而行之功名富贵死生祸福不以为欣戚也君子之道孰有加於此哉先生累世科第有司尝表

其里曰桂籍宋时为太守者五人有万石君之号曾大父瑤由进士通守潮州北兵至守节死义大父请学上舍生值宋社移隐居不仕国清湖灌溉一郡瀾省平章乌玛喇欲湮为田上舍慨然争之累年湖得不废虽时异事殊民至今称之父柏字庭坚号石亭布衣儒素克守先业先生七岁失恃石亭令就外傅见其记诵喜而谓曰吾家诗书之泽其在兹乎不幸石亭即世先生年方十五有持家之责至二十有九厉志发愤师郑先生献可林先生学矩以及丁先生文远学矩元进士知福清州冈孙之子文远则其高弟也问学渊源盖可见矣今以教席之尊任斯文之寄而所以自处者如此可谓不负所学哉唐次山元公尝作惠圆先生喜方而以名其斋居其何愧於古人也耶抑又有说焉易曰直方大不习无不利夫敬以直内义以方外君子所以法坤道也敬义既立德斯盛矣何假於习而後利哉先生取义於方其善於用易者耶真忝教於淮托在下执而亦以不能刳方为圆见诮於衆先生独咻嚶之獎厉之盖志同道合有如此者属笔纪事不敢以浅陋不文为解先生其尚有以教之哉

约斋记

松江陈氏为巨家名族自其先世尝以好义称於乡里名布字孟敷者年几四十清慎修谨而种学绩文不倦不怠早尝受易於嘉禾鲍先生仲孚洪武六年以儒士徵试吏部中选授宿州儒学正宿为汴泗要冲自金宋以来为用武之地际今天下一统文教聿兴而宿为中都畿甸孟敷讲授之暇退归所寓端居静念人莫窥其际自题曰约斋云予尝以使事过焉叩之曰子何以约为哉孟敷曰吾自志学时尝欲推己及物斯文之过我者得用其情焉然事至物来必裁制品节而後可故字孟敷而以约名所居敷有广博之义约有要束之义二者盖相须也今因於羈旅所谓约者非向之约矣予应之曰是何伤哉亦足以见子之志矣夫守约而施博者善道也天下之事宁有约而失之者哉是故约之以礼约之见於行也博学而详说之约之见於言也言必以约则有纲有要不泛然以无统行必以约则有规有矩不侈然以自放约之时义大矣哉孟敷年壮力强心存惠济交接应酬必以其礼而忠信笃敬见於日用常行间殆易所谓纳约自牖者耶乃今以教席之尊任斯道之重将使成人有德小子有造其於名教信非小补也异日昇之馆阁进诸廊庙将见学之所及德之所施大有以慰夫民生者非徒简俭穷约之谓也虽然君子之德当论其世孟敷居家时尝事其从父充之先生充之亦明易学两领乡荐元至正末年张士诚据吴中分兵略地松江充之散家财聚义士与官军相犄角及敌战屡捷同里有背恩反噬者引敌兵为内应充之兵衄家毁仅以身免省宪交章论荐得授江淞提举入圣朝知和州事归老於家以卒予家海上时尝书其事比之辛说成败非所论也夫善善及其子孙况其节义之着足以裕夫後人者耶然则孟敷岂终约者哉并书以为记

常斋记

括苍王景彰先生教谕怀远县学治其斋居之室以蓍策筮之得易之恒筮者曰吉恒者常也久也常故能久久则悠远矣且恒刚上而柔下雷风相与巽而动有恒久之义焉於是以常名斋而求记於予夫天下之理亦惟其常而已非其常则为怪为异为变徒以骇耳目之观听奚可哉子不观诸宇宙间乎日月星辰之运行山岳河海之流峙四时之行百物之生形形色色历千万年无有差繆不常而能之乎人於其中贤愚贵贱固有等差而彝伦日用之须修齐治

平之要岂外乎是常者哉书曰彰厥有常而子思子於中庸之庸以平常之理言之而张思叔座右铭亦曰常德必固持噫常之为义微矣哉景彰世为括苍儒族而清谨好修力学不倦为古文歌诗皆典雅蔚贍可喜洪武壬子以文词领濶江行省乡贡进士荐书计偕京师选部将奏以官力辞不得遂领怀远教职以去怀远凤阳属邑涂山禹会之地兵燹以来学校之事有所未遑景彰既至而馆舍萧然在学子弟皆复业之家樵牧童竖迫於有司勉强应命从师授业之诚无有也景彰曰吾惟尽其职焉耳昼夜程督不见有不堪之色人以是敬惮之斯其有常之吉士而得於易之恒者耶视夫好高立奇索隐行怪以钓声名取利禄者相去何远哉虽然恒卦之九三爻辞曰不恒其德或承之羞上六振恒凶所以深戒人不能固守其常者国家文治大兴菁莪乐育之盛前古莫及景彰皐比之席已越三年将使久於其职以遂责成焉者无以轻动为也传曰肆成人有德小子有造古之人无斁誉髦斯士於景彰窃有望焉景彰曰箴之言信矣抑或子之说其亦有以教我乎於是乎记之

树德堂记

传曰民之秉彝好是懿德德者人心所同得也而书言树德务滋者何哉夫树德犹树木也晋人谓十年之计树之以木百年之计树之以德夫其坚固而不拔则盛大而无穷德其可以不树矣乎四明韩氏出自高阳有字君屋号妙心居士者由定海徙居郡城以勤俭致产业天性孝友好善乐施尤向慕佛乘年六十有三而终有子二人长惟善次可善克承先志益大以振惟善有子二人长懋简号节斋不乐仕进濶省两以庆元幕长荐不为就次懋和号务斋由庆绍海运千户三转至海道都漕运正万户积阶由忠翊校尉至奉议大夫奉议贵为三品有司奏当疏荣二代於是妙心赠中宪大夫追封高阳郡伯惟善封太中大夫高阳郡侯其职皆以海道都漕运万户云圣运肇兴懋和以闲良谪居汴梁郡侯与长子懋简力贡赋以奉有司尝奉命旅朝京师拜伏奉天殿下面闻圣谕赐酒食以归恩意醲渥夙兴夜寐用图报其万一噫非树德之极其至是乎予客居中都郡侯之孙名中字允传以书来言曰韩氏世泽非一日矣先曾大父郡伯善庆之积大父郡侯遵守以至於今若子及孙之盛先生有以知之先叔祖可善翁扁其堂曰树德蒋先生德纯者实为之记藐焉弱息无所肖似亦欲取以名其所居幸先生为执笔焉夫君子之於人论其世而已论世者不於其人於其德德之树也如甘棠之勿翦嘉树之封植斯可矣使夫怠惰放弃弗树弗艺芜废而茅塞焉至於雨露之养人事之不齐或偃以拔或撼以摇其能有所获也哉若稽前史韩以国氏汉唐及宋为将相为牧守为名儒士大夫先後相望其年代之远谱牒之殊不可攀援而强合然泝源穷委所以兴怀先哲垂裕後昆者可不思所以生息而蕃衍之乎昔端明苏长公铭王氏之堂曰郁郁三槐为德之符树德之谓也夫树木者常待其熟树德者亦待其熟木之熟德斯熟矣德之熟德其可胜用哉允传气貌清修循循谨飭读书工文辞溯妙心之传已四世於是勿替引之自根而干自干而枝而叶广大高茂可几矣传曰绳其祖武受天之祜於允传切有望焉予既书其所以以示鄱阳周先生克复先生曰某以先左丞玉雪公使命濶东知鄞有韩氏久矣然微先生之文不足以发之因用古篆法题诸篇端且扁其额揭诸楣间云

慎独斋记

国学生严陵王以宁奉上旨赐袭分教中都之属邑之临淮邑大夫乐侯瓚命父老考古者党庠间塾之制为之建学率子弟二十余人事之以宁朝夕讲授不倦既闭门不与物接端居静念深有得於先师曾子子思慎独之说喟然叹曰至矣哉圣门传心之要也信矣哉理欲善恶之几也可不思所以用力哉因以慎独名其斋居而求予着记昔者儒先之论详矣尝试以其说身体之平居暇日燕坐寂然融心会意湛然如太空明镜天下之物不足以动之而其好善恶恶之诚存养省察之实固已默具於中矣或者事机之来势会之乘一念之发或有不谨而幽暗隐微之间少不致察焉则不免於自欺之蔽而其离道也不既甚乎是虽人所不知而其手指目视亦不可掩矣以是而曰吾将以慎其独也繄孰信之哉今以宁之居是斋也扁焉而朝夕观焉则其遏人欲存天理诚中而形外者不徒一时为然而时时皆然则不必乎不睹不闻而始有所谨矣精义入神气象具见小而扫洒应对外而出门使民大而天德王道之纯亦不已功用所及言语云乎哉诗曰潜虽伏矣亦孔之昭独之不可不慎也如是夫子尝有言曰世之学柳下惠者未有若鲁独居之男子而後世亦有借此以明慎独者以宁气温貌恭在乡党循蹈规矩入成均以明经中高选博士先生称之是固能心曾思之心於数千百载之上矣岂止鲁男子之学柳下惠者耶予家东海上謁謁而来块然独居蠶盐薪水朝不继夕而清苦自甘于今三年窃尝擬古盘盂之戒书其辞於室壁曰慎厥止汔小愒相在屋漏尚不愧书於枕席曰梦寐处罔或愆明灵司之眇幽玄书于户牖曰仁为枢义为闕敬尔威仪慎出入乌乎兹言予其勉旃此皆慎独之要也因书以遗以宁庶几相与警惕以无负名教矣乎以宁斋居在清流门水帘洞南昔传有蜀卒自青城山来访求水帘先生者盖古仙遗迹云并书以为记

自省斋记

真年十余岁时挟册侍先处州教授侧先教授谓真曰志士之为学当有其要学之要其惟自省矣乎昔之日孔圣之道传之曾子三省之功不以一日废也今去圣门数千百载其能有学曾子之学者乎呜呼汝勉之哉真服膺先训至今凡三十年然而一日之间事至物来是非取舍忤於理者多矣反而求之其能不愧矣乎洪武六年夏五月忝以濶江进士典教于中都畿邑而天台吴叔祥氏以谪居密迕尝过而访焉叔祥方以讲授为业草斋数椽仅庇风雨卅角之童劔侍林立叔祥端坐其中起而迎之如旧相识从容言曰鸩毒生於宴安德业成於忧患古之人未尝不致谨焉往吾自东海上来居濠梁计其道途所经余二千里鱼鸟与东海邻饥渴顿踣者数矣今幸而就衽席之安得与二三子朝斯夕斯以从事简册者斯文之幸也其有所惕厉矣子因以自省名斋子其有以教我哉真闻而有感焉窃意叔祥庶几有意於学曾子也夫人所以立於天地间而为万物之灵者以有是心也心之在人谓之有物则不可以形像求谓之无物则其日用常行亦无非心之所为而已一念之间善则交修过勿惮改审乎天理人欲之判囿乎流行赋予之中斯其为自省之道矣哉叔祥南冠之士北来于兹悄焉羈旅常情匪堪顾方以反身修己为进德入道之域其志行不可尚矣夫濠梁国家兴王之地贤才之所聚车驰辐辏叔祥志学如有司固将转而上闻矣真老病駸寻简编荒落而趋庭日远无从是正方将与叔祥究竟曾子之学殆恐公车之召敦迫上道非老生所能挽留也

立志斋记

凤阳府学楚生关家居中都之道门前望独山後睨长淮城郭之高大宫阙之壮丽一寓目而尽得之予与教授莆田吴先生义孚同在斯文尝以公府期会往来二十里间过其庐为之憩息生之父谷石翁谨愨笃实而尤切於教子出酒馔相劳苦先生谓予曰吾忝教职无补事功弟子员若生其几乎号其斋居曰立志俾予记之夫士之生以桑弧蓬矢射天地四方示夫志之所向也自髻而童童而冠有成人之道焉成人之道非立志不可也志之立则事必成功必遂不尔其不至於颓堕而委弃者几希且生不观诸射乎张尔弓挟尔矢彀满而发不至於中的不止也生之立志如射之志的斯可矣常存於平居无事之中不离乎困穷患难之际夙兴夜寐弗忘也安荣顺适弗堕也志苟立矣则自格物穷理处事接物以至於齐家治国平天下无所往而不得矣孔子十五志於学又曰志於道而孟子亦曰持其志生知亚圣之资犹若是况学者乎生清修明敏读书解义音吐清畅学为词章亦时有可观者以是日求其未至其於道也孰御国家诞兴文治以诸生进者不次超擢为御史为部郎为郡守为承宣布政使者先後相望生既有志於学异日进之朝廷所以烜衣冠之华耀袭簪组之光荣者其不权輿於此乎诗曰肆成人有德小子有造生其勉乎哉予不敏不文辄因吴先生之言而为记之

不贰庵记

同郡周舜言氏隐居城东偏一室数楹窻明户虚阳光交映外有山石高一二丈许若戈鋌搜疏玲然珑然■〈石含〉然呀然萃而聚之培以沙土植丛竹数十本间以幽葩异草雅淡静素芬芳清洁有林野之趣舜言屏絶人事挟策之暇静居默念间以微疾亲岐黄之书既心定神完觉恍然自得者乃号为通一子而其所居曰不贰庵云以予有交叉之厚求执笔为记作而言曰甚矣子之善於立名也夫一者数之始二者所以配夫一也一者奇而阳二者耦而陰天地生成之数也自一而十十而百百而千千而万万及于无穷而卒归於一也故天下之理一而已矣宁有贰乎哉子不观诸天地间乎日月星辰之运行陰阳寒暑之代谢山岳江海之凝聚流溢鸟兽草木之飞走生植与夫礼乐鬼神之奥器用度数之详自然而然而不抑之使然者其非理之一也耶盖万物各具一理而万理同会一心故即诸物者即诸理可也即诸理者即诸心可也心即理理即心通乎理之一者由其心之一也通一则不贰不贰则不杂不虚伪不间断如是则自吾身而推之家国天下事至物来皆一以贯之而无碍於其间矣是岂非善学者欤虽然一也者诚也不贰所以诚也书曰善无常主協于克一所以言诚也而先儒朱子者着敬斋箴亦曰勿贰以二勿参以三亦即所以为诚也诚之时义大矣哉诚故不息不息则久久则专乎一矣专乎一则其不贰也可以终身矣尚务其诚矣舜言闻之谢曰先生之言良是哉佩服书绅可矣遂书以为记

去非轩记

同郡蔡景和氏年三十余性资明敏仪矩洁修居于郡城东北厢近郑魏王故第王在宋时以甘盘旧学身相理宗端平之政号称元祐今其园池废为墟市而犹以郑氏得名景和居其间有冠带之遗风当海宇清平晏然自适泛观经史究古人立言行事而有得焉踵门谓予曰天理人欲同行异情谕其是非而取舍之吾未之能也窃有志焉将以去非名轩可乎予应之曰可哉夫人之生也得天地之气以成形五常之德莫不具焉浑然至善而无有驳杂也大中至

正而无有偏倚也初何是非之云哉自世学不明人心锢蔽喜怒哀乐之发声色臭味之交固有汨於形气之偏而忘其德义之正於是昧者日趨於非而莫知所以为是者矣圣人忧之本之以仁义节之以礼乐刑之以法度使其就是而去非者於是至是故非法不言非道不行则夫子告曾子以孝亲之本非礼勿视非礼勿听非礼勿言非礼勿动则夫子告顏子以克己之功顏子去圣人未达一间曾子亲得圣道之传而其授受之际指是为则所以遏人欲而存天理者其要莫重於此矣景和於是而用力焉其亦庶几矣乎虽然善学者持久之功一日之间事物之来千态万状是非取舍之心少有间断则混淆错杂而利欲从而蛊蚀之矣然则如之何其诚矣乎诚则明明则久久则是非判然矣推之於日用其於道也孰御哉景和闻之曰子告我以圣贤之学吾殆自是而有进也耶请书以为记

荜阳外史集卷八

卷九

●钦定四库全书

荥阳外史集卷九

（明）郑真 撰

○记

东园庄记

松江黄氏世有隐德至仲瑱先生以老成浑厚之资道德文章名满浙右在先朝以易经三领乡荐缙绅士大夫若蜀西虞文靖公金华黄文宪公尤敬礼之值世事既非迄于不用圣运肇开谪居临淮即鍾离子古城南相地一区斩茅盖堂插竹成篱艺蔬成圃凿荒涧以供饮犂荒亩以供食客至酒殽随所有尽欢而罢一榻就睡不以形累也旧所蓄书数千卷日坐堂上与其子立敬讨论相为师友其同乡故家子弟在巾角者求为击蒙亦欣受教育之其所居地旧名东园里且扁为东园庄莞尔笑曰吾其为东园公乎於是立敬致其言於真且请着记夫隐显异途行藏殊致登廊庙者溺富贵而不返入山林者甘贫贱而不悔夫随时取中无入而不自得焉者贤士之所以自处也先生非仕非隐而优游从容庶几於全节完人矣世之刍狗营营乍起仆变灭者不知其几何哉昔西山先生蔡公元定且贻书戒其子曰独行不愧影独寝不愧衾儒先君子处世律身有如此者先生年逾七十家在大江之南而贫不忘道老不忘学去古人何远哉国家子育斯民劳来安集咸适有居若先生者返诸吴淞与三高士神交千载殆恐东园之胜不得专有矣传曰时止则止时行则行先生之谓乎真为儿时默诵先生科目之文岁月云迈华髮駸寻眇焉淮海之乡幸得相见屈行辈为忘年交先生之待真者厚矣执笔纪事其何敢当哉腴顔泚额用以复诸先生云

东涧草堂记

临淮凤阳属县盖古鍾离子之国出县东有古城春秋成公十五年晋士燮会吴子壽梦昭公四年楚箴宜咎城鍾离即其地也由古城复东行里许涧水横截而清驶激越白石礫砢明彻可数架石梁以渡名五里桥桥之左厥土燥刚而磅礴广厚南望定远诸山高下起伏若屏障之环几席之奠也松江夏氏士良系名谪籍得而乐之构草堂以居耕田饭牛温饱仅足暇日取古金石遗文閱之实与世相忘者焉士良汉四皓黄公之裔其先自吴徙华亭儒素起家以好义称乡里朝廷旌表其门至士良盖四世矣勤俭自厉克振先业而折节於名士大夫间尤以文字着述有声时境内承平富家巨室雄豪相埒彼其峻宇雕墙被文锦绣而金玉钱货谷粟布帛足以极耳目口体之欲粉白黛绿者争妍取宠日与市井游酣纵风月间士良虽在亲戚故旧藐若途人曾无一毫喜戚加於其心者物换事非天涯流落有过草堂者谢愧焉累累

然依依然低首下心索莫罔措士良常笑语予曰礼义廉耻士之所以保其身也世宁有是者耶予释之曰士君子安於义命之正无所往而不自得焉立身一败万事瓦裂可不知所重哉士良累世诗书所守所养一归於正谪处不异家居向在富贵不知其为富贵也今在贫贱亦不知其贫贱也视夫奢淫自纵丧败相寻展转顿踣卑污苟贱而不耻者彼何人斯且夫地以人而胜君子之於世不求名而名随之况其燕游之所在人有不可忘者耶士良之居于此四方之人来者往者遇而憩息焉者视东涧之水益有光矣昔者周顒之居锺山杜甫之居成都皆以草堂名二公之出处进退兹不复议观士良之自处与其所以处人者如此可不愧於两古人矣诗曰维其有之是以似之士良之谓乎是为记

东轩记

凤阳古禹会之地今天子以王业所基定为中都先朝将相大臣多奉皇居前参知政事方公卜宅旧城於其地东偏斲土树楹植以修竹藉以芦而茅覆之穴墙壁以成户牖甃甃以通径隧幽花芳草杂然前列内设几席度书史图画披玩讽诵朝斯夕斯於以舒愤懣而挹幽爽者焉一日公率衆客落成从容言曰大明生东天光之普照也万水朝东地势之下趋也天阳也地陰也陰阳之理有固然者矣且东者四方之首於四时属春於五行属木於五常属仁於八卦属震世之辨方所分位置必以东为首称东所以受生气也吾以东轩命名可乎真起而释之曰此自其迹而言之耳由公之心盖无适而不可者奚以方所位置为哉夫身有定在理无定在理存诸心心者身之主也今夫以一身之微居一室之内视之若块然矣然而心与理融意与神会四方上下皆吾一举目一举足之间是非取舍惟义之从不以贫贱富贵而移也死生祸福而变也公在至正间尝预典大藩参大政固尝以天下安危民生休戚置诸念虑矣事去物改委质来归甘与齐民为伍向之功名势位曾不以挂诸口故其居是轩也心澄虑清游观物表盖将等古今於须臾齐得丧於一致仅仅焉寄足一区追逐形迹而指其东西云乎哉先民有言曰用舍无与於已行藏安其所遇公其庶几有得於圣贤之学者耶衆客闻而韪之公起而觴酒数行请记诸壁上公名文敏字存诚故平章越国忠愍公次子尝受经於陈叔夏先生博览善记而尤精於诗云

南轩记

凤阳府庠许生志学公敏居临淮县古城之东五里桥扁其读书之所曰南轩予尝过焉笑而谓之曰子欲为南轩先生乎公敏拱手谢曰志学以所居面南故云尔若南轩先生某不能知之亦岂敢望之哉予曰士生斯世其当以圣贤自期耶夫南轩以魏国张公子着书立说传之天下後世载在史册列诸从祀诚非後学所可拟议然其立身行已不过仁义忠孝之实故其於日用间则宅心高明表里洞然而黜门相闕曾不以为意入朝请对则正容肃襟从容密勿於广厦细旃之上不以人主意向而有所随顺涖官政则四典大州图上经略建置事功而宸音焕发嘉其弗忘盖其闻道甚早大本卓然有如此者尝与考亭朱文公东莱吕成公相与论辨往复辑成近思录一书於是志同道合至於无所为而为一说子朱子取为名言惜乎人亡国粹而有吾道益衰之叹矣夫生於二百载之下去南轩若彼其远也然想其仪型固有兴起而不已者子言其所言行其所行则亦南轩而已矣公敏世家松江富厚多货事去物改竭来

濠梁文献老成若莆田吴先生义孚同郡黄先生仲璜天台李先生廷铉皆得以考德而问业焉退居轩之下默思静念必有深造而自得者矣想夫盛夏之交天日卓午四窗洞啓清风徐来尘坱息而炎郁苏也顾瞻左右图书有秩肃襟正坐悟对古人而心境湛然了无一物於此时也气象何如哉公敏曰某未之能也愿学焉书以为记

清白轩记

柳州府知事慈溪孙原哲自柳江以书抵中都临淮谓真曰往年令先君子求我先生讲道龙山以知行体用训学者原哲摄衣往先生不鄙弃之程督啓迫不少倦先生既去原哲卒業於家因得日趋於正而不失为士者先生之教也後先生没十余年际今圣朝以六科取士原哲以有司敦迫入京师羣试吏部中选遂拜柳州之命柳远在蛮广间珍货所聚贸易輻輳不絶於道视之一无动念惟是簿书期会之冗朝以竟夕而德薄材謏深惧弗胜勉以平日所闻於先生者竭力笃行以无负国家委任之意因扁所寓轩曰清白幸子为记之以昭世契可乎真捧诵再三陟岵兴思为之泫然因折简以复曰原哲可谓能信所学矣夫幼学壮行後先一揆涖官临民盍先律身清白者律身之本也清者不浊白者不污清斯白白斯清矣独不观诸古人乎羊续悬鱼於廷裴寬瘞鹿後圃子罕之寘玉杨震之却金简册所载炫耀烜赫夫万古一心持之以正守之以公而无少私曲焉湛然若冰之在壶而渣滓不得留也皎然若月之在天而尘翳不得入也若是於古人何远哉孙氏四明閥閱在宋时以科第显载郡乘者相杂有讳因者以文章名天下原哲纂承厥绪当明良相逢之盛选部识鉴之明荣恩美赐从事府幕世泽之遗师承之契有没齿勿忘焉清白之操终始不变闻望以隆而爵禄以增真虽相去万里有若亲覲面於晤语间也是为记

予向居四明与求我郑先王定交先生讲学慈溪龙山时过从识邑子弟孙原哲座下先生谢世予承乏潮阕得别业龙山闻人誉原哲不絶口及予来濠梁而原哲由儒入任知事柳幕以廉谨称每乐道之今观先生之子千之为知事着清白轩记固信其为人昔吴隐之在广南酌贪泉而清操愈厉能知古人用力焉斯足以保其清白矣柳幕长叶■〈𠂔曳〉与予友也盍亦以是语之浚仪赵宜讷跋

虚白轩记

予往年尝客东海蛟门岛上溟波际天一瞬千里秋高气清明月满空若玉轮金镜清光透澈毛发森竦及夫玄陰闭冬烈风吹雪琼台银岛巍峩千叠於是时也一榻生明因谓人曰庄子引孔子所谓虚室生白者殆谓是耶或者曰此庄生寓辞尔吾夫子安得有是言哉庄生之意以为室虚则阳明生心定则天光发神专所司内景不逸外尘不入灵府湛然真君莹彻苟为不然是犹骥伏槽枥而驰意千里矣盖道家修治之说例如此非吾儒所谓本然所赋之正理也夫人所以生者理与气而已理存乎心冲然其虚而无有蔽塞也洁然其白而无有污浊也一旦声色气味之交耳目鼻口之欲於是虚者塞白者涅矣圣人忧之示以诚敬之要存养之功使之致谨於动静几微之际有以遏人欲而存天理则此心体段本然全具常见其虚且白矣独雪月时也耶予闻而韪之亦已有年际今圣运肇开忝以乡贡进士为中都学官以郡太

守命奉诏书録黄开读寿阳而国子生毗陵高允昇氏以上命分教其州之子弟以虚白名其轩居请寓书求着记因以向所得於人者告之允昇气质清修问学充实造诣之至岂予所能测识哉想夫太空无尘傲睨上下心融而意怡歌小山之丛桂挹肥水之清涟与淮南八公神交千载殆不知有人间世也岂特所谓吉祥止止也耶虽然闻之周子有言曰圣人定之以中正而主静而子朱子着调息箴有曰鼻端有白我其观之此圣贤内修之学也夫虚斯白矣然则允昇之学其求之此乎求之彼乎

无墨斋记

国家奄有方夏文治诞兴科目取士具有成式有司奉行惟谨士凡一材一艺者皆得对敷显命盛矣哉惟严州府淳安县之武氏为其乡望族字仲廉者修身慎行四十年矣乃洪武六年有司将以六科荐之天官仲廉亟往力辞其略言曰某谚所谓无墨者也平生昧文章义理子虚客卿之诞尤羞为之不能与笔砚同污譬犹白圭之玷不可磨也沥肝胆倾肺肠当见之某岂忍欺也耶有司不能屈竟免归仲廉即淳安冬岭之阳缚茅中平山耕田取给间取无墨二字扁其斋居缙绅士大夫及乡先达长者咏歌成什以真与其从弟国学生仲友氏同寓临淮介求着记作而言曰仲廉可谓清白之士矣昔孔子尝语仲由曰涅而不淄士君子之节人固不能浼也已若夫墨翟之悲丝扬雄之守玄意固各有在也然翟之兼爱终致无父之罪雄之寂寞不免投阁之讥往行前言审择其可否者尔仲廉尚志圣门甘心静退以为役役以劳神不如默尔以忘形庙堂爵禄之宠荣不如山林泉石足以栖息燕宁也故其托鄙谚以无墨称者盖如此噫何其贞且固哉真在元至正间就试溱闻识前乡贡进士仲源先生盖仲廉从兄行也以先人教授尝与之友用父执礼见时座客有戏谓者曰唐世举人曳白者饮以墨汁今时尚然子其勉之真敬受其言力学不怠恭逢圣运以明经首选辱分教席追想前烈合并之盛有如一日而去坟墓远亲戚南望悔恨以为不若仲廉托无墨之愈也天其或者幸得告还当尚历钱塘上严陵过仲廉所居与论先契叩以所蕴其果无墨乎否耶於是乎记之仲廉名仲清号愚隐道人奉母至孝乡党无间言云

晚节堂记

士大夫砥名砺行恒见盛壮时至於齿发向衰克以完节自保者几何人哉夫知功名势利之足慕富贵丰厚之可羨则夫贫贱患难寂寥澹泊固有所不堪者矣有能慎终如始克享天年斯亦难乎哉四明马懋善父年老气苍尝从乡先生胡继善工文辞服劳藩省谋猷赞画達官为之器重际今圣运谪居濠梁受廛为氓斩茅盖堂售岐黄之学优游终老号菊龄处士而名其堂曰晚节朝斯夕斯庸以终其身云适朝廷切於用才凡以宦籍在临濠者皆徵詣公车懋善力辞曰某老矣无能为矣衣帑食麤用以全吾节而已爵禄非吾节也遂免归予闻而为之喜曰懋善其知静退之宜哉在易蛊之上九不事王侯高尚其事遯之上九曰肥遯无不利高尚则不能卑屈肥遯则无所系滞懋善殆学於是者矣懋善世儒家先君子良可碧翠翁以孝行称两授溱东宣阃荐书为温衢学官家庭之训手泽具存懋善服膺久矣而又为史大资家子婿大资事宋穆陵为名法从宵人执政退居沧洲十年屡以书劝其兄卫王罢相懋善盖尝视其泉石之胜而想慕其人矣盼桑榆之日晚怀松柏之岁寒能无慨然於中也耶夫仰止高

山先烈如在惟吾四明文献冠东南诸郡丞相郑忠定魏王端平去位归卧东山号安晚先生人以谢安石比之忠定勲名爵位诚非後人所可拟议然名节天下大闲岂以古今贵贱言耶予与懋善俱四明人也故以乡先达事告之非以励懋善并以自勉焉洪武十年岁在丁巳正月既望乡贡进士同郡郑真记

养生堂记

於越戴氏自江左晋宋以来代为宦族在萧山者其支裔也有名潜字起之者尝登安阳韩先生京北杜先生之门而亲炙於金华朱彦修先生彦修许文懿公门人遂性学而尤精於医爱起之勤敏凡医家论着悉以授之故起之迄能以医鸣年二十余薄游湖海间缙绅大夫啧啧称之其学大槩多祖东垣李氏云际今内附以尝为吏例居濠梁濠梁国家兴王之地五方之民星聚云集而不习水土恒至疾起之辄与善药以金帛酬之者不辞贫不得钱者亦不问所居在大东门外五里桥北控淮河南望定远诸山云烟风雨幻化朝夕起之乐其远静树堂四楹覆以重茅凡神农本草虫鱼草石之类兼收并蓄扁曰养生求予记之夫人位三才之中立万物之表五常四端其理也四肢百骸其形也日用之间饮食衣服以养其气体声音顔色以养其耳目舞蹈歌咏以养其血脉性情至於君臣父子夫妇昆弟朋友之间周旋交际之文足以尽彝伦之则明分义之严其於有生之道盖无一之不备矣然或动息不时节宣失候疾痰所攻死亡旦夕於是时也妻子且环视而泣矣其它所有何足恃哉有医者焉明陰阳分表里察色以知证因证以知脉投以药餌砭鍼之具而济之烹炮和剂熨烙按抑之法使夫卧者以兴昏者以醒羸者盛强喘息呻吟者宴安而平复然後其人始得以顺五常之道遂万事之宜而道德性命之正皆在於我矣斯不亦养生之明效矣乎而起之有得於此诚足以见其名实之允称矣虽然君子之於人亦先观其所自养耳故养颐见於易养气又见於孟子养之时义大矣起之所养何如哉屈子有言曰一气孔神兮於中夜存虚以待之兮无为之先起之所养正在於此岂徒以药餌为济人利物之具哉所养既成仙风道骨恍不知其所之矣异日崑仑不死之乡闻有衣冠而游者非起之其谁也耶是为记

植芳堂记

松江沈复吉来居中都东市口以三圣人之学鸣作堂以居问名於尊翁文举父文举以植芳扁之予尝过焉见其崇檐层砌高下中度而虚户洞开方席静设以延广爽而涤尘坳也左右前後芳葩幽蕤丹红杂而文章烂也淮天晴旭芳馥薰蒸而融液透彻精气入而麤秽除也因起而谓复吉曰此岂求名而弗得者耶夫芳之为言薰也薰与蕝对称而不以相入犹小人之不得以并君子耳薰蕝之莫辨也久矣矧有知所植芳者哉昔屈大夫着离骚以芳馨为仁为义为君子而以恶臭为谗为佞为小人是非取舍固有所分矣然而鸚鵡既鸣兰芷变而荃蕙化矣纷吾有此内美将焉佩謇吾法夫前修将焉程乎此原所以不忍屈心抑志於上官靳尚之徒而甘从彭咸之所居焉千载之下诵其言而深悲之乃今圣运休明羣贤彙进复吉在輶轂下晦迹不耀而芳香自珍乃若同於楚大夫之为者意果安在哉噫君子之於世亦观其所处焉尔原以谗见逐者也三后之纯粹原固不得而见之矣而其言一则曰苟得列乎衆芳一则曰哀衆芳之芜秽忠国爱君之心实拳拳焉乃今沈氏一家父子之贤堂构之重所以命名

者在此盖因夫济人利物之心丰殖其胤祚使尽夫人力之至以责报於天耳夫其心之所存道之所存也方之屈大夫其孰多乎哉且夫以天地生物为心风霆之鼓动雨露之滋息有不知其所以然者生物既遂纷纷总总不能以一端名也有人焉通其理而神其用天地生物之心在我矣心即仁也仁也即所谓德也植芳斯植德矣德盛则仁熟矣德之盛仁之熟馨之闻岂特一堂之名哉系之以辞曰归哉斯堂纷其植兮芎蓍参苓间芷术兮灵彪夜吠变殊质兮和风斯扇芬其苾兮孰其擷之筐筥积兮以爚以蒸或炮炙兮七剂维良起沉癖兮咄彼二竖远避匿兮民吾同跻仁壽域兮神圣在天同日月兮七经有春啓橐籥兮邈彼化枢生物育兮繁芳之植符尔德兮善植斯获益自力兮毋怠弗忘勿握拔兮芬其难亏畅以达兮德音孔昭用不极兮植之培之後无斁兮词讫复吉以示其尊翁尊翁文举父曰懿哉斯言也几於橘颂矣意者先生其以古人望汝乎乃请书为记

荥阳外史卷九

卷十

●钦定四库全书

荥阳外史集卷十

（明）郑真 撰

○记

易安斋记

同郡项子希昭家于锡山之阳辟一斋为讲诵之所取陶渊明归去来辞语扁曰易安故参知政事鄱阳周公伯琦为书古篆而天台孟先生子重着之铭诗以予有往来之契复请为记予作而言曰韪哉希昭之有得於渊明也夫渊明也萧散夷旷何有乎车马之荣轩冕之贵哉而使其令於下邑朝夕遑遑簿书钱谷视之不啻敝屣矣解印而去固其夙心特未有以发之尔一旦督邮人至然後五斗折腰见於声嗟气慨之间而去之心始得而直遂矣故其辞曰审容膝之易安所以深志前日之倦且劳也千载之下诵其言而想其为人固有兴起而不已者况即所居以命名其不声随影接而意悟神领者乎且安者危之对人情莫不喜安而恶危然而安不易即危不难蹈者何也亦观其心之所适何如尔心之所适者正则虽高山深渊祸患不测固将转而为安心之所适者不正则虽广厦细旻燕娛自适固将变而为危安之与危一间尔可不慎哉希昭诵诗读书深探旨趣日与二兄希元希周氏侃侃相乐视功名势利曾不一置诸念虑其肯谄屈以取卑且辱乎居焉安焉吾知其安之易易矣抑予又有说焉昔者曾子尝曰静而后能安而孟子亦曰君子深造之以道欲其自得之也自得之则居之安盖皆即夫心言之欲求安者其可不求诸心乎心安则身与之俱安渊明曰容膝易安殆与曾孟相发明矣然则渊明其圣门之徒欤希昭有得於渊明则其有得於圣门之学可知矣其尚勉乎哉

隐乐斋记

汉阳熊德昭甫扁其斋居之室曰隐乐诵诗读书自适其适者有年矣间以访亲来鄞与予有交好之契俾执笔为记予乃为之言曰世之隐者多矣而鲜有能乐者德昭以隐为乐其深知隐者哉夫隐者显之对乐者忧之反仁人君子才足以用世志足以泽物忠君爱国存於心勑奸折暴形於色条教法令以成经久之规忠信仁厚以致治平之效功业传无穷名声垂不刊随所意为泰然自足此显而乐者也若夫志在隐幽分甘肥遯冠冕不足为其荣车马不足为其富木石之与居麋鹿之与游澹然无营漠然以宁此隐而乐者也以显为乐者达而在上行道者也以隐为乐者穷而在下守道者也穷达有命隐显以时德昭乐在於隐而不在於显其志趣可谓正矣且吾闻之地灵人杰古为美谈故楚国有才晋人用之德昭生云梦居汉阳器宇敦龐言论疏爽盖楚产之最良者际今天下太平革兵偃息士之登金门上玉堂自际功名

之会风响云合德昭顾不能析圭儋爵以取荣耀乎乃今甘与渔樵耕稼者相望於山水■〈亩犬〉亩閭寥澹泊之滨自非安於义命之正其何能之昔孟子尝曰反身而诚乐莫大焉德昭其庶几矣德昭闻之曰美哉子之言也斯所谓教我者乎遂书以为记

胥乐轩记

韩氏系出自高阳今在四明者为令族有名中字允传者年二十余姿貌玉雪而雅志恬然不事荣利辟一轩高明显敞蓄古今书史图画以轴以卷者多至百计座席累茵褥几格设彝鼎左右布列秩然有序允传宴坐其中与其从弟唯传讽诵披阅旦夕不倦客至焚香啜茗取壁上长琴作佩兰雉朝飞等曲五音六律心融神会殆不知有尘俗事也时予忝以同里馆授其家从其伯父节斋父豫斋来饮酒赋诗允传执子弟礼侍侧属和成章歌数阕尽欢而散闲尝扁其轩曰胥乐请予为记而未遑也洪武癸丑予掌教临淮允传以书来请卒为之因折简以复曰允传可谓得所乐者矣夫胥乐二字多见于诗大抵纪一时燕享之盛尔以允传自其先曾大父郡伯妙心居士以俭德植业积善余庆以至于今非有车马之奉币帛之供与钟鼓笙磬之娱也而其所以乐者盖以养气体之和适性情之正焉耳即而观之其非士大夫所当务者乎且胥之为言相也乐者动於中而发於外者也士生於世当四方承平宴安无虞从容耕凿取给衣食洋洋乎诗书礼乐之域悠悠乎性命道德之天凡其日用之间事物之适有以合衆心之所同然者将见其晬面盎背施於四体至於不言而喻矣其非胥乐者乎昔者孟子论反身而乐而夫子亦谓朋来而乐夫有以得诸已必有以及诸人已乐矣人其有不乐者乎圣贤之学如是而已岂徒曰一家一人也耶予客居异乡南望千里思昔时合并之乐有不可得天其或者幸遂言归复得过兹轩之下问允传所乐者何事斯有以慰予心者矣呜乎勉之哉是为记

乐胜云间记

乐之义大矣发乎情根乎性合乎礼义晬面盎背施於四体不言而喻者惟圣贤之乐不可尚已若乃观光上国览山河形胜仰宫阙之壮丽覩其礼乐声明与夫风土人物之广厚盛大心广而体胖其乐殆有愈於乡土所居者矣云间朱孟闻氏家饶於赀少好读书作诗有奇气艺术亦精其能际今圣运徙居濠梁濠梁兴龙之地中都肇建四方万里骈集辐辏孟闻既得所止扁所居曰乐胜云间而来谓予曰昔太史公周游天下历名山大川而其文益奇吾非忘故乡也顾吾所见闻非乡土所有者自今而後问学将日以充知识将日以明吾诚乐焉岂不胜於在云间者乎且达人大观物无不可今天下一家无间南北帝乡佳丽游焉息焉从容周旋以岁以年亦足以全吾天矣予闻而复之曰孟闻诚乐其所乐者哉夫怀土常物之大情不以穷达而异者也昔者孟闻之祖买臣年四十余游长安待诏公车归为会稽太守此富贵而归故乡者也孟闻乐不在此则其心之所适意之所得怡然涣然融然泄然有不知其所以然者矣买臣以故乡为乐孟闻以异乡为乐亦各言其志也已虽然自乐其乐者不若与衆同其乐与衆同者不私其有者也有駢之诗曰君子有谷诒孙子于胥乐兮胥者相也乐同於人人善斯有以及於後人矣若然者予知孟闻之居非已之所得专也予忝以乡贡典教临淮已及三年虽簞瓢屡空贫亦足乐而羈旅之中不能忘首丘之思尝欲一造孟闻问其所乐者何事

而占毕从事朝夕靡遑乃今因其言而得其意如此然念其同乡合并忘形尔汝状松江之鲈
唳华亭之鹤其果能不动心否耶於是乎记之

养拙庵记

前平江漕运万夫长崑山丁侯仲德扁其所居之庵曰养拙属予记之夫拙之为言朴也不瑀
琢以成资不粉饰以为文与世之所谓巧者对称世之人安於浮俗狃於薄习谓为巧则喜谓
为拙则愠是固莫知所以为拙矣又安知养其拙者哉侯以养拙自名其亦得夫所养之正者
乎养者顺而无害之义养而无害则夫守身行已处事接物皆有以循其理而无矫逆之沮抑
之者彼谄於言笑工於文辞贪於富贵急於仕宦徇名而败节趋利而避害所以斲丧其天者
夫岂有芥蒂於其间哉侯生於吴世以仁厚积业侯承源本之正廓而大之尝过大江由淮历
汴以至燕蓟复出代北过辽东泛海而归凡世之为巧为幻为譎为诈者固已厌闻而厌见之
矣是故仁义为涂道德为舆从容舒徐与古为徒所以养其拙也中正是式法度是则践履笃
实优入闾域又所以养其拙也是岂非离人羣而立乎独者哉昔者濂溪周先生着拙赋以为
天下拙刑政彻乌乎侯真有得於周子者哉

拙存斋记

巴陵徐允吉甫年五十余龐厚老成尝为湘陰县学训导教诸生有师法县长礼敬之或有言
其尝为吏者遂谪居淮北依玉驿以居草屋蓆门隘不容展步窃自叹曰吾忝儒素曷尝为吏
哉吾不能取悦人人以至於此非拙也耶因以拙存自号而求记於予夫拙者巧之对称天之
生人气以成形而理具焉五常四端万善以备何有巧拙之分哉大朴既散浇淫日滋於是
为诡诈为便佞凡可以遂口体耳目之欲逞心肆志而本然之天斲丧矣且喜巧而恶拙人
人皆然而允吉於拙何独存之而不去也耶允吉曰吾家湘潭南纪万里变故以来驰驱干戈
矢石之场以功名富贵称者不可胜计矣天定胜人英雄豪杰剗削消磨而吾一綫之微苟
延喘息得复见天日之盛斯亦拙存之明验也予固信其言且谓天下之理一而已矣理存
诸心心者身之主宰也顺其理而不害巧伪之私无从而入焉是亦拙而已矣存其拙者
理存斯足以保其身矣允吉其有得於是哉异日杖策南归父老时相过从试问向之巧者
何如哉拙者何如哉允吉视予一笑因书以为记

尚友斋记

署中都国学簿永嘉裴君贵和以尚友名其斋居之室要予记之夫人不可以无友也尚矣
友资以成德者也贵和以尚友名斋其古圣贤之徒欤所谓古圣贤者上而周公孔子次而
顏曾思孟下而周邵程朱之类是也或千万载而远或十载而近容貌不得接声音不得闻
也然其治统之传道学之着见诸方册者皆得论其世焉精神之交心术之契凡道德文章
礼乐刑政所以置诸谋为施诸事业者同符而合辙焉尚友之道孰有加於此哉而今之人
狃於近习安於小成於其一乡一国以及天下固不得取而友也况望其友诸古人乎贵
和前乡贡进士日章之子好学而文居永嘉时乡先生金公长民孔公子升屈行辈为忘
年交在国学与博士赵

先生本初为僚友及来凤阳与助教贝先生廷琚严先生鹏飞为僚友等而上之若台省枢府诸馆阁及外郡县有声誉闻望者皆得讨论其未及而振发其已能至於老成科第在前朝与其先君子同年者亦许为通家其於一乡以至天下之善固无余矣而不至於古人不止也故其日用行常以圣经贤传为闾闾以百家诸子为籀籀孜孜矻矻幽探穷赜言有文而行有章也体之立而用之行也以是而升诸朝廷所以尧舜其君民者不在兹耶先民有言曰学於古人而尽古人必尽之情其贵和之谓乎乌乎友道之丧久矣管鲍雷陈之事後世犹称之况志於圣人之道者耶若乃挟贵挟长以夫子之道反害夫子至於饮食之徒临利害反面不相识挤之而又下石者彼何人斯予于贵和之尚友不能无感焉於其请为之记而并言之

明慎斋记

上在位十有三年命举贤良方正之士於是明郡有司以宋君廷臣应诏授凤阳府推官赐衣带入拜阙下对扬丕显休命既到官默自念曰推讞古秋官之属也刑狱民命所关非明察而慎重者不克为眇予小子其足以称斯任否耶於是即郡第西偏治为斋居扁曰明慎以予同乡斯文之契俾为之记於是诺而言曰公庶几克求之於心矣夫不以一毫自蔽其心者谓之明不以一息自怠其心者谓之慎惟明斯慎慎则无不明矣昔者圣人作易於火山旅卦之象曰先王以明慎用刑而不留狱而武王之诰康叔亦曰明德慎罚至於他所论刑不曰惟明克允则曰慎因其类不曰明於刑之中则曰兹式有慎明则是非曲直无不公慎则小大轻重无敢忽我思古人有若皋陶仲由汉张释之于定国唐徐有功之流可以企及而近世若宋欧阳崇国所谓求其生而不得则死者与我皆无憾者亦庶几矣廷臣学古入官凤阳帝乡戚里九州二十四县狱讼之烦何啻千百廷臣尽心焉若镜之照而无不见也若玉之执而弗克胜也可谓明且慎也已以是而往刑岂有失者哉虽然天下之事惟圣贤克尽其至中人以下过与不及有不能免者焉差之毫厘谬以千里刑狱之重或制於事势或扼於权力则明不能以常明慎不得而久慎必也敬以持之使无挠於中斯可矣大舜尝曰钦哉钦哉惟刑之恤哉穆王作吕刑亦曰惟敬五刑以成三德盖圣人好生之德有如此者然则廷臣其以敬为主姑书以为之记廷臣家明之甬东江水上尝学於宋参政楼宣献诸孙子史先生内附入京预修礼书既上铨部将奏以官力辞归养今在凤阳未及朞岁名声着闻缙绅君子称为能官云

咏斋记

沧海之上黄冈之墟闻有学仙之士称为李长庚之流制为瑶草玉芝孤鸾双凤等曲率其弟子泛莲叶舟倚空而歌时秋高月白一瞬万里其音飘飘然凌霄汉而入太清也上下数百年间欲求而即之则邈在蓬岛方壶之上矣然而余响之传终不至於寂然閤然也今得一人焉贾君惟敬年三十余质修气清幼时好吟诗自三百篇以下至及汉魏唐宋诸大家无不闯其籀籀家居黄冈凡山川草木鸟兽之情状触心注意一以诗发之尝扁其所居曰咏斋谪居颖上亦然兹承恩宥归於旧隐云水杳冥之间庶几与夫天籁地籁同其声之着词人韵士同其声之发协之以五音谐之以六吕用以荡涤其忧虑流通乎精神不亦性情之正者乎惟敬斋居坐忘俯仰上下牢笼百态陶熔万象其沈潜也若游鱼入重渊之深其眇邈也若飞鸢翔九霄之峻至於咏而成文铿然金石之鸣锵然琬璫之击累累然珠琲之贯也比之仙音法曲其孰

多乎哉且夫审声以知音审音以知乐声者乐之所由以和而德之所由以成也诗曰猗其德音其惟敬之谓乎予素不解咏者而不能忘情焉譬如候虫将一鸣之视夫雅颂之颯颯洋洋为何如乎异日幸得归老四明取道黄冈造斋居下倾倒奚囊与惟敬讽诵之吾知一唱三叹有遗音矣姑书以为之记

安六斋记

临安朱君行简以聪明正直荐入京师授知凤阳府六安州事赐衣冠束带入谢阙下既到官考诸图志知为皋陶所封辄自念曰古所谓树德茂乎英六其谓此也耶吾家本维扬少从宦游钱塘遂占籍焉尝泝大江入湖湘度汉沔往返数千余里风涛之险山崖之峻心凜焉其弗宁也至於荒榛故垒英雄豪杰之场摩挲残碑断碣固有不勝其慨然矣乃今出典大州坐享俸禄在畿甸之地而又为古士师建国之地即其三德九德之说学而为政亦足以保吾身之安而允终令图矣视夫向之艰难跋履其孰愈哉州名六安吾以安六名其斋居不亦可乎予闻而韪之曰此所谓慕古人而从之者也昔宣圣孔子尝曰静而後能安安而後能虑而亚圣孟子亦曰居之安则资之深取之左右逢其原安之时义大矣哉夫安於道德者功名不足以累其心安於命分者贫贱不足以易其心安则不挠不挠则不屈不屈则一於义理之正以是而任司牧之寄吾见民生安堵饱食煖衣养生送死涵咏太平熙熙然安於诗书礼乐之教怡然安於忠信淳厚之化无有冒刑犯禁背义非礼者矣斋名安六即其地而命名焉於静义岂不精矣哉且吾闻之六者天地之成数也天一生水地六成之六陰数也主乎静静所以为动之根也圣人定之以中正仁义而主静然则行简其安於静者欤非静其有能安者耶予客居九年老病相寻亦颇知所自安者向预修九郡图史知六安山川人物古蹟为详尝以使命至其地憩於南塔得焦状元遗事想其土阜民淳不能不往来於怀也异日或得过斋居之下为君倾写然後去

勤有斋记

袁州分宜县李氏唐西平王第七子岭南节度宪之後宪尝居袁州没而葬於其地曰红花仰云数百年来不得享有世禄而以诗书克祚其泽名金字汝砺者去节度公十余世矣年三十余貌充气修而笃志於学际今盛朝命举文学之士有司以汝砺应诏至京师试莺啜皇州赋问高丽弑君诏二篇进经御览授德阳县主簿未几县革并调淮安海州赣榆县主簿既到官默自念曰古所谓世臣之家非爵禄之谓也于其德焉尔眇予小子其能绍闻衣德言以迓续前人耶夫天下之事成於勤而废於怠盘铭之日新周公之所其无逸圣人所以儆戒而只慎者如此况修德而讲学者乎吾惟其勤而已乃取韩昌黎戒其子诗中语扁斋居之室曰勤有云汝砺以使命来凤阳以斯文之好求记夫勤之为义大矣国而非勤则治政■〈施，弓代方〉家而非勤则生产废下至农工商贾皆然惟士为四民之首所以尊德性道问学着书立言明体适用皆在於此使不勤於用力其能有成功否耶夫学贵於成已居顏巷者为大贤下董帷者为大儒囊萤映雪夜以继日笔耕舌耨惟日孜孜带经而耨不为劳扣角而诵不为倦感磨鍼而翰林之诗名以成悟警枕而丞相之勲业以兆凿匡衡之壁者以名臣见称铸维翰之砚者由进士及第名哲所以载诸简册传之天下後世者其学果何如哉汝砺学优而仕而

复即仕以为学鷄鸣而起留情案牘奉上接下无一不备退而与简册为伍沈潜涵咏微显阐幽肃衣正冠圣贤如在有不可以浅近窥者矣且夫学存诸心一操纵间勤与怠分焉然则汝砺其益求之於心乎母徒以九仞一簣而自画也顾予不敏尝学焉而皓首无成殆不免面墙之悔忝以科名典教临淮与汝砺相望数百里间异日幸得一造斋居相与激发而振厉之使汝砺与古人齐驱并驾不亦可乎哉姑书以为之记

荥阳外史集卷十

卷十一

●钦定四库全书

荥阳外史集卷十一

（明）郑真 撰

○记

云松巢记

昔唐翰林供奉李公太白望五老芙蓉欲巢云松崑山丁侯仲德得其遗意扁其居曰云松巢寢处食息朝斯夕斯泊如一枝之寄而飘然万物之表亦可谓善学古人者矣忆自上古大朴未散民巢居穴处草衣木食後圣代作制度繁兴宫室起居之安饮食养豢之适去古悬絶矣况叔季之世乎今侯之居不在於山林涧壑也不陵乎霄汉风雨也然谓之巢居岂将放志於高栖身縹眇而与造物者同变化飞走以惊世骇俗哉盖将变今之俗反古之风庶几有巢氏之民耳其可尚也夫且云者无心之物松者有用之才松依乎云云依乎松二者固相须矣岁寒後凋之操品物流形之妙不於人而有取乎侯器量弘博材略深长虽尝见知於王公大人而功名富贵有不足以动其心焉是盖无心於用而自不能不用者则是巢也歛之近在一室扩而充之将见广厦万间肤寸八荒而覆庇天下润泽民生而後知云松之为巢也且夫彻彼桑土绸繆牖户君子所以明政刑於闲暇也孔子盖尝读而赞之矣侯以军功锡勇爵而独以云松名巢岂所谓思患而预防之耶缙绅士大夫过而赞咏歌其下者宁不赞之以知道哉

燕垒记

予友庄九畴氏以儒士徵试吏部授知邵武县事将告满以僚友坐累谪居瞿相山耕凿为业相地一区深广不盈丈范土为塹葺苴四围参差而进退之纵横之轮囷焉臃肿焉伐竹斩茅编辑庇覆幽暖蒙密高不容矫首濶不容展步瞪目视之喟然叹曰其为燕垒矣乎因以名其扁云燕之为垒也手拮据而口卒瘡也羽譙譙而音哢哢也吾作室之用躬亲经营之早作而出夕而入饥渴顿踣呻吟嘽嘽不啻燕之勤且劳也至於恩勤卵育止其所止又燕之不若也谓之燕垒岂求名而不得哉予解之曰巢居穴处生民之世然也子其为太古之民矣乎夫士而怀居不足为士贫贱患难无入而不自得焉省躬念咎斯可矣惟天地间羽族至不一也独燕与人无鷹鷂缴弋之虞子栖迟■〈亩犬〉亩从容衣食视官守言责何有燕良似之哉且燕司时者也春而来秋而往亦唯其时而已子其待时乎卫人有言曰燕燕于飞颀之颀之子于归远于将之子宁恋恋於是垒也耶国家泽及万类叙复昭雪具典制予送子之归有日矣九畴谢曰子其善慰我哉书以为异日一笑

石庵记

石庵者同郡洪允诚濠上居也洪氏世家四明在宋时有为湖南宣抚者允诚生当盛平承先业积累从乡先生单良能游先生精於理学登门多文献老成问难往复理明义析允诚日在讲下沾沾听受学正而行端乡党器重之会镇将开省四明辟置府幕军机重务赞益为多圣运肇开允诚谪居濠梁兴龙之地多古仙遗蹟黄冠野服翱翔燮坛水濂洞间意领心悟尝谓人曰昔唐贤士有称水南山人者有称少室山人者然皆仕途捷径不能终隐也嗣後二百余年而吾宗番易平斋先生以文章道德名天下致位两府而以野处自号则其志之所存可想也已吾去家二千余里自放于野仰止高山先烈如在非斯人其谁与归且夫天下之至坚者莫石若也石者玉焉韞其璞而弗耀终石焉而已矣吾志其犹石乎功名爵禄岂所欲哉因扁其居曰石庵号石庵野人云会圣朝求治急於用贤户部侍郎马公尝奉命来临淮择其良者而为之劝驾允诚力辞不就洪武乙卯冬中书省遣行人比系宦籍者悉诣公车允诚独辞有司不获仰天日以死自誓蓬首垢面敝衣履简饮食嬉笑不见词色至省部以痼疾告于侍郎从之宰执大臣有诘之者曰子岂以仕宦为非者耶则对曰铨衡重在得人痼疾且不任焉用哉用之不败乃公事耶败事咎将谁执宁不在用之者耶诘者不能屈遂获免退归石庵将徜徉以终老曰吾庶几不负石庵矣乎因请予为之记夫人所以自别於天地间审其出处之正而已出处既正虽贫且贱何害哉彼有冒进竞趋惟富贵是图若浮云之有无尔允诚尚志节德义睨轩冕而韦布远朝市而林野审於几微守以中正确然不变而卒遂所志得所欲传所谓介于石不终日贞吉者允诚有焉予与允诚少同里閭惟吾四明多笃行文学之士缙绅君子乐所以称道允诚今克蹈之矣顾以不才名在宦牒用舍行藏随时靡定安得时从允诚石庵之下讨论世家之懿以优游岁年也哉

耕读轩记

沈子仲杰家于吴淞江之上其地平远夷旷四望云山渺在天际而重坡丛林聯絡远近竹树参差含芳吐秀内则平田广亩耕耘各以其时外则澄波千顷风烟幻化儻忽之间景态万状仲杰既抚有佳胜乃树轩三楹覆以白茅置书史其中取陶渊明读山海经诗语扁曰耕读力农之暇朗吟清诵若金石丝竹之奏宫商和而律吕谐也客至琴酒相娱宠辱两忘有不知尘世事者会朝廷广致多才仲杰辟至京师为督府掾虽簿书期会朝以竟夕而山水寂寥澹泊之趣未尝不往来於怀也洪武癸丑之二月予以乡贡计偕春官仲杰以钱叔昂及褚文炳所绘斋居图请文以记辞不获则为之言曰士之生世随所寓而得所乐故在山林则甘心於肥遯在廊庙则自致於勲名以仲杰志行之修学问谋犹画诺於甲兵樽俎间固将上裨戎幕偃武修文佐太平之治者然而耰鋤间顾犹不忘平昔之素殆欲俯仰宇宙优游卒岁如古人所云者斯可谓贤也已虽然耕田读书一致而已耕田必期於有秋读书必底於有成水旱饥馑及夫富贵贫贱则一付之於天而已昔者吾夫子尝曰耕也馁在其中学也禄在其中仲杰其有得於斯否耶异日仲杰请命於上杖策归田以毕遂其志予亦东还尚当扁舟太湖过兹轩之下为仲杰赋之

归耕处记

士大夫之於世审其所处而得所归斯为善矣归于朝者为公为卿归于野者为农为圃道不行有归欤之叹身弗辱有归来之辞进退出处一於是而已使夫奔走驰骛多歧忘返其不至於倾仆而颠蹠者几希噫非知几之君子孰能知之松江谢伯礼父世以积善名浙右而折节读书以材能见称元至正间外省荐之朝行授同知松江府事同知古通守别驾之职预同民社乡里以衣锦为荣既三年谓同僚曰吾岂以爵禄为哉家有二亲不於此时备孝养一旦终天之憾无及也投牒竟去於淀湖里第奉其先尊德嘉翁母氏叶夫人具滫瀡甘旨极其欢心丁内外艰哀毁如礼服阙值时多故徙居泖上泖上佳山水良田万顷鱼鳞栉比而耒耜其中焉丰年黍稌以仓以积贡赋供亿享祭宴饌之须率资之前浙省左丞周公伯温作古篆扁曰归耕处纪实也际圣运肇兴来居濠梁之东园里薙荒除秽以给衣食伏腊作苦斗酒自劳凉竹簟之清曙茅檐之暖恍不知人间世也取旧扁揭之示始终弗忘也而乡人同在羁旅者无少长皆称曰同知公盖本其所得官以为尊称云真惟穷达隐显殊途而同归伊尹耕於有莘者也严光耕富春光武召之而不能屈龐公耕鹿门刘表候之而弗能致此穷而隐也夫把锄荷锄风雨蓑笠其与锵金曳玉轩车驷马前呵後拥孰为劳逸孰为贵贱哉然而时之所遇志之所适君子固不以彼而易此也同知公生当盛平致身融显而弃去有如脱屣足以见其制行之高矣世运代更勲门宦阀既与海桑同化而■〈亩犬〉亩之归矢言弗渝其诚得所归者耶虽然古人一饭不以忘君故在江湖犹在廷阙初何隐显之有间哉昔高宗驻蹕临安太师楚国楼公异绘耕织图列为诗歌以献至理宗时西山真先生着大学衍义於豳风一章恳恳为帝述之是皆以天下生民为心者国家以农事开国濠梁兴王之地视古岐周圣上眷念乡土爰幸中都召见父老以慰其思同知公先朝遗老耕稼畿甸能推广成说彻诸甍旒斯亦尊君亲上之心哉真教职三年恋恋弗去尚及见之矣姑书以为记

学圃轩记

姑苏樊学士氏侍亲来中都於濠水上得地一区肥沃高厚构轩居治圃其中躬秉锄把鋤以瓜以蔬或羹或菹上以奉甘旨之娱次以资宾客之储甘辛之适随所意需而刍豢之味有不如焉因扁其轩曰学圃而谓予曰某圣门弟子之後也吾不如老圃何敢自戾於圣言哉顾学而有得焉不敢忘也予曰何如孟学曰生物之功学问之益一致而已矣夫天地之心吾之心天地之气吾之气凡物之生者天地之气也而其所以生者则至理存焉所谓天地之心也吾於学圃而脗合焉种而播苗而植雨露之滋粪壤之培萌者蘖牙者茁芟夷灌溉发生盛大取之无禁用之不竭历岁易月循环无穷盖造化生生之妙固有如此者人之生也本之以资质之美性分之懿仁义以为场圃道德以为籓篱诗书礼乐其奥区也典章文物其渊藪也修之治之探之赜之窒者以疏晦者以明其用功也若圃之植而生也其成功也若圃之遂而成也日之所生夜之所息奋励自强天理春融人欲蟬蛻吾心即天地矣使夫怠堕不振一日暴之十日寒之茅塞其心如圃之荒芜湮秽不得遂其生育之性奚可哉夫即物理以观人心此吾之所以为学也予应之曰宇宙之内皆子一身之所寓也万物皆备於我一圃云乎哉儒先谓观於草木之生与我心契其乐无涯孟学其有得於是者耶抑予又有说焉圃者细民所赖以生者也士君子欲行其道於天下何以圃为哉苏逸民云卿灌园豫章之东湖人无知之者张魏公为相命漕帅两司以书币招之漕帅假游士服得见欲与同载逸民坚拒不就遂长往弗返古人之风节如是今天下一家礼罗招贤野无遗者孟学居辇毂下士誉所归欲为苏云卿

得乎因诵言以为孟学劝孟学其果有意乎否耶於是乎记之

田园隐记

治生之道田园为重粵自后稷树艺古今贵贱之家无不由之而君子独以隐言何哉夫士之生非专为食也立身行已可效可师致位庙堂丞疑辅弼丰功盛德泽斯民而传後世其斯可矣若夫道不期行言不期用爵禄不能为之荣刑罚不能为之辱甘心没齿於农圃之归惟审於进退取舍者为能古之哲士若陶靖节解印彭泽赋归田园迹其萧散夷旷千载之下为之闻风兴起彼其深山穷谷以锄耰传之子孙者何啻千万竟令无一言一行可称其不与草木同腐乎噫隐之为义亦微矣哉云间朱孟闻氏徙家中都构屋鍾古城东治圃以植菓蔬治田以种黍稷无征输无徭役以衣以食而从容自给宾客至辄觞酒其中咏歌唱酬如金石在悬衆乐交作音声谐而律吕和也因扁之曰田园隐云予尝过而造焉语之曰昔先圣孔子以隐居求志为未见其人岂真无人哉盖有待於後人耳故有隐於山林者亦有隐於廛市者亦因其志之适焉耳夫隐者显之对称显行道者也隐守道者也近世以来庙堂之上仕而显者非不衆多使皆公忠直谅尧舜其君尧舜其民固天下所深望者如其欺公罔上败度弃礼宠禄甫加而斧钺已随於是时也使其悔志革心欲木石与居鹿豕与游不可得矣悲夫孟闻玩志诗书道德以为区仁义以为涂言动舒徐俯仰自如殆将与造化为徒矣以视夫昏夜乞哀以钓声名取利禄者其不赧然夫抑愚又有说焉遯之九五曰嘉遯贞吉上九肥遯无不利遯之为言退而隐去之义也孟闻其学於是耶然遯之为卦内外交变而为晋有丽明之象焉遯而晋斯显矣仰惟圣明在上贤才彙征旌招罗致无有虚曰凤阳兴王之地孟闻攸蹠攸芋而声誉四驰则所以多福受赐而被亲礼者吾知其有日矣孟闻聆予言若有不恡然者久之乃曰学而优则仕吾斯之未能信独寐寤言永矢弗谖其终於此而已矣嘉其志之笃而言之淑也记诸壁上而去

耕云野趣轩记

云雨间一气尔或在空或在野或栖迟山谷或散漫江海变幻儻忽来不知所从出去莫知所止一旦夕间百千万态欲以形状彷彿之难矣士大夫於其云之所在耕稼以时而急趣之以怡然悠然殆与天地造化相周旋矣吁不其可敬也哉去凤阳府南二十里曰瞿相山嶠然而高浮岗断陇映带远近良田广亩犬牙参错陂塘足溉高岸为城衣食之利与民共之四方谿宦往往乐而忘返金君泽珉永嘉名族也来处其地缚柴为门诛茅为室如燕垒蜗殼隐隐轟轟於杳冥晦霭间东作既兴比户咸具钱鏹深耕易耨千百其耦既辍日夕藉草而坐壶浆饌饁短歌吟嘯于时膏雨新霁浮云被陇林麓草木蓊郁深茂郭公杜宇反声相唤俯仰上下化育亭毒之妙神领心契如饥者之得食渴者之得饮行者之得归至於独寐寤言而永矢弗谖者矣因题其所居曰耕云野趣云泽珉尝介予友吴孟周氏求文以记辞不获则为之言曰古人所谓甘心於■〈亩犬〉亩者泽珉其庶几也耶夫君子之於物苟得其趣将终身焉利欲之诱若浮云之有无而已耕者衣食之源名哲之士非其力不食谓之耕云盖非从事於虚无惚恍之谓矣云在於野耕於野而适焉安焉其所见所得必有出於物象之表者系以野趣云者盖申而重之而非辞之赘也人之生世非耕则仕仕必登於朝耕必适於野就其迹而论之

暑雨泥涂披蓑荷笠上蒸下湿汗体涂足孰与高车驷马锵金曳玉起居动静之安适公通私负急迫朝夕邻童里幼啼饥号寒孰与高堂大厦万锺千镒饱煖歌呼之快且乐哉然而趣向之适寧为此不为彼其能以贵贱荣辱苦乐为欣戚变异也耶且仕於朝者行道者也耕於野者守道者也若泽珉者其与道相忘者欤顾瞻天上青云咫尺大明普照黄道正中今日之耕异日之仕今日之在野异日之在朝其趣为何如也耶易曰同人于野亨而又曰云上于天需然则望云就日以膏泽天下吾知其有日矣泽珉其勉乎哉

孤村默隐记

孤村默隐者凤阳太守滑台李公归老之地也公家在南六十里大张村外控大河内亘平野密林广亩芳塘曲流参错映带所居西北地本平坦阡陌交相通犬吠鸡鸣遂擅一村之胜自祖若父乐居其处至公数世矣虽更兵难移徙南北倦焉弗忍置也今公谢事而归焉能无情哉绘而为图扁焉观焉意谓在於村中默则无庸於言隐则无庸於仕其可永终令图矣然窃闻公在壮年以立言待用於世际今圣朝拜监察御史继金山东按察司事慨然以言责为已任民生之休戚政事之得失必起而论之来守中都事之弗当於理者海谕淳切不厌不倦吏民爱之有如父母凡一言之出一令之施莫不乐而从之服而趋之於是时也虽欲默得乎幸而名遂身退遽以默隐自居何哉无他隐者显之对显者不容不言隐者自不容言也隐显语默惟其时而已且夫恭默思道心之存也渊默雷声道之存也三缄其口幸免於获戾矧不及舌者虽悔而不及公之於隐亦岂得不默哉於是而樵於山钓於水耕於■〈亩犬〉亩与田父野老徜徉於阡陌间风晨月夕一榻坐忘者万化之流行至理之昭着心领神契於混沌冲漠之表而凡是非利害之纷纷扰扰者不惟口不欲言耳亦不欲闻矣易所谓退藏於密诗所谓明哲保身公其庶几乎昔宋陈希夷隐居华山太宗时入朝问其道不对而还迨至南渡韩世忠位兼将相退居湖山絶口不言兵公之默隐何愧於古人哉非真不能言者也念公之盛德为不可忘於公之默隐终不得而默默也遂着为之记公某字某云洪武十三年岁在庚申六月十一日乡贡进士四明郑真记

静学斋记

上虞越郡属邑舜子孙分地有揖让遗风自汉唐至於今日千数百年多名世好学君子盖山川灵淑使然也邑名族朱氏家累世业儒有字怀玉者年二十余以俊选徵入京师试艺南宫为国学生自博士赵先生以下乐为延誉怀玉不自矜喜退居一室扁曰静学斋读书着文惟日不足於势利纷华泊如也阅二年天官奏为知平凉府静宁州庄浪县事既到官默自念曰学所以为仕也昔者圣门谓仕优则学学优则仕仕与学盖相须也簿书钱谷何往非学哉然非静不足以致力於是仍以静学揭之而求记於予夫人生而静天之道也士之所以学为圣人圣人之所以合乎天者惟静而已矣诸葛武侯尝曰学须静也才须学也非学无以广才非静无以成学而濂溪周子亦曰圣人定之以中正仁义而主静静者动之体动者静之用一动一静互为其根而太极之理与之无间静可以见天地之心动亦可以见天地之心君子之为学其莫先於静矣是故平居暇日心念义理涵泳其所已知敦笃其所已能探赜索隐微显阐幽即夫事物之器用而推致乎典礼会通之大由乎下学上达而驯致乎过化存神之妙闇乎

屋漏之微達乎康庄之着螻屈而龍見淵默而雷聲斯其為靜學也大矣懷玉其有得於茲否耶夫靜之理會而學之用大無慾故靜靜則安安則不怠不惑而其為學成矣使夫撼於私慾汨於事勢不專於靜矣其能究竟夫學也几希若乃習於固陋昧於清虛安於鹵莽而謂人曰吾將以靜學也其然豈其然哉懷玉遠治邊邑不識其所學者何事然予弟奇為之僚友以書來言其同寅協恭政平訟理日與其民相安於無事則固靜學之一驗矣異時考滿來朝予在濠梁尚當扣所蘊而考其成亦得而有進矣懷玉名瑾在成均時嘗奉命山東上泰山登日觀蒐奇發秘得李斯篆刻以傳縉紳君子稱其為篤志古學者云并書以為記

澹齋記

嚴陵盧先生年逾六十聞望老成自鄉大夫以下視為范模有所疑者必諮問之先生不自矜喜退治居室曰澹齋一榻蕭然左右圖史處之裕如也會其子思禮為國學生調官山西過中都之臨淮以先生命求記予惟澹者無他嗜好之云世之君子守其常而不变者亦惟澹而已矣然非冲深玄漠者不足以與於斯夫大羹玄酒味之澹者也而其感通之效實在於茲蓋无味之味乃所以為至味也至味之存至理之著也澹之時義大矣哉人莫不有所嗜五聲令人耳聾五色令人目盲軒冕服乘乃喪心之具甘脆肥醲斯伐性之斧嗜慾之為人害多矣悲夫諸葛武侯嘗曰非澹泊無以明志胡文定公亦曰人於世味一切澹泊方好斯言也其察於天地人心之本然者乎先生深隱山中養恬自如而正襟肅容日與賓客子弟讲求乎仁義咏歌乎詩書視世之紛華榮耀乍起乍滅者若浮雲之有無焉豈非真能味於澹者耶扁焉觀焉循名求实蓋見其意所適心所樂身之所蹈而德之所由成矣噫是豈可以淺近形容哉且吾聞之盧氏為唐青州刺史之後在宋時多以名科躋顯仕有字登父者於先生為曾叔祖行名其所居樓曰天邊風露蛟峯方公為之著記予得而讀之想其高洁豈世味所能奪耶然則先生之澹其有自來也哉予與先生誼同產恨不得一瞻下風然念自幼及艾亦嘗從事於澹者異日幸遂言遄取道嚴陵歷階修謁與先生清晤山光水色間庶几志同道合者乎遂書為之記先生字德仲至道其名云

荊陽外史集卷十一

卷十二

●钦定四库全书

荥阳外史集卷十二

（明）郑真 撰

○记

龙山隐居记

蛟门为海道絶险自蛟门西行六十余里有山曰伏龙蜿蜒磅礴若头之昂鬣之张而尾之掉也山有古招提为唐僧常公禅悟之地崿絶处趺石尚存武宗时勒僧人归宗僧上偈云云中有寺不容住天下无家何处归帝悯其意寺得不废崖石间有泉曰海眼泉出如缕昼夜不竭以供五百余衆山之左右斥卤沮洳亭监旁午溜飖水煮盐内则良田万顷犬牙交错岩崖林麓高下掩映长溪飞涧控引绵络山曰达蓬曰石塘湖曰凤浦曰沈窖岭曰雁门石曰鷄头皆其远近形胜也慈溪罗友闻杖策来游辟一室在龙冈之阳高明敞朗鲸波际空一瞬万里蜃楼蛟室云烟风雨变化不测友闻日与宾客徜徉其中且谓之曰孰使予乐而忘返者非斯居也耶会天下大定职方有司以友闻尝在吏籍遣入京师遂泝大江憩鄂渚间又因军事入苗徭款峒与猿狖麋鹿为邻者有年矣返乎长淮覩兹中都河山之胜慨然叹曰自吾去家往返万有余里今幸托迹於兹从容无事坐对荆涂二山偃息朝夕视向隐之龙山其孰多也耶因揭旧扁而属予为记予惟达人大观物无不可乾坤上下我室我闼曾何介於彼此哉友闻识见高明无系吝在龙山无异於长淮也在长淮亦何异於鄂渚哉故其幽潜静僻之趣无所往而不得焉者彼有终南捷径少室索价南岳献嘲西陇腾诮者得失何暇计哉虽然地以人而灵昔宗正少卿东发黄公在宋咸淳时以风节行谊有名於朝其子孙尝作湖山精舍欲列於宫而不之遂友闻隐居实在其乡仰企前烈深所兴起今其文献大家若方氏钱氏皆在跬步间遗风旧俗深可观友闻行将归隐幸为我寄声焉是为记

晚翠轩记

凤阳为古鍾离子之国自汉以来列为郡县郡包山带淮以荆涂为朝冈周世宗驻蹕以为王者气历数百年今天子以龙飞邸里建为中都视周之岐山汉之沛国土大夫不远千里而至者占其形胜如在蓬洲仙岛不知为人间世也四明潘先生伯英来为凤阳右卫吏治一轩为宴居之地面南四望山之高下远近若龙翔而虎踞也万马之奔而羣鸞之翥也刀劍之攢而几席之布也每日既夕山光如洗而落照一抹炫耀衽席伯英顾而乐之用古篆扁曰晚翠云晚翠之说本於杜陵以经济之学自比稷契遭世不偶崎岖展转秦蜀山水中白谷深游翠屏晚对与浮鸥鸣雁相上下岂尘俗所能羈耶夫陰阳动静各维其时自朝至晚则由阳而陰动

而欲静之际也山以静为体静而获静於晚为宜由是息焉安焉其意思凝寂气象春容殆见古人於千载之上矣天地间形色万殊於其所过而适将终身焉况夫山之高大静重苍翠之色四时一致得生育自然之性足以极游览之娱哉世之志幽隐者原取於荣观春卉繁华蘧蘧蝶梦而岁寒晚翠每於霜雪见之托物取兴之君子固尝用意於晚矣故不及震耀於一时必欲保全於悠久士君子当世道之会修名姱节其不在於晚乎伯英居胜国时掉鞅燕都所交皆天下才隗国子先生若同郡叶公敬常临川危公大朴河东张公仲举尤喜延誉会朝廷粉黄金泥书大藏经伯英以八法厠诸其列遂出身为慈湖鄮山两院山长陞浙东宪使际今圣明则年几六十矣犹从事於簿书期会岂天将华其晚姑使之徘徊有待耶山以晚而翠益深入以晚而德益盛伯英栽培栽植如山之衆木晚翠而底於材焉可也想其退食自公焚香默坐羣动既蛰万籁不作俯仰眄睐空青一色天地造化之妙默契於忘言之表矣勲名爵禄云乎哉仰惟圣君在上求贤审官惟恐不及伯英将考满入覲大器晚成於时见之紫金山名冠天下笑傲晚色意悟神悦吾知其犹在淮海间也是为记

浮庵记

云间姚君宗文浮家凤阳於鍾离古城西北得地之胜旁据高阜下瞰长淮两垓而对如门矫首独山近在咫尺而中都宫阙城郭历历在目於是构室数楹列以棖檻隆然如舟其外怪石人立刀披劒鏐杂以奇卉名木禽声上下笙筑交奏纵观默听如舟之入崑仑玄圃也宗文脱略尘俗萧然物表日与家人妇子燕笑乐衍寻伦以叙不啻范蠡之於五湖也宾客骤至呼网取鱼剖瓮倾酒歌啸於清风明月间不啻苏子瞻之於赤壁也牙籤插架翰墨凝香探蹟义理讨论典故与英雄人物神交千百载之上不啻米襄阳所谓书画舫也宗文居之甚适自号浮庵居士且扁其居曰浮庵其乡友沈先生丈举既为着传以予在斯文当为之言按许氏说文浮字从水盖泛然无所系之谓宗文自浙入江自江沂淮其迹近於浮矣抑其出处大致初不在此夫达人大观物无不可尾闾归墟我池我壑曾何界於彼此哉昔者宣圣尝有浮海之叹固以道之不行也使夫言果然其过化存神固有不可测者况今天下一家帝乡戚里观光上国文物礼乐之盛足以扩充其学问激扬其心志者哉且习俗不同人品亦异詖淫邪遁浮於言者也譎诈狂罔浮於行者也宗文固秽而唾之矣彼焉能浼我哉嗟夫宇宙茫茫吾身如寄乐天知命从容自得静而嘘若春沼之鱼动而游若秋海之鸥就其气象观之谓之浮可也至於真境内融英华外发崑仑磅礴俯仰无际深造妙悟物我相忘而太空圆镜■〈日晃〉朗洞射髣髴乎无何有之乡矣於是时也宗文以为浮乎否耶宗文闻而怵然遂为之歌曰万化兮浮沕泊吾生兮盍休令淮海兮安流謩予乘兮桂舟駉苍螭兮骖素虬吹参差兮弹箜篌乐吾乐兮谁俦招羽人兮丹邱超恍惚兮灵游望不来兮心悠悠飒天籁兮空山秋悲噤俗兮呶嚶溘轻举兮上浮盼八极兮九州沛■〈彳 罔〉瀼兮夷犹飞光飞光兮不少留拂若木兮沧洲宗文起而谢曰子之歌善矣予让不敢当也浮大白请记诸壁

驷良山别墅记

驷良山别墅者莆田陈君廷杰思慕之地也山在莆田北三里峰峦远近襟带左右一水中分衆流交会而长桥卧虹行者负者朝夕弗絶山之上松杉楮樟蓊郁深茂怪石林立奇花异卉

芳香静幽使人意领心悅昔之论曾杨之学者以为水砂之法於兹为胜陈氏六世祖兵部侍郎公葬焉侍郎之孙龙门公笃於报本建精蓝为崇奉拜扫之所晚岁终老游焉息焉者八十余年迨今大明洪武辛酉之岁廷杰省墓而来慨然念曰我祖神灵洋洋如在焄蒿凄怆有不能忘可不追孝於前人以迓续於无穷耶於是结屋三楹编竹为篱甃石为径幽邃静密尘俗远屏仰高俯深山光水色皆在衽席之下岁时来居依依不忍去因题曰驪良山別墅云阅二年廷杰如陝右过中都求予文记之夫人中天地而立身之所自则吾亲也吾亲所自则吾祖也暨夫曾高以上虽曰亲尽无服而尊祖之心初何间哉故凡口泽所存手泽所遗必恭敬奉承弗坠至於某山某水过必式焉以为其平生所游覽也况乎宅兆■〈穴上之下〉龕衣冠体魄所藏者哉驪良山莆中名胜侍郎公奉身归全其立朝大节犹耿耿也廷杰別墅之居所以心存生民而道济天下者於侍郎公有之似之矣般游衍乐云乎哉谨按陈为莆望族其先以晋永嘉乱由颍川徙闽至唐清远令名拯者迁居莆十一世祖宋虞部尚书讳仁璧者让宅为兴化郡治郡为立祠尸祝之传其子靖显於太平间累官尚书左仆射为三朝元老着奏议十卷曰经国集其以功赐铁券封会稽郡王名揆者则仆射伯父也嗣後袭珪瓚者凡十三世至廷杰则十六世矣世家渊源其有自来哉国家大兴人治蒐罗岩穴之士无有遗者廷杰之兄廷宾方以文武全才任陝右专閫之寄廷杰必将上登於朝昆季後先规重矩叠驪良山不增观矣乎莆人尝有言曰水邊壺公山莆阳金紫半此莆士大夫为卿相之兆也驪良与壺公山密迤往者之讖安知其不在今日乎予於廷杰诚有望矣因为之着记廷杰名贤别号抱拙生盖以拙忤物托仰河东语以自况云

半湖亭记

江右山水郡称吉安为最吉安属县凡九永丰其尤也去永丰东南八十余里平湖八顷四山环列而文笔一峯嶄然特起层冈别巘如案如架灵秀所鍾代生名哲是为胡氏世居之地在元至正间举江右辛巳进士科名植者则湖亭先生也先生构亭湖上遂以为号着述之暇揽结山川之胜鸢飞鱼跃意领神悟士大夫以经济期之而遽云不禄有子二人长名启字尚迪次名某字光振种学绩文嗣守先业弗坠尚迪尝慨然自念曰先公文献之泽久矣绍闻衣德言以追孝於前人者吾兄弟之责也岁月逾迈音容斯在吾兄弟之於先公不敢期而似之如使各得其半亦足以名为人矣遂扁为半湖亭兄弟相戒埙唱而箴和规行而矩随风清月白想像彷彿如见其先公焉今尚迪奉土命任凤阳府经历真以斯文礼见为言其概且使为记因作而言曰是可谓善继善述也已夫半者数之分世有称为半云者以造化之妙不得而尽窥也称为半山者以泉石之胜不得而尽有也尚迪学问文章治政可谓至矣而不敢以先湖亭公自居且与其弟均而半焉则所以夙兴夜寐各敬尔仪者从可知矣天下之物得其半则可以得其全是以万理殊途同归一贯况圣贤之学克肖先烈者哉昔亚圣邹国论子夏子游子张皆有圣人之一体冉牛闵子顔渊则具体而微盖师友间气象有同者下至唐宋时史家撰述以李常侍之类西平南轩之类魏国盖父子间声望有同者就今观之尚迪之贤比诸先湖亭公不几於全乎想夫天雨初霁一镜如拭燕坐渊默融然悠然有不知其所以然者复何计其半与全哉真少好山水尝过钱塘西湖至孤山左顾右盼以为尽矣及登灵鹫峰则一湖之胜高下远近皆在目中始悟向之所得者仅半焉尔夫所行既远则所见益大故学海者必至於海尚迪宏濶吞云梦者八九半湖云乎哉仰惟圣君在上用无遗才尚迪既在幕府之职

光振亦有名声於时异日金昆玉季并登岩廊羽仪朝宁如胡氏先忠简公与弟刚简公之在宋南渡时则湖亭公之神灵固福而佑之矣而真也安得杖履游於斯亭之上快覩西江之盛观哉按胡氏世胄金陵始祖唐时刺史吉州封庐陵郡王後有领节钺镇郑州者皆家於庐陵之香城其析居於湖者号小香城宋时衣冠有名德元者官国子博士名寬者号琴窻穆陵朝举进士与赏花钓鱼御宴诗世以为荣自琴窻至半湖又几世实刚简公嫡传因并书以为记云洪武十六年岁在癸亥秋七月既望乡贡进士四明郑真记

鹤顶山房记

姑孰当长江下流之会自六朝以来视为重镇今天子定都金陵龙蟠虎踞而姑孰为陪都於阙廷为近英俊之域轩冕所兴文学之士固有应时风云侈千载之逢者矣胡先生伯昭家郡东北十余里控山川之胜自其先世以来隐居求志亦有出为儒学官者先生幼时遍游缙绅之门书无不读而於四圣辞象变占之学尤致力平居宴坐仰观俯察而万物万化之理默具於心矣洪武六年以有司荐为当涂学官遂以斯文为已任未几引疾归所居东南二里许有鹤顶山者尤为奇秀先生素乐之构屋数楹植以松竹扁曰鹤顶山房徙居其中聚书千余卷穷探幽赜訛者以正缺者以补露抄雪纂朝夕不倦其於学也本诸事物之微而达诸天地之奥即诸彝伦日用之常而推致乎典礼会通之大知之明而信之笃行之力而守之固意有所适往往着为声诗而冲淡幽远有陶谢之风其所至可想见矣会朝廷起复之命下遂领怀远文学掾之职怀远中都畿甸昔者禹会诸侯之地先生讲道之暇而对荆涂二山兴怀鹤顶之阳以予义同出处求文以记予惟天下之有道德文章者其始也必求幽深悬絶之境而有事焉以为尘俗既屏则志向专一故能以翰墨为町畦简册为墙壁孜孜矻矻惟恐不及一旦为时而出立言励行为世师表後进之士过其地者有不覩桑梓而敬恭者乎昔者儒先君子讲学若抚之象山闽之考亭衡州之石鼓南康之白鹿皆列於学宫俎豆尸祝之而姑孰之天平亦以处游士而设今先生出而以道淑人名将大显後有良有司者援天平故事即鹤顶山建为精舍用诗书礼乐以化诱其人使先生之声誉风范永垂不朽岂非扶世教之大者乎传曰高山仰止景行行止予先生盖有望焉敢书以告来者

铁砚斋记

燕山陈生昊文年二十余气质清修而勇於为学以予典教临淮县庠来受朱子诗经传私拟科举业数十百题予爱其理明词顺以为一第不足多也生尝得铁砚一事遂以号其斋居而中书舍人胡公廷铉大篆揭之楣间会予考满入覲生请文以记尝阅五代史载晋宰相桑维翰累举进士不第铸铁砚誓以砚弊乃改业後卒以科第显然则有志於科名者莫维翰若也生其志维翰之志者欤夫砚为文房四友之一与笔墨出处任用相类而寿夭不同昔人谓笔以日计墨以月计而砚独以世计者以其为石而坚也况以铁为之其坚尤甚於石者欤使累世研磨用笔墨以万计不足以少挫彼以三余之学一二十年之功有托於兹其不克底於成者鲜矣以是孜孜焉矻矻焉是旧日之维翰即今日之昊文也斯不可尚矣哉予向居四明山中读乡先生郑魏王安晚与刘公后村林公竹溪着为四制砚以石虚中目之刘公则曰一泓之水不足多万斛之源所从出其托兴取义深矣生之於砚不资乎端溪之美产而独与昆吾

之钢赤堇之英发挥朝夕则其笃实内充而辉光外发者可见矣仰惟圣天子以明经取士登其选者台阁方伯之任於是乎取之今宾兴在迓县大夫以生之名上之郡府贡列矣予虽老不文尚能取铁砚铭之是为记生字仁伯本高句丽人在至正间其父宦游系籍燕都复徙而南定居临淮云

友兰斋记

古之君子必资友以成德故近而取之一乡远而取之一国天下又上而取之古人诵其诗读其书以论其世也夫使得诸古人固不异於今人得诸一乡又何异於一国与天下哉乃若取友而托诸物焉其亦君子用以比德者乎湘为长沙府属县去县百余里地名春溪隐士曾子敬父居之修德行谊乡党敬焉构屋数楹猗兰遶砌用磁盆科植登置几格笑而指之曰吾与之相忘朝夕者其在兹乎因以友兰自号而名其斋居以其先君子常作县五河与予有斯文之雅求文以记兰见於本草而杂出於经传虽其一草之微在岩谷间不与凡葩杂卉争妍并耀则其物性之得天者然也士君子取其芳洁则必茹华保真而菰秽不得入焉取其静幽则必违声远利而尘坌不得入焉其非比德乎夫托物比兴者性情之正也昔屈子尝曰滋兰九畹而又曰纫兰为佩盖以譬夫逸民君子有仁义道德者尔然而荃蕙既化蓁施盈室至以兰为不可恃盖伤时俗之变而志有不得伸者如此其忠君爱国之心何惓惓哉予敬家湘乡正屈潭祠祝之地遗风余烈固有所兴起矣想夫天日卓午芳香袭人援琴雅奏作猗兰之操神融意释与兰写真矣虽然至人遗物乃与道俱今圣运文明贤才彙征子敬抱道而出天下之士若皋夔稷契者与之友以尧舜其君民不愈於友兰矣乎於是乎记之

澹庵记

予年几冠与宗文永嘉郑君伯厚隸业四明郡学伯厚勤苦惕厉蠶盐朝夕受书经习举子业期以功名自见後数年学成讲授弟子隐居养亲泊如也际圣运肇兴以尝试掣省徵至吏部校艺中选授合州定远县主簿以称职闻调安西巩昌府成县主簿逾二年以春首入覲既还知予典教临淮走访风雪中予以久别割腥置酒相劳苦伯厚歉然若不敢当者予语之曰是岂不足饮食也耶伯厚曰吾志於澹久矣昔诸葛武侯云非澹泊无以明志味其言而有得焉及官於蜀拜武侯象精神志意有若默契因以澹庵自号凡饥渴寒暑之际以澹自持而弗得过焉今子所以馆谷我者厚矣无以发明之可乎予遂与之言曰澹者至味之存而至理之存也太羹玄酒足以致其诚簞食瓢饮不能改其乐则澹者其所难哉士君子从容於义理之天周旋於信厚之地凡声色臭味所以瞽目聋耳伐性丧心者其可有一於其间也耶伯厚从事於澹是以自始至终疏粝自给仕宦所至冰雪其操视夫甘脆肥脓轻纖华丽举不能为之动斯所谓安於理之正者矣以是恪守不变所以致寿考而绥福佑者不在兹乎在宋南渡时胡忠简公亦号澹庵其上封事力诋秦桧南荒万里贬窜相继而赋诗自适曾不以利害死生为意非真味於澹者不能也伯厚筮仕入朝与国家事风节行谊固当以忠简公自期矣无食焉怠事而曰吾澹於宦情也伯厚谢曰吾子有以教我矣遂书以记庵之屋壁

瞻云轩记

云之为物变化无常囿乎天地而天地不能囿也藏乎山壑而山壑不能藏也浩浩然莫知其所止飘飘然莫知其所始也然而孝子之用心乃指云之所在为亲之所在有登太山而望河阳者其亦魏风陟岵之用心乎予典教临淮遇庐陵邓君存仁之子九渊氏为言吾家自先曾大父潼川提刑府君以科第进身传及四世宦学不絕忝以家教年逾弱冠与羣士旅朝阙下授池州贵溪县丞以二亲在堂累使迎养而吾父报以有祖母不得舍母而就子也九渊实遑遑焉於是即官舍扁其轩曰瞻云居三载调毘陵义兴县丞复使奉迎弗至且示书曰汝祖母年踰八袞设使吾去左右一旦不测谁任其咎耶况田园邱壠一家之重汝弟尚幼孰主持之哉慈孝之义吾思有以处之矣汝能尽忠於国不足以荣亲耶既三载入覲复职又二年得归省膝下二亲为之色喜未几授巩昌府成县典史县即古西康州遥望庐陵数千余里而朝夕定省不能释然于怀也先生其有以慰我哉予语之曰善矣哉古孝子之存心也夫先王事父孝故事天明事母孝故事地察事亲如天地岂不重乎然以仕宦所羈违远顏色山川阻深迎养弗致矫首长望见云而不见亲则托物以寓其思者固其情之所不能已也且人非父母不生九渊之念其父母犹父存仁之念其祖母也祖母之爱存仁犹存仁之爱九渊也存仁以母之故而不忍远适九渊以二亲之故而不忍忘家一亲亲之恩也孰得而议之哉登斯轩也望斯云也盖不特其子思夫亲亲亦念其子矣彼其至行精纯本乎天稟十年之间展转南北白云亲舍之思在贵池无异於义兴也在西康亦无异於贵池也云乎云乎其知九渊之心者乎昔有仕至宰辅而回拜亲在朝夸为盛事今圣教大明惟贤是用异日九渊登诸廊庙之上三釜九鼎以为亲壽不亦遂其心矣乎於是乎志之

恒农轩记

明郡属邑定海灵绪乡之西曰任溪以邑大姓任氏得名其外大海际天波涛万里蜃楼蛟室变幻莫测内则重峦叠嶂高险深阻飞瀑如练下注溪壑蜿蜒曲折若锵金奏玉听之不倦良田广亩犬牙交错五谷之入穰穰满家无有饥岁任氏之先以力农致富饶而读书循理一门少长隱然有三代遗风曰存敬氏者敦厚慤实士也自幼有志於学邻邑旁近有曰杜洲书院者延乡先生孙公正甫训导弟子员存敬从之游受朱子诗经传学成而归辄自叹曰农之子恒为农其秀民之为士者亦赖之吾庶几农民之秀者乎且耕田读书以天下事置之念虑在古人可数也眇予小子独不能挂一编牛角与古人寤对於千载之上耶於是扁所居曰恒农以为学之成犹耕之获云际今圣运以博学荐入京师试艺中选倅高邮州事适予典教临淮以同乡庠序之好求文以记夫士出於农而工商不与焉故甫田之诗曰烝我髦士盖生於田野安於■〈亩犬〉亩不以异物而迁父兄之教不肃而成子弟之学不劳而能其俊秀之才足以为士是故农为国家所赖而农之为士者尤有赖焉自汉以来若倪寬高凤之流其非出於农者乎彼其鋤耰耒耜朝夕相寻自以为终其身矣一旦位跻通显旌麾道前驺从拥後天下之人固钦慕而健美之矣存敬奋身■〈亩犬〉亩冠裳佩绶任州佐之寄匪惟斯民赖之国家亦赖之矣然而存敬终不忘乎农者所以重本也且玉堂金马富而且贵不如凉竹簟之清曝茅檐之暖足以为便且适也高车驷马禄食万鍾不如秋风■〈禾罢〉稴土盆瓦缶醉饱歌呼之为安且乐也於是而扁焉观焉其亦见夫志之所存矣昔宋庐陵曾公安正着禾谱凡四十五品内翰苏公以其不谱农器为缺作秧马歌以遗之予以笔代耕者也於东作之劳夙有意焉俟存敬致政还里相与力田山海烟雨晦冥间其亦足矣若乃击土鼓歌豳雅笔之

於书曰大有年则有春秋之法在

心远楼记

吴郡郁明本氏寓居临淮城构楼居号曰心远其同郡友陈仲良谓予曰吾与明本居斯地久矣爱其习俗之美不能去也斯楼在闾閻中俯而视之邑屋万家鳞次栉比长街广巷纵横贯综车填马集衣冠礼乐所以悦心眩目者相错也远而望之淮山濠水冈连岸接帝乡汤沐宫阙园林之壮祥光佳气葱葱郁郁仰瞻尺五蔼然化育之治焉明本以居以栖扁焉观焉其脱凡近而游高明者乎先生幸为一言焉予诘之曰明本之於斯楼也不出衽席不越户限以为心远欲置其心於何所也耶请有以语之心者神明不测者也其体至备其用至周即乎一事一物之微而通乎万理之会形乎一瞬一息之间而极乎八表之外不局局乎卑且近也不遑遑乎浅且陋也理之存焉身之泰焉笔舌云乎哉我思古人若柴桑处士者正惟有得於此故其诗曰结庐在人境心远地自偏是岂为外物所移者耶想其采菊东篱而悠然南山悦飞鸟之还以为真意而欲辨忘言则夫万化之妙已默契於其中矣此心之气象他人不能识而柴桑独识之夫君子之学欲其自得之也自得之则居之安资之深取之左右逢其原矣而况於一心之微如太空明镜洞然内照者乎明本反身而诚焉悟焉斯可矣予不能不为一言也勉之哉是为记

云松巢记

云松巢者贛郡过君复亨休息之地也贛城南五十里有山曰空同回薄贡江与郁孤台相望其西南诸峰挺拔直上势如削笔上有飞泉三道下有龙湫累朝封诰存焉欲观者以诚扣之则浮水面已而沉焉此其异也山之东南五十里乡曰四会里曰安乐後有一山曰小庐山层峦怪石高下隐伏与空同山相接环以清溪九曲深僻静幽实为郡形胜之会复亨世家文献曾大父概轩先生有田有庐耕稼其中世运代更庐以兵毁而田亦芜废不治载传及其先君子思义重为垦辟而未见及竟复亨慨然曰菑播之责其不在我乎於是而对小庐山构屋九楹如先世之旧杂植松竹花柳内度书史往来游憩秋风■〈禾罢〉榼斗酒自劳不知其为人间世也遂号为云松巢云以予同客临淮有斯文之雅求为之记昔李太白望匡庐五老峰欲巢云松盖将与古仙真人颉颃翱翔於天地也复亨诗似太白而其卓■〈斗〉不羈亦彷彿焉使白复生殆以昆季处之矣乃独寓形一室超忽动荡於万化之表精神之契其不如见谪仙哉虽然白宗室贵胄也天宝召对金銮供奉翰林恩隆宠洽至於夜郎之谪则其命之不幸也复亨生当盛朝数覲阙下对敷显命縉绅君子以远大期之而复亨顾歉然不自安以为思患豫防之计乃明哲保身之基则夫绸缪拮据固有所不容已者且地以人而灵向者庐山以太白遂为天下所景仰今小庐山安知不以复亨得名哉且子独不观诸鹤乎悄焉林丛一枝如寄及夫抟风霄汉不知其几千里也然则复亨岂巢居者哉予也有巢氏之民朴拙之甚於复亨高风远致何能形容之姑记其大略云尔

居敬斋记

君子之於敬也猶居之有屋室焉屋室知所以居之以體所便心所安也而不知敬爲身心之主宰居之尤重於屋室者乎予典教臨淮十年每告學者以持敬之法退而獨處暗室屋漏之地不敢怠慢焉褻玩焉庶幾以爲存養省察焉一日弟子員吳生原達請名其齋居予命之曰居敬會中書舍人胡公廷瑗以使命來用李斯篆法揭之梁間生復請予一言遂告之曰生欲辟理聖門之閬域者乎使不居之以敬吾恐不得其門而入矣生其慎所居者哉粵自唐虞至於成周君臣交相訓誡不曰欽若則曰欽哉不曰敬之敬之則曰不聰敬止至於聖門教人居處執事之常見賓承祭之重及夫修己安人而天下平者莫非敬也數千百載之下繼孔門之傳者其論敬曰主一無適曰整齊嚴肅曰常惺惺法曰其心收斂不容一物至於朱子着爲敬齋箴則兼動靜表里言之其於體段形狀具矣生其有事焉弗忘焉洞洞屬屬如捧盈焉如恐失焉固將悟其理之所以然者矣雖然敬所以行禮禮者敬之實也一毫之非禮非敬也一事之非禮亦非敬也生之於敬也其審於禮矣天理人事有節有文有儀有則敬以求之斯可矣豈曰詞章記誦釣聲名取利祿而已哉生再拜謝曰先生之言是也佩服終身可矣因書以爲記

荊陽外史集卷十二

卷十三

●钦定四库全书

荥阳外史集卷十三

（明）郑真 撰

○记

监思堂记

监思堂者开封李彦亨氏恋慕之地也李氏世家相台自金源末至元百十年间高大父昭勇公官授节钺传及中顺州守及敦武宣课提举凡三世敦武生安义居士彦亨则居士之子也居士早丧彦亨幼孤养其母夫人某氏兵难荐兴奉板輿展转晋魏间凡二十余年实得其欢心际圣运肇兴附籍开封之新昌里构草堂三楹奉母以居地素下湿多茹齏饮醎若堂既成凿井得甘泉焉汴之缙绅士大夫以为纯孝所致於是具殽酒落成之夫人指彦亨为衆言曰吾年及笄为李氏妇今七十余矣尝逮事先姑崔氏言祖宗以来形貌相似殆气类耶此子状肖其父而鬓发皤然宗祀之弗坠庶几在兹乎彦亨览镜自照以不及见其父为悲时予与乔君志宁在坐起奉觴为母夫人寿题其堂曰监思云越三年予忝属天官乃使请文以记予惟物生有象明照无穷监者至明之器也妍媸俯仰物莫得遁焉然鉴於水者不若鉴於人鉴於形者不若鉴於心因其耳目之覩以起夫心志之思则监之为器不徒然矣且夫父者我之所从出今由父母而上溯高曾世代相远而精神血脉固有流通而脗合者昔者贤哲之家云仍後先不特於声音笑貌之似而必求其道德功业之类彦亨因其母夫人之言览镜以思其父昊天罔极矣嗣而续之父虽没而犹存也求形审像云乎哉且孝百行之原执一物而百善至彦亨至孝感神甘泉之应天固有以鉴之矣况夙兴夜寐耳存目注不显亦临者乎国家孝理天下若李氏母夫人之寿考康宁而有彦亨为之子以学行表仪庠序登之王府为左右从臣异日表厥宅里树之风声天下之人其不以之为鉴乎予幸得告老北还当为彦亨赋之

雪霁轩记

吾乡为东南之甲郡雉堞云屯扼江阻海山之得名者金娥导前骠骑殿後玉几太白天井文锡诸峰雄踞角立当夫玄冥戒冬雪霏洒俯仰高下万象交辉来游之士穷幽探胜以为不啻上方丈而登蓬壶也郡人陈先生子云居闾闔中辟一轩为藏修之地外列花竹奇石内度诸经子史日与宾客讨论订正值风雪交作拥炉便坐啜炙行酒诵梁园之赋叶郢中之歌清声逸响慷慨今古既而风定雪止曙色曈曚而一帘高卷四牖洞开丹山赤水洞天三百八十峰之胜皆在目睫世所谓银界三千者殆不能极其形容也子云居之甚乐缙绅君子扁曰雪霁云会予自凤阳入覲授广信郡文学掾过家上任子云送至舟次以记为属因书以复之曰

子云其寓情於物者乎天下之物得诸目而识诸心情之适者心之适也一心衆理之会浅近云乎哉夫气物流行莫非陰阳所为陰极则雪降阳动则日出雪之霁以日之霁也陰阳二气磅礴两间於是时也精神内融英华外发天地之心天地之气我之气一尘不得而杂也一私不得而入也造化之妙相为无穷矣且雪天下之至白者也丰年之祥兆於是诗人有言曰上天同云雨雪雰雰以其有泽物之功焉斯固人人之所同喜者也然雪以时而降以时而霁玩檐冰之成筋眇野水之流澌吾之适犹夫人之适也可但若王恭之斲东郭之履特立独行以自眩其怪且奇哉子云扁焉而时为观焉其有由然矣予居中都之临淮十有二年每雪晴时絨帽重裘出涂山门徘徊徙倚久然後去间尝以讲说春秋经召入晋邸蹇驴行深雪中瞻仰皇陵诸山如琼楼玉宇晃烺照耀弗知为人间世也然而严寒栗烈莫之能御则固以为奔命之劳不若子云衽席之安也乃今越在广信地益处於南穷冬少雪非在淮海时比遥盼家山瀛洲天远缅怀子云兹轩之下燕坐从容傲睨无际则固洒然冷然於云霄之表矣异日扁舟清兴不识果能如王子猷之访戴安道乎否耶於是乎记之洪武十七年岁次甲子十二月十有九日濶斋郑真记

竹坡记

上饶徐公英仲年逾八袞眉皓首衣冠伟如若香山九老之一所居在山谷中尘坳絶坡坨上下植以修竹小者大者如青琅玕挺挺离立枝叶交亚如铁鉤鏤金错刀纵横叠沓掩映清溪白石间风雨晦明月星晨夕如蓬莱仙人湘江帝子飘飘然佩琚来下而云旌翠羽飞扬晦暖也如笙箫并奏蛟龙舞而凤凰吟也英仲抚有佳胜作亭其上自号竹坡客至觴酒啸歌傲睨无际人以有道君子目之庶几文与可之在箕箒谷云会予与教信庠以斯文礼见求为着记夫君子之心与天地造化相为流通於其动植之微形声之接而识其理之所以然则天道之流行赋予皆在我矣况夫竹之为物根之固而性之直也心之虚而节之劲也固则不拔不蹙直则不曲不回虚则必能有容劲则不失之弱是物之受命於天者然也英仲家泽世积本深末茂有操守有度量而正容肃躬不可褻玩竹之植也庶几近之故其岁寒之交誓言金石殆与此君周旋始终矣抑尝以易说卦观之震为苍筤之竹震为雷为动而其象曰君子以恐惧修省盖竹者植之物也於震之象何居予家居海上岁暮杖履於确犂间霜筠雪节生意默然及春雷啓蛰萌茁迸裂森然犖角之挺挺也俨乎豹斑之隐隐也儵焉旬日枝分箨解由是干云霄捧天日而造化生生之理不可胜穷矣予乃喟然叹曰土之变化成就不当如是耶惕然自厉不有协於易之象乎乃今典教而来以为英仲两朝齿德为逸民为吉士订正归宿之地将在於此想像仪容漪漪之间其为企慕何如哉异日幸得过从竹坡之上取童子所携长琴请英仲作鹤舞洞天之曲以洗尘陋不亦可乎顾以末学无文不能如苏长公大手笔以形容有道之气象也

槐庭记

槐之为物也干可材备成器花可染为中大正色子可药济疾病上应公台之祥下示科名之讖非若散樗恶栎旦夕斤斧於樵童牧竖也夫其受命於天而托质於地盖亦异矣隐人君子时而培植焉其有以哉广信徐君德彰父家於郡城六十里辟堂数楹高明显豁日与山水色

相为主宾堂外植槐数十本对峙林立苍翠郁然时德彰令尊翁年踰八袞鸢肩鴈眉善饮酒强饭朝夕宴坐堂上德彰与其诸兄恪恭诗礼滫瀡甘旨侍奉怡愉不少怠宾客来集举盃祝颂以为福履之成焉因题之曰槐庭云夫种木犹种德也木之盛德之盛也德之盛则本之一身推之一家而及於天下矣以德彰性本孝友心存惠济於其庭槐之植也根之固则犹其先业之远庆泽之深而无至於蹙拔也干之硕则犹其立心之正律已之严而不至於诱惑也枝叶之茂陰翳之盛肤理之密则见其祚胤之多福履之及而致用之全也维其有之是以似之岂不信哉昔韩宣子聘於鲁宴於季氏有嘉树焉宣子誉之武子曰宿敢不封殖此嘉树夫所谓封殖者固非藉柯叶以资玩好之娱也亦曰以其德焉尔予千里南来未得一造槐庭之下然而蝉声昼永夕照风清此心向往久矣宣子之誉其能忘情乎德彰盍亦封殖乎德矣哉若乃功名爵禄冠冕轩车之盛则以付之南柯之梦可也

梦拙轩记

崑山孙惟学氏倅广信上饶之初年於灵山之阳玉浮之上审势面胜构轩居为寢息之所扁曰梦拙予典教郡庠以斯文之契过焉语之曰人得天地之气以成形拙者不得而巧巧者不得而拙也子之梦拙於义何居岂天诱其衷造初者示之象以为进退出处耶且子仕宦南北多历年所於世之是非荣辱固已如邯郸之一梦矣今复曰梦拙无乃梦中说梦乎惟学曰不然吾尝梦双鸠止於座隅掩而获之水饮而粟啄啐啐然若欲以臆诉者既寤以周礼六梦之法占之非思也非噩也不知其为祥耶否耶徐而得之曰鸠羽族之拙者也吾以拙累久矣而莫之去也其以拙终身乎於是扁焉观焉庶几以为精神气脉与造化相流通矣予应之曰人与物同者也托兴比德於是乎在而况衽席之上梦寐有以得夫心之所同然者哉然而夜如何其杳冥茫昧物我两忘无彼无此不知子梦鸠耶鸠梦子耶且鸠之拙也尚矣维鹄有巢维鸠居之诗人以兴二南风化之盛然而雄鸠之鸣逝吾犹恶其佻巧士君子之於拙其严矣哉粤自大朴既散巧伪日滋譟张变幻之士憧憧而往来者相踵也耳目所极不能不歉然於中矣梦乡不知几千里而物以类至即其羽翼之驯习而识其性之专静均壹用以为律身行己之要斯足以见天人感通之符矣岂若昔人所谓梦蝶梦鹤自诧於虚无恍惚而谓与道翱翔者哉抑尝闻之古者以鸟名官故祝鸠司徒睢鸠司马鸣鸠司空爽鸠司寇鹄鸠司事五鸠皆所以司民者也以惟学际文明之运与司民社而双鸠兆形梦寐功名爵禄其自兹升矣异时放鸠示好生之德杖鸠崇养老之义子其以为梦耶非梦耶予固天下之至拙者幸分半榻於是轩之下凉竹簟之清风盼芸窗之皎月鼻息通灵自谓羲皇上人之流矣乃蕉鹿之疑妄吾无取乎尔

源斋记

益津刘公於洪武乙丑夏六月由衡州耒阳丞归里不一月有司复以通经荐陞知江西广信事既至恪恭乃职对扬丕显休命退食自公肃居深念以为天下之事必有其本事之有本犹水之有源也眇予小子辱司郡寄恐陨越为斯文羞朝夕兢焉惕焉有事焉勿忘焉端本而澄源濬其流而引其支不识可乎哉因扁其所居曰源斋云予以郡博士於公有宾主之契起而言曰天壤之间水居其多演为万派而会於一原固其理然也造化之大万殊而一本其理不

然乎因物而察理君子所以致其知也是故逝者如斯以明道体原泉混混以明学问学即所以明道也学之正道之明见之事为施之政治衮衮乎其不穷也滔滔乎其不竭也至於当大事临大节议论之宏力量之重足以屹砥柱而障狂澜矣以公学优而仕用源斋自号其合体用显微而一致者欤谨按刘氏家出彭城自卯金刀应讖赤帝子遂有天下降国而家衣冠蝉联代着闕閼在上谷者尤号为盛此公家世之源也元至正间公尝曳裾燕都为国子伴读助教乔先生志宁授以易经凡卦爻象系之微辞象变占之正心传而面命之祭酒徐公彦礼御史胡公山历得其所试文以为析理精立论当置为魁选一时贵游行辈为屈此公师友之源也乃今圣运文明九重入覲东南名郡一麾出守凡而王政之大民事之要推而致之无过焉不及焉有本者不如是乎扁而观之盖将尽性命之理穷事物之情与上下相为流通矣吁其可不敬矣哉虽然天以一生水地六成之九州之水备见禹贡是水用大矣然导河曰自积石导淮曰自桐栢至於嶓冢导漾导江及沱其终皆曰入于海彼盖以会於极者泝其源也然则水之大者莫海若哉海为万流之滙心为万化之源即吾之心而扩充之上以尊君下以临民衣裳而冠冕朝宗之义百年一日也勲名事业不至於海不止矣沟壑之聚云乎哉扬子云曰百川学海而至於海其公之谓乎姑书以为记公名循字循理云

无逸斋记

天下之事成於勤而败於逸古之人皆然也今之人独不然哉夫万古一时万人一心古之人无逸也今之人亦无逸也今人何异於古人哉勤之与逸同系於一人一心而天下国家盛衰系焉吁其不可惧哉同郡周啓宗氏以无逸名其斋居乡先生卓习之父为之着记後十余年适予自淮海言归啓宗复请申其说而予何足以言之哉诗曰靡不有初鲜克有终向者卓先生所以告啓宗者既克慎其始矣庶几叮咛反覆俾图攸终哉夫虔恭自度不敢荒宁壽考所由致也上寿百年中寿九十年下壽六十年往者如斯来者莫止可自暇自逸乎哉是故夙兴夜寐无忝所生日就月将逊志于学不以迟暮而有悔也涉难历险比为坦途栲风沐雨视为佳趣不以宴安而可怀也出门如宾承事如祭恭敬所以为仁相在尔室不愧屋漏存养所以慎独岂曰造次颠沛之或违不睹不闻之或懈耶且天地造化万殊一致吾心之体用固与之周流无间矣岁月不留寸陰当惜悦焉孜孜乐善不倦勇往力行中立不倚圣门高远跬步可至福壽之来也必矣呜呼所其无逸如此而已啓宗其知所自力哉仰惟大明丽天君臣盛际鳧鷖既醉持盈守成文学侍从之士固有以无逸书为讽诵者矣亦有以无逸图为鉴观者矣啓宗年方强仕将致身青云之上幸得见如姬公旦宋广平之流以之传帝王心法之要斯其为始终服膺矣予虽老愿与有成焉

思稼轩记

真在临淮入覲京师承恩除广信教授还家上任过月湖宋故少师金紫史公旧第其四世孙均实以尝传易於先府君求我先生有兄弟朋友之契慰藉良厚见其轩居扁曰思稼辄问之曰稼者百谷总称天下之人所恃以为命者也子何以思为哉岂尝缺於朝夕者耶抑亦圣门所谓樊迟请学者耶均实哑然笑曰是何言欤昔吾先金紫公罢官退居邹溪别墅构亭曰观稼日与田夫野老相望阡陌间彼其念虑精微谋谟永远盖将致艰难务本之意以貽厥子孙

於无穷岂以功名富贵为可恃哉今去二百余年文献一线之违眇予小子无所肖似然而神明志气之交形声影响之接不以昕莫或间也扁曰思稼其将循名求实者哉真复之曰子其以前人之心为心者乎夫心之官则思虚灵知觉由内以达外故渴而思饮饥而思食寒而思衣皆切於日用所不能无至於贤哲立心行事使不置诸思惟而得其要领其何以为用力之地乎史氏在宋东南时为相门金紫公越社之孙卫社之侄而提刑公长子也文学政事有名於时而多所着述淳熙间越社再召金紫扶掖上殿阜陵嘉獎弗置富贵荣耀当世莫及禄赐之丰何待於稼然而林泉宴游之娛独以稼言者岂有他哉盖所以培植先德之厚以为嗣续之传尔想夫原田每每十千维耦而水车晚沸雨笠朝集於是时也顾盼远近有曾孙来止烝我髦士之意我後人之有事焉勿忘焉菑播之责尽之在已勿助长以揠拔也以穰以穰丰年之庆匪今斯今矣均实思稼之意不在兹耶且夫学犹稼也成则为嘉谷不则萑稗焉而已矣可不深致其思乎本之以忠信仁厚之泽溉之以诗书礼乐之源以方册为町畦以翰墨为耒耜则夫有秋之盛盖被乎天下高爵重禄有如金紫公矣岂特黍稷仓廩之实以为一家一人之奉哉诗曰无念尔祖聿修厥德均实之谓乎均实闻之曰子之期望可谓至矣顾予已老恐终不能以亢宗也嵒确之余服劳作苦用以系先烈之思庶几可哉子幸而退归吾当访子於丹山赤水之阳歌豳风击土鼓共为太平之民矣

拙修斋记

古之人重以厚今之人轻以浮重以厚者拙之本原轻以浮者巧之横流天之生人何异於古今哉岂其性稟之或偏或正耶抑其气运之降习俗之弊而致然耶昔子贡遇汉陰丈人抱瓮灌畦教以桔槔而丈人羞之则天地生人之道亦惟拙而已有能以拙自修不几於君子乎同郡黄梦熊氏世家子也年逾三十质实惟重以诗经中洪武五年江淞乡贡进士选计偕京师大臣将奏以官控辞再三大臣为之喜曰子所谓吾斯之未能信者耶遂免归闭门读书养母事兄以孝友闻昌国邑大夫以礼币招致教导弟子员昌国海岛云水乡梦熊不憚僻险日与学者研精毕力求底於圣贤之域退处斋居一榻萧然而静存深念渺渺千古若有与之晤语者因扁曰拙修盖用儒先董子之语云予向与梦熊同年梦熊以世契视为执友礼待良厚予以广信文学掾过家上任梦熊请着文以记夫人喜巧而恶拙久矣梦熊以拙自修毋乃愈拙而人愈不喜乎且君子之学也期底於道而已不以世之好恶为是非荣辱也故拙之修道之修也董子伊洛正传谓闻道为悦而以拙自修盖信之笃而志之力也考亭朱子以为下学上达之要信哉梦熊自幼知学而欲自同於古人则其於道也必有神会心得於浑沦磅礴之外矣彼有譟张变幻而阿媚取容逢迎为说至於昏夜乞哀骄人白日而曰吾巧於游说巧於仕宦名声者梦熊能不秽而唾之哉且夫炫耀华美不如敦朴浅近浮薄不如深沉敏速捷急不如迟久世岂有重此轻彼者耶梦熊以拙自修其视流俗何如哉夫道者天理自然顺其理而不去拙斯在矣中庸曰修身则道立身外无道拙修矣其於道也孰御焉此固梦熊名斋之意岂可以浅近形容哉梦熊先大父乡先生声甫宋太学生以文名著於德佑间尝试对将略人才号金玉策梦熊宝为家藏经济之传固有素矣拙修云乎哉予年过五十懵然无能读周子拙赋以自解幸而退归与梦熊相羊山海间其亦出处之同者乎於是乎记之

卷十四

●钦定四库全书

荜阳外史集卷十四

（明）郑真撰

（阙）

荜阳外史集卷十四

卷十五

●钦定四库全书

荜阳外史集卷十五

（明）郑真 撰

（阙）

荜阳外史集卷十五

卷十六

●钦定四库全书

荜阳外史集卷十六

（明）郑真撰

（阙）

荜阳外史集卷十六

卷十七

●钦定四库全书

荜阳外史集卷十七

(明) 郑真 撰

(阙)

荜阳外史集卷十七

卷十八

●钦定四库全书

荜阳外史集卷十八

（明）郑真 撰

（阙）

荜阳外史集卷十八

卷十九

●钦定四库全书

荜阳外史集卷十九

（明）郑真 撰

（阙）

荜阳外史集卷十九

卷二十

●钦定四库全书

荜阳外史集卷二十

（明）郑真撰

（阙）

荜阳外史集卷二十

卷二十一

●钦定四库全书

荥阳外史集卷二十一

（明）郑真 撰

○序

送知淮安府事德安洪公上任序

洪武十有一年春三月凤阳府同知德安洪公范九畴奉诰命知淮安府事公便道上官追饯者出朝阳门外二十余里为其僚友者曰守官至难也凤阳置郡以来通守别驾多以事去公独以才行兼济简在眷知甫及二载授以二千石之重君臣际遇可谓盛矣然舍此去彼一政一令之施何所谘谋乎为其士大夫者曰斯文不振久矣公摄守事时谋诸同志兴学校创礼殿释奠先圣与诸生落其成劝勉激励拳拳焉自今以往复有如公之贤克继其终者乎为其父老民庶者曰中都天子故里大驾归幸亲王驻师馆谷供亿吾民甘心焉而公不亟不疾不鞭朴怒骂而事以集子育之恩不可忘也公今自此升矣其复有如公之抚柔吾民者乎相与执轡遮道欲留真忝以文学掾属在下风拱手肃容趋而解之曰诸公信厚矣而迁命涣颁公不得而辞也然公何以得衆心所同哉有以见公恺悌君子宜民宜人者矣夫高爵重禄君人者所以劝赏天下也圣主於公知之既明将用之天下大慰斯民之生非一郡所得淹而久也今自同知进为太守特其一阶一级之升耳自是入为三公入为丞相宁不先有汉故实乎然则公之不可留也谕矣淮安地包河海控制山东古今形胜昔者张敞郑弘之治民祖逖韩世忠之治兵枚臯之文章陈瓘之气节流风遗习犹有存者国家建都江左视淮安为股肱郡以公治行之着辍中都重地来为之守注意深矣公之为治其不以古人自期乎公之先在元世祖为开国勲臣世爵武弁佩金虎符镇云梦至公以儒业值兴运初知解州入谢日上亲抚谕再三自解州历凤阳凡三转馆郡符至四品所谓公侯子孙克济其美者非公其谁也耶公其益励忠勤以报上哉於是衆皆以为然酌酒赋诗而真为之序

送知汝宁府事万公孟雅上任序

圣天子在位之十一年春王三月诏以泗州知州万公孟雅陞知汝宁府事公拜命趣装过临淮真迓诸道左为公贺公从容言曰民社之司国体所关孟雅藐焉晚进无能为役任以一县一州犹恐弗胜况二千石之重耶仰惟圣明在上拔擢至此惧陨越为斯文羞何以贺为真应之曰此足以见公敬谨之心至矣天子於公知之既明故用之亟而任之重也公其夙兴夜寐以图报上恩哉按公南昌府进贤县人自幼读书有奇气洪武甲寅以人材徵至京师天官策以时务尽略去问目直以已意荅之天官击节叹赏曰用世才也授侍仪司舍人进殿廷仪礼

司副奏对详雅甚称上意谒告归拜家庆还奏江上徼巡不法事诸巡检皆杖责公遂授知凤阳府临淮县事临淮中都畿邑多谪徙之民使者往来冠盖相望置驿给马视以为重先时量其民之物力高下十分为率以供其役奸民号金银王者与其徒十人恃郡太守亲契撰词行贿将变置损益售自私之计公慨然曰挠法乱政有甚於此者耶实封上言上命台府鞫治奸民悉服罪郡太守坐累至死公遂以言事得实陞知泗州事泗民醇厚古朴公知其易治也莅以寛治其民大和以得公为晚士大夫之在学校者摭其事倣汉魏乐府咏歌之报政上闻遂有今汝宁之命意非才且能其至是乎汝宁古为蔡州周蔡仲所封在春秋为要领之国齐桓晋定两召陵之师皆以蔡故炎汉以来袁安陈蕃许劭之流以名节相尚至宋上蔡先生谢公以伊洛正传启迪後进文物彬彬焉而自近世以降汝宁首为兵阶际今盛明德化涵濡休养生息十有余年向之称干戈昼战夕备者今则诗书礼乐道古昔而称先王恂恂乎礼让之风矣向之飞刍挽粟疲於奔命者今则优游田里以耕以稼养生送死各终天年无愁叹困苦之声矣而公以聪明清强之资当承流宣化之任所以抚安其民者其不以在上之心为心哉汉黄霸守颍川以治行第一入为丞相汝宁颍川密迩之地也公其有所兴起矣庙堂钧轴之任宁不有待於公乎真虽老犹及见之矣遂酌酒为别叙其事以赠公之父玉麟先生博学老成生公时尝感异梦公政治之善者多出庭训云时洪武十一年龙集戊午三月十有四日序

送平凉崇信县主簿定海赵行远复任序

蛟川为明郡属邑有虎蹲山以为形胜溟波际天一瞬万里珠宫贝阙光怪朝夕蛟龙之变化鯢鲸之出没云烟风雨晦冥不测诚天地之伟观也去蛟川四十里曰慈峯为元放翁隐居之地有丹竈在焉山势峭刻林泉幽深灵芝瑶草琅玕之属丛生其间至其地者不啻上方丈而登蓬萊也邑大姓赵行远者居之赵之先家襄阳在宋建炎时有扈从来南者遂占籍焉行远少失所怙有母年八十余耕田读书从渔网家取海错以给奉养洪武六年夏以秀才徵至京师试艺中选授安西平阳府崇信县主簿有能声三年考滿入覲宴南宫俾复旧职谒告归拜家庆慈顔喜悦郷党咸以为荣毕事以来过中都求予文以赠夫士之出处一惟其时而已故在山林则以尊德乐义为心在朝廷则以济时行道为心行远居海上初无意仕进也及出而任民社之重於是钱谷赋税政事刑名与夫簿书期会念念乎动静语默拳拳乎举措设施不能以一息忘也国家用人取法唐虞三考黜陟久任责成有官守言责者盍亦慎重乎守之以公莅之以勤而行之以敏毋旷官失职以至於戾上以慰廊庙之望下以乐斯民之生而前乎如是也後乎如是也斯其庶几哉昔先宋时文献萃於我明若黄给事龟年以谏直闻应参政徭以文章显沈国録焕以道学称皆在今蛟川昌国诸岛屿间行远习闻其风其似而续之矣夫观於海难为水行远家海上观海者也功名事业其必如海矣乎行远行矣见庄浪县簿曰郑奇者予同母弟也其必以是勉之

送国学生洪仲友授开封杞县丞序

杞有夏之後也圣人书之春秋始以伯中以侯终以子有若不足乎杞者岂以其用夷礼失先代之旧欤母亦以其甘心削弱不自齿於大国欤自秦置县以来有长吏治其民人遂并列於有司矣今观其地在梁宋之郊北入燕冀西出并晋四方宾客高车驷马为仕宦而往来者肩

相摩而足相踵也使者一介之命元戎十乘之仪王事勤劳不遑后处者冠盖骈集而旌旄联属也原田广阜以耕以稼出赋税以给公上其民甘心焉然而供亿将迎驰驱奔命盖亦烦且劳矣非有清介勤敏之士抚柔而劳来之何以副国家安养生息之盛哉严陵洪仲友好学能文由国学生分教临淮者三年天官奉命徵入授开封府杞县丞丞贰令者也於其政事号令之施得以可否其间非阿顺以为同矫亢以为异也今夫令之与丞听治一堂之上吏胥抱成案鹄立有启其端者曰某事当然某事不当然署其当然者不署其不当然者一利之兴民望焉一害之除民望焉斯其庶几矣夫使依违苟且当署即署利之弗兴害之弗除焉用彼相哉仲友以学入政志乎民者也盖亦不负丞乎杞之令长黄原辅由翰林拜御史出膺兹选文章政事纲维於上仲友赞助而辅成之杞其治矣公退之暇问诸境内亦有道古昔而称先王者乎由是明礼义以正人心兴教化以厚民俗有夏之遗风千万载如一日矣使有学礼如尼父者过而观之曰文献足徵焉岂非朝廷所望士君子为政之効哉

送邳州睢宁县主簿何振纪朝京序

春秋之学自左氏公谷氏以及文定胡氏之说天下家传而人诵之际今圣朝科举取士复增用宋直阁张主一氏胡氏得於伊川程子张氏得於考亭朱子大经大法前後一揆士君子取与之公固足以信诸天下後世矣有能因其学而见诸政其非明体适用之士哉山西沁水县何君振纪世家儒素幼从乡先生胡关张公德彦游张公通五经元时累领乡荐後以上第历任儒台爱振纪颖悟授以春秋凡王伯夷夏之略所以明分义正名实着几微者无不用其至洪武四年之秋有司敦迫就试乡闈复徵试吏部论楚椒吴札为一例吴札让国之贤不当以辞国见贬大宗伯见而异之奏为霸州保定县主簿未几以减汰冗员调睢宁县簿睢宁下邳属邑今为中都畿甸昔者黄石公张子房之知略江革王祥之孝行遗风流俗犹有存者振纪居佐贰之职尽心周旋不憚劳勩阖境百里政教所行风动草偃由是盗贼屏息词讼简少治邮传而道路以葺修陂堰而水利以兴劝学校则诗书礼让之风蔼如也课农桑则禾麻丝茧之用裕如也振纪之政既为郡府所知遂檄命摄五河县复摄淮岸税课分司事皆有能声复职睢宁益廉慎自持民以悦服既三年遂以考满入覲明廷矣振纪其贤矣哉夫穷经将以致用也惟春秋帝王传心要典君臣父子之道实备焉推而行之家可齐国可治而天下可平也岂徒一县邑间哉振纪以春秋学来佐睢宁设施举措之方本诸褒贬赏罚之要所谓明体适用者不在兹耶且夫三考黜陟唐虞盛典久任责成汉唐良法国家用人依倣前代有如振纪之政献诸九重之上天顔对越恩言嘉獎不使之复政睢宁以慰其民之心哉传曰恺悌君子民之父母於振纪见之矣予以乡贡忝教临淮振纪尝以公事至郡府得与论同经之好故於其行取其为学治政之大者叙以为赠而凡聚散离合之琐琐者庸得而略焉

送凤阳府推官李公考满朝京序

政事之重尚矣周礼秋官司寇掌邦禁以佐王而士师乡士遂士皆其属也汉有廷尉平司狱而部刺史郡太守各以其法律治境内自汉以下循名责实盖不一矣宋节镇府州置推官一人当时公卿士大夫名声在朝廷功业在民社如赵抃苏颂之流率由兹选不谓之得人矣乎钦惟圣朝混一海宇小大之任咸尽其才至於推谏之职尤不轻授盖欲刑期无刑致治平

之効以比隆唐虞三代也嘻盛矣而为是官者其可不以在上之心为心而勤於厥事者哉吉安李公以儒世家初任河南陈留县丞以政绩着闻陞授今凤阳府推官凤阳帝乡戚里中都重地簿书狱讼号为繁剧公之来也日与郡长贰坐堂上讲明治体凡一政之出一令之施相其可否阖境千有余里风行草偃无有後期至於刑狱置对则东厅独署洞究精察所属官吏贪赃狼籍者按得罪状或杖或流率媿服以去有先被鍛链成死狱者公审其实有罪者至服斧鑕无罪者为破械出之至於疑似之踪诡伏之奸必俟其发觉呈露逮捕系治而无有冤枉不伸者矣於是缙绅士大夫相谓曰李公其贤乎真闻之作而言曰公何以得诸衆论之公哉帝尧之世伯夷折民惟刑孔圣之门子路片言折狱刑非不用也然非明而清者不足以任法之重轻非刚而勇者不足以寄人之生死公之治狱小大以情然後以其法施之生者非我能生之也死者求其生而不得则亦未如之何也夫其存心之正用法之公斯能伸其所学而不媿古人矣是宜人所羡慕而歆艳之者使天下为士师者皆如公焉刑措之効不其可致者乎昔者儒先君子有法律仁义之说盖法律本於仁义必有慈良忠厚之意存乎其间斯民固有观感动荡为善而不自已者矣公尝以仁义之道莫先於教化而教化莫重於学校每谒先圣庙下必进诸生讲明经史以济全体大用之要可谓知本者矣莅政之暇诗歌自适尝赋灯夕短歌行模写太平风物之盛雍容揄扬郡博士以下皆属和焉今忽已三年矣考满朝京凡平日被公容接者能无情乎庸即九郡山川古蹟形胜拈题为咏窃比古人赠出处之意云

送怀远县税课局大使樊先生牧斋考满朝京序

象山在明海上丹山蓬莱之胜玉芝朱草琅玕及不死之药生焉古仙神人若羡门安期偃佺之徒尝居之其人物多风流醞藉有冠带佩玉气象自宋以来故家文献栋宇相望至於有元若蒋公商卿博士奉常与典大议藏在有司缙绅君子犹能言之其文行显着与博士同时者若石壁翁樊公其人乎石壁之学後进之士多传之而其犹子天民先生实得其绪余天民传之子余庆余庆以今大明洪武五年用易经试中漕闈计偕春官不乐仕进告于大宗伯归山中隐居求志以予同年亲若兄弟尝与论家世源流知其从兄牧斋先生之贤牧斋盖石壁翁嫡孙尤克世其家者也惜予未及识之既来临淮三年而牧斋亦以铨试吏部中选授凤阳府怀远县税课局大使因得挹其颜色听其议论私窃喜幸庶几遂平昔之愿焉牧斋清慎自律其於商贾之征不以位卑禄薄尽心竭力朝夕不倦或岁时之暇登大禹涂山卞和玉坑兴怀千古见诸咏歌邑大夫博士以下皆重为敬礼考满得代当朝京师怀远士大夫咸恋恋不忍别使来求序以赠夫足国裕民之道莫先於理财故钱谷之职自古为重乘田委吏在孔子大圣不耻为之唐时盐鉄度支皆以大臣兼领宋儒先君子以道德闻望称者或主茶場或监酒务曷尝不尽其职之所当为者乎夫君子素其位而行士君子明体适用之学何所施而不可哉牧斋征商从事贡赋以登上下相安国家劝善録功由是官省部台宪及馆阁郡县尽其学之所至以大祖父文献之传其不权輿於今日耶异时功遂名成幅巾野服逍遥丹丘蓬莱之上识者固以为神仙中人矣予也忝以同乡又在契家之末幸得归老固当尽脱尘鞅以从之矣是为序

送凤阳府推官李先生渊泉考满入覲序

吉安李先生渊泉以奥学高行为郡有司所知荐诸江西行省行省以其名上之吏部吏部徵试中选授河南省陈州陈留县三年任满察官考为称职陞授凤阳府推官凤阳国家兴王之地控制千有余里九州二十四县在管辖之下簿书之烦不易理也狱讼之多不易治也先生日从诸公莅事公府羣吏就列两造在庭是非曲直一言辄得其要讯鞫所加不罗织鍛链以致其事小大之狱各使就律不以威势利害为高下轻重今太守河南李公深敬异之以为儒者之効焉夫狱讼民命所关有国者视以为重张释之为廷尉天下无冤民于定国为廷尉民自以为不冤虽其所致固有浅深然非端本澄源政平讼理焉能之哉廷尉天下之平也推官郡府之平也郡府平则天下平矣噫岂轻也哉且夫仕所以行其道也道在是不以禄位言也先生为古士师之官其道固足以行诸一郡矣使进而升如钱若水以同州推而进拜枢使梁灏以大名府推而入知制诰赵清献公以武官节推而累官至参大政亦何歉乎哉仰惟圣明在上天光咫尺崇儒重道日恐不及思得賡歌之士都俞吁咈於治朝之上致太平无讼之功有若先生者考满入覲则以之为台为省可也然而中都重地九重宵旰眷念乡土则以先生复职凤阳亦可也任贤使能在久任责成今九年三考之法与唐虞黜陟之典何以异哉予知先生尚有以慰凤阳吏民之心矣先生行有日临淮邑长山西王君惜其别而冀其复来也俾四明郑真序以为赠

送渭南县主簿章宗盛朝覲复职序

朝覲之礼尚矣周制六年五服一朝又六年王乃时巡诸侯各朝于方岳所以考制度尊天子也礼之所在根诸人心达诸天下先王为之节文着为定制孰得而踰之哉周衰礼废更秦汉隋唐以来无复如姬周之盛矣赤芾金舄会同有绎其威仪文物何如哉洪惟天朝万方一统礼乐会朝具有成制凡列郡守长每岁一朝州县长貳三年一朝考功即户口钱粮之多寡农桑学校之废兴以时其殿最焉其与周人考礼修德之意何远哉永嘉章君宗盛世为儒族读书明理而精於法律元至正间以才能见知江淞省臣荐为温州録事内附谪居汴梁徵入京师授渭南县主簿渭南安西壮县簿书期会之繁贡赋供亿之重朝夕从事厥声懋着三年考满布政按察两阃咸以称职闻覲朝大廷宴赐南宫衣冠入谢而归过临淮论斯文之契为予言曰某何以得至於此哉予惟君臣上下之间以敬为本宗盛以一命之士得面奉清光对扬显命法樽珍饌上承宠赐其亦可谓荣矣大雅之诗曰君子万年介尔景福盖享其恩礼之盛而祝其福受如此也然则宗盛其思为报効之地哉簿佐令者也虽曰位不称其才然能以爱民为心而尽力於所当为公侯将相之任其不权輿於此乎夫奉法循理古循吏所以为治也宗盛其夙夜匪懈以无负上恩哉予教临淮恋恋弗去异日闻有上偕者称渭南之政於安西诸邑为最其非宗盛也耶马首告西叙以识别云

送固始县税课局大使胡子贞考满序

予尝读宋史绍兴八年戊午王伦及金使张通古以诏谕江南为名来言归河南陕西之地诏侍从台谏论得失胡忠简公者为密院编修官上封事乞斩秦桧等贬公监广州仓未几桧启思陵诏示天下指为横议言之不用又以为罪国家之治乱中外之盛衰判然矣君子以是知宋之南渡不复以北犹周之东迁终不得而西也呜乎君父之讎义不戴天宋世之祸惨矣下

穹庐之拜公岂忍见之哉身为岭海之行名如泰山之重士君子公论有在矣然而秦桧以公异已必欲置之死地南荒瘴疠转徙万里而守臣复有希其指意为窘辱之者而公不以死生患难为意且着诗词以自见迨至阜陵御极公道大开召还叙复位跻荣显年逾八十壽考令终岂非天也哉予客中都尝预修九郡图史因得宋顺昌郡人王明清所着挥尘録观之载公遗事为多至及王伦家世出处大致益知公之指斥其狎邪无赖不诬也然而伦之使金终能守节以死其公之言有以激之也耶今去公二百余年诵其言而论其世凜然如见其人况其子孙文献之足徵者乎光州固始县税课局副使胡子贞世家吉安为忠简公之後年四十余器质修谨言论疏爽而直亮慷慨之气恒见於日用间识者以为有忠简公之遗风夫忠简以直言去国出司钱谷执政者固有以挤之也子贞方以材艺荐不登诸馆阁列之郡县而征商之司乃无异忠简之贬秩何哉是不然忠简当权奸用命主懦国弱其由内斥外固宜重叹以为不幸今明良相逢万方一统而子贞由小及大升高自卑殆将歆美称美而不已者岂曰钱谷货财之职为非所当为者哉士之怀才抱德者以得时为难时有用舍身有显晦子贞其可谓得时矣昔宋宰执侍从家多在大江以西庐陵欧阳氏至承旨原功而益着清江刘氏至集贤良甫而复显若盱江曾氏临川王氏晏氏平园周氏亦有文学政事绳其祖武者公侯子孙克复其始胡氏与诸家相望子贞其不当以忠简公自期乎左氏载陈敬仲之占有曰八世之後莫之与京子贞上溯忠简公已九世功名事业其不在今日耶无念尔祖聿修厥德予於子贞实有望焉因其考满如京师庸叙其家世之渊懿以为赠

荥阳外史集卷二十一

卷二十二

●钦定四库全书

荥阳外史集卷二十二

（明）郑真 撰

○序

送知邳州事杨公考满入覲序

吾乡四明袁先生志衡以宋侍郎洁斋诸孙世家文献德行问学为後学者师际今圣运徵入京师授知池州府事政事神明洞见幽隐属县长贰少所许可独与建德知县杨公子方爱厚每於其至府白事亲与为宾主之礼公关西盛族尝登赵公益阳之门设施举措皆得诸学问讲贯之素公既考核称最复职逾年中书奏陞知凤阳府邳州事适袁以谪过邳公以故人致馆谷之礼君子於是知公之厚矣予与袁为亲契尝遇诸淮海上闻其道公之贤咄咄不离口而恨未及识公今年之春公以事至会府见诸庠序间容貌之修伟襟度之脱洒文章语言之俊迈高爽然後知其为故家文献之盛也未几公以三年考满与其倅陈公惟仁旅朝京师其州之僚友与其父老及寓公寄士学校师弟子及闾巷儿童凡数百辈送至东门外五里攀恋不容行至不得已为别则曰公之为政彻於九重非一日矣圣君眷念乡里其亟还公以慰吾民矣乎予闻而异之意公何以得诸此哉问诸邳人则曰我邳之望治也久矣自公之来一以教化为本而以法律行於其间其於我民咻噢之而督责不加也抚绥之而烦扰不及也是以同僚协恭令行禁止数百里之间鸡犬相闻安於生养完聚而无愁叹困苦之声矣吾民殆将尽其力役终其身事之不特如河南之愿借寇恂而已予於是喟然叹曰诗所谓恺悌君子民之父母者公其庶几哉夫圣王之治莫重於得民故善政得民财善教得民心得民财者未若得民心之愈也公之得民如此其能以在上之心为心哉乃若简牒登载所谓农桑学校户口钱粮云者特其服官守职之常尔昔冉求以政事称其後得封为下邳公公学圣门者也当君明臣良之时为政在辇毂下考功上奏重瞳昭囿高爵重禄其不复见於今日乎予因袁先生而信公之为人又因邳人论公治政而喜为天下道也遂着之序以为赠

送邳州判官陈君惟仁考满入覲序

兰亭在越郡西南二十里崇山峻岭茂林修竹晋人觴咏之故蹟千载一日也土生其地往往词藻醞藉有永和之风予在元至正间过山陰拜王右军祠上天章寺阁览观山川形胜退归所寓因识故宋侍郎公之裔陈君惟仁君美容修髯风神秀朗慷慨论议时方承平读书着文谓取科第如拾地芥予因服其为人嗣後二十余年际今圣运予以乡贡典教临淮而君亦以六科试艺中选授真定景州东光县丞道过中都相见有如梦寐逾年以减汰召至阙下核税

广信能声着闻还授邳州判官邳与临淮皆凤阳属邑君以使府期会往来不一因得与论宿昔之好君尚气谊重然诺而吏治尤为精敏邳当大河南北之冲公侯贵臣以王事出入供亿无常君上承下媮悉得其欢至於狱讼两造在廷一言之间情伪以决有经其化导劝诱至於革心悔过者尤多由是三年之间其民皆安乐生养熙熙然诗书礼乐之风而君称为辅佐之贤矣噫地灵人杰古今美谈即君之为人而考其为政可谓不负平昔所期矣山川灵秀之鍾故家文献之盛其然不其然耶昔汉韩陵为下邳令徵拜尚书遗爱在民庙祀不废晋王祥为下邳别驾至今传其孝行善政之得民如此君其何媿於古人哉仰惟圣明在上致理之效有如唐虞以君之佐邳在畿甸之近而治绩彰彰如是铨衡上考简书有程仰黄道之天开瞻圣顔之咫尺所以宠绥而福祿者不在兹乎诗曰既见君子为龙为光此诸侯见天子之词也邳之士大夫於君之入覲盖有望矣予与君相知为深於是叙其出处之正以致其期望之厚云

送凤阳行大都督府僉事胡公朝京序

凤阳国家兴王之地肇建中都虎旅云屯周庐千列於是立行大都督府以控驭之建牙视篆上应天枢自非文武英杰熟於韬略者岂足以当之哉淮郡胡公奉上命来僉督府事当京畿清谧钱谷甲兵夙已具备而公从容折冲文武将吏悉听号令贝冑瑇珉之士帖然衽席之上各思尽力所报而凡系籍为民者皆得以安养乐育於太平无事之域若公可谓贤也已洪武十三年之春圣天子图治励精更官定制建五大都督府以统治军民玉音涣颁趣公入覲盖将增重本兵班聯上衮以节制藩维盟功带砺也斯不亦盛乎哉夫将帅之才於其治兵以考其成功公忠厚知勇出於天稟值圣运肇开龙飞九五躬属橐鞬援桴鼓与诸公周旋军旅中决奇取胜有如耿恭谦退不伐有若冯异勲名既着闻望日隆上心眷注斋坛授钺诚有待於公矣乃今佩绶进趋天顔对越尧言汤诰崇股肱心膂之任禁中颇牧指授器使非公其谁耶诗曰思皇多士生此王国王国克生惟周之桢济济多士文王以宁凤阳有司百执事宁不赖公於是哉麾节言迈谨率僚佐以别且进一言为赠

送凤阳行大都督府僉事陈公朝京序

上在位之十三年诏立五大都督府以统诸卫所以尊国体重军事也於是僉凤阳行大都督府陈公奉命朝京盖将盛斋坛之礼以为授钺之荣焉惟公淮海望族沈机勇略足以制驭三军仁心厚德足以抚绥百姓自其早年上逢圣运躬属橐鞬与诸将帅出入行阵间六韬三略堂堂正正迪师中之吉上肤公之奏武阶勇爵位望日崇其僉阃凤阳也高牙大纛前驱後翼增中权之节制示上将之威仪笑谈折冲从容整暇僚佐协恭军民安堵生养教训安乐太平而公之令名广誉日闻於黉旒之上矣仰惟廷陛天开威顔咫尺温语如春以赐以劳衣冠佩绶奉扬对越枢机之任辅弼之功用以勒勲彝鼎垂名竹帛岂不足慰凤阳羣有司之望哉夫天生五材何能去兵将帅之职安国家定社稷功莫尚焉故武文万邦为宪周诗所以美尹吉甫也帷幄决胜千里汉史所以称张子房也公当明良际会之时风云龙虎千载一时也战多之绩视诸古人矣自今以往公其尽心报上与功名相始终哉某以非材谬膺郡寄承下风而被余光者非一日矣旌骑南辕能不恋恋於中耶谨叙公出处之大以致颂美之诚云

送凤阳太守李公归滑台序

国家设官分职任民生之寄者莫盛於郡守汉帝所谓共治天下惟良二千石者是已今士大夫仕宦於朝得至二千石亦云荣矣责望亦不轻矣求其任处京畿慎终如始奉身而退如我滑台李公者何其少哉凤阳帝乡戚里地大物衆号为难治公之来也勤以莅之敬以行之持之以公平律之以廉洁本之以仁慈寛厚不矫矫以为高不察察以为明闔郡九州之吏民敬之如神爱之如父令行禁止境内称治而尤究心学校尊敬贤士探讨论议求其所未至由是令誉彰闻咸以为凤阳置郡以来太守之贤莫公若也公不自矜喜益加慎重逾二年代者至公曰我其免於戾矣四时之序成功者去我将归隐林泉与猿鹤相主宾矣投牒遂行郡僚佐父老民庶追送淮河上恋恋不忍别有传輿人之诵者曰煌煌兮中都绵万代兮基图焕尧言兮都俞曰我公兮尔守尔居公之来兮五马绣衣冠兮儒雅坐黄堂兮任民社岁其有兮祥庆来下湛形神兮至清水之清兮月之明政以成兮民以宁乐雍熙兮盛平驾公车兮结轸驂騑兮双紉望滑台兮不远伊近曰公归兮默孤村之深隐攀辕卧辙兮公不少留我民之思兮心曷以休淮山晓兮淮水秋溘清风兮公其来游真闻之起而言曰公可谓得斯民之心矣然公去志已决其若之何哉夫进退一致也进而仕所以行此道也退而止所以全此道也公识进退之宜明仕止之正庶几於圣人之道者乎輿人之诵岂欺我哉於是退谄诸衆而为序以赠

送凤阳府推官刘可成归长沙序

上在位之十有三年命有司求贤良方正之士某遂以荐入京师授凤阳府推官窃伏私念狱事系民为重而才謏德薄惧不足以称圣恩既到职因得与前推官刘君可成论交承之契可成长沙名族性姿温厚议论详恳恂恂然儒者也莅事凤阳甫三月余稽经按律决狱平允其狴犴之严扃鐍之固朝夕惟谨视其寒暑燥湿为之洒扫而祓除焉常使囚人安於桎梏而疾病不生盖以所犯在彼而所施在此於秋霜惨烈之中有春风和煦之意吁是其仁心之存者欤承乏後尘凡簿书成案是非曲直议擬裁决方将资以取益庶几告新令尹之意焉乃以归田得请言别能不慨然於中耶夫怀土常物之大情旅次天涯忧虞荐至不如乡社桑梓之可恭敬止也禄食鼎鍾曳朱紫荣耀一时不如布衣疏食之可安乐长久也劳神州县莫遑居处不如山林泉石之可从容延伫也然则可成之归孰得而挽留之哉长沙居三江五湖之中地大物衆为东南上郡有屈大夫贾太傅之遗风自唐及宋人物宦游之聚若欧阳询褚遂良沈传师及致堂胡公平园周公朱文公考亭张宣公南轩道德仪范相望後先数百年来衣冠文献之泽犹有存者即可成之为人盖可见矣今而脱屣仕途田园归老用诗书礼乐化湘潭为邹鲁使章甫缝掖之流尊为乡先生岂非某所望於可成者哉行有日夙所承事者若司狱张彦实府吏某等十有余人眷恋不忍别请一言以为赠遂不敢以不文辞也

送颍上教谕徐景顔谒告归三衢序

鄉贡进士太末徐先生景顔典教中都之颍上县逾两考不调座下执经凡二十人以成绩着闻固有贡春官入成均者矣一日慨然曰昔我二亲弃捐相继葬诸穀江之阳而风气弗完吾

亲不能以妥宁也失今不图异日无以见我亲於地下矣遂以改葬告诸有司得报而行过临淮予以同年之契饒诸水汭告之曰景顔克伸情事庶几始终无憾矣夫生之膝下一体而分喘息呼吸气通於亲亲之安子之安也亲有未安子其得而安乎是故事死如生事亡如存人子当致力者也况夫山川兆域体魄之所藏神明之所宅焉者乎且葬地固有当择者亦有不择者惟审其安不安而已自龙穴砂水之术行好事者图其地之形以售诸人曰某可贵某可富某当贫某当贱听而信之者往往牵於吉凶於其亲之亡有不及时而渴葬者有过时而慢葬者有终其身不能葬者噫独何心也哉夫富贵贫贱天也我其如天何彼术者之言亦已惑矣景顔谒告改葬其亲求其亲之安也非惑於富贵贫贱之说也传曰改葬之礼总举下邳也景顔其慎於礼哉窆既毕奠祭如仪盍亦念夫我职不可久旷也占毕之士望之久矣必亟来以慰其心乎使夫留恋乡土而曰迟迟我行也岂国家所望儒师作成後进者哉景顔行矣见常山可斋陈先生为予问讯焉先生予故人也景顔以予言示之其以为然乎否耶

送延安府宜川县黄君孟仁归莆阳序

闽南儒先过化之地自宋以来道学正传融液渐渍三百余年於兹矣莆阳在南闽封域之内比屋诗书衣冠之盛比诸邹鲁郑公献可朱公原道林公以顺在元时皆以科第显仕化诸鄉其門人德器成就为时模范者则今宜川知县黄君孟仁其一也孟仁之家于莆也尝领郡太守及县令聘币为教导者十有余年弟子员绳绳有师法出而见用於时者十余人由是声誉着闻以其名上之天官孟仁以母老力辞不得已为入京师试艺高等天官大宗伯张公某大器重之奏诸阙下遂有宜川之命宜川延安属邑古为丹州宋时西师经略之地蕃汉杂居号为难理孟仁抚摩疲瘵斯民爱之若父母然逾五月解职而去过凤阳郡博士吴先生义孚同門友也为致馆谷之礼且贺之曰士大夫得仕非难得遂归老为难子归矣其为明哲保身者乎孟仁曰我身不足惜也老母年逾八十慈怀恋恋不能一息宁也始相别时我母流涕言曰我死汝方得还我见汝无日矣幸而我母在焉尚以慰我母之心乎真闻而告之曰士君子立身行已顺其理焉尔向之出仕忠也今之归养孝也忠孝古人所难孟仁其庶几矣且进退随时时可进也则进不为荣时可退也则退不为辱孟仁之於进退岂不从容有余裕者哉莆阳山水之秀甲於閩中壶公之胜蟹井之异好事者以为美谈孟仁既归指其平生钓游之地徘徊顾盼足以系千载之思矣定省朝夕之暇尽出其师说以淑诸人以惠幸天下後世使莆阳文盛为东南冠其非士君子之所望者哉请以是为孟仁赠

送开封府杞县丞洪君仲友归严陵序

洪武五年之秋予以明经应瀾江行省鄉贡进士举识严陵洪君仲友於稠人中即而挹之气清神明信其为佳士也既辱膺荐书偕计春官授文学掾来中都之临淮逾三年而仲友亦以国学生试艺高等赐绮衣分教临淮之子弟遂与论斯文之好为至又逾二年仲友召还京师授河南开封府杞县丞杞在梁宋之郊公侯使客冠盖相望军输赋役视他邑为重县有令有簿仲友尽心其间旦夕集其民咻噢而教诲之其民相谓曰丞我父母也其勿慢凡一政之出一令之施率劝趋恐後縉紳君子以仲友为不负丞矣会亲王建邸河南百物所储动以万计郡府择司其事者皆曰非洪县丞不可仲友受命弗辞勾稽探核出纳惟允鳩工之聚实有赖

焉考滿慨然曰我何久於此哉家有老母不及时致养我之罪大矣先是其母使季子仲德来为仲友图婚得阳谷张氏亲迎成礼既有子矣适朝廷许在官得代者还里仲友再拜感泣曰圣恩如天莫量臣微克遂所愿所谓生死而肉骨者其在兹乎遂及室家登舟过临淮予酌之酒曰仲友可与论出处矣夫士君子之所由者道而已不合乎道其不媿为人矣乎仲友家世业儒年逾四十学以裕已善以淑人忠足以奉上仁足以恤民孝足以及亲君子之道萃於其躬矣故其进也以道之当行退也以道之当止其心之所适志之所安孰得以浅近形容之哉千里征途言遄言迈高堂白发朝倚门而夕倚闾也其亟以慰其心乎昔者曾子尝有言曰我初为吏禄不及釜尚欣欣而喜者乐其逮亲也仲友归养其母以其余禄奉觴称壽乡党亲戚来宴来贺慈孝之情固有感动人者矣传曰民之秉彝好是懿德仲友之谓乎予与仲友俱濶产为同乡业春秋为同经任教事为同志而久客淮山望家之想日形梦寐曾不及仲友出处之裕如也於其别姑书以为赠

送开封府郑州荥泽县主簿王以仁归养序

国家以兴教化为本凡俊选入成均者使分教天下之学於是太末王君以仁以洪武八年之五月奉命来凤阳之宿州逾二年还京师授河南开封府郑州荥泽县主簿当关陝要冲道西北而径东南者率由之以仁年逾弱冠才敏气锐读古今书期於适用既至慨然以民生为已任利之未兴害之未除躬为之率先其民爱之有如父母会亲王建藩河南宫府所须瓦实为重以仁领开封府檄司琉璃窑塲土搏色设之工精好完美故上而公侯方伯大臣下而郡守长吏以为非以仁不足以致此咸尊重而礼貌焉三年考满蒙恩归里因谓人曰我少失母氏今独父在耳忝佐下邑在数千里外而我父以道远不遑就养且遣人以书来俾授室金斗张氏为嗣续之图今幸挈累以还无一金为壽将耕猎樵采为朝夕甘旨之供焉予闻而赧之曰此可以慰其亲矣夫夙兴夜寐无忝尔所生者君子之所谓孝也是故莅官临民兢兢业业而清慎自持内慾不萌外邪不入至于一举足一举目之间不敢忘其亲焉盖所以保其遗体不以利诱之私貽其亲羞也彼有堕窳败业贪墨败名囊充捆载骇心耀目使其亲忧在旦夕者独何心也哉且得禄以养其亲亲所乐也禄有厚薄费或不贲而养有不及亲亦何憾焉若乃洁身而退不辱不污有如以仁焉者其父见之懽欣喜悦当何如哉昔宋赵清献公仕蜀以琴鹤自随故家文献论廉介者莫尚焉以仁生清献公之乡其闻风而兴起者耶予忝教临淮久縻廩禄不得从以仁而去深窃自媿而严陵洪君仲友以予同在濶产求一言为以仁赠予安得以不文辞哉仲友亦国学生为杞县丞仕止进退与以仁同往来又同舟载庶几敦始终之谊者云

卷二十三

●钦定四库全书

荥阳外史集卷二十三

（明）郑真 撰

○序

送平凉府判官徐公复任序

平凉为西北边郡控制蕃部势极万里国家倚为重镇元勲硕望高牙大纛将命出入弘远略而奏肤功者相踵也一介使副轻车驷马旌节所向宣上德而达下情者相接也殊方异俗一统咸归荷旃披毳之流匍匐伛俛效诚奉献者若百川之归海衆星之拱极也彼其地大物盛则夫任抚绥佐辅之寄者可以不得其人哉江右徐公宏远以南州高士之裔由孝悌力田得判平凉府事上任以来承上接下无不得宜而其钱粮户口农桑学校凡职之所系者实尽心焉既三年考满入覲拜恩华盖殿下锡燕而归中朝士大夫且贺且喜咸赋诗为赠请予文为序夫民社之司所系者重汉时长吏安官乐职或长子孙以官为氏其治行之着者则玺书褒宠增秩赐金盖所以重斯民去思之心以为久任责成之法也岂徒玩岁愒日以养资格为哉公之倅平凉吏民既熟其为政矣其来朝也必企首翘足而望曰盍归以抚我乎今既慰所望矣则夫教令之施固将奔走之不暇矣异日报政上闻尊官重爵其不有以宠绥之乎夫府倅之於太守义均休戚使夫慎终如始协衷和恭庶几上副国家委寄之隆哉传曰不懈于位民之攸壻公其有焉予弟奇簿庄浪时於公有周旋之契故於公之行敢诵言以勉公名原别号（阙）溪渔叟云

吴氏谱系序

予以临淮学官考满与凤阳教授吴先生进牌入覲阙下对清光聆玉音应制进诗荐承宴赐一日朝华盖殿先生以称职授宁波府主簿予亦忝除广信教授幸得过家上冢与先生买舟东行先生既上任宁波士大夫且贺且喜造谒馆下先生出示谱牒且曰某忝以世绪谬拜恩擢民社之司凜不自胜维是系序之传奉以周旋不敢失坠今老矣尚未有子息嗣而续之其能无所望也耶缙绅君子谥焉观焉仰其科名之懿世泽之厚执笔撰述盈诸卷轴俾予序作者意夫君子莫贵於重本谱牒之系有尊祖睦族之义焉非所谓重本者乎以吴为周室之懿胤昔者太伯仲雍以天下让至延陵季子而让国益以明着自国而家子孙蔓延天下有能谨尊祖睦族之义则泰伯季札退让之风千载一日也然以莆田水南一族观之由宋以来号为全盛五太守状元坊之号功名爵禄冠於闽南至於晚岁潮州倅君复守节义可谓世臣乔木也已恭际熙朝右文更化先生嗣而承之文章德行掌教中都自王邸台察至郡府州县皆改

顏而礼貌之由是出倅于鄞凡簿书刑政之宜诗书礼乐之正异日公侯复继万石君家之盛岂非宁波士大夫祝愿於先生者乎夫家有谱牒国史取信唐太宗诏许敬宗类天下氏族序世家者有考焉乃今紬书金匱述作并兴若斯谱者上送之官岂不足以风厉天下乎可但昭穆世次为一家之传耶孔子曰吾学周礼有宋存焉予於吴氏谱亦云

送广信守御千户陈公赴召命序

国家以神武定天下熊罴爪牙之士以忠信勇力自奋於功名爵禄之会者以战则有一月三捷之功以守则有专城方面之寄勲名载史册声誉在朝宁恩泽在子孙吁其不盛矣哉定远陈公某自幼以材略称际圣主龙飞江左环甲执兵与在行间累功至武毅将军守御千户由永新移广信所至号令精明军民按堵乃洪武十四年朝廷命取云南公以兵隸安陆侯帐下时公年几六十气体充肥而骑步便捷所向有功行营以老将目之逾年八月进兵逻逻斯之地羣蛮立栅山中者首尾相应猝不易拔衆议以百者当一寨为贼往来要冲岩崖壁立最险而固宜以奇兵出其不意取之则诸寨不攻自破矣求将难其人安陆侯以属公且许重赏公曰某当捐身报国无他冀也设死得一棺足矣况未必死乎约以是日四更复命於是率百夫长南阳卫臧胜广信所张荣壮士四十余人乘夜攀藤萝以登贼不之知也一鼓拔之捷报如约自是西堡及阿黑白崖关七寨皆震懾请服安陆侯酌以卮酒夸爲隼功上其事于朝公既振旅还广信逾年命召还阙下盖将獎厉贤劳致其委寄任使之隆也公其可得而辞哉夫竭忠敌忾固臣子之用心而赏功録善实朝家之盛典三代以来尚矣汉置武功爵以赏战士多至超等或赐武臣则倍於文官所以闵其劳而叙其绩者何如哉昔者傅介子班超之流其始皆以下位致显秩实由在上者有以致之以公职长千夫宠荣亦已至矣然以安陆侯知人之明公克承知己之遇善将善兵於斯为至故能以上多之绩膺促召之荣则夫推轂之命斋坛之拜其不在於今日乎易师卦九二之象曰在师中吉承天宠也王三锡命怀万邦也夫人臣有功而君宠任之岂为一人哉所以为天下後世劝也君其益思尽力以报上哉将行广信士大夫恋恋不忍别请予为之序云

送广信府同知严陵方公入覲序

国家朝会之制岁时大庆海宇普同其在内文武百司则有常朝起居之礼在外布政按察暨府州县之长若贰及首幕司者每岁首赐之来朝随班上壽考其功过而以时赏罚焉乃洪武十七年岁在甲子春正月朔旦天子御奉天殿文武两班以次序立车辂象马羽卫兵仗左右环列司晨唱晨侍仪引礼教坊奏乐拚舞拜贺宴赐如式十有六日玉音若曰凡在外入覲者其各归尔职宁尔民慎尔政若事明年孟春朔旦尔等其复来於是广信府同知方公弘道服膺维谨以其年十二月上旬士大夫送至门外者皆恳恳致其祝规而四明郑真扬言於衆曰公其慎於礼哉周礼行人时会以发四方之禁盖以禁止天下之不义也若乃巡狩方岳五年六年一朝之制则诸侯考礼修德以尊天子是故明试以功车服以庸乃虞廷庆赏之盛玄衮及黼路车乘马则周人锡予之公世运既降虞周气象不可得而见矣然而君臣上下木水本原之义固有亘万古而不泯者则人心天理之正也仰惟圣朝龙飞启运声名文物前代莫及而同知公以文学起家貳兹甲郡仰瞻天上清光咫尺则夫赤芾金舄所以雍雍其来肃肃其

止者在今日矣至於民生之休戚风俗之淳漓政治之臧否农桑学校钱谷甲兵之重承顾问而绥宠禄者不在兹乎易晋卦明出地上之象曰康侯用锡马蕃庶昼日三接同知公幸际盛平名华仕版几於古之康侯矣锡命之荣不有协於易象矣哉虽然天眷之隆民望之隆也公佐政已及三年政治浹於人心久矣今其行也咸曰其亟归抚我乎夫天之心即民之心也天之所欲民必从之公盍以慰其心哉

送长沙卫马千户上任序

壽阳淮颍要冲有淝水八公山为形胜实汉晋以来用武之地其人多英勇果毅有古烈士风皇上龙飞淮海壽阳为中都畿邑帝乡戚里輶轂之近凡具一材一艺者皆奋迅挺拔自致於功名之会矣其非云龙千载之逢乎马公世家壽春早以膂力闻执兵行间从征伐有功授广信百户尽心率职将二十年会朝廷有事云南公以百人从行以战以取鼓勇先登为大将识拔云南既平敛兵而还召入阙下论功行赏昇授长沙左所千户公既拜恩奉符文过广信挈家上任千户王公及同寅周公送至西门外执爵言曰公其自此昇矣一郡之寄我谁与谘谋乎予起而解之曰有功加地进律古之盛典以公勲在边廷名在简册则夫进官升秩有不容已者岂广信所能久羈也耶昔汉新息侯南定交趾表功铜柱图像灵台此公家世事也今天子垂意韬略之士制武功爵锡貂冕以表仪朝宁以公准产之英战多之绩安知不为公为侯与新息侯相望於千载之上哉衆以予言为然酌酒言别而俾予叙以赠

送长沙郑千户上任序

国家诞受天命四方九宇悉主悉臣而云南小丑僻在荒陋未入职方遂命熊貔之将虓虎之师一举而郡县之由是雕题凿齿之流漆头花角之衆以朝以贡旦夕往来不絶於道而圣明之化益大以遐矣吁其不极盛矣乎宁国郑公景祥智勇之士也为广信百夫长将凡二十年师征之日获预行间既定中庆遂入逻逻斯之地羣蛮列栅保险猝不易拔公鼓勇先登诸寨相继欵服行营尝上其功洪武十七年冬上命之来朝授长沙卫右所千户所以示劝典也夫师克用命固足以成将帅之勲而赏不踰时尤所以示人君之信以公职居偏裨而功在上多则所以奉成命而绥宠禄者不在兹乎长沙在三江五湖之中左控荆门右通夏汭实东南用武之地金城汤池所以绥勇略而奏肤公者多有其人今天下太平耕桑千里熙熙然仰字俯育之时也然而楼櫓之备器械之修所以警戒不虞者固上下所宜同致其力者也夫严於备御则疆域静勤於绥抚则民心安长沙节使既克承屏翰之寄矣公其尽心周旋以古名将自期哉公既拜恩过广信携家以行千户王公与同寅周公且贺且饯以予在斯文请为之序

雪霁图诗序

雪霁图者元清江守李公圆峤所作也皴法远师董元近学马远而意匠经营精入能品其山之峻险者若鸾凤之轩翥突兀者若车马之奔驰横者如案平者如屐崇峦别巘盘薄起伏不可名状而同云积雪一色皜素楼台层观仙居佛所天光下烛恍然不知其为人间世也乃若野水微茫长桥偃卧古木荒篱闲门自扫有倒屣迎客之意乘扁舟之清兴者殆维其时岩广

架广足迹罕至而睡酣焦寝冻逼袁门者可以问无恙也峻岭巍峩修途栗冽历蓝关而谪潮阳者髣髴如见其人焉想其运笔之时清气吐吞傲睨今古所谓咫尺应须论万里者岂虚言哉圆峤既没五十余年是图流落人间武林刘公购得之爱赏弗置自京师出入燕冀复渡海入辽水天雪野无入而弗自得焉岁时速客每出以示曰是殆类我亲历矣按图索象其在兹耶缙绅君子多为诗文赞咏之予得谛观焉起而告之曰公可谓托物君子矣夫物之白莫雪若也当夫六翼飞洒万象交辉凡污而秽黝而黑者无不白矣人禀天地之气以生人心衆理之会不与雪同其白乎且夫雨雪浮浮见睨曰流诗人之兴以雪之霁也雪之霁以日陰阳动静循环无端於是时也俯仰上下我室我闥内融外明妙悟无际岂独山川之胜可玩可说也哉公由吏入仕所至以清白称今通守广信与司一郡之寄灵府真君光华透彻盖将化炎热为清凉变尘垢为皎洁者由是上瑶墀登玉陛赞襄燮理致三白丰年之兆所以绥宠禄而介遐福者不亦可乎庄周所谓虚室生白吉祥止止者庶几在此此固画史意外之意使圆峤可作宁不有取於予言哉公顾予一笑遂书以为序时洪武十八年岁次乙丑三月十一日鄉贡进士具官郑真序

梅隐诗什序

木植之在天下多矣独梅称百卉之魁彼其固陰沍寒万木僵仆而琼肌玉质傲睨山谷间回视凡葩俗卉驰骛於豪奢侈美之地不啻舆台矣隐民逸士羡慕而培植之其为德之似乎上饶徐饶彰父忠信慤实士也杜门求志不乐仕进所居多梅每相羊其下理融心契慨然叹曰孰使予不遇于时而乐焉忘返者非梅耶遂号曰梅隐缙绅君子多为赞咏之其所以发明隐之为义者矣然隐者显之对隐正所以为显也寓情草木云乎哉想夫宴坐清适芳馨四来岁寒高节永保贞固视夫轩裳珪组渺渺然罗浮一梦中矣乃今圣明在上将使髦俊之士版筑之英从容庙堂之上是以状元及第之荣宰相调羹之用皆於梅比兴焉饶彰远在林野而声誉蔼然我不知君终隐於梅乎梅终能隐於君乎於是仿小山丛桂赋招隐之辞曰岁晏兮冰雪霽孤芳兮高洁纷夫人兮姱节挹前修兮遗烈凜兮栗■〈彡 寥〉兮沆沆冥冥兮岩穴嶮兮僻黯兮寂履巉岩兮峻陟闲林扃兮深蛰赋考盘兮以游以息邈羣仙兮姑射容姿澹兮的皪炫皜素兮裳衣耿心肠兮鉄石青天指兮白日敦永好兮焉极琴樽兮棊奕乐逍遥兮以永朝夕望天上兮九重圣人作兮风虎云龙仰黼辰兮重瞳衣冠肃兮会同君胡为兮山中山中兮盘紆窈窕谁歌兮白驹攀南枝兮踌躇虎豹叫号兮熊羆呼啸日将暮兮孰华予玉佩兮琼琚盍翱翔兮宸都吁嗟山中兮不可以久居饶彰闻之曰是所谓诱我者耶我於木母誓终身矣予知其不能屈也遂序于羣言之首

文江图诗序

江右山水郡称吉安吉安属邑凡九而言水文江为胜江控上下流绵络数千余里羣峯环列其高而锐兀而起迤邐而平衍者若笔之削架之横而几席之奠也由宋以来若参政六一欧阳公丞相平园周公文山文公生相先後而其文章之懿功业之盛节行之高与文江山川相为无穷矣百余年来风声气习犹有存者嗣而续之将不见其人乎赵原高氏纯谨慤实士也家居文江为天潢旧族际今圣朝以才行荐为江西宪府吏处心公正论事平允上下咸以能

称原高自念有母在堂望家尺咫未及遄迈而情有弗能自己者於是即文江之胜绘为一图时焉展玩俯仰上下神驰意往庶幸母之安以慰其心焉缙绅君子多为诗歌以赞咏之以予职在斯文俾为之序夫母子之亲彝伦所重陟岵之诗曰陟彼岵兮瞻望母兮母曰嗟予子行役夙夜无寐而四牡之诗曰王事靡盬不遑将母一则孝子述其亲之望而欲其归一则人君序其臣之劳而本其情此诗人忠信之至也原高服劳宪府而念念其亲岂以家事废国事以公义废私情者哉且夫地灵人杰古今所称眉山以三苏父子而益重于蜀监湖以贺公季真而益着于越夫有其地而无其人则其山川之气亦抑鬱而不舒矣以文江为吉水之胜先哲之生固多後人续之岂少哉後人不以先哲为心则不惟上负明时下负所学抑且有媿於山川之神灵矣夫出处隐显一致而已然而林泉穷僻孰愈朝市之富台宪之贵草衣木食与田夫野老相羊东阡西陌间孰愈纪纲要地操持文墨谋谟画诺为绣衣钺豸司天子耳目之寄哉原高职在宪长以宾礼待之所以期望者至矣有事焉勿忘焉爵禄之来如鄉先达以显亲扬名可也岂徒有事山林间恋恋膝下而已哉孝子不匮永锡尔类予於原高深有望焉

送广信府太守刘公母丧还霸州序

洪武十八年之夏圣天子以来阳丞霸州刘公循理授知广信府事既上任三月以母夫人郑氏年几七袞遣使取以就养未几霸州有司以其家讎来上公袒踊括发水浆不入口号恸再曰天乎我不得在家而使我母至於此我罪大矣徒跣衰絰即日登途广信士民攀号恋慕有作佛事以荐福者於以见公纯孝之至以心感心矣夫亲丧固所自尽也天理人心非由外铄原始反终情所弗忍而礼无不至於其气之絕也升屋履危以其上服三招之则犹冀其复生也不生矣於是制为死具故饭而含致孝养之宜不欲其亲口齿之虚也衾而袭致归全之义不欲其亲体肤之露也乃若朝夕之奠祥禫之节其於四制之义亦云备矣以公文学政事上承恩宠一麾出守太夫人在堂限以官守缺於定省壽考奄终棺衾殓斂弗躬弗亲想其瞑目属纊之辰正安车奉迎之日倚闾之望莫致陟岵之悲无穷公於是亦无以为情矣然而丧事即远有进无退变而不失其中不亦可哉奔丧之礼见星而行见星而舍兹固不能以留公矣入境至家升自西阶服丧尽礼有如初丧宾客固有吊而大悦者矣先陇之阳有若堂若防者竊焉窆焉藏焉想其志气神明之存望望然皇皇然追而弗及求而弗得也而欲报之德终其身弗忘天地鬼神实临之孝感之徵将见嘉禾之生醴泉之涌赤乌白雀飞翔驯集於墓田之左右矣国家以孝理天下异日金花紫诰推恩泉隧不曰忠孝萃於一门乎此固予所望於公者也於其行学校之士以公有德於斯文効蓼莪之咏为公祖道而予为之序

又

古丧礼杂见传记多矣而於奔丧一事尤致意焉盖礼莫大於送终人子之於亲死生大变岂不欲曲尽人事哉然或服劳于公官守言责有不可废公义而徇私情故於亲之疾不克致汤药饮食之奉没不及亲棺衾殓斂之具是以先王制为奔丧之礼有望境尽哀及门升自西阶之说所以顺情而为之节文也呜呼慎终追远民德之归厚也可不重哉益津刘公循理奉上帝命知广信府事上任三月以母夫人在堂取以就养未至而其家以母夫人卒讣谄之则九月十八日正遣使奉迎之时云公号恸仆地即日徒跣登途广信士民攀留莫得有些哀於其母

者曰母子至亲一气分兮於惟夫人慈而仁兮笃生我公子我民兮大义彝伦亲所亲兮亲曰仙游公弗留兮民心悠悠曷其有瘳兮惟公之思繫夫人之悲兮百身可赎我焉辞兮予闻而解之曰亲莫重於母子爱其子以及其母斯其为人情天理之至哉夫公之得其民如此则公之为政可知矣初公之别其母也盖以致君泽民为念不以舍朝夕定省为戚也千里南来司一郡民社之寄尺书传报固足以慰其母之心矣然而鼎釜之娱莫致风木之憾遽闻则亦付之无可奈何而已且夫亲者我之所自出也非有贤母不有贤子以太守公本家教之盛以及夫人人是夫人为不死矣先灵在天昭昭不昧公其慎於礼哉将行合府所属咸以公之德不能忘也请予文以饯夫人心所向风化所由成也采輿人之颂以传之其非士君子所当用心者乎若乃宅兆之安寝席之荐载诸礼经则公固素学之矣予不得而赘也

同前为李通判作

近予以人才荐入京师与燕南刘公循理陕西李公大本试艺天官铨选文华殿伏蒙上恩授公知广信府事大本府推官予亦忝以非才为通判既受符契谢恩丹陛公车上任四人者既志同道合庶几协恭以对敷丕显明命哉广信江西属郡地瘠民贫而公务繁冗使者往来交错旁午公厉之以勤持之以静而律之以公由是治体一新凡贡赋之征货财之奉簿书期会之集告戒从容诚意恳至闾郡吏民劝趋恐後数百里内民生按堵与时休息咸谓太守公之贤庶几於古之循吏矣方将兴废举坠抚绥教训成礼俗之盛而乃以母夫人在堂奉迎间遽以讣闻於是士民失所依归矣留连展转何忍公之去哉夫君亲天地之至恩忠孝臣子之大节以公恪职事之恭而复尽孝思之敬为臣为子两得其道矣予尝读韩诗外传载臯鱼一事以为木欲静而风不停子欲养而亲不待至於哭泣以死孔子门人闻而归者三十余人则其心之所感如此也公世家益津田园之入足以娱亲初仕耒阳禄赐之厚既得致慈颜之奉矣何有臯鱼之憾乎然而大孝终身之慕公何敢自己其心耶北望燕山千里遄迈衰絰上堂见其母之殡如其母之存也恋恋之诚何如哉以葬以祭祥禫如式三年服阕起复登朝德业之盛必有上报国家下及民生矣岂独一郡被其泽哉於是衆以为然相率再拜挥泪而别予与推官同致僚友之谊为之序以饯云

同前为李经历作

予以非才为有司荐入天官蒙恩授广信府经历与知府益津刘公相先後而同日上任闾郡之政咸仰成於公凡害之未除者铲削无遗利之未兴者设施恐後由是吏民向风吐情供实狱讼之决举得其要货财之征应时而集税贡之登仓庾之实礼乐祀典之谨戈甲器备之修而又勉励学校严赏罚以别勤惰创三皇殿使其师弟子瞻敬而企仰焉予不能事事而有太守公在上为之纲维私窃自喜庶几可无戾矣居无何公之母郑氏以卒讣公即委篆於通判李公徒跣衰絰望燕山而驰焉六曹之吏若典皆曰公我父母也自今何所承命奉教以为依归哉欲留公弗得请予通其意予诰之曰诸君子之於公固为厚矣其如礼制何且我闻之孝於亲者必忠於君公以太夫人之命出事天子一麾出守士民皆称为贤臣职尽矣太夫人壽考奄终五福具备则公纯孝奉养所致也限以官守千里在远殡斂弗亲苦心荼毒计日兼程言遄言迈岂为君等留哉夫攀辕卧辙不欲公之去者诸君子之情也星言夙驾亟去弗顾者

太守公之情也情之所在理之所在岂不为两得哉传曰民之秉彝好是懿德其此之谓乎予於公有宾僚之契尤不忍别者於诸君子之请心实戚戚焉公行矣山川深阻冰雪岁寒其节哀顺变归尽大事朝夕服食之宜必致其谨毋徒以齐疏飡粥饥寒伤生也

荥阳外史集卷二十三

卷二十四

●钦定四库全书

荜阳外史集卷二十四

（明）郑真 撰

○序

送凤阳府儒学教授吴义孚先生谒告归莆田序

闽南为儒先过化之地自龟山杨氏得程子之学於是我道南矣考亭朱子承延平李氏屏山刘氏之传自是环闽以南家洙泗而户邹鲁仁义道德之说蔼如也世运既微文献凋落故家子孙有原伯鲁之诮求其诗礼之泽久而益振以师道自任若今吴先生者何其少哉先生闽产也自幼颖悟承先君子石亭翁之训年二十有九慨然曰我不读书为士以祚其门不名为人从师取友玩心经史凡性命义理之微天人礼乐之奥莫不究悉为文章敦尚本实浮夸绮丽一切弗道值世事既非隐居深山为学者师足迹不入城府际今天朝以科目颁天下命兴其贤者能者有司强起先生艺闾省先生力辞且曰科举诚我家故物然投老山林无意於世久矣不得已以书经领洪武五年乡贡进士荐计偕京师将告归适分巡监察御史张公度上言中都兴王之地四方视为取则而教席多虚非所以崇化天下也朝廷用其议丞相及大宗伯以先生龐厚老成且在科名优等遂授今凤阳府教授缙绅咸贺以为得人既至而负笈子弟皆迁谪之家心不乐学至视简册为害已先生博以经训约以文艺诲之谆谆而诱之循循也既三年告诸生曰我老未有嗣息宗祀欲有所属将归经纪其家复来委心焉於是请使府申诸吏部吏部报可遂给告以去夫君子之道人伦而已道之所存教之所存也故自身而家自家而国自国而天下躬行心得宁有过於彝伦之外者哉於此而不得其理何以为淑诸人之本也耶先生之归君子以为能致其重者矣春日载阳脂车言迈宗姻乡党欢言来迓览田园之瘠肥慨风景之非昔则亦时其兴之所至云尔莆阳南闽甲郡在昔衣冠尤号为盛立言之士若夹漈郑氏石林叶氏四如黄氏与考亭相望先後其经史注释制度考索於名教实非小补而近时陈氏衆仲亦有古诗文为士大夫所诵顾诸君子之书久已传世然而山川地远後生晚进莫之见矣闻其家尚有其人先生归试而问之购取以来嘉惠淮海之士岂非鄙贱之所望哉庸敢叙以为赠先生名烈字义孚号方斋所著有卧云集其考德问业则先朝文献若郑先生献可林先生学矩云洪武十年三月朔日乡贡进士四明郑真序

送睢州学正永嘉刘贡寓上任序

天子在位之七年命天下郡县守令各荐士三人时我四明陈德源氏为重庆府巴县丞巴僻在西陲人物稀少惧无以上答明诏乡友项熙原同仕蜀西谓之曰士信於知己弹冠结绶必

有推挽之者若永嘉刘氏南金字贡寓者其可乎哉德源曰何如熙原曰贡寓世为温儒族读四圣之书观象玩占达陰阳造化之理圣运肇开士凡一材一艺者皆拔毛脱穎翱翔青云贡寓杜门谢客耳若不闻忍贫茹蔬裕如也方今旌车四出野无遗贤可使若人者终老於岩泉间耶於是德源上其名於四川行省行省咨之吏部吏部符温有司强起之贡寓不得辞焉与羣士同诣吏部试易义中选将调官天官宗伯议诸丞相以为通经学古者未可烦以有司当使施教一方苟才贤辈出则其有功也大矣丞相从其议遂得为睢州学正上任过淮临以予同在斯文求一言以赠夫政与教非有二涂今日之所以为教即异日之所以为政也国家设立学校置师弟子员非有钱谷之劳簿书之冗巍坐臯比与诸生日求其所未至士之以文学自任者固乐为之而有不得遂也而今幸而得之故必有得道忘势之君子遇夫尊德乐道之诸侯优礼崇獎捬衣负笈者得以激厉成就之奈何今之有司视为故常漫不加恤而掌教者亦仅仅自守玩岁愒日冀幸一旦以去况夫中原多故以来故家文献既以湮微父兄之於子弟甘心樵牧视简册为累已其来非一日矣贡寓学高而强气正而苍行端而方所以转移其心术开示以正途下学上达俊乂林立登庸於朝为端人为正士斯不负菁莪乐育之意岂徒日月书季考词章句读而已哉睢为汴宿之冲华夏文明之地也昔者葵丘之会诸侯封人之见夫子於是乎在仰惟圣明在上王道大明五伯之事诚不必论睢之士大夫见贡寓者於言动词色有若封人得诸观感之间则贡寓之道将大行於时矣予与贡寓早尝相闻而於陈项二君子皆有同乡契家之旧荐贤举善二子既为得之若睢学之得吾贡寓抑何其多幸哉於是为之喜而俾予叙其事以赠

送颍上县教谕徐景顔先生复职序

洪武九年十二月中书省檄凤阳府凡通经博学之士在教职者悉取以来盖相君上副天子宵旰求贤之意欲尽天下之才储之馆阁谋猷黼黻致唐虞三代之治也乌乎盛哉於是知凤阳府事潘公奉行惟谨而颍上县大夫以博士徐先生景顔荐既至而中书且有後命许留见职景顔辞诸潘公请复归掌教事公曰先生是也国家以用人为急先生去而登诸班行不过先生一人而已先生在而学者有所成异日晋之省台布诸郡县用以为奔走御侮疏附先後先生之功顾不大矣乎时同僚皆黾公言景顔即再拜为别予以同年之契送诸淮河上执爵言曰景顔可谓识进退之宜矣夫君子安於所遇固未尝求进而亦未尝求退也不求进以见其不急於用世不求退以见其不果於忘世易曰时止则止时行则行而孔子於仕止久速亦当其可而已景顔家居太末为徐偃王之後世胄神明从容儒素浮沈里閭将四十年适圣运肇兴有司敦进就试濶闈以书经中选来为颍上学官执经在座下者凡二十人皆通性理能文辞於其行也咨嗟涕洟恋恋焉意其复归今兹果然矣是岂不足以慰其心耶往复去留何芥蒂之有哉且夫富贵利达天也学以致用在人焉君子不谓天也独奈何今之儒者自一经决科之外於礼乐典故文献谱牒一切漫不省如或知尔则何以哉予之病此久矣景顔疏通明敏竭归颍上讲授之暇博记广览以资其见闻圣明在上述作之事日以大备駟车之召岂能舍我景顔哉

送泗州税课局副使金仲止考满序

国家立税课以征天下之货郡有司州县有局军国之需率赖於是然多以儒者司之盖经义治事初非二理明体适用有在於此岂曰理财非君子所宜哉金华金仲止年二十余好学能文有司尝以六科荐之天官试艺中选署泗州税课局副使有难之者曰税课冗职也子其若之何仲止曰先儒谓钱谷为为已之学职分所在尽其力焉尔泗为两淮要冲舟车憧憧无有宁日仲止既上任百货之来相其贵贱多寡而轻重之持之以公平煦之以恩惠民皆懽趋恐後或仲止以他事出则相顾延伫必待其亲莅得一言而後定既二年贡赋告登而代者至矣仲止其贤乎哉仲止世居金华金华多山水人才辈出儒先君子若鲁斋王公仁山金公白云许公皆以道学泝朱子之传若待制柳公侍讲黄公今学士宋公长史朱公亦以文章大家冠冕後进仲止生於其乡得其绪言余论故其入仕之初不以为卑且冗而善於其职如此夫洪范八政食货为先禹贡一书底谨财赋周太宰定九赋之法征敛随宜乃今圣明在上重本抑末征商之额取之有度仲止尽心周旋不亏官不抑民异日为令为守为台为省设施举措从可知矣易曰自天佑之吉无不利仲止其有焉予与仲止忝同瀾产久客临淮闻名日甚兹幸得相见将与论世家文献之懿而以考绩入覲京师其能介然於怀耶泗州博士陈先生楚宾既合士大夫同致斯文之谊遂叙其出处大略於羣言之首

送凤阳府税课分司副使高彦芳任满序

凤阳兴龙之地今天子肇建中都四方百货之聚陆輦中土水道长淮视他郡为最有司相视地形於淮河之北岸置税课局凡商贾取道虹县及宿州司其征闽人高彦方氏来为大使朝廷用言者改为税课分司而彦方昇为副使彦方年壮力强疏通明敏而长於干济自始至终逾四年而朝夕不懈如一日於是贡赋以登考当书绩知虹县事陈侯敬铭儒者也慎於许可独於彦方每獎誉之且使来请序其概夫征税之法尚矣周礼宅不毛者有里布民无常业者征夫家国家疆里之大生齿之繁凡山川土地所出所以衣被而饮食之者不能以数计关市之职量其多寡大小以三十而取其一隐匿者有没入赏告之律其为法可谓详且密矣然而贪黠之民欺公售私常额不登程督责备惴惴焉旦暮之不保者相踵也而彦方独优为之不谓之才可乎彦方生於闽之南平盖延平李先生之里也先生之学传之考亭朱子考亭尝论钱谷为已之学其於征敛之法固尝讲之熟矣夫明体适用不当见之空言君子之於世盖有无施而不可者易曰理财禁民为非曰义彦方其得於儒先之绪余者耶予典教临淮若彦方之职业固当目熟而耳闻而况陈侯之言有可徵者乎故不辞而序之彦方世官阀在前朝尝以门功司徽巡云

送清河县税课局副使刘与德考满序

我乡四明为文献邦百余年来流风遗俗犹有存者遂初叔载王先生老成闻望师表於乡时天台胡先生世佐伯衡两领乡荐由儒学官归老寓居於明胡先生三省之孙家有史学王先生厚斋尚书公之孙以玉海书着闻于世者也二先生先朝故家之契先後训导明庠而沛县刘与德以宦游执经居弟子列二先生爱之凡天人礼乐之奥典故文物之着词章性理之微心传面命学遂以进既归卒业又十余年而圣运肇兴以秀才徵至京师试文吏部授淮安府清河县税课局副使清河当汴徐之冲商货之交舟载车挽与德量其贵贱多寡而为之征钱

楮之入以贯以文计者载之赤历岁增月美贡之府藏之库而军国之费赖是以出焉既踰年考满当代与德曰我庶几无责可以退矣清河人士挽留之莫能得乃使来请序以送之夫衣被服食民之所赖以生者不先有以贡於公其何以致夫尊君亲上之心哉然而奸民黠胥窥避隐匿弊幸百端於是关市之征不得不严矣国家之法钱谷为重监守自盗之律读者凜然而好生事者往往罗织鍛链必致刑辟是以清修谨饬之士不乐为之盖其心戚戚焉不能以顷刻去怀也噫是岂立法者本意哉与德天资明敏而敦朴有守其於理财之要可谓不媿所学而无忝师门矣予家世四明於二先生既亲且契胡先生即世已久不尽得其绪言余论而以贡士忝教临淮复闻王先生之讞老成凋谢为之薑然犹幸遇与德论师友渊懿期底於远且大也夫为政之道尽其职分之所宜而已寬则民慢而事不集猛则民畏而心不安於二者而取中斯其庶几乎与德学而仕者也异日为良有司不当如是耶知清河县事陈立本予同经友也其当以是告之

送邳州税课局大使韩民瞻序

越为浙左名郡属邑萧山当浙江东西要冲山川之秀鍾之於人名家大族若湘湖韩氏民瞻世所谓才者也其先魏国公以雄文直道致位宰辅自後登金门上玉堂者代有其人际今圣运肇兴徵用天下文行之士越有司以民瞻应诏民瞻不得辞遂试艺天官中选授临川县主簿临川在大江以西其民好讼民瞻扶植善良勸治强梗罔不化服尝奉省檄簿録民财一无所私怨家罔生事端诉诸宪府宪府悉辨其诬然犹左迁为邳州税课局大使人有以为难者民瞻曰钱谷有司一事尔以治县之道治务何难之有且我夫子上圣之资辞尊居卑亦曰会计当而已矣某圣门之徒也无人而不自得其可哉既至而邳在中都輦毂下大河南北形胜要地行商去贾舟车冲扰无有宁日民瞻量其货之所直而为之征多不为重少不为轻泉币之入以文以贯计者登诸赤历储之府库月有余而岁有美矣人皆曰民瞻其果材矣乎考满邳之士大夫作诗以赠使来请予为序自古英杰之士必历试诸难况乎钱谷军国所需儒者视为切已之学者哉王文正公旦监潭州银场余襄公靖监筠州酒税之二公者皆位登政府勲着畴庸其始也岂以位卑禄薄耻为之哉民瞻世家贤子孙清修谨约凡其设施措置之方皆得诸学问之素自兹以往功名富贵何古人之不可及哉予家世四明与萧山接壤夙闻韩氏之多贤有名某字奠之者慷慨论事缙绅竦敬於民瞻为尊行盖尝识其为人而予乡先生黄公润之以东发之孙奥学能文在元至正间讲授其地民瞻盖得其绪余焉者传曰鲁无君子斯焉取斯其民瞻之谓乎於其入覲京师遂叙於羣言之首时洪武十一年岁在戊午正月既望序

送凤阳府量积仓大使陈德谦考满朝覲序

高邮陈氏为文献大家在宋孝宗朝有名造者博学高行以淳熙乙未进士积官朝散大夫入乡先生四贤祠与孙莘老乔竦并列俎豆尸祝不废自是珪珥蝉联领乡荐及为运使直内阁者相望後先入元为丹阳县主簿名宏者亦以政事有声其在至正末为淮南参政名谦字子敬者则其孙也世阅源流其有自来哉凤阳府量积仓监纳陈德谦父盖处士再福之子参政公从子也去朝散公六世矣龐厚老成而熟於世故际今圣运以尝逮事先朝徵入天官授安

庆河泊所官沔阳仓副再转调今凤阳维仓庾之司职冗秩卑凡而关键之严契勘之要槩量储峙之烦会计出纳之重夙夜尽心不遑后处者有年矣人有戚之者则曰钱谷国家所赖眇焉小子尝恐陨越失坠以为祖宗羞顾其职所当自尽者可憊其劳耶既考满得代仓廩皆有余羨会给散告尽乃奉府檄入覲京师来别曰我耄矣将上休致之请倘庙堂怜其愚衷归扫丘垄守田里以尽我齿荣莫大焉予喜而复之曰是可谓能谄夫出处之正矣四时之序成功者去人生几何哉在少壮时志强气锐视功名犹拾芥齿发既变奉身以退保冲养和以还造化旧物斯亦可矣宁能与衆齐驱并驾耶德谦世业诗书善承善继从容仕版逾六十年而廉谨自律由始至终不以一毫自累晚节令名庶几保全矣圣明在上优老之令改官增秩禄养终身所以荫休于後嗣先耀夫前人者未可量也传曰积善之家必有余庆其德谦之谓乎予忝教临淮与德谦时相过从乐闻其家世之详乐称道之於其将别殆不能忘情也异日幸得南归道过高邮访德谦於山水间觴酒称壽取其平生律身行己録而传之使知朝散公之後尚有人焉

送新蔡县知县应先生致仕还里序

仙居应先生宗毅号木斋奥学高行为有司所知洪武六年之夏荐入天官试艺高等授知汝宁府新蔡县事赐纱帽袭衣银束带拜恩奉天殿下上任政举职修未几流逋四归田野日辟户赋岁增新蔡之民咸知有生之乐由是兴学校敦教化葺治邮传兴修水利凡事之宜於官而便於民者行之略备部使者考核以称职闻自郡府及卫阉至承宣布政司皆为崇重敬礼以为儒者之效可暴白於天下矣一日先生慨然曰我老矣久此何为者哉解印而归独不能効陶渊明也耶遂以老病休致为请汝宁太守万公孟雅为达诸朝报章既下扁舟竟去新蔡士大夫父老及其民庶攀恋不忍别有涕泣者先生曰我何政理而得衆心如此耶挥手谢之过临淮真以斯文之契贺之曰先生可谓得所宜归矣夫进退隐显一於道而已进而显所以行此道非所谓趋竞也退而隐所以存此道亦非矫激也古之君子平日暇居以天下事置之念虑一旦列仕于朝仁义道德之施所以尧舜其君民者特举此加彼尔若乃功成名遂投闲置散木石之与居鹿豕之与游逍遥徜徉以终其天年其亦可以无憾矣使夫溺权要贪势利恋恋不舍一旦陷身不测噬脐可及乎且夫濶河以东素号人物渊薮自十余年来登仕版者不啻千百也其有奉身而退如先生者几何人哉然则先生之归天其有以默相之耶昔者圣人传易於文言曰知进退存亡而不失其正者其惟圣人乎先生知进知退庶几圣人之道哉真家居四明与仙居为隣壤服先生令名久矣兹客临淮先生之出处大致实见而知之顾以教职羈縻耄年未及不得相从言迈心歉焉其弗宁也异日或得一遂幅巾杖屨访先生仙居山下某水某丘指其钓游之地歌归来辞觴咏为乐有若晋人之风流焉其亦可哉

送致仕凤阳府儒学教授刘伯机父还金华序

七十致仕载於礼经详矣数千百载以来着为令典莫之改也然人年至七十盖亦罕矣既艾既耄而使朝夕困顿於簿书刑政之末不亦可矜耶夫仰惟圣明在上优老养贤惟恐弗及迺者玉音涣发命中外大小有司至六十以上许引年休致大矣哉尧舜之心乎予友刘伯机父金华兰溪文献望族博学多闻洪武六年以秀才徵入京师授湖广荊州府潜江县税课局大

使考满调凤阳府泗州通运所副使踰年以裁革调本府税课司副使分司新城三年贡赋登足奉考书入覲天官宗伯以其年过六十上奏廷陞陞凤阳府儒学教授致仕时同列者六人上亲御宸翰制诰以赐有曰刘伯机今当调官而乃苍顏皓首纵有自强之心终是年高故加升等以养老於家大哉王言也典谟训诰何以加哉伯机持归告诸祖祢夸耀乡党父老亲友下及山樵野牧藏诸篋笥将见虹光上烛矣乌乎伯机何以得此哉岂其明哲自保慎终如始致夫名遂身退之荣耶将祖宗积累之厚余庆所及有以祚夫胤嗣之传耶不然锦文犀轴鸾翔凤翥岂轻也哉夫司征冗官也典教清职也税课国用所关为之者或至於戾学校师道之重望之者或弗能得士大夫於斯二者殆不能兼善而两尽矣伯机商税之司克称其职而於郡博士之任终显荣厥身其非出处维时进退以道者哉瞻望故山修程言迈田园清兴从容晚节幅巾深衣以道德文章模范後进古之所谓乡先生者非伯机其谁欤

荥阳外史集卷二十四

卷二十五

●钦定四库全书

荥阳外史集卷二十五

（明）郑真 撰

○序

嘉兴宣公书院山长华亭陈君事绩诗序

予读唐辛谠传未尝不三叹也方唐室中微麗勋以偏伍庸材据徐宿攻泗水列城方镇环观坐视未有能任夫分灾恤患之责者辛谠一士人尔无官守言责以为身累乃能请命赴难以泗州成功书之史册有昭昭而不可泯者雷云邁屯■〈宀禹〉县兴难千载之下岂无忠义自任奋身不顾如谠者其人乎至正十六年夏四月高邮张寇陷松江凡郡人以才望称者皆受伪爵宣公书院山长华亭陈君慨然曰我志欲吞此贼尔乌能忍耻偷活於此耶出私帑募勇壮三千人即所居为营以拒之时江淞行省参知政事杨中奉公驻师嘉兴君遣人间行请益兵止得文千户所领十有八人君以大义誓衆迎敌决战寇兵败走擒伪通判吕恂追至朱泾市镇焚其营乘胜抵斜塘桥擒获不可胜纪居无何里人黄璋约寇兵为内应夜潜引兵纵火劫寨君尽力死鬪会官军先退君孤立无援仅以身免其爱女及从者皆见杀失资产以万计君流寓钱塘贫馁自守省宪交章论荐迨未有以宠异之者怀忠抱义之士能不为之齟然也哉夫士大夫之於人不论其事之成败而惟在理之当否以君倡谋仗义为国忘家则其忠节为何如耶使任以帅假以兵威则功业之成视辛谠岂少哉予蛰居东海无由与君论议以发所蕴尝诵乡贡试中之文想君之为人武林杨子玉以事来遂作诗以美之君名善字充之诗云吴松之壤东南奥区岁在丙申羣寇突如朱巾赭裳陆梁恣睢乃贼乃戕乃毒乃荼桓桓陈君誓不辱污指廩发囊仗义奋呼从者如云仡仡万夫修我戈矛为君前驱请命辕门是究是图秣马饘兵剪馘执俘寇狂假息有若釜鱼彼何人斯委心奸渠俾我子立力寡势孤惨焉骨肉横罹非辜籍我土田火我室庐转徙流移莫适有居忠愤之蓄鬱焉弗舒赫赫明廷唐虞訏谟省署宪章登于宸都胡不名爵金紫曳娄太史秉笔古之董狐传之後来请从简书

予向居东海上为山长公着此文公见而喜曰此士大夫公论也际今圣朝而公之侄孟敷为中都宿州学正适予亦教谕临淮尝出以相示及九年任满同升教授又同在江西属郡既三年孟敷以书求此文出旧稿録以归之并记于後

应节妇张氏旌表门诗序

国家着礼典为目三十有二而旌表与焉盖所以崇教化美风俗为天下後世劝也四明节妇

张夫人有贤行年二十二归应氏生二子七年而夫君卒夫人恸哭言曰夫者妇之天既絶我天矣何以生为继而又曰夫之不幸天也我其忍死以终厥志乎躬服襄事除丧不事容饰日承事舅姑惟谨及舅卒尽鬻奁具以殓以葬一如礼制又推其余以嫁其夫之妹四人二子则俾之从师问学既长克以才行见知名公鉅卿遂有禄养今其姑年踰九袞而夫人亦已老矣会廷臣经略江南遂得旌表其门太史周公传其事缙绅士大夫又为歌咏之乌乎是岂不可为世道劝哉尝试论之女子之嫁也三月而庙见既成妇矣盖将终事君子以遂家室之宜也中道而乖乃其不幸之大者於此而不失其正焉固常情所难而亦女妇之当自尽者非徒欲为门户荣也乃今富家巨室多藉是为幸免徭役之计夫岂制礼典者本意哉以夫人观之节义以守其身文行以勗其子孝足以奉尊惠足以及衆至行彰彰不可诬也故其无资产势力之助卒能高大其门盖天理所常行而公论所不泯者书所谓表厥宅里树之风声者於夫人诚有合矣系之以诗曰懿惟夫人有肃令容内教式承冲和敬恭相攸立配於彼儒族命也不辰罹尔惻独中闺窈窕明月夜光晤言孰亲顾影皇皇永矢厥心如金如石地下天高百岁一日白发在堂克谨膳羞而舅奄丧孰相其忧我饰我粧乃贸乃易以孝锡类惟礼是式翩翩二雏矫焉高飞娱养乐康斓斑舞衣皇矣熙朝崇尚节义於赫旌书荣需宠贲诏尔子孙永涵天休矢诗以歌配于柏舟

送王继远归天台诗序

天台王继远倜傥好义士也其先七世祖献肃陈公在南渡时历事两朝为名法从继远以父命出後王氏在至正间以逮事先朝得谪居临淮缙绅君子乐称道之予以乡贡来主教事与继远斯文之好为至间与登锺离故城仰独山之高胜俯长淮之险要帝乡神都之盛观近在咫尺凡古昔疆理形势因得指而论之继远曰昔吾献肃公之事先宋也尝以天下安危为已任直前论事慷慨激切大槩以临安僻在东南藩篱喉咽当以淮襄为重淮控引山东襄经制中原守襄当得唐邓守淮当得海泗金人泛使议和每以四州为言而公建议以四州之地决不可弃阜陵知勇天锡銳意恢复而扼於羣臣卒不得逞於是唐邓海泗之得失与南渡相始终矣吾幸生治朝远游千里经览陈迹质以先献肃之言感慨系之矣予既谛而听之暇日从继远得献肃公家集具载轮对上殿劄子及奏疏贴黄皆论南北利害大计喟然叹曰至哉言乎其国家盛衰消长所关乎乾道君臣克取而行之必能厉戈北向雪复讎耻何至界淮中流为小朝廷恋恋於八陵坏土之悲也耶世异事殊九原莫作故家文献之传乃於继远而取徵焉献肃庶几为不没矣今天下一家輿图之盛亘古莫及继远以家学之正异日进用於廷其不曰公侯复始乎予於继远窃有慕焉因其归天台作诗以赠且序其出处论议之懿冠诸篇端云驱车濠梁道薄言向南州江河隔千里中情邈悠悠矫首赤城霞五采联瀛洲故山幸无恙归来成宴休旭日耀桑梓浮云泄松楸清晨听唤起芳昼闻■〈车勾〉輶蘊真愜所遇泉石聊夷犹亲宾列冠盖佩琚锵琳璆樽壶湛清醕鼎俎罗琼羞十年慰契阔咏歌相献酬物情竞朝夕变幻如蜉蝣保身树明哲前修以为俦

送凤阳府学教导陈继先归清漳诗序

清漳陈继先由国学生来为中都凤阳府学训导弟子员母苏氏在堂年七十余继先在凤阳

去家五千余里以音问之不通禄养之莫致也怅然南望泫然以悲其乡人过者或言於继先曰汝母病亟势将属纊继先惊仆地国家之法凡仕宦於外其父母在家或病或死非其所司有文移印信为凭据者不得解职以去继先旁徨无所出因请於郡府檄漳之龙溪县问其母安不以为去留而龙溪之有司不知为政之大体不谅人子之至情邮传上逋慢不启视催檄至再而终不以报也道里辽远山川阻深南州往来之使不得一介焉继先亦无如之何矣会乡友赖君恩顺与继先同业成均又同训导凤阳今年夏六月由省亲复职以其兄讞来则其母已小祥矣继先徒跣号恸水浆不入口累日有吊之者泣而言曰天下之人宁有母死逾年始得闻之如予不肖者乎且我不得终养而使我母一至於此我罪大矣何以生为凤阳太守李公闻而悲之为之达礼部俾駟逋以去予以斯文之好送至南门外告之曰继先其可谓孝矣夫父母之丧见星而行见星而舍继先岂辽缓於此哉讞告之不时动静之或制继先岂得而自由耶天地之间凡有血气者莫不知爱其亲况人为万物之灵於其至亲存亡之际也耶惻隐之心人皆有之秉彝好德非外铄我也有忍死其亲忽焉而不加恤如龙溪有司者独何心也哉昔後魏淮南王长史赵琰以二亲之丧不得越关归葬至絶盐粟断诸滋味二十余年惟食麦而已而南宋海虞令何子平父丧八年不得营葬昼夜号哭常如袒括是其天性至孝有非常情所及者继先以儒得禄将以为养也而越在畿甸亲之疾不及奉药以尝歿不及凭棺以敛阅岁历时讞告始至是其风木之悲蓼莪之感有不容已者然而丧事即远有进无退窀穸之事所以妥安其亲者尽礼无违庶几始终弗憾矣然则继先其亟归矣哉清漳文物之邦昔者考亭朱子过化之地也考亭着为家礼丧葬之事损益适中漳之士大夫讲之熟矣诸侯家鲁於是观礼盖庶几焉继先归而取行之使观者有所感发其不曰礼义由贤者出乎因作诗以舒其悲且为序其篇端诗云窈蔼北堂居猗猗媚丛萱永言忘忧物金蕤耀以蕃一朝霜风发惨惨摧芳根白日无精景重云翳朝昏游子远行役迟迟归故园中心怅莫及泣血渍深怨忆昨别离时慈闱笑且言为将手中线致此鞠育恩壽命有盛衰容顏失清温慈养不得终空复盘中飧昊天邈万里何能诉重闱谁如古巫阳用以招冥魂

云岩小隐诗序

颍上县主簿庐陵顏先生朝宗唐太子太师鲁公之系鲁公尝为吉州别驾遗爱在民岁时俎豆尸祝之今郡丽谯西祠堂存焉郡之属邑曰永新西南百余里曰禾山两崖壁立长溪绵络入於禾川与吉江合流鲁公在郡时尝至其地大书岩石上曰龙门溪爱其幽阻僻深留其季子硕居焉故宅有鲁公搗衣石尝着灵异人莫敢迁之因号为平原石岂其遗德所存者耶子孙蕃衍分为数族散处各邑历唐及宋以至今日登名科掌教席及仕州县者相望先生以世泽独家石岩岩上常有云气或时神物蜿蜒雷轰电掣霖雨大至悬崖飞瀑万鼓齐鸣荡击喷薄奔放而下不知其几里也先生乐得其胜因号为云岩小隐云会朝廷蒐罗岩穴先生以有司敦迫与羣士旅进天官授蜀西顺庆府蓬州营山县主簿历六载以革并调官颍上县簿书期会朝夕从事而耳存目注未尝不在云岩也於是用篆法扁其所寓而会稽陈能旧尝绘以为图缙绅士大夫咸为诗咏歌之先生以斯文之雅请予序其意夫山川以人而胜南阳以诸葛也东山以谢安也彭泽以陶潜也兰亭以王羲之而始着浣花溪以杜少陵而益显匡庐香山以李谪仙白居易居之而後人为之向慕兴起夫君子所过者化所存者神即其地而想其人而其人为不可忘矣况夫堂构菑播之重嗣世象贤追念本始有以永其德泽之传者

哉江右山水庐陵为盛盖天地扶舆之气鍾聚凝结有如此者而龙门溪特以鲁公大书深刻遂名天下子孙居之诗书礼乐之风数百年如一日人固以为文献足徵矣鲁公为唐忠臣世之儒者言其不死计其忠烈之气殆与天地并存矣乘云而来乘云而往疑若在是岩之左右前後也神而明之存乎其人胤祚骨肉之亲精神血气之感俯仰上下慨想其冠带立朝专城出使之日俨乎如见其伉俪山而骂希烈忤辅国而谪卢杞也功名勲业嗣而续之与鲁公同不朽可矣岂徒视白衣苍狗之变化以自适其意者哉夫云行雨施品物流形大易所以明乾道也先生精於易学通乎天人向者隐于云岩固尝以天下事置之念虑矣今出倅畿甸宁不以所学施之有政乎异日升之廊庙遇大旱作霖雨使天下之人视云岩犹傅岩焉斯其无愧於鲁公之後人乎传曰无念尔祖聿修厥德为之序而系以诗曰

截彼云岩维其高矣孰世其居儒衣褒矣自古在昔匪一朝夕载经载营言作尔室山高水深德人德音寤寐孔怀湛焉厥心浮尘斯迴俗氛斯屏攸芋攸跻閭焉幽隐云兮卷舒我起我居从容以时或诗或书云兮变幻我顾我盼用之则行时岂云晏日惟我祖太师鲁公正色立朝教言则忠来游来邀以命其嗣厥构貽谋克趾其美山川神灵有闻无声乘彼浮云太空冥冥天高垂象以寓遐想厥降在兹非惚非恍大明中天礼罗徵贤其来于于赅然翩然旅进于廷需恩锡宠民社之司靡劳靡冗洌洌颍阳煌煌帝乡故山邈悠岿焉相望云兮在天咫尺非远乐以忘忧动静隐显相时綢繆膏泽我民为雨为霖与物其春庆门珪珣盍绳其武云汉昭回以奉明主

东海池公溥孝行诗并序

尝閱太平御览载古孝行事甚备彭城刘师贞以梦母而识其母之容状东平孟元方以梦而知盗发其母之冢荥阳郑邴以梦教令啖杏而愈其母之疾病及读柳宗元铭墓之文天水赵来章以神人示兆而得见父柳州府君之墓今观刘先生贡寓董先生士勉着东海池公溥孝行事亦以神童示梦而寻遇其父正与古类世言至孝通天地感鬼神其信矣哉按周礼纪梦有九思其一也公溥之梦其思欤思存其心在平常旦夕之间公溥奉二亲避兵仓皇中父子相失至诚恳迫天地上下实临之神童之示梦岂特以其寻常旦夕之思耶然以梦得其父幸也以重伤奄至大故抑何不幸之甚耶夫父子之道天性也人心义理本诸赋予之正凡人莫不有之历千万世不变也私欲汨之於是有忍死其亲者矣公溥当丧乱患难之时父毙於兵藁殡从事不共戴天之义弗容於苟存矣而寇盗蔓延遍于齐梁操戈剗刃莫辨谁何縗墨哭泣视诸天而已孤惻喘息眇焉如缕而展转千里十有余年恋恋哀慕有如初丧躬际承平复覩天日之盛卒能归葬其父终养其母生者死者各尽其礼是固常情所甚难者而公溥能之传所谓欲报之德昊天罔极者其斯之谓欤予虽不识公溥而以刘董二老先生皆良史才纪事之实为可证据辄因其言作诗以美之其词曰

驱车上中土川涂邈以巖双亲正华发客行奈时危弄兵彼何人杀气腥风驰仓皇负所天骨肉成乖睽追奔幸一憩感此吉梦随崎岖涧谷深忍能见疮痍奄忽成永诀荼毒犹割剗丛殡泉隧间礼制谅勿违号恸苍松根愁云天为低泪尽眼欲枯骨立肤其羸所幸不即死宁复嗜甘肥竭归向闾里庶以奉母慈大明赫中天恩光浹四陲荐书上京国恳恳拜且辞富贵非所

欲但祈终我私言瞻旧时路行行记梁齐返葬捧遗殖北风袭麻衣峩峩马鬣封水砂猷神奇
蓼莪感劬劳风木增悲凄至行昭格享永言福履绥大书示千古金石粲光辉

太常司丞方公资深使还诗序

洪武十三年秋七月望日圣天子孝享皇陵先期命礼官奉币行礼而太常司丞天台方公浚资深实当使遣公既俯伏拜命出次龙江乘驿舟泝大江涉长淮风水急驶櫂夫奉功一瞬百里以某日至中都将事之夕斋戒沐浴具衣冠省牲视饌品物备具昧旦作乐成三献礼燔瘞如式竣事享昨天光发舒嘉祥骈集公出郊将复命京师过临淮及凤阳府推官宋君廷臣抵谒先圣博士诸生相见以礼公论及祀事以为宗庙祠祔烝尝备见周制若山陵之礼则周官所谓冢人凡祭则为尸者其略也自秦始皇出起寝於墓侧汉室因之故陵有寝殿起居衣冠象生之备降及东汉因而不改每四时朔望二十四气伏腊及社定为上饭之仪以礼官行事官人随鼓漏理被枕具盥水陈严具天子以正月五日上陵则郡国计吏亦得从之占其郡国灾祥丰歉欲使先帝神灵具知之盖事亡如事存不得不严者今天子孝思维则霜露慨然羹墙之见若舜之於尧也某自揆不才忝在职掌奉命而来恐陨越为斯文羞今将还奏九重诸君何以教我於是宋君及凤阳教授吴先生义孚进而言曰公之於礼如是博且详也不谓之能其官可乎抑闻之礼贵於诚敬声名文物特其末耳周公升歌清庙苟在庙者愀然如见文王焉不诚且敬其能之乎夫臣职之恭即君德之着也上之奉先下之奉上一诚敬之交孚是以骏奔对越洋洋在上来享来格熙事备成社稷臣民之庆万年赖之盖有以交於神灵必有以同福祿然则宣室前席之召非公其谁耶公闻其言首肯者再送至淮河上再拜为别至八林阻风赋诗四十韵寄郡府及庠序诸君子凡使事之诚友道之懿山川之所历习俗之所见莫不备着而词意典雅有杜少陵韩吏部之风可谓能赋之才大夫矣昔在元蜀郡邵庵虞公金华乌蜀山柳公常官奉常当重熙累洽之时凡朝廷大享大朝会见诸诗歌金声而玉振之读者美艷兴起公其何慊於斯哉予家四明与天台壤地相接尚论先契爱厚为至谨次韵成篇致恋慕之意且序其事於首云

天朝崇孝治蒸尝藏先祠皇陵松柏深扈卫貔虎师礼乐盛典制坛壝严威仪金匱抽秘藏类以编简推黄流湛芳馨圭瓚粲陆离熙成备格享清庙赓周诗侃侃太常公衣冠伟文儒（叶而）蹇若彩凤翔陋彼班豹窥对扬列廷陛凜然冰雪持内筐肃将币奉命宁絜维涉江浙长淮沧波天渺弥灵神迓天使舡头舞蛟螭历险吁已艰秉心矢弗移斋宫爰戾止清风洒旌麾多士咸骏奔宰夫效驱驰嘉牲告充腍荐俎宁迟迟昧旦竣禋事渐渐金乌飞式瞻河汉间星斗粲有辉曙光烛马廐晓程报鸡埭使华倏云返早饭何容炊芹宫幸一憇礼赐承先施知己逢叔牙哲人覩先箕少将鸡黍献何有熊蹯膾斯文已波靡砥柱非公谁相忘饌席间古道何偲偲至理蹟幽眇名言阐渊微毫锋缚霜兔洒洒云烟挥磊落珠琲粲烂煊云锦如（叶而）士林相唱和吹埙间鸣篴重壁见垂棘名宝夸璠璣（叶移）笑谈一倾盖乐此新相知都俞际明圣有若唐虞时招徕慰宵旰佩绶锵王畿行膺玉堂召紫泥进摛辞老学饱研磨况乃年末耆大手燕许笔永言千载期嗟予忝濶产同乡愿陪随阮籍遇青眼马良逢白眉矫首翰墨林汗竹纷如围秋高望鸿鴈写寄千里思

一湾烟水图诗序

海宁贾君惟敬谪居颍上县扁其室曰一湾烟水邑簿庐陵顔朝宗绘为一图题诗其上嗣而和之者有人矣会惟敬南还舟次濠梁出以相示予笑而谓之曰此所以示归兆也天壤之间水居其多知者乐水以其周流不滞有似於水也惟敬其知者欤且水之大者莫海若也惟敬家黄冈在沧海上水之大者固常见之矣客处淮颍其取义於一湾烟水者所以志不忘焉尔宜君子以为必归也然则扁焉观焉徇名而求实其何间於彼此哉遂歌诗志别云

野水晴川望海遥
光开宝监散风涛
鼓琴出听鱼龙近
弹铗惊飞鸛鹤高
隔岸不烦呼折简
倚空时复醉挥毫
黄冈路接蓬莱岛
仙子来迎炫锦袍

知五河县事曾君（阙）号北溪诗序

长沙山水名郡属邑三湘惟湘乡为最湘乡有连水南流百有余里是为春溪绵络冈陇映带林麓透蛇曲折莫测远近溪之水清澄莹彻洞见深底而崖骨石齿剑攒珠累舟楫不通每雨晴月霁俯而听之潺潺汨汨若琴瑟之鸣而璆琳之奏也邑士曾君（阙）隐居其上一榻清晤尘坌不入客至燕笑从容赋诗行酒以为乐尝慨然曰我其终於此矣乎且号为北溪云会朝廷急於用贤君以文学荐入京师授知五河县事五河中都畿县之一簿书刑政日不暇给而北溪之胜盖梦往而神驰矣缙绅士大夫为之赞咏者盈卷轴予得而观之叹其幽情雅致有非浅俗所及者夫天地之气凝而为山融而为川山川之秀非哲人君子不足以当之蟠溪以太公望也濂溪以周茂叔也其功名之盛道学之尊孰得而议之然而柳子厚辱溪以愚陆希声号溪为蒙亦得与穹壤相不朽然则其地之灵其人之杰也耶长沙在三江五湖中有屈大夫贾太傅之遗风名世大儒若考亭朱夫子广汉张南轩存神过化後学企仰君以文献故家与之相望千百载之上濯纓自洁初无意於人间世也然而隐显随时出处二致向在林泉今登朝宁斯时北溪之胜固已增辉改观矣於是而澄其心易其气处事接物有如水之清且明焉我见其渊乎其有容浩乎其不穷虽在数千百里之外岂不犹在此溪之上乎昔宣圣在川上曰逝者如斯夫不舍昼夜释者以为与道为体君学圣门者也循名求实其在於此乎君为予一笑遂为之序而系以诗云

沔彼溪流蜿蜒山谷曰廓而容曰杳而曲辉光内涵精英上浮皎焉明镜锵焉鸣球有斐君子于胥乐只以号配名克济先美宴居从容以游以遨言涉其深言陟其高有卉有葩有苹有藻掇英撝芳幽探远讨天高日晶湛然虚明凉风徐来掬其清冷鸛鹤飞翔龟鱼游跃上下昭昭岂不识察人亦有言至清者泉心术如此可象圣贤弗挠於中孰尘孰滓谓言不信有如此水

槐桥野趣轩诗序

括苍叶君伯玉年及六十老成文献之士际今圣运以六科徵入天官授平凉府开城县主簿在参佐之职尝扁其所居轩曰槐桥野趣而为之图盖纪其乡里之胜以示不忘其僚友孙先生大年纪之会伯玉以两考朝京师过中都请予申其说而予何足以知之按槐桥在龙泉县

南十里临高制下为县之要会伯玉家於其地已及数世其系以野趣云者盖因其意向之适云尔今即其图观之大山深林回旋磅礴而平原广阜犬牙参错非有朝市之盛闾閻之富公府之严也一篙中分两水交会烟草云树凄迷惨淡葑屋荆扉星布远近白发老叟曳杖而来者伛偻匍匐咙言俚语前呼後应非有声名文物之聚衣冠礼乐之集也然而伯玉得其趣而乐焉则固不以彼而易此矣括为仙都上直少微星其人物往往有隐君子之风伯玉家于槐桥将底终身殆不啻李原之盘谷孙登之苏门林逋之孤山矣然显晦非二道出处本一致向在于野今登于朝凡所设施举措之方皆平日涵养之素其意向之适固无入而不自得矣於是樵於山耕於亩猎於囿与二三君子考盘丘壑间其心之所得意之所趋殆与天地万物同其妙矣昔我四明乡先生蒙斋袁公尝曰我观於草木之发生禽鸟之和鸣悠然与我心契其乐无涯然则槐桥野趣其有得於兹耶因为之序而系以诗云

眄彼槐桥龙泉之阳神鍾秀聚山川相望懿美君子兹焉考室言即于野惟趣之适元气太和块轧氤氲两间化育万彙以均因象赋形至理斯具意向之趋心领神悟如饥得食如渴得浆朝夕坐忘乐哉相羊视世营营各惟厥志朝者争名市者射利理欲异情匪公伊私我心休休先烈依归质诸羲经同人于野至趣之存有不忘者圣治文明贤才彙兴天光宠贲粲兮弓旌大道之公岂不在我时仕时止我无不可岁月其徂盍不归欵收视反听式完厥初桑梓敬恭东阡西陌尔汝两忘谁主谁客德人德音或嘯或吟从容者天渊乎尔心猿鹤招邀某山某水优哉游哉永言乐只

荥阳外史集卷二十五

卷二十六

●钦定四库全书

荥阳外史集卷二十六

（明）郑真 撰

○序

送陕西承宣布政司参政陈公入覲序

洪武十有六年夏六月吏部符陕西承宣布政司传上命驿召右参政陈公观廷宾入覲者时陕右吏民方熟公之政不乐其去恋恋再三公曰礼云君命召不俟驾其敢少辽缓耶不问家事星夜就道至临淮阻风舍舟登陆兼程而进予幸以斯文谒见退而叹曰君臣际会之盛不在兹乎周制六年五服一朝又六年王乃时巡诸侯各朝於方岳考制度以尊天子是故赤芾金舄会同有绎则因狩而朝也玄衮及黼辂车乘马则因朝而赐也下以致其敬上以致其恩人心天理之正孰得而间之自汉以下成周之制不可见矣而木水本原之义千载一日也乃今圣明在上朝覲之仪斟酌今古凡在外藩及郡府州县之长岁一朝覲其余大小率以三年考满入覲天官考其功过而为之黜陟焉其礼甚重而其法亦严矣今公以明经之学简在上心西北大阨出当一面而报政逾年首赐入覲盖以旬宣之重委寄之隆厚股肱而崇体貌也可不思所以对敷丕显休命哉天下之大生齿之繁兴化致理之宜柔远安迓之略其有以彻九重黻旒之邃者乎谨按陈氏为莆田望族由始祖号公祀肇居历清远令枢至三世而会稽郡王揆以灭董昌救温陵等功授大镇节钺赐铁券五世而吏部尚书公仁璧六世而仆射公靖父子宰执侍从相继荣耀赫奕嗣是而後持綉斧乘朱轮者代不乏人至十有六世公复起而承之可谓重规叠矩也已昔者左氏载陈敬仲之占曰八世之後莫之与京以公世系考之符敬仲之占矣天於三恪之裔何其封植之厚哉乌乎兹不可以观德也夫於是本其山川地理家世文献之盛立题赋诗序其首以为之赠且以为陈氏奕世之传云

铁券

按陈氏三世从祖会稽郡王揆以武宁军节度使同中书门下平章事检校太师赐铁券郡王薨背其家上之内府券文载在家谱定为宋太宗太平兴国四年以予观之文载郡王平董昌救福建拯温陵等功当是唐昭宗朝钱鏐同时事非太平兴国年也宋初功臣以一言罢兵就镇未必有九死三宥之说尝考司马通监东莱记事本末欧阳五代史皆不载郡王事恐郡志及墓碑或他书可考今当为史家之阙可也

炉冶鼓风炎火煽昆吾坚钢成百链神槌急击迸飞星水石磨礲冰雪片丹书模勒黄金填王

言训飭人文宣侍臣捧入紫宸殿流虹万丈光烛天会稽郡王陈节度大将功成旗鼓树黄罗包赐向辕门鼓舞三军夸际遇山河带砺申誓盟九死三宥垂孙曾筑台拜受扬宠命臣微岂敢忘忠贞後來上表还内府多幸斯文缀宗谱讨论彷彿唐末年盛典煌煌照今古故家人物冠貂蝉嗣续声华今几传安西阆寄催入覲祝公富贵如前贤君不见武穆钱王国吴越数百年来尚官爵铁券网出秋水深锦裘珍藏镇家閭

吴越钱氏世家天台元至正间渔人举网得铁券遂购藏之洪武初年朝廷尝取以观复归诸钱氏云

累朝宸翰

按陈氏御书五通其一五代梁太祖赐节度巡官沅其二宋真宗仁宗赐仆射靖其一则神宗赐广东提刑中复巡官廷宾四世祖仆射六世祖提刑八世祖也

梁宋先朝御笔题封緘犹带紫金泥龙章凤篆昭云汉锦轴牙籤映壁奎清问畴咨隆体貌恩言嘉獎慰黔黎故家文献承先泽捧上青云万尺梯

文思诰

按宋庆历中授虞部郎中陈惟德广东路提刑陈中复文思院绶诰共二通中书舍人行词虞部郎邵庵虞先生称为庆历名法从者廷宾九世祖也

人说闽南法从家先朝深宝诰绶花恩承内殿皆亲擢命出中书溢宠嘉制作多应逾岁月光辉犹复动云霞锦囊犀轴珍藏久许借春风席上夸

经国集

按集类劝农取士守边等事奏疏议凡十卷号经国集右仆射靖上进勅藏秘府熙宁初神宗幸秘书史臣以是集进帝览而嘉之追赠左仆射其集今藏于家

恭惟仆射公全材见经济冠登庙堂谋猷协羣议粲然如日星用以资至治彙次篇目分上表进廷陛帝曰大哉言蓬山肃登度裕陵幸銮輿芸香发灵秘史臣跪进余乙览愜宸意时公已神游九重发深喟煌煌五色诰疏恩贲泉隧巨编手泽余文献期勿坠嗣续喜多贤愿言绍遗懿

梅洋

在兴化县东北林麓多梅树唐武德初陈氏肇居之地後分为十二系云

卜居曾与赋盘阿雪里梅花奈汝何鼎味已应符相业春魁频得冠儒科灵根培植来嘉德奕叶光輝发旧柯归向岁寒林壑底山川佳气近来多

■ 〈^{ㄊㄨ}瓢〉湖

在兴化大象山下陈氏始祖号国杞唐贞元间徙居其地三世至会稽郡王开府先是有■ 〈^{ㄊㄨ}瓢〉湖平陈氏出公卿之讖

大象开形胜平湖綠泛■ 〈^{ㄊㄨ}瓢〉羣峯罗锦綉一水莹琼瑶倏忽鱼龙化翩跹鸛鹤飘浪浪鸣急雨洒洒漾轻飈窈窕深通壑穹窿仰驾桥天晴浮彩鷁月霁响琼箫咫尺天光近从容地利饶淳龐便俗习虚爽远尘嚣似火明丹荔如云覆綠蕉咏歌传翰墨问荅听渔樵允烁精英聚恭惟令德昭起家成赫奕开府耸迢嶢公爵荣重壤王封拜九霄填门多紫綬列座屹金貂远使时相过飞仙自可招公卿先有讖同际圣明朝

郡治故居

按廷宾三世祖清远令枢自■ 〈^{ㄊㄨ}瓢〉湖徙於莆田邑下五世祖吏部尚书仁璧与其子仆射靖让其宅为郡治而退居於郡後郡治今兴化卫也

闽海天高聚德星一门三世尽簪纓金银气合春霄近紫翠屏开晓日明让宅祇今为闽治传经应复大家声德馨幸见贤孙子佩服翩翩覲玉京

金紫厅

在■ 〈^{ㄊㄨ}瓢〉湖上以会稽郡王阶金紫光禄大夫得名上

阶金紫表殊勲大国王封荷圣君宴席醉酣延素月佩声飞步入青云风流上客停丝轡绰约羣仙舞綉裙富贵煌煌忠力报春风玉树长遗芬

仆射坊

按宋熙宁元年诏追赠尚书右仆射陈靖尚书左仆射郡守许翟以朝命建仆射坊至今子孙族居为盛

绰楔煌煌仆射坊相门朱芾咏斯皇雪融晓色喧车骑风送秋声入佩璫綠叶生根蓉树暗红芳结实荔枝香闽南万里何由到几度相思夜月凉

集贤亭

按亭仆射公任集贤学士归时所作

集贤学士早归来丹碧光辉面面开史馆图书深册府仙家冠佩接蓬莱久闻管乐称王佐还道萧曹摠相才春雨兰堦夸奕叶青云遶上凤凰台

龟蛇图

按仆射公知苏州日龟蛇驯伏案前公率僚属祭而遣之遂不复见吏民绘图为公归之赠图今存

琅函出巨轴云是龟蛇图龟蛇玄武神示现将焉如郡侯廊庙器正直神明扶酒酢昭斥遣精诚深感孚鳞介闭深蛰帖然静堦除吏民共惊异绘画粉墨俱再拜赠公归呼舞填通衢修德消怪变古语谅非诬袭藏永为宝不啻如璠璵

忠勲祠

按祠在兴化郡後宋郡守陈宝谟建以吏部父子让宅为郡治尸而祝之时朝议郎捕林居裔使高丽等功赐额忠勲可谓没世不忘矣作迎送神辞

煌煌兮会府奕灵祠兮修宇铿钟兮考鼓饌嘉牲兮湛清醑（叶上声）灵巫兮传语握荔蕉兮式歌且舞盼钧天兮帝所神不来兮思凝伫纷进拜兮诹诹神之来兮如云满堂兮氤縕挹芳冽兮清淳神欣欣兮宴宁飒灵帷兮风泠泠霭霓旌兮错云骈骖鸾鸞兮逍遥上征我福兮我壽昭格享兮绥佑载祈兮载扣耿忠勲兮宇宙

金錢芝

按熙宁六年癸丑壶山清远公莹产芝草四本紫色金錢是岁朝廷加赠仆射而子孙服金紫至十有三人夫人才之兴国家之盛美盛德之形容不在兹乎追为之颂曰

瞻彼壶山佳城葱鬱灵鍾秀聚产此英物紫叶金錢璀璨光荣天风四来播其芳馨嘉应殊特肇自天锡惟清远翁先朝遗德繄仆射公聿大其传密诰疏封曰惟兹年嗣而庆门公卿有伟佩服荧煌腰金衣紫我观图牒在国在家君臣际会文献有华昔在神爵铜池产异儒臣匡衡颂传永世咏怀先烈泉石幽局至和絪縕融结精英我作声诗荐诸祀享霜露春秋以寓遐想

龙爪木

按清远公坟宰木千章熙宁中当昼忽潜龙缘木拏云而去爪迹分明遂号为龙爪木夫龙渊潜在下而托木以升此风云际会之徵陈氏衣冠之盛宜矣为之赞曰

於惟神龙四灵之一变幻蜿蜒风雷盘辟惟閩大家墓林孔深乔木上参云烟昼陰爰有神物
於焉奋蛰五爪纷拏有形有迹我观嘉应彰时文明圣作物觀为公为卿義易有占大人利见
太空茫茫膏泽其遍瞻彼佳城欣欣向荣伊龙所藏伊龙所升告尔後人栽培栽植本固枝茂
聿昭先德

鸿蒙阁

按阁为廷宾八世从祖若道处士所建时同族有绣斧弟兄三部使朱轮叔侄九侯藩之盛处
士当奉恩泽而潜德弗耀养性自适为论时所称云

翬飞杰阁倚鸿蒙复道天寒海日红万里竟翔寥廓表三山如在有无中仙游每迈簪裾集宦
族频看俎席同矫首乘鸾人已去云仍犹复仰玄风

槐轩

按廷宾十三世槐轩先生隐居教授门人多登科者常与宋内翰後村刘公和梅花百咏集行
于世所居有古槐因以自号今里中犹呼其故第为槐轩云

虚堂荫古槐云是公侯兆种树犹种德凭谁契其要先生好幽隐弗以官爵耀弟子肃衿纓函
丈得深造登科若而人喜捷春旗报石床卧緑陰南柯梦方觉逍遥形骸外万事俱一笑懿哉
後村翁兰金为情好翩翩百咏集风月恣吟啸芬芳犹至今依依恋余照百年不同时期君与
同调

白云冈

按莆郡西曰太平山山之东冈为廷宾曾大父龙门公之藏时有白云轮囷其上因目之曰白
云冈以寓恋望之心云

太平冈上白云重佳气林峦晓郁葱尽使函生同化育可能飞步上云空衣冠夜月精灵秘俎
豆春风肸鬣通万里从龙今有象前修嘉泽蔼空蒙

安雅堂

按堂为元国子丞衆仲公宴居之地山海中诗礼藹然号海滨洙泗廷之从祖也

彼美君子作堂孔深有樽有俎有书有琴青山在上流水在下攸芋攸觶既安既雅静焉休休
动焉悠悠造物为徒太虚与游烝我髦士永言占毕教铎洋洋德音秩秩斯文在天圣言岂湮
异途同归洙泗海滨邈哉神游缈缈鸾鹄着书满家有华嗣续我怀斯人如玉如金匪今斯今
犹见其心

驷良别墅

按别墅在莆田北三里许廷宾曾大父龙门居士所筑因以奉其先茔大父莲堂公及其父梅岩公两世继志述事而陈氏世得其山川之秀土地之饶焉

闻说莆田北佳城按拨砂门庭开别墅冠盖识名家山势高奔驷溪流曲赴蛇溪声喧霹雳岩斗露■〈山含〉岼神秀千龄聚英才奕世夸冲姿称孝友美德用柔嘉享祭浑如见修崇凉匪奢馨香罗品荐俭朴尚樽污冥邈魂游閤衷诚恋慕加盟真修法供梵诵肃僧伽继述酬先烈登临擅物华画屏开锦绮仙籁杂箏琶筑坞迷春霭经楼绚早霞凤鸣园有竹莺啭径饶花牡蛎甘分肉槟榔澁当茶红盐青落子丹荔锦先葩宝翰藏宸墨遗书载巨车郡王存誓券仆射记宣麻庆泽从来远功名未有涯闽南人物志传寄海云賒

辍耕处

按莆郡属邑曰游洋游洋之东南曰莒峯林壑尤美至正间廷宾尝耕隐其下扁曰辍耕处云

莒峯山中爱耕作一卷遗经挂牛角耕田方罢还读书自是古人经济学耒耜本为家食资怪底山田苦硗确老犍垂泪怕鞭答归向空山早栖泊夜来春雨波连天南村生意何绵绵客来堂上笑相问城中斗米今几钱秋来收获幸及早便当秉笔书丰年土鼓吹豳大作社与公同醉西风前山上浮云山下土日月云来作门户兴来直上青云巅人事纷纷慨今古君不见甯戚夜饭牛单衣短布寒飕飕一朝应聘入东海小白竟得雄诸侯又不见南阳诸葛吟梁父大耳王孙枉三顾指取巴蜀如掌中鱼水君臣夸际遇人生穷达系逢时丈夫须作远大期■〈亩犬〉亩农功信足乐何如致治成雍熙幸君幡然今一起阡寄煌煌宣上旨辍耕之处早归来乡人唤作鸣珂里

右洪武十六年岁次癸亥秋七月望四明郑真撰

松厅雅咏什

临淮为中都畿邑地近物夥号为难治丞之贰令凡一言之失一事之误辄闻诸庙堂之上固非穷乡下邑自诧为古之附庸也使有学行之士事至物来酬酢处置举得其当而咏歌从容有得夫情性之正不谓之才大夫可乎永嘉林君如渊之为丞也以勤敏见称簿书词讼是非可否与令长僚友协议断以至公贪贿售欺者率不得逞吏人惴惴焉又非所谓籍纸尾当署即署者也以故县以无事日与士大夫赋诗为乐盖如渊家居时尝及事李公五峯高公则丞以是得其比兴之法云人谓之曰子诚哦松者也惜无韩昌黎有以发之因题其扁曰松厅雅咏相与赋诗成什而求为之序夫文章政事非有两途仕优则学顾人之用力何如尔如渊以天子命出贰畿邑帝乡汤沐凡其山川之胜风俗之盛故蹟之遗与夫日月星辰之象风雨霜露之变人物鸟兽草木之形色名状寓於目接於耳发而成声有足以裨教化焉岂徒曰翰墨之适而已哉如渊家在鴈荡石门间林壑静幽万松天倚风月高秋衆籁交作息心寤听如在

九奏钧天之上乃今淮海之阳享有禄仕视隐显行藏如出一致亦可以见无入而不自得矣彼有厄於上下志不克逞而寄兴两松之间抑末也已予与如渊义同濶产又在文学之列当日与如渊妙悟於衽席间母曰我有公事而致其不屑之辞也诗曰仲山甫永怀以慰其心予固以大雅期之矣因为之序而歌诗四章以诒之云

奕奕松厅仰高俯深有美君子遐思悵悵雅颂颯颯以哦以吟如鹤在空如凤在林我怀斯人秩秩德音天高月明如见其心松厅峩峩匪夸匪耀哲人坐忘载色载笑孰鉤我玄孰契我要神游茫茫古今同调仰彼沆寥划焉长啸松厅言言孔寂且闲有客戾止锵兮瑶环跂予望之蓬萊三山鸿飞冥冥邈不可攀薄言旋归宵兮山湾式微载歌天风珊珊煌煌松厅孔乐斯土有琴有书有樽有俎颂声洋洋如邹如鲁太音寥寥逍遥今古

湖山旧隐辞并序

予往年闻永嘉鴈荡石门之胜欲一往不可得久客临淮值林君如渊来为丞因与论斯文之好尝言我家萧台之石门石门为鴈荡支陇奇峯错出不可名状飞流悬瀑如银汉自天而下汇为长川支分派别逶迤曲折至於巨海而止良田广亩鳞次栉比鱼盐稻蟹之利视他郡为冠自上世以诗礼相传先人尝为文学官以非其志拂衣而归謫焉弱息无所肖似尝慕孤山处士之为人在至正时白野忠愍公为篆湖山旧隐四大字以宠之今圣运忝有禄仕皆在淮海之阳南望萧台一发天际常神驰而梦想也子盍有以慰我哉予复之曰君子之学不期於用而自不能不用也不期於用隐可也不能不用仕可也惟其时而已易观之六四曰观国之光利用宾於王时而仕者也遯之上九曰肥遯无不利时而隐者也隐显一致隐即所以为显显即所以为隐也夫石田茅屋布袍草履耕桑自给孰愈民社之司禄食太仓峩冠博带坐论政事为国家出气力以垂名不朽哉然其志之所存固不以彼而易此也如渊既出而仕矣乃不忘乎隐岂区区声利可拘者哉且夫景行先哲士君子所以为厚也岂无他人不如我同姓彼谪仙之高风大节历数百载一日也夙兴夜寐若形声影响之接焉故其在东甌犹在西湖也在淮南犹在东甌也岂以仕止出处为间哉为效淮南招隐作楚辞以贻之异日如渊功成名遂言归旧隐歌予辞以侑酒亦足以为怀古之一慨矣其词曰

望沧海兮青山岿石门兮孱颜飞瀑泻兮潺潺潏长溪兮经纬其间梯空兮险艰松桂连蜷兮邈不可攀窈兮謐悄兮沆水崖喷兮坠危石熊黑啸号人惨栗驾浮云兮寵嵒思夫君兮心忡忡孤鹤啸兮冷风飒佩环兮玲珑构穹窿兮重屋保吾真兮贞独折芳馨兮深谷羌何心兮荣禄煌煌兮旌招结组绶兮登天朝帐山中兮远遥飒天籁兮萧萧山花开兮双崖高澹寂寥兮谁与游遨云归兮风马盍归来兮税驾命蓬萊佳期驱飞廉兮远迓亭亭兮萧台双凤兮飞来眇故鄉兮孔怀君不归兮胡为哉岁宴兮冰雪玩孤芳兮惜别纷前修兮遗烈盍保身兮明哲天地兮浮沕泊吾生兮焉求松桂山中兮春复秋归来归来兮聊淹留

临淮县主簿德政诗序

保定蠡县陈公日新倅簿临淮逾二年民人大和有歌之者曰茫茫淮流形胜今古帝乡汤沐

孔乐斯土惟我陈公受命大廷来倅来簿煌煌厥声咸曰贤哉民之父母气类感孚如出一口
我有田畴以稼以耕尔界尔疆尔沟尔塍我桑我麻载劝载劳我诗我书载迪载教我饥而食
我寒而衣不嘏以呻愉愉怡怡君曰宜哉我躬我职匪恩匪勤匪功匪力惟天生民爱养则均
惟公之政惟公之仁昊穹盖高厥鉴在下曰介景福曰锡纯嘏山高水深秩秩德音我歌不忘
以写我心予谛而听之曰公何以得此於民哉夫是非之心天下之至公长民者有不善焉人
不敢以为善也善焉人不敢以为不善也若公之簿临淮善矣斯民歌咏之其不可以观人心
矣乎公中原望族在胜国时尝掉鞅燕都授经胄监遍及缙绅先生之门膏馥沾溉多矣是以
才给而敏气充而严仕宦所至以治状闻际今圣运由严州府分水县主簿调濮州范县再转
而临淮畿甸之重他人不胜任者公独处之有余不谓之贤可乎是宜诗人见诸颂美而不能
自己也昔仇览署考城簿而王焕以为枳棘非鸾凤所栖百里非大贤之路然则公其自兹升
矣予忝教于兹与公有宾交之契其兴学一事殿廷斋庠创而新之公之功为多乃若户口之
增赋税之登狱讼之平有不能悉书者诗曰济济多士克广德心此学校斯文之责也予安得
以不敏不文而不使传之後來耶於是為叙其事俾能詩者歌以繼之云

荥阳外史集卷二十六

卷二十七

●钦定四库全书

荥阳外史集卷二十七

（明）郑真 撰

○序

赠汝宁方君自牧先生序

地理之学何自而起乎盖自混沌既分清浊肇判凡为天象地形之着人固与之无间矣仰观俯察星峯龙脉阐灵发秀陰阳之气聚之使不散止之使不行行之使有止於是竊焉兆焉封焉沟焉人子之於其父若母终事毕矣吉凶祸福云乎哉至正二十四年先处州教授府君卒予兄弟斩焉在衰絰之中莫知攸之汝宁方君自牧先生以地理之学有名荐绅间再拜以请先生俯而哀之相其土宜於鄆之桃源乡西巖山先莹之侧以先君所尝属意也揆之法而合遂以九月甲申日葬焉夫水砂龙穴地理之準的也先生有得於此故能正四方之位辨五行之形八风之所藏四灵之所聚逆则顺之顺则逆之所谓减左饶右之宜补短截长之法举无不当常使生气行於地中存者亡者两得其安焉其哀死恤生急人之难成我兄弟之厝安其亲者如此至於富贵贫贱贤愚壽夭盛衰成败世之銜其说以售厚贄者则一不出诸口非仁人君子之用心乎盖先生为上饶祝先生高弟其地理学实得之江西王先生自青鸟经以下若郭璞葬书杨筠松曾巡口诀胎腹李周卿之金针张子之玉髓师友渊源之正微词精义传之於口耳熟之於身心专乎理而不谄乎术急乎义而不惑乎利此正圣贤所谓格物致知尽性知命之学岂区区銜名矜能之士所可同日语哉予兄弟贫者也念无以报君则请於乡先生长者为之诗歌以赠之因得序其略於後若其易学之精微文章之华美德行言语之温纯家世出处之详略兹不赘

赠金华钱如璧序

国家之利多矣而盐为大民生之利广矣而食为急盐以煮海为利食以力田为利故有稼穡之入然後可以尽斥卤之功而有司两税亦赖以取然旱暵不时瀦堰失备饥饉死亡之不暇安能竭诚奉上於已之所当为也耶上之人不探其本而拯救之其不至於妨民矣乎四明滨海为郡定海头龙塲岁贡盐三千余引场之南曰凤浦湖者周回十八余里日久不治田失灌溉民以病告者数矣至正二十一年江淞分省左司郎中张公檄命郡府史金华钱君如璧来督盐事且以水利属之君清介廉慎寬和乐易亭民履亩赋盐应期而集遂浚湖筑堤增高就深又筑下堰塘以固其势秋累大获老耄懽庆越二年郎中公檄君复来君守成法不变亭民劝趋恐後初湖置水锸水不能遍及君相地之宜复创其一而斷河数里蜿蜒迤邐至海而

止其湖崖之頽圯洼卑者且■〈木豕〉杙叠石实之土而加筑焉於是昔之硤瘠者今肥腴矣且稔熟十倍矣乡之人咸相谓曰微君其及此乎夫盐水利其尚来矣故海王之策管夷吾所以相齐均水之约召信臣所以治汉也今君以上之命於是二者而交致其力焉庶几乎古之人矣而又衣敝食粝亲率畚鍤而先之故不待刑驱势迫而事功之成不徒为亭民之利而普为编民之利不苟为一时之利而必为永世之利非其仁心之周知虑之密而何哉君尝受知天台许侯具瞻东阳张侯率性参谋赞治於君为多今张公以文武之才司宥密之地君尤为之尽心焉他日擢登华要则其问学政事之施岂特盐法水利而已耶君其尚勉之哉

送赵氏贵伯归天台序

东南文献家称天台黄岩西峽赵氏其上世有以玉牒之望知大宗正寺者子孙相传科第不絕迨至芳塘先生以道德文学当元初为翰林学士制诰书命学士大夫多传诵之数十百年风声之不泯气泽之尚存盖有赖焉族子孙有曰贵伯者自幼读书知明地理之学操笔为文词多清丽可喜年二十余声誉着闻先生长者乐为之獎引贵伯不自矜喜人以是益贤之洪武中贵伯持所业游京师适廷议广致多士有知贵伯者将奏官之贵伯辞曰某实不材幸蒙惠顾得比于庶人之在官者足矣爵禄非所冀也遂署为吏部下执事凡符牒之往来簿册之哀纂尽心竭力不少休废至於铨衡考绩贤愚善恶之实是非邪正之公亦得与其间故天官诸公尤器重之既三年考满其友请予文以赠予遂为言曰士之世其家者岂不欲传珪裘组戟然而命分之定固有莫之致者方在盛时轩车之杂逌衣冠之炫耀孰不曰闾里之荣岁月代更故家文献殆不知其与草木同腐者矣有能於此时奋起而振刷之斯亦人之所难者哉以贵伯当明良相逢之日克以才艺见知於人珪玼蝉聯当复自今日始岂特风声气泽而已哉诗曰以似以续续古之人其贵伯之谓乎予蛰居四明与天台壤地相接固尝知贵伯者旅次相遇倾盖如故而贵伯且以告归为辞矣东望故乡瀛海千里未能从贵伯行李之後尘其能不慨然于怀也耶因其行略序其世家渊懿以赠

送许彦英序

濠梁国家兴王之地今天子肇建中都设兵马指挥使司任徼巡之职内而宫禁公府外而城郭关要军民盜賊水火狱讼之事无所不统固国保民之法可谓详而尽矣洪武三年冬十有一月廷命指挥使秦公建牙视事而会稽许彦英氏实来补吏彦英廉慎精敏谙法律识时宜凡文牒往来悉能举其纲要故事无不集令无不行使闾上下咸以为得人矣考满将行同事者请文以赠夫今之吏即古之所谓庶人在官者虽其上下之间势分不同然片纸尺楮列名并署其贵固不轻矣而况於扈卫所关者哉彦英以有用之才当事功之始周旋三载具有成绪不谓之能可乎古之贤人君子不以禄薄位下而弗为法律心计备樽俎之前筹簿书从事具庙堂之伟略一旦得时行道功名事业照映简册天下後世固有愿慕兴起者矣然则吏之为吏岂轻也哉顾瞻天上清光咫尺量能授官不以格律彦英上考天官大宗伯衡鉴之公安知彦英异日不为卿为公也哉於其行叙以志别

送戴起之归萧山序

越萧山戴起之父累世名家龐厚老成以在先朝尝执事藩府谪遣濠梁居■〈亩犬〉亩为民者有年矣洪武癸丑监察御史张公上言分巡事宜起之随衆量徙壽春逾三月天官宗伯奉上旨凡年六十五以上者放还田里起之以耄耄预焉既趣装戒道停舟河浒来谓予曰我客居异乡分甘沟渎今幸遂首丘之愿圣恩寬弘惧无以报子其一言以识之予复之曰起之存心可谓厚矣然尝闻之达人君子以天地为室庐山川为户牖江海为阨域去家千里无所往而不自得焉不以平易险阻而为进退去留也不以贵贱安危而为荣辱欣戚也此无他命分之正乐焉安焉尽之在已而听之在天尔起之自越适淮转徙困踣常情匪堪而未尝有几微之色见於顔面顾以岐黄之学为济人利物之具其所养可知矣言邁言迈问田园之无恙谿丘壠以依然觴豆俎几岁时展省而子孙满前宾客沓至相与极娱乐之盛以终其天年此岂人力也哉天也然而在野之民当无事时有一饭不忘君者况夫释自羈拘从容所欲诚所谓生死而肉骨者而起之念念不忘之其存心不亦厚乎予世家四明明在汉时为越属邑壤地密迩夙与起之声迹相闻今幸托交下执而教职所縻未得从起之行李後尘殆不能释然於怀也异时或者幸得告还尚当寻夜雪扁舟之迹以尽平生之心焉岂曰乘兴而来兴尽而返何必见戴安道也耶權夫告行书此以识别

赠赵兼善序

越在宋南渡为陪都嘉定间丞相史忠献王奉穆陵於侧微嗣沂邸入继大统越遂为潜藩比汉南阳麟趾公族视他郡为盛宋社既墟数十年来虽不克有其世祿而诗礼敬让楚楚自将人见之者必曰是故宗室信厚公子也赵子兼善生於越二十余年矣世谱仙源本宋太祖後盖处士谷祥之子翰制本初先生从孙也兼善读书明理达务尤能为诗侍谷祥父来居颍上凤阳府幕知其名罗致之俾簿书从事人皆以为宜兼善不色喜将辞归求志简册来谗於予予解之曰学将以有为也刑政法律何往非学哉子不顾诸古人乎张敞起自卒史王尊本於书佐是皆勲名事业卓絶奇伟後之人争欲慕倣而不可得者彼其初岂以卒史书佐为卑且微者耶一簣之积至於为山百川之会迄於成海下以趣高小以至大为之在我而已吾何歉乎哉夫杞宋大国也文献之不足徵我夫子重叹息之兼善先代之後故家文物礼乐典制之旧世将取徵焉爵祿富贵其来也必矣凤阳府幕诸公好贤乐善名动中朝必有为兼善推轂者兼善其善事之乎兼善再拜曰命之矣

送高生鹏举归北海序

北海郡高生翥鹏举年二十余清修穎悟自失怙恃慨然以学业自见入濉县学受尚书读之至成诵探赜紬绎欲然自以为不足将求正於有道而後已也会其同乡贾公顺举通判凤阳府事有亲亲之好纳谒馆寓公俾入郡庠执子弟礼於莆田吴教授先生先生以其得於师者授之生拒户伏按研朱濡墨套点略备典谟训诂微词奥义悉经口授生盖属餽焉未几通判公考满入覲于京生亦辞归展省坟墓将就家卒业予与之别曰圣人之道具载六经若书之论治尤为有天下国家者所甚重士君子之学莫先焉自秦灭典籍百篇之义世莫得闻汉兴济南伏生始为传授北海郑康成继为训释於是齐鲁之间经生学士专门名家其列位於朝者引经决事於名教信非小补矣自汉至唐及宋千有余年至於南渡文治益盛新安蔡氏会

粹诸说而折衷论定先元处士定为国是海内学者家传而人诵於是唐虞三代之道粲然明着若日月星辰之丽于天也蔡氏之学在闽南卓有端绪吴教授之学传诸林先生冈孙之子学矩纯实笃厚议论尤为邃密生既得为依归所以明帝王心法之微会圣贤旨趣之正者不在兹乎昔容城刘公静修未尝接见考亭朱子而以为得其传藁城安公敬仲未尝接见静修而亦以为得其传焉无他天下之道一而已矣圣贤之相契若今古之同时得其道则得其传矣况列诸讲下心传面命如生之於吴教授者哉其母以岁月之久近为言也山东为文物渊藪生世家北海在郑康成之里去伏生乡为不远风声气习感慕兴起今天下文明岩栖谷隐之士不有伏生郑康成者其人乎生归而求之有余师矣夫学贵於有成成已推及成物明体贵於适用生其尚知终始者哉异日齐鲁复有称大儒者非生其谁耶东莱郡博士于君用达尝领濶江书经魁荐予同年友也生归亟往拜之持予说以请必有以淑生矣洪武十有二年九月初十日

送乌先生归四明序

吾乡乌先生继善居慈溪文元杨公之里姿貌玉雪自壮岁得公所着书妙悟心契雄文懿行模范後进者几四十年际圣运肇兴徵入天官授知化州府石隆县事县当海徼远王化号难治先生以其道教诱之隣邑寇窃发率其民为备具寇不敢犯境三年考满调吉安之永新永新之民素健讼先生训以仁义则皆化服由是兴学校礼贤才创建节妇祠以风厉流俗先时民苦苛役逃居他邑者二千余口至是闻先生之政来归恐後遂以经济之学闻诸列郡不宁惟是凡缙绅士大夫有所撰述皆请为执笔而先生之言遂被于江广间矣不幸旁邑事累当置对御史廉知无罪而未如之何坐输作凤阳之池河先生躬事陇亩饥窘劳苦不为戚戚暇则抱琴自适着古诗文乐府以见意且谓人曰吾知所以自处矣逾二年蒙诏旨许还故里过濠梁以同郡两世之契慰藉良厚予因起而告之曰传所谓无入而不自得者先生之谓乎夫独行不愧影独寝不愧衾儒先君子之处忧患而检身律已之为也况先生素有志於圣人之道者乎故其仕也知道之当行其谪也知道之当晦其归也知道之当止凡其身之所存皆其道之所寓穷通隐显曾何芥蒂於胷臆也耶维吾明文献之邦自汉以来董子以孝行称任奕以文章显降至有宋庆历淳熙诸大老道德性命之学有名於朝至於公侯卿相衣冠蝉聯百年之後犹有其人其立言行事足以垂世立教者甚多然而世绪湮微讨论订正固有望於後人矣今仕宦以归老为难晚节完人尤世所少先生年逾耆艾遄而言归岂天欲壽斯文而默有以相之耶故家遗泽之仅存者旁搜远访明分类别以传诸天下後世使天下之人曰文献足徵在吾明郡岂非鄙贱之所望哉洪武十三年夏六月朔日乡贡进士同郡郑真序

送何本道还金华序

国家科目取士得人之盛前代莫及乃洪武五年诏命三年叠试於是濶江所属九郡以其名上之行省而金华何君本道与焉既就试考官嘉兴贝先生廷臣会稽钱先生启予得其文爱其经术通明论策皆中绳墨遂在四十名之选当预计偕有司歌鹿鸣而劝之驾过濶省大参徐公待以客礼命赋青云甘露等诗甚见称赏既入京师吏部奉上命俾入成均将不次用之踰年同舍生同荐书者入台省部相继本道恂恂然谦退如诸生自博士先生以下咸器重之

翰林承旨有宋公以同乡许为通家乞归省侍公着文赠之既复业成均拜恩阙下赐寒暑衣二袭分教中都之国学业者皆将家子弟奉教惟谨逾二年慨然曰吾岂以此为仕进之阶也耶家有二亲年在耄耋不於此时归养後虽噬脐悔奚及乎遂请诸礼部得报而去古之儒者或仕或不仕时焉而仕则得禄以荣其亲如欧阳詹可也时焉弗仕则归养以乐其亲如何蕃亦可也本道为名进士在成均为诸生冠其於进退固知所自处矣且吾闻之本道之五世祖文定公以勉斋黄公高弟上接考亭夫子之传有易学启挥等书行於世在宋茂陵时屡徵不起後以侍讲召亦不赴其学传之鲁斋王公鲁斋传之仁山金公仁山传之许文懿公皆敝履轩冕高风大节与文定相望先後况本道子孙之贤宁不似而续之乎虽然德之深者泽必厚实之大者声必宏何氏以道学传至於今天下学者知之其立言行事之微尚有未及尽知者本道定省之暇昉分而类别之用以传诸天下後世使咸曰何氏尚有人焉顾不韪欤夫君子之所守者道而已爵禄不与焉然则本道之所任者其在兹乎予与本道为同年在凤阳往来为厚于其行不能释然于怀也遂叙以识别云

送姚宗文还松江序

云间姚君宗文年将四十博雅好修以诗文自许谪居临淮令誉日闻临淮大夫聘入乡学不久即弃去泗州守雅知其名言於郡太守李公用礼币训导州学弟子员亦不赴以是淮海之士益高之一日谒诸临淮大夫曰某家在大江之南父母已亡旁无葦功近亲惟外大母某氏在焉外大母年逾八十尝以书来谓曰吾欲见汝甚久兹忍死以待汝其亟来不然无及矣某捧诵之余起居食息凜然不自宁也将归云间少慰其旦夕焉述辞备情恳到切至邑大夫不能违也夫人孰无怀土之思哉锺仪之楚奏庄舄之越吟固其情也况夫外大母骨肉之懿反哺之恩有不能忘者乎人非父母不生父之自出曰祖父母母之自出曰外祖父母盖皆自我一身而推之也昔者先王仁及九族盖母族则次於父族矣亲亲之念一有不至岂为知本哉宗文少而失母长而失父谪遣北来隐忧多难外大母念之不啻如其女也宗文陟屺兴思倚闾多感见其外大母之存亦不啻如见其母之存也彼其白髮高年康宁无恙而千里久别一日会聚老者少者慨言存歿其情为何如耶君子於是以为归所宜归矣而况邑大夫之锡类克俯而从之哉昔吾乡先生袁文清公母史夫人大资忠清公孙女也生文清七日而没外祖母张氏来抚育之公既贵登内相赠及其母祀张氏於家庙别室盖以义起礼也宗文念及外大母远事归省其古君子之用心哉异日登名朝着增光前烈成外家之宅相衍奕世之基图岂非淮海士君子所望於宗文者若乃托放园林感今怀昔鱸松江之鲈听华亭之鹤诗酒清娱与二三高士神交千载之上固其余事也庸何贅辞也哉于其行叙以为赠

荥阳外史集卷二十七

卷二十八

●钦定四库全书

荜阳外史集卷二十八

（明）郑真 撰

○序

赠昌国县典史马君德明序

昌国在海中洲地号险阻而异时道德文章之士项背相望固有登庙堂而参大政者百余年来故家余风犹未渐尽操翰墨而事编简者往往有之若夫习险之徒张网罟举舟楫乘时逐利妄动窃发盖有陷溺於流俗而不自知者是岂可槩观之哉呜呼天之生人秉彝好德之心固人人之所有也长民者抚而安之未有不可使为善者况昌国为明之属邑文献之遗有足以兴化致理者乎自武林马君之来典文幕也适当国家开创之初虎旅奋扬诛暴禁乱岛屿之间疮痍呻吟者未尽起也饥渴困踣者未尽苏也流徙转移者未尽复也然而甲兵缮修之急钱谷征敛之重簿书期会之烦纲提领挈咸视君取则焉其何以善於其职欤而君也洁廉无私刚介有守蔼然恺悌之意形於言惻然仁恤之念见於政凡郡府公务之需有不能应者挺然为民侃侃言之虽至于谴怒言之益力必期於免而止故上官爱其诚庶民怀其惠而君以能吏闻矣近日者郡府以属县户口之籍未成也命君程督之君昼夜尽心焉既而以就绪告遂复归典幕事斯民咸感叹相谓曰吾民其庶几有瘳乎於是其邑之长老间属笔於予俾叙其事以志不忘云予惟士之学为政也不以位之小大禄之厚薄志於利民而已故政在天下则天下之民受其利政在一邑则一邑之民受其利随其所在而设施之亦各尽其职焉耳以君由儒入吏其在典幕之位位诚卑矣禄诚薄矣而君不鄙夷之诚所谓有志於民者欤夫有志於民而民德之必使着之言辞以表见於世其文献之遗俗有足观者欤兴化致理顾所行何如尔君其尚慎始终者哉

同前

今天子建国之初大兵徇地淞东明之父老且簞食壶浆百拜请降天子怜之命守臣分治其地且有以抚绥之明年国号大明改元洪武淞江省守臣钦承旨意檄命新具图籍明郡长贰承奉恐後且相谓曰赋役之法其根本系於田业不先定其田业虽有良法美意何从施之遂命六县之民凡山田疆里之宜某税某粮之数悉登载之且择邑从事之贤者令昌国县典史马君程督之君守之以正持之以公不亟不矜咻噢教诲无有倦意执笔操觚之士咸同心一志不敢少肆隐欺之弊其征科旧额间有轻重失宜为民病者悉厘正之於是大编巨帙分类别披而览之若躬历焉谷粟布帛力役之征所以足食足兵者视其多寡大小为之经制而

民遂得其平矣昌国之民相聚言曰民之望君也久矣其归抚我乎由是郡府俾还理县事同里之士凡千余人觴酒奉别江水上有一惘惘之色因命予序其意予惟版籍之传也尚矣周礼职方氏掌天下之图与其财用以周知其利害而司民之官且正其都鄙郊野三年大比以其民数诏小司寇献之王王拜受之藏之天府是则土地人民固有天下者之所甚重也国家诞受天命幅员之广至於海隅日出固已囊括无余矣况吾邦在畿甸之下千里而近其有不致其谨乎以君承郡府之命恪勤若此其能以在上之心为心者哉予蛰居间巷贫而且病无名声之闻而昌国之人往往来言君之善者予既为文乐道之矣而里之先达老成尤德君不忘则君之及人者盖可想矣安敢以言之重词之复而不以着君之美乎君字德明武林人早以儒试吏所在有声盖其学之所至云

送明州卫千户所司吏张子中考满序

国家右武而尚功列卫将校莫非折冲御侮之才至於操翰墨治簿书以为吏者非其信行之着知虑之周足以参赞机密辅成事功者不克当之噫士之得试为吏岂轻也哉京口张君子中以读书习律见知今千户淮右陈侯时侯以一军从摠兵官平章朱公於淞江子中与在行间侯以之自随因进拜平章公於行营遂得为杭州仁和卫千户所吏自百户以下摠旗大小部署处分悉以委之籍既上无有变易之者未几侯移戍四明子中亦以常调来适当海岛抢攘调发不时君按籍具姓名给粮授甲尽心厥事有不自知其劳者若是其不谓之能可乎既逾年以考满捧檄将上淞省凡部伍之长共惜其去请予为序予谓自古士之有志於禄仕往往寄径於卒史书佐以为之阶及其至也虽公侯之贵亦由是出焉然则升高自下趋远由近其理顾不如是也耶乃今宇宙开创之初弓矢未囊干戈未戢服役辕门者多能以功名自见况子中参赞画诺夙为大官贵人之所赏识哉吾知其以能为之才见用於世也必矣子中尚勉乎哉

送邢惟中陞凤阳行大都督掾序

予年几二十好习两制学取宋词科十二体诏诰制表録而读之得说斋唐公进门下省所业及试中六题喟然叹曰东南文献渊懿其在兹乎说斋践历馆阁出守台州有能声迨今二百余年其子孙在金华者犹有其人尝欲就而取证前代之传而潦倒山林间有不可得者洪武癸丑忝以淞江进士典教临淮得与凤阳府史邢惟中父定交甚能言说斋出处之详从而谄之盖惟中先君子以说斋裔孙来後邢氏有宗盟之契是所谓不忘其先者耶凤阳国家兴王之地惟中为府史历掌刑户二曹簿书狱讼之烦钱谷户口之重深猷精核各得其要故九州二十四县之属莫不称其公且勤明且敏也三年书考行大都督府辟以为掾惟中不得辞夫儒与吏非二道也惟督府密迓禁严高牙大纛增重於时其谋谟画诺当得儒者有用之才岂琐琐者所能任哉惟中以儒先家世其於吏事固恢恢乎有余裕矣上公器而使之其不谓之得人矣乎顾予不才窃禄罔功而去家日远羈孤廓落犹幸得友惟中以慰其心焉今惟中自此升矣而不远伊迓过从如故能不为之喜谈而乐道之哉惟中母弟绍宗以明经试吏部授知光州固始县事以先命归姓唐氏昔者高魏合族士君子以为美事惟中与知县同气敦睦是庶几於古道者耶因并识之以为亲亲者劝焉

送颍上县分巡千户所吏王敬仪归河南都司序

国家建长治久安之策纬武而经文内而京师外而郡邑肇置环卫卫有指挥使副统司各所有千百夫长凡而甲兵之缮修衣粮之给赐户口之繁狱讼之重则以付之吏师而为之职掌焉颍上中都属有扞城之责隸河南都司尝以千户分镇之而王敬仪实来司其吏事敬仪谨慎廉勤尽心周旋无有失者颍上多闲田广袤朝廷尝命设二屯俾军民杂耕而收其税租敬仪设法以区处之农而耕兵而戍者更番迭休劳逸适等春夏之交荷锄如云乐岁有秋饱食思报此其功之可书者也既三年考满奉檄将归都司盖其上官有以器使之也夫天下未尝乏才也时有未至则用有未尽萧何曹参王尊张敞之流皆起於吏彼岂异於人哉亦惟其时而已今夫介胄之士奋自行伍决机两阵之间了无怖色平居无事吏以文法裁制其短长则畏恐缩忸莫敢先後其於役盖不轻矣然则任外阃之寄以迪师中之吉者其不在於得人也耶若敬仪者可谓难也已仰惟圣明在上日月临照求贤审官不以资格有如敬仪报劳分阃考绩书功宜在陟典功名富贵何古人之不可及也耶予虽不识敬仪然清声美誉服膺久矣异日倾盖相逢挹其顔色所其议论当有以启予者岂曰见所见而已哉颍之士大夫有求为赠言者书以为序

送同郡李公复上任咸阳县教谕序

朝廷崇尚儒术士以才名登馆阁者上优礼而宠异之他有司不敢望焉其在外为儒学官郡府州太守若县令亲与为客主之礼他有司不能比焉士之在学校犹馆阁也呜呼不其重矣乎予友李君公复世为明郡奉化儒族大父某与其父某皆不幸早歿母沈氏以姑之侄为妇两世皆以节着公复生逾年而孤既长出就外傅力学思亢其宗外家端宪先生之後端宪与奉化乡先生舒文靖公为熙淳大儒文靖有诗说绍承先烈公复既尽得二家之传学以早成际今圣朝尝以乡贡徵至京师力辞归养未几复以荐入天官试艺高等为广德广洋县儒学教谕县既革并遂调安西府咸阳县咸阳古帝王所都人物渊薮公复掌教其地必能以道化诱其民矣自昔敦学之法非以词章句读月书季考以钓声名取利禄也涵养其气质薰陶其德性去其小者近者就其远者大者故所教即所养所养即所用一旦见诸事业直举此加彼尔近世以来师道不明人心滋蔽父兄不知训子弟不知学穷乡草茅视简册为害已甘心樵牧商贾之归至烦有司弊弊焉文移驱迫之未施教导民其果如是耶夫斯文兴起之机实世道升降之会仰惟盛代文明士有一才一艺皆得録用况学校贤才所关文学德行之士乐得英才而教育之所以转移人心恢弘世教者宁不为己任乎知咸阳县事庄君九畴端士也前在邵武民思其惠爱今宰咸阳尤以兴学为重公复与之同乡有亲契之厚则所以尊崇而体貌者视他州异县不啻倍蓰矣而予也老学无成教授临淮八年于兹历知县事凡六七人每以落落难合为恨岂若公复之於九畴相遇之适然者哉殆天默相斯文用以惠幸咸阳之子弟耶因着之序为公复贺且为九畴致意云

送同郡蒋古岩上任知沛县序

四明蒋氏本汉安阳亭侯之後为文献大族自评事登名仕版至金紫公而益大其在宋崇宁

间兄弟聯登上第陈忠肃扁其堂曰连桂者则金紫公二子也自金紫四传至尚书公以雄文直道逮事宁理两朝为名法从载在国史今其家累世诰勅具存其有所谓三径连珠集者则宣献楼公着序以传者也宋社既亡虽不及享有世禄而以诗书保其家业尚论其世者亦足取徵哉知凤阳府徐州沛县事蒋君古岩金紫公之裔与秦府长史子杰为同族世家奉化之三岭长兄玉才敏过人元至正间尝接见诸名士治春秋有声庠序不幸早歿古岩克嗣其承读书学古人文章开门授徒孝养其母将终身焉乃洪武十有三年春三月圣天子命郡府州县举聪明正直二人於是奉化有司以古岩应诏古岩不得辞至阙下遂有沛邑之命夫聪明正直之谓神以一县而止得二人可谓才难也已使果得其人吾见其视无所蔽听无所壅邪不能干曲不能回矣以之司民社之寄岂不足以副国家委任之重哉古岩世家贤子孙克膺兹选出宰百里又在帝乡畿甸之内则夫神明之政其不日闻九重之上哉自昔公侯卿相子孙奕叶者汉有陈留袁氏关西杨氏唐有京兆杜氏钜鹿魏氏宋有东莱吕氏安阳韩氏蒋氏由金紫以降世泽相承衣冠蝉聯与诸大家相望後先际时盛明子杰既以府僚为上所眷注而古岩复以县令克为之继可谓规重矩叠矣传曰公侯之家克复其始蒋氏其庶几乎予以蒋氏外孙幼尝从舅氏过三岭拜金紫公尚书公诸大墓云深木寒翁仲石兽故无恙想见其志气神明之所存固有不胜慨然者矣越在淮山与古岩相遇论内外兄弟之契故家文献嗣而续之不有望于古岩者乎古岩行矣沛与临淮俱凤阳封域声迹相闻属在文学之职三年报政有可书者尚得执笔焉

送王上舍思我奉亲如京师序

国学上舍生王度思我姑苏人也处士伯贞父之子南昌太守伯恭公之侄年二十余清修穎悟寓家凤阳入郡学受易经於松江以斋黄先生仲瑱时滑台李公惟政为守獎厉後进弟子员中于思我独表异之盖见其质之美而学之勤也公将以所属诸生入贡春官命吴教授义孚阅试予亦濫次其列得思我之文为九州诸生冠公为忻喜设飧具躬为之劝驾既入京试所业成均又以易经魁在前列博士助教诸先生多为之延誉而思我遂以俊选称矣圣天子嘉惠学校储材大用凡成均士子德器成就者选入内廷职钞纂备差遣思我得在其列尝奉丹符出使济南既还复命一日入奏曰臣家在凤阳二亲老矣而不得时晨昏之奉幸得归取以来实微臣之愿也上可其奏命司业给告还凤阳逾月奉其父母登舟予与吴教授送至淮汴因告之曰士之所学者忠与孝也忠孝臣子之大节事亲孝故忠可移於君孝之未至於忠乎曷有思我奉命以来侍亲以往於忠孝庶几矣昔唐何蕃在太学以文行有声六馆之士视其动静以为向背然卒以亲老辞归昌黎韩子传着其事後世高之予窃以为使蕃如思我取以就养亦何必终归哉惜也蕃不得有其禄仕以为亲荣也夫得禄以及亲亲固荣矣禄有所弗及亲亦何憾焉蕃志于归养亦各言其志也已仰惟国家崇广孝治国学生有亲同在京者优其廩赐足以见恩之锡类矣思我之奉迎其亲也处则以事其亲出则以事其师诗书礼乐之政习复而不舍君臣父子之道敦笃而弗违用是入侍圣君九重之上其於忠孝可以两得矣异日荣跻膺仕名列縉绅花诰恩封捧觴称壽不曰王氏有子乎诸士既为思我祖道即凤阳境内拈题为说夫山川能说可为大夫有问中都名胜者思我尚得以取徵焉诗既成请以予言为首

送凤阳府知事向君志仁入朝序

知事幕职也古为掌故之官其在郡府与太守秩有高下禄有等差而是非利害相等太守曰然知事曰不然太守曰可行知事曰不可行刑狱之裁决仓储之出纳所属官吏进退黜陟成案已具知事弗署守固末如之何也已然则职任其不轻矣哉凤阳为帝乡戚里辖九州二十四县大驾巡幸亲王驻师将相公侯将命出入兵卫星列屯牧棊布文牒往来栋充庾积谋谟画诺之职信乎其难矣向君志仁归峡望族种学绩文有可传者避地东川以师道自任士大夫属心焉际今熙朝徵入京师由荆州司仓转凤阳府知事前太守滑台李公今山西张公皆推獎崇敬待以宾礼事之大小每以倚为重是故学校之兴邮传之置钱粮户口之增羡仓廩府库之缮修志仁实有力焉而尤孝於事亲诚於待士廉於律已凡在接识者皆称为贤由是名声四闻有荐诸上者天官奉命徵入且将大用於朝矣夫巨木在山非不坚且直也美珠在渊非不光且耀也然而匠氏之求不至则柱石之才无施蠡民之求不至则照乘之珍焉取志仁美行懿德在僚佐之任一旦升诸岩廊之上如木之资以柱石珠之取以照乘人皆知其为才且珍也岂不可哉自今而後当见峩冠正色献替可否使天下之人皆仰其容仪挹其论议斯足以见出处之正矣且士患无其时志仁今可谓逢时矣其尚不媿所学哉将行士大夫即凤阳胜槩拈题为赠夫山川能说可为大夫况志仁莅政之旧吟想之至系千载之思者哉圣上眷念乡土或时顾问亦可以备对敷之万一云

送临淮县主簿叶宗义归富阳序

昔宋理宗时临安叶文简公在景定初为京学生上书论丞相贾似道专权误国远窜漳南宋社既亡入元仕至中书右丞今其言载在国史读之者凛凛然犹有生气予生也晚不得望公之後尘犹幸识其孙子中先生老成之资正大之学退隐四明山中晚节从容为後学仪表而晋府长史彦良公实其弟也以出继慈溪桂姓由先朝名进士际今盛明为官僚侍上左右甚见亲厚其出处大致与文简公无以异矣乃洪武十三年夏四月富阳叶君宗义举聪明正直来为凤阳临淮县主簿适予典教兹邑以礼相见问其家世则文简公曾孙也於子中为从子行未几子中薄游济南将归取道临淮宗义馆诸所寓殊为恭谨适长史公奉命入朝旅次淮浒论兄弟叔侄之契予以斯文世好亦得周旋其间因退而叹曰乔木世臣之盛东南文献孰有过之者乎宗义之倅临淮也簿书期会朝夕不遑同僚以疲冗见黜独宗义明敏俊爽上下爱重去府北十五里淮河上长桥以大水坏郡太守檄宗义督工更作之有成绩而宗义遂以贤佐簿称矣既而念家有老母年登八袞得请归养缙绅士大夫即临淮山川胜槩赋诗为赠予因谕诸宗义曰仕所以行其学也宗义学优而仕功名爵禄将文简公是望而何去之速耶宗义曰先文简公立朝大节亦惟忠与孝而已夫孝之未尽於忠何有吾亲喜惧之年不得尽爱日之诚顾恋恋禄养重不孝之罪岂文简公所望於我後人者乎予不能沽酌之酒而告之曰古所谓克世其家者非宗义其谁哉遂序诸羣言之首用以质诸子中先生云

送中都国学分教林实中归永嘉序

永嘉林君实中以俊选受业成均拜恩阙下赐绮衣分教中都国学逾二年辞诸学官曰尝闻

先民有言孝子一夕五起视其亲衣厚薄枕之高卑也其家有老母年七十余定省之旷而滌滌之违也不孝之罪多矣设有疾病谁与侍汤药乎及今不归是重不孝之罪也助教金先生怜其情为达诸礼部上其奏符报如章实中买舟淮汴问道所由与缙绅士大夫为别以予泐产同乡求一言以赠夫人子岂欲舍其亲哉气志物欲之交固有轻去而远别者矣至於湖海涉历山川转徙日复日岁复岁功名利禄之未酬固有不暇归视其亲矣噫是岂其亲之所望於人子者哉且生之膝下一气而分喘息呼吸彼动此应故有啮指而心动者蔡顺之於母也有疾而心痛者张志寬之於母也彼其白发高堂而游子在远望眼长悬忧心如搗其何以为情也耶实中少而失父独幸有母在尔拜奉慈命观上国之光文章德器为诸生长者同任斯道之寄固其母所深喜者初不以去左右离朝夕为戚也然而实中至孝天稟陟屺之思倚闾之恋有不能顷刻忘者仰惟国家崇广孝治实中一请遽得其所欲诚有以见夫秉彝好德之心通上下而无间矣虽然孝子之有深爱者必有和气有和气者必有愉色有愉色者必有婉容非由外铄我也根诸人心本诸天理即诸一事一物之近而无有过不及之差焉尔实中归壽其母以心求心慈孝之情百年一日也岂但服食周旋猎山钓海为膳羞燕娱之奉哉乃若览乡土之非昔问田园之瘠肥相羊夷犹而以得归为幸非予所儼於实中也实中行矣予何敢以不文而为之默默哉

卷二十九

●钦定四库全书

荜阳外史集卷二十九

（明）郑真 撰

○序

纪君师道文集序

吾乡世称文献之邦庆历大儒淳熙故老流风余泽犹有存者有国以来以德行文学为後学所师尊者则益朋先生纪公其人也先生既捐馆其子文愷父能修其业至其孙师道君复以古文有名荐绅间而先生之道益以明着间尝出以示予予伏而读之作而言曰美哉文乎其有得於渊源之正者乎盖尝论之天地之间物之大者莫海若也八紘九野之水纳焉朝而潮暮而汐风云烟雨椒崖岛屿之险怪瑰伟晦冥变化穷千万年而不息焉者盖其深广而有本也人之於文也亦然本之以仁义充之以问学而又养之以刚大之气故其大者可以经天地纬日星发挥圣学润色皇猷登太山之封镂白玉之牒而其小者亦因事托物时出而鸣之而人弗之及焉源深者流长其然耶其不然耶师道貌温而气和德进而业修凡经史之微传注之要鬼神礼乐之奥人物事物之着若取之室中其渊深浩淼冲灏洋溢诚足以语夫海之大矣沟渎云乎哉乌乎纪氏何其多贤也耶文献之传信乎迪光前人矣予幼时与师道君隸业郡庠自予之祖蒙隐先生与君之祖同有声闾里而予之父求我府君又与君之父为同岁两家三世之好世复有过之者乎祖父之遗师友之笃有事焉弗忘焉其能无愧於师道否耶诗曰维其有之是以似之吾於是为师道喜语曰以文会友以友辅仁吾於是又为师道望师道不有以张我则必有以规我矣师道曰诺书以为序

梦慈诗序

世言至人无梦高宗之梦傅说尼父之梦周公其然岂其然哉周官占梦载梦有六曰正曰噩曰思曰寤曰喜曰惧则其目也夫人与陰阳昼夜相为流通昼之所为夜见诸梦得失休咎示为先兆故礼有献吉梦憎恶梦之说以为天人相感之理不可诬也况於子母至亲思念之情见於寢处而不忘者哉陕西灵台李公大本纯孝君子也早岁失父赖母氏鞠育以底于成受业胄庠得请归养复领明经荐除广信府推官广信江右名郡词讼繁剧公本家教之盛尽心所事号为平理尝以公事至铅山次车盘驿信宿间梦拜其母床下顾慈顏若不怪然者既觉泫然而悲曰此固吾母倚闥之望有以动吾心也喜惧之年凜焉朝夕盍其遄归矣哉缙绅君子为诗以慰解之予得而读之有南陔白华之遗音焉其有以得公之情矣夫梦寐之形精诚之着也以公之梦质之周官则其梦为思矣人非父母不生亲而且狎者莫母若也方孺子无

知亲亲之爱不能以顷刻舍也既长而他适则其爱或由而弛矣以公虽不及事其父而幸其母在仕宦远游山川辽邈爱母之念犹向之为孺子也故中夜而寢见之梦寐於其母之动静起居忧娱喜戚不异於温清定省时也此无他志意之合精神之通初非以内外远近间也使其心或忘焉则无复是梦矣思之深见诸梦而复思焉身虽在远而其心常若在其亲之左右前後也不谓之孝可乎虽然君子之於所亲非有二也故易以乾称父坤称母视父母为天地岂不重乎公既克念其母其於父若之何哉盖念其母者所以不忘其父也见其母於梦寐则於严君终天罔极之思不言可想矣仰惟国家推恩锡类公既贵及七品法当疏封金花紫诰幸而得之奉归以为亲壽夜阑秉烛笑叙平昔语及兹梦其不以为吉徵乎诗曰夙兴夜寐无忝尔所生公盍知所自慎哉

荥阳外史集卷二十九

卷三十

●钦定四库全书

荥阳外史集卷三十

（明）郑真 撰

○序

余时远字序

岁功之成系乎时日月星辰之运行寒暑旦暮之代谢非时乎上古远矣然自大挠作甲子以来更历数千百载而精历筭者所能考也时岂远哉夫即近以观远者明於时者也书曰视远惟明远之至也远之时义大矣哉四明余某字以时远其有志於时者乎然时而谓之远则非溺於浅近安於小成者矣时远为明文献大族其先高大父畏斋文靖公在宋时与丞相史忠献王有宾友之契嘉定间自临安归明过越避雨全保长家遇理宗於侧微进诸史相嗣沂王入继大统文靖遂以潜邸之旧入践台阁归守乡郡积官至参知政事其犹子退斋公复以文武才治全蜀金紫一门荣耀莫加焉时远慨念其先已阅百年而声容志意俨然如见遗簪旧笏不与海桑俱化足以见世泽之久矣夫源深者流长本大者末茂时远以世家子孙绍承诗书之绪思亢厥宗好学不怠公侯复始日可俟已何远之有哉传曰尔尚迪前人之光此时远以字配名之义也乌乎勉之哉

许生志学字公敏序

松江许生尝登前乡贡进士同郡黄先生仲瑱之门执经凤阳府为弟子员者二年适太守刘公以兴学为己任以币聘先生生於是复居座下生名志学间以字为请先生曰圣如宣尼十五志学匪曰生知匪曰先觉敏而求之不厌不倦圣言如天子其力践於是以公敏字之异日生复求言于予夫先生所以告生者至矣何以予说为哉虽然不可不有以语之也三代以上人未有不学者党庠遂序之制固非一端矣小而洒扫应对大而修齐治平暨夫天文地理兵刑食货律历筭数礼乐典章文物之详且着者孰非吾之所当学哉然自离经辨志至於知类通达自一年五年七年而小成又九年而大成苟非敏以求之其能至於深造自得乎昔传说告高宗曰惟学逊志务时敏而夫子称孔圉亦曰敏而好学夫学必先于立志而非敏不足以成功以孔子上圣之资犹曰敏而好学至於顔子之於仁曾子之於孝独以不敏辞则敏其人之所难者耶夫字所以配名也黄先生所以命生者岂有他哉示以用力之方而已生慎其所由审其所止敏言焉敏行焉毋卤莽以灭裂毋苟且以因循毋甘污下而进高明毋为浮薄而习忠厚毋即宴安而清苦自厉毋昵近小人而君子是归斯为志学而敏者矣志之立学之进敏而有功庶不负先生之训哉

乐侯君玉字序

知临淮县事山西乐侯名璚字君玉予为之说曰天下之至宝者莫玉若也玉璚之制见於礼书以黄金为勺青金为柄而朱其中注鬱鬯之酒灌地以降神者也是天子宗庙之器岂羣公而下所得而用之哉侯名璚而字君玉是以宗庙之器期之矣夫隋氏之璧价重连城下和之璞至於三献宝玉之在人有终不得自弃者人以为宝而献之君以为宝而用之於是为主为璧为琮为瑁为玺为佩为绶为旒为冕为冠则其为宝也大矣而况璚之为器王者用以禘祀清庙者乎诗曰瑟彼玉璚黄流在中岂弟君子福祿攸降盖奉祖考格神明孝敬莫重於此焉者谓之君玉其非名实之允称者乎且君子无故玉不去身玉所以比德也侯以温润之质缜栗之容内美在中含光不耀有似於玉矣以上命令兹畿邑民爱之如父母今以考满入覲且将进而用之为宗庙之重器不负先生长者命名与字之意矣昔者子贡在四科夫子许以瑚琏之器侯其圣门之徒欤

国学生王文祥字序

国学生越嵎县王铭字文祥以春官选训导徐州萧县弟子员洪武十一年冬以州太守命奉表来中都竣事将还来临淮求着字说予语之曰文定厥祥周大明之诗所以美文王也文者礼也祥者吉也言既卜得吉而以礼定其祥也子何取於是哉其将以斯文为治世之祥乎夫龙马负图而伏羲演易神龟呈洛而武王叙畴此天地之祥所以致人文之盛也箫韶九奏而凤凰来仪春秋经成而麟出于野此人文之作所以致天地之祥也呜呼天人志气之感通其来久矣天地之祥其非人文之祥乎且铭者着之金石者也铭即所谓文也汤之盘铭着日新之德正考父之铭着三命之恭汤之德配天历年八百正考父其裔也正考父之後则吾夫子实承之祖述宪章斯文万代之传莫尚焉子名铭而字文祥其有取於是哉且文莫重於经六经之文圣人之所成也读其文者用以修身齐家推而至於治国平天下治效所徵诸福毕至斯其为祥也信矣子生当盛明菁莪乐育任斯道之重异日登馆阁之上发言成文吐辞为经恢圣教之尊崇资皇猷之黼黻日光玉洁金声玉振勒之景鍾传之简册使天下之人仰之如麟如凤如庆云如景星则文明之祥孰有大於此者乎文祥谢曰先生之言是也书以为文祥勉

李敬字德輿序

滑台李生敬年几弱冠侍其父太守公莅官凤阳太守公命入郡庠执弟子礼於莆田吴先生义夫松江沈先生文举二先生爱其质之美而学之勤也训以经史朝夕不倦生间游中都国学助教孙先生大雅以敬輿字之生归以语吴先生先生曰敬德之輿也能敬必有德晋大夫尝言之唐元和间权公载之亦名德輿权公以文章显为唐名相孙先生以其名字子意者以公之勲名事业望子乎乌乎勉之哉会予与沈先生厠座列同以吴先生之言为然遂从而解之曰德者得之於心尽善全美而无或遗忘之谓也若大学所谓明德诗所谓懿德书所谓咸有一德是也輿者车之异名任重致远之器也敬为德之輿谓其任以载之推而行之也尧之德在允恭克让舜之德在温恭允塞汤之日新中宗之寅畏文王之小心武王之只惧成王之

不敢康宁孔子之不踰矩孟子之不动心圣贤之所谓德何莫非敬哉士君子惟德之行亦敬而已矣子不观诸车乎方是箱圆是轮前轩後轻上盖下幕驱驰乎太行之道而无有倾侧放逸焉以其险之虞而敬慎之至也至於平原旷野怠心一生忽不知其轂之脱而辙之覆也是故车以配德而敬又所以成其德也守诸内而形诸外非敬何以哉朱子着敬斋箴即动静表里言之而其训德则曰虚灵不昧以具衆理而应万事所以明体用相资之要也生好学而文为太守公嫡嗣又得先生长者以为依归以字配名吾见其整齐严肃动容周旋无不中礼矣天理春融人欲蝉蛻而德性之懿有以全其天之所赋矣以是而任重致远则以仁为辕以义为轼诚笃以为干忠信以为轨险而安易而利动而法庶乎车之全殆如柳宗元所云者乎异日名在缙绅列诸朝着如权公之为卿为相亦何歉乎哉生上手谢曰某何敢当耶佩服明训以无负诸先生斯可矣遂书以遗之

陈守立士德字辞并序

出郡城南行二十余里地名姜屿邑大姓陈姓居之有名守立字士德者年方弱冠佩言服行以书来求为训辞予乃为之言曰甚矣人不可以无所守也亦甚矣不可以不有所立也曰守曰立其庶几士之有德者乎夫人之生以眇然之身所以参天地之间者以其能持守而植立也苟其不然吾见其根本空虚而凡动作威仪固将放逸纵弛倾侧偏陂而不自知矣其不愧於为人矣乎是故致勤於存养省察之功致力於真知实践之地忠信以主之诚敬以持之孜孜矻矻有事焉勿忘焉使夫外好不入内慾不萌性命义分之正皆在於我兹非所谓德者欤夫德之在人本然全具固无假於修为者然而学者不致其用力之要则德非其德矣论语曰据於德而朱子以为据者执守之谓是德固贵於守矣易曰立人之道曰仁与义仁义者德也而中庸曰中立而不倚强哉矫强者勇也天下之达德也然则德者其非有立亦何以哉今生居山水间醇厚周慎无刻薄疏卤之习絶险陂邪佞之私延师取友诵诗读书其於守身立己之道得矣字以士德岂过乎哉抑予又有说焉孟子尝曰守身为大而夫子自言进德之序亦曰三十而立夫有以自立则信其能守矣孰谓其不为君子之德者哉乃作字辞以贻之其词曰

人之始生曰有恒性惟性之存为德之正天之所赋罔间知愚形气之拘或失之初爰有人焉抗然自立守之持之以听以夕相厥攸居书史纷纭寤寐圣贤湛然天君静存动察万殊一致天理春融人欲蝉蛻守焉立焉心德之全字以配名尔其勉旃

吴生起予字辞并序

人始生而名既冠而字字所以配名也鄞丽山吴生掄年二十余种学绩文师事同郡臧君彦和先生先生以起予字之殆所以表其德也欤起予二字见於论语吾夫子独以子夏发之他弟子无与焉亦足以见其许与之不苟矣夫孔子天纵之圣顾何待於学者之感发哉然所以许之如此者盖其盛德之至乐与人为善也乐与人为善则人益劝於善矣乌乎师友道丧久矣千载之下有如子夏能契圣人之心者欤夫降衷秉彝人所同得圣贤之道古今同贯有志於学者可不以孔门师弟子授受自期哉以生年壮气完力勤不懈而又得明师以为依归风

灯雪席间耳提面命必有神会而心得者当不止一言之契一语之合而已字以起予其亦名实相孚之义也耶予虽不识臧君实具言之君鲁山廉访公诸孙以师道振其家声後学之士待其獎掖而成就者非一日矣异日尚当所长河乱横江访生於丽山之阳挹生之气色听生之议论必有以起予者益有以知臧君之不妄矣传曰鲁无君子斯焉取斯生其庶几矣乎作起予字辞

昔在圣门有高弟子以文学称曰卜商氏燕居恂恂温其阳春教育流行有若化钧枢衣肃趋问诗明理心融理昭由彼达此气象雍容渊哉圣衷起予之辞揭日行空往世悠悠遗编斯在後有学者如闻罄咳学者谁欤丽山氏吴以字系名繫德之符我观世人斷丧本实匪识之卑惟志之惑岂无老成示以范模听言藐藐孰其起予古今同归圣途可即繫子之良升堂入室匪言弗扬匪闻弗彰乌乎勉旃以慰所望

蔡若愚象贤字辞并序

筠州蔡子若愚字象贤为吏部掌故以才行见知於尚书詹公公尝用古隸为作若愚二字名士大夫为诗文以乐道之洪武癸丑春予以乡贡待选京师象贤且俾着辞以申其义予为之言曰人之贤愚系乎气之清浊昔者儒先之论详矣今有人焉眇然之身徒知饮食衣服之欲而於立心行已实惘惘焉则谓之愚可也一旦振厉奋发致勤乎弗得弗措之功驯致乎真知实践之地宁不谓之贤矣乎象贤读书能诗文又善楷法中书制诰多其手书即其名与字观之是能自进於学者耶老氏有言盛德容貌若愚象贤其亦有取於是乎为之辞曰

茫茫堪輿气化万殊人生其间有贤有愚愚者可贤贤者可圣志学而成名斯为称侃侃蔡子质清而修好尚之趋匪同常流衆方譁夸我以纯实衆方奔趋我以宁一动容周旋其乐也天狗名求实若愚而贤盍务尔功盍勉尔力辞以申告庶几无斁

徐进士景顔复礼字辞并序

三衢徐景顔世儒家博雅好修以明经荐中壬子淞江乡贡进士选明年春癸丑计偕京师予以同年相遇旅次进士谓予曰字所以配名也景顔字以复礼子其有以教我哉予作而言曰甚矣进士之志於学顔子也夫圣门以好学称者顔子一人而已克己复礼顔子造道之功无大於此昔者伊川程子既辑视听言动着为四箴紫阳朱子又推衍而训释之其所以嘉惠後学者至矣予何敢赞一辞虽然予不可不有以语进士也夫克复之功理欲二者之分而已人於事物云为之际精察而明辨之孰为天理孰为人欲去其非而取其是斯其庶几矣乎至於一日克己复礼而天下归仁盖其功效之极有如此者噫顔子之学岂易言哉夫降衷秉彝人所同得有志於顔子者亦可以至於顔子矣於是敬以行之诚以守之则所以复乎性命之正而安乎义理之天者其不在兹耶范浚有言曰顔何人哉曦之则是进士其有焉为之祝辞曰

天之生人万理具全物欲纠纷乃失其天欲遂厥初在乎克己蟬蛻春融罔弗以礼昔在圣门曰克己公从容晤契如日行空道无古今圣贤可学朝斯夕斯庶几先觉

荊陽外史集卷三十

卷三十一

●钦定四库全书

荜阳外史集卷三十一

（明）郑真 撰

（阙）

荜阳外史集卷三十一

卷三十二

●钦定四库全书

荜阳外史集卷三十二

（明）郑真撰

（阙）

荜阳外史集卷三十二

卷三十三

●钦定四库全书

荥阳外史集卷三十三

（明）郑真 撰

○书

投谢危参政书（代舒知州公作）

伏以廊庙畴庸诞着持衡之正鄉州委寄下容衣锦之华临谷惟兢循墙莫避某窃以官司之守莫过里社之荣故买臣领郡符越人以为盛事相如握使节蜀老倡为美谈况我四明甲于两浙慨念长汀之胜实当巨海之冲百里江山不改承平之旧故家文献犹存积废之余宜得聪明特达之才以布恺悌仁和之政如某者赋形朴野稟性疎愚简帙披寻莫继广平之道学箕裘嗣续恐颓忠愍之家声曩为上国之游尝困新丰之旅分不自异谁为先容荷蒙知己之恩许以通家之契俾侍坐于先生长者且见称于王公大人韩子入光范之门敢忘所学祢衡领孔融之荐切有元因遂由公府之陪叨冒王家之宠緑绯衣被颁白归来三径故园问菊松而无恙七城阃幕劳案牒以何功交游谓之陈人出处溺于流俗青山緑水甘为野处之归紫绶金章忽拜宫恩之锡儿童鼓舞父老惊夸虽鹄巢鳩居奈世途之孔棘然鯤随鹏化知洪造之难酬有感於中不知所措兹盖伏遇出逢熙运亲遇圣知瞻城南尺五之天近玉阶方寸之地荐扬华要进式丞疑本文章礼乐之微当甲兵钱谷之会事当其可知无不言仁义陈于前见敬王之孟子谋猷顺于外俨告后之君陈念人材之盛衰关世教之隆替肆广俱收并蓄之路允为中兴复古之规有臣三千益广周武王之助除吏八百悉归崔佑甫之公善万物之得时虑一夫之弗获乃令微眇亦在甄陶某敢不祇奉除书恪佩公论涖官临政匪敢望于功名刻骨铭心永不忘于恩赐

代上李知州书

伏以建学立祠诞着圣朝之治尊贤肇祀用昭贤守之公俯罄忱辞仰干听览伏念曾祖国子博士赠朝散大夫李元白长汀巨族故国名贤诗学得文靖舒公之正传科名聯相国吴潜之甲榜蜚英上舍德业比乎阳城待对大廷文章同于贾马屡掌教于列郡旋正席于监庠宰揆称能士林观德肃大听之记注躬直道以论思万字纵横一心对越尝论帝王之学必极圣贤之归奏赈恤则惠及天下之民谈礼乐则善淑四方之士耸宸心之顾听华仕路之登跻天不愆遗人为出涕穹碑列姓荐为後学瞻依邃宇定仪尝列先贤祀典势殊事变俗薄风漓何後人怀偏见之私俾我祖絕顾歆之奠道德功烈已数百年咳唾音容有如一日惟在孝子慈孙有不忘者惟先生长者庶几动之恭惟某人经学渊源仕流冠冕风云步武早承台阁之华雨

露恩光荐赐京华之宠两承嘉命来戾吾州重枢府之推崇荐省垣之敬信大扬文教丕阐王风民生推父母之心多士尽宾师之敬徵故家之文献崇明祀之苹蘩尚论古人慨念先世瞻斯文之未几庶公论之有归伏望慰及明灵恩沾嗣续如有祭有享昭昭可达于馨香虽无声无形永永亦涵于陰隲

代上李知州书

伏以太守兴邦斯文所系先贤崇祀明德惟馨言瞻俎豆之华式见宫墙之美自天有造伏地知归惟我四明思皇多士淳熙庆历伟道德之名儒嘉定端平挺元勲之上宰高山仰止大糴是承百年如睹其仪刑後学庶闻其丰采仰惟我祖久废先祠岁月忽其若流音容恍兮如在苹蘩蒹藻莫荐清芬牺牲粢盛孰陈肥洁惟大君子笃于名哲而藐诸孤赖以申明言出听从声随气应俾此百年之典见诸一旦之间喜极而悲感深以惕恭惟某恩推锡类化洽承流临祭祀奉人民风移俗易昭文章明贵贱礼备物成尚徵文献之传丕正校庠之典苾芬是享福履其绥某亲睹缩茅誓言结草羹墙如见既永妥于神灵泉路有知亦岂忘于明赐心之所冀言不能殫

代上（阙）金枢书

伏以神兵大极上承日月之光属吏门生下逐风云之便肃陈斐纳冒犯威严某窃以人无全才士当有立毛遂不自荐岂成赵公子之功驥蔑若无言曷致晋大夫之善予寔何者乃切慕之伏以某命奇穷逢辰蹇拙尝以斗升之计遂亲案牒之劳荷蒙大君子之知俾侪诸小人之列吹嘘汲引左右周旋未遑结草之恩忽坠包苴之党弓伤兽骇不虞奇祸之撻网脱鱼游皆出更生之赐妥奉省垣之考再登帅阃之书谅造物之不容致化工之倍费弹冯讙之铗岂不悲哉赠范叔之袍谁其怜者心焉耿耿望其拳拳恭惟某文武全才山川间气十连动上公之敬九重结真主之知漕府登庸斋坛大拜牙樯画鷁上供天府之储紫绶金龟荐拜玉廷之宠貂蝉冕黼鸛鹭趋班位参宥府之严礼重宸心之寄说诗书敦礼乐雅尚非凡橐弓矢戢干戈太平可致有常立武遐不作人桃李门墙散春风于笔下桑梓闾里占瑞采于云间成始成终必恭必敬某数奇半世多辛二天肃趋光范之尘愿効王良之御泰山不辞土壤切冀涵容浮屠终成合尖所期造就其诸悃悃罔既教陈

代贡危参政书

某等蛰处海隅蒙庇泽而被余光者有年矣赵修撰代祀南来蒙列名门下感佩不忘于心伏惟阁下以孔孟之学任伊周之寄明天子在上赞襄辅弼使四海苍生咸有依赖某等敢为斯文贺某窃以政治之得失尝以人材为轻重得其人而任之则致治有不难者伏见濶东道副都元帅裔出后族传家孝让其忠足以卫上仁足以恤下廉足以律贪诚足以服衆从容乎诗书礼乐之间留心乎恺悌仁厚之化至如钱谷甲兵特其余事耳迺者闽省平章公以参知政事荐谕文到京伏惟阁下任钧轴之重寄衡鉴之公为明天子得人以致太平如斯人者使之佐政薇省当专阃方面之寄必能有以赞助政化勘定祸乱者矣夫一善可名君子不弃况其

以公辅之器巨济之资为阁下素所知闻者哉某明人也知公为深故敢闻于阁下固非谬言臆说以自取戾也惟阁下留意焉

贡程宪副书

岁事将阑伏惟尊候起居万福某等罪逆不天祸及先人伏蒙阁下瓣香哀临继奉手书俾为求铭之地此岂藐焉诸孤足以致之盖阁下至诚惻怛之心出於自然有以不後人之善如此铭心刻骨莫之敢忘九月间粗毕葬事实云庇所及也重念先人老于问学六十余年虽禄不及身而其文章缙绅固有称道之者日夜以不克绍承为惧过不自量辄欲写成一帙上尘视司而以餬口之计卒未及成谨先以诸公哀挽辞上进大小拟招阁下已慨然许之矣更乞高文序诸篇端则先人之死犹不死也再三有瀆罪在不贷默念先人受知门下已再世矣临终之言耿焉如在惟阁下有以动心焉干冒威严不胜惶恐战汗之至

通危相君书

某蛰居海滨无由通于名公卿之门伏惟相君谋谟庙堂圣眷隆渥神相起居万福某罪大逆重先人于至正二十四年三月廿六日即世病革将属纊语某等曰吾平生不足齿录于人独云林先见知我死幸吾友王叔载述行状求先生铭我墓先生尝怜吾生必哀吾死幸而获请吾死不朽矣言讫而逝某等哭泣而识之奉哀返葬奄及终制草茅贱微岂敢上瀆遗命所及终不自己兹因马编修入京谨录行状百拜忍死以请伏望弼亮之暇大书特书增光丘壠则先君子临终之托不为空言九原之下感恩佩德而不肖诸孤当铭心刻骨没齿不忘矣干冒威严不胜惶恐战栗之至

上刘金枢羽庭书

伏以仁人乐道其善诞扬褒袞之词孝子欲显其亲用致抠衣之敬俯濡札翰仰彻廷阶窃以人有先容士宁自弃苟有可见之礼宁无欲进之心故陈后山拜南丰先生尚奉瓣香之献袁清容赞深宁居士犹为俚语之援矧此後生敢忘先烈窃念某少而多病长益无闻鲁史一经粗识过庭之训周诗三诵俄成陟岵之悲慨念先人老于兹世名声爵禄虽莫遂于初心德行文章亦有功于来学念德报之罔极怅明发而有怀何辜于天不幸若此芹宫诸老歌蒿里以成编栢府先生标儒林而立传矧兹所业具有成文入乎耳着乎心誓承余绪诵其书论其世孰为品题有待缙绅为之增重皇甫谧序三都赋以左思为能文崔德符论八哀诗以杜陵为近古允念羣言之首用祈贯道之辞恭惟委羽源流藜灯光焰寿斯文之命脉障吾道之狂澜政合神明言行海■〈一禹〉三代两汉尽归渠度之中诸子百家不出準绳之外慨惟先子曾荷隆知岁久月深斯其已矣日光玉洁宁不慨然嗟哉手泽之遗用俟心声之妙九原有托百世增光某心切吐丹情深泣墨敢论通家之契妄希侍坐之荣夙夜忝尔所生不忘警戒春秋成人之美盍着权衡战栗惟深敷陈罔既

谢刘羽庭副枢书

伏蒙高文宠冠先集云锦五色之瑞价重璠璵春秋一字之褒宠深袞黼惟君子笃于名义而先人得以表章捧诵凌兢摛辞感激窃观自古文学之士与夫当今道德之流惧没世而无闻每着书以自见时无伯乐安知良骥之才人匪子期孰识高山之调况文章各自为体而好思多至于偏向非识鉴之明曷着公衡之议乃如今日允冠前修大书屡书不昧操觚之正一世累世于昭载籍之传过辱不辞敢忘下拜恭惟阁下诗书元帅道学鸿儒宥府本兵增重斋坛之拜大邦维屏每资帷幄之筹誉蔼縉绅学穷绂帙萃正直中和之气为雄深尔雅之辞聿骏先猷广心多士矻矻乎若不及休休焉如有容凡兹德行词学之可称不以微贱污卑而或弃肆垂雅制增贲家传盖有德而有言宜必恭而必敬黄山谷祭王文甫固闵其穷韩昌黎志樊宗师亦多其博金声所振纸价倍增某自揆踈庸仰承许与香分云帙辛观新着之编光贲茅斋复听前呵之伏恩莫能报德何以加入荆州之品题何可忘也传和凝之衣鉢窃有请焉属当严凝冀加珍嗇上赴玉堂之召茂膺金炬之荣颂祷维深敷陈罔既

贺王敬中除教授书

恭审显奉恩除光膺模范有道则仕正逢泰运之还非教不亲益赖师资之重斯文是庆吾道增华窃以官必惟能士当适用广文官独冷固匪能堪孝廉不知书孰云其可曰惟兹选实难其人况飞声急羽之秋非稽古右文之日长枪大劔安事毛锥章甫逢衣动成白首庸人窃笑壮士羞为弦诵久已无声礼乐殆为虚设静言若此宁不慨然伟甚良才固当广乐地而振名教嗟哉我辈岂宜束高阁以待太平夷考四明寔多哲士戴剡源名闻天下仅由广信以归来程畏斋学被江东终自铭山而致仕乃如今日有光前修是为一举而得之所谓脱颖而出者恭惟某襟怀潇洒气稟清修按桃源先生之绪余慕兰亭右军之风度学海擅青箱之富词源挥彩笔之华雅颂三百篇不忘素学便宜十二策欲吐丹衷肆惟教席之尊寔领縉绅之荐赤城巨镇碧海名邦博士横经伫见衣冠之盛诸生立馆益看衿佩之多顾不重乎必自此矣某青毡不振黄卷徒劳拭观荐鹗之飞与喜攀龙之近至圣文宣庙拟传采藻之诗举子翰墨场更妙穿杨之射其诸赞颂罔既敷陈

答李元帅书

设席以致宾贤久仰元戎之盛横经而授弟子自惭末学之卑承命惟荣抚躬是愧恭惟某翰林家世藩阃才雄囊弓矢戢干戈适当熙运说诗书敦礼乐诞广儒风深惟嗣续之传俾叙师生之敬某青毡不振白首将成念无稽古之能敢犯好为之戒辱承枉顾辄尔抗颜善教有待守之功恐成怠事执贄尽相见之礼莫报恩私将承斧钺之光庸谨简书之体俯陈崖略仰冀海涵

通刘仲愚先生书

伏以一乡高月旦之评式尊仪范三传着春秋之学肃就师模仰造丈函俯陈一得窃惟诸侯之行事见诸鲁史之旧文正次王王次春纲常为正事系时时系日凡例滋多道上合于唐虞赞不待于游夏粤自汉晋之降及至唐宋以来羣儒狐疑诸说角立据事直书者胶于一见随

文立义者弊至多端充栋汗牛党枯护朽非躬受圣人之训孰能知作者之心倦我四明思皇多士楼宣猷序止斋之传高祭酒为国子之师因学名书深宁撮其要趣日抄有注东发缉以成编程先生接赵太社之源流袁内翰备高舜元之答问盖以发明其旨匪徒专事夫言厥今明廷用以取士巧以新说晦庵尝指其文妖泥彼陈言元凯空成夫传癖仰止前修永远孰为後进依归论规矩之方圆必资良匠称权衡之轻重盍同此心非就有道而正焉终亦无闻而已矣伏惟先生属辞比事微显阐幽谨人事于三余审天时于五始正其谊明其道大明笔削之公褒有善录有功克审劝惩之正尝论晋楚终始以见夷夏盛衰蜚王国之声名登虎榜掌天门之教位正臯比既勇退以来归遂从容而息偃发蒙郤击待问钟撞谓万二千五百家为乡谁其学者而二百四十余年所载吾将语之文通得赵氏之微安国踵洛伊之派门深夜雪席上春风伏念某久别蠹编深嗟麟获饥贫所迫仅为餬口之图疾病相攻尽废传心之典顾私衷之欲奋谅习气以难除仰瞻道德之光足遂声容之覩小子成章狂简不知所裁长者大度寛容庶几于进所愿扫门而授业固当敷枉以陈辞致南丰之瓣香慨云其晚传和凝之衣鉢请继自今属当阳和幸调节适早正儒台之擢以永翰苑之荣倾向之私敷宣罔既

与李经历书

恭审美宦所临彝伦攸叙事庶母如适孝思推重于先灵视长兄最亲友爱敢忘于同气得侃侃怡怡之意有融融泄泄之情同致一家以介五福十余年之别不亦久乎千百里而来有足乐者爰致同乡之谊以伸吾道之勤莫尽其辞少将以礼

代彭太守与张天师书

伏以万代同流深阐玄虚之妙一麾出守欲求清静之归庸致起居敢辞烦瀆恭惟真人神明胄系道德光辉由有为悟无为森璇霄之象纬修人爵得天爵华綉黼之山林弘开衆妙之门高视千年之上某幸尝覩而未遂从游恭敬不以虚拘薄展修斋之礼呼吸如能变化当循问道之仪仰企仙都肇当炎夏粲星佩霞裾之饰盛金科宝籙之文无任皈依惟深眷注谨奉书以稟

童定詹书

状元赐对久夸及第之荣先正疏封有忝立祠之典允惟道德文章之懿用谐室家婚媾之宜言发乎情事严其始伏承某诵列女传夙成壺范之贤而某学圣人书罔识渊源之正念传恭于嗣续盍仰企于高华筐陈鴈奠之诚惠徼亲厚瑟叶凤鸣之吉有待欢娱

回定书

大闢畴庸久仰光华之着同郷合好遂聯姻媾之和宗事其承蹇修为理伏承某诗礼续外家之庆已沐恩荣而某德容习中饋之仪未嫻姆训久叶凤占之契有来鴈奠之诚谓我舅为甥事盍严于堂着视兄女如子礼深愧于竹練

王定范书

仰华文学士之门久钦儒雅问荆国先正之裔深忝宗风睠加好之有成由同声之相应伏承某德容备美已姻中饋之仪而某问学无传粗识内经之要既恭承于然诺用式序于情文伊始问名礼兼纳币居敬而非太简式孚所愿之同亲迎以及其时即见于归之喜

胡回赵书

仰普安郡王之相业閼閼相传问致堂先生之绪余箕裘莫守允念婚姻之合寔惟契好之同伏承某文行相教久着篇章之美而某德容无取尚勤丝茧之功有来嘉命之严式见修辞之正家人正始行看堂着之辉之子于归毋责竹練之陋

为胡椿齡定孙氏书

仰长沙太守之门久钦材略忝安定先生之裔孰继经传睠为閼閼之华契此姻连之好由来远矣于以成之伏承某姆教听从夙谨修仪之训而某师门授受莫循治事之规允惟中饋之贤深藉衷言之助事系于日情见乎辞有其礼者有其文匪敢忘于敬简愿为家而愿为室冀克笃于欢娱

为舅回陈纳币书

娶必若吾家久叶飞皇之兆嫁不与凡子适符中雀之缘有仰情亲敢忘盟约伏承某师模授受久扬要路之荣而某姆教听从仅守中闺之正粲兮筐篚乐尔瑟琴事莫重于正名宁辞来命礼未遑于从吉愿缓于归罔既敷陈惟深倚注

为小儿复昇纳币书

伏以婚姻之礼尚矣惟道德之懿久仰前修而彝伦之重盍先正始睠我四明号称文献伉俪之求必论閼閼比在淮海伏蒙尊慈以令爱娘子与某男复昇締媾姻盟所以崇重古道者也兹幸来归于纳币之礼可不讲乎夫以三世之契合百年之好斯文盛事然修辞立诚居敬行简亦士君子所宜慎重也赐金诺以遂玉成服恩佩德多矣执事其俯而就之

荅阳外史集卷三十三

卷三十四

●钦定四库全书

荥阳外史集卷三十四

（明）郑真 撰

○说

陆质夫字说

平江海运万户陆侯名文字质夫俾予为之说予作而言曰甚矣夫人之有是文而不返诸质也亦甚矣夫人之有是质而不饰以文也若侯者其文质之君子哉夫上而为天下而为地中而为人衆而为物有其质者必有其文未有有其质而无其文者也且质者文之本文者质之华文而不质则一于侈靡质而不文则一于鄙朴故孔子曰质胜文则野言文质之偏也子贡曰虎豹之鞟犹犬羊之鞟言文质之混也偏者失中混者无别皆非君子之正今侯名以文而字以质其体用相资表里交养者乎且吾闻之人气稟之性系于习故性相近也习相远也人性之不流习者鲜矣侯生于吴吴为东南都会象犀珠玉之富绮綉罗縠之丰笙歌声伎之盛邑室之侈车马之多娛心意悦耳目世之所谓文者莫尚焉侯也不以习俗而易吾性分沈潜乎诗书礼乐之中优游乎仁义道德之奥既以修其文又以厚其质非有其大过人者哉于是诚以主之敬以持之恬淡以守之文采以彰之以之临政治民推之国家天下无所施而不可天下之人称之曰文质君子其不在兹乎是岂非古者命名与字之道哉侯曰其遂书以为说

仁山说

同郡张氏彦仁年踰四十貌温而恭气正而充一室蓬如左右图书肃襟正坐曰求古圣人之言而学焉自号曰仁山以予交好之笃也俾为之说作而言曰天地间物之块然者为山仁人稟性分之全循义命之正不以物欲而移患难而变其居止之常意向之适于山有合焉孔子曰仁者乐山而朱子释之以仁者厚重不迁故乐山呜呼其至矣哉张君居闾闾中非有峰峦之胜冈岭之奇也乃今以仁山自名则其体段气象有似於山可见矣夫山艮象也艮为止止其所止者山之静然也静而乐山其亦庶几於仁者欤且吾闻之仁为五常之首于四时为春于五行为木于四德为元是吾之仁与天地之仁固无以异者况夫山者草木所生禽兽所居宝藏所兴云雷之变化雨泽之流通天地发育万物之仁于是而着是故仁虽主静而无不动者君试以一身体之静而为体则若山之崇高博大而不蹇不崩也动而为用则若山之包含发育而既庶既蕃也动静互根体用一致谓之仁山其非有得于圣人之遗意矣乎虽然一卷之石至于广大九仞之功起于一簣盖至诚无息之妙为学不已之实有如此者君既以仁山自名扩而充之吾知其不至于终南大华之高且大不止矣扬子云曰丘陵学山而至于山其

君之谓乎广其义而为之说云

范君执中字说

同郡范君名与权盖自髫髻时其先大人尝以命之迨其既冠则字以执中且祝之曰权者中而已矣名权而字中其亦名义之允称者呜呼聶之哉范君佩训服命垂四十年犹恐一日之或忘也俾予推衍其说夫允执厥中儒先君子以为道之传其见于中庸详矣尽矣复何有他辞云乎哉夫人受天地之中以生莫不得是理以为性莫不得是气以为形凡其动作威仪饮食起居亦莫不有当然之则焉惟其移于玩好迫于忧患则夫目之色耳之声鼻之气口之味四肢之安佚固有离于义分而不自知者矣隆古圣人莫大于尧舜而其授受则曰允执厥中而已是帝王心法之要无过于此者而舜之於禹且复有人心道心之说则其词愈精而意愈切矣人能于其知觉之动不陷溺于人欲之危而有以审察夫天理之着本心之正常为吾身之主宰而凡事至物来千态万状酬酢处置各得其宜有如一身处乎一国之中视夫四方上下亭亭当而无有偏倚过不及者焉斯不亦所谓执中者哉虽然执中者亦惟权轻重之宜而已权而得中则虽临天下之大难当天下之大变死生存亡近在顷刻亦将从容处之而不失其常矣以君名权而字以执中其可胶于一定之中也哉抑愚又有说焉中也者至诚之道也圣人固无不诚自圣人以下则思有以诚之中庸曰诚之者择善而固执之也而又曰不诚无物君子诚之为贵数千百载以来涑水司马氏教人以尽心行己之要亦曰自不妄语始则其用力之方断可识矣然则君其务于诚矣乎君之先华文阁学士工部尚书式斋先生尝以正学事宋理宗而予大先父蒙隐先生寔以尚书从孙来继与君之先父为同母兄弟於是与君有宗盟之好故敢诵儒先之绪言以告焉君其尚思尽至中之道以振起其家声也

哉陈临以庄字说

姜山陈生名临字以庄求予为之说予诺而言曰庄者敬而已矣临之以庄寔为政之要旨昔者圣人尝以语季康子今生方读书务学未为禄仕其于斯义也何如请为生试陈其略予尝以身体之平居暇日肃襟正坐俨然如宾客之在旁惕然如神明之在上言不敢有躁妄也动不敢有匆迫也气不敢有骄蹇也声不敢有忿戾也夫如是庶几持敬之道者矣使推此而行之在位之间则夫外有威仪内无邪曲修条教出政令人其有或慢者乎自世教不明人心欺罔极鹵莽灭裂之致怠慢邪昵至于丧身败业多矣然则庄敬之道今之学其可不之务乎哉夫子尝曰不庄以莅之则民不敬而又曰庄以莅之动之不以礼未善也夫莅即所谓临也临之以庄而又动之以礼则其容止周折之间其有不观感而兴起者乎以生为世家子年方弱冠清修慎重其于宗姻乡党之间庄敬之容礼让之节固有可爱可慕可羨者矣而又延师取友以日求其所未至异日决巍科登膺仕其文学行业之施皆本诸平日修治服习之素者固以见圣门教人之气象矣字以配名其亦无忝于厥躬者乎乃若貌恭心违世之所谓色庄者固知生有所不为的矣予之言又安得不拳拳底于是哉生之师臧君彦和庄敬有礼君子也生其持是说以取正焉

王景彰有常字说

括苍王进士景彰取尚书彰厥有常之义字之曰有常以予有同年之契请为之说夫彰厥有常见于臯陶谟昔者儒先论之详矣予何以辞为哉然尝以身体之平居暇日肃容正襟言不敢以躁妄也行不敢以违戾也由是见之政治措诸设施随所用而获吉庶几于士之有常者矣我思古人有若臯陶訏谟于虞廷之上其论九德之目自寬而至於刚言其赋受之质自栗而至于毅言其学问之功以赋受之正而复加以问学之勤则其德之彰着于身者可知矣其为有常也何如哉彰者明而不昧常者久而不变彰厥有常非表里相涵动静交养者莫克致之进士清慎好修问学不倦今以中澍江壬子秋试计偕京师且将进而用之矣方今明良赓歌左右辅弼者皆臯陶伯益之流有若进士者周旋其间以之参赞谋谟俾益教化使咸曰有常之吉士斯不负命名与字之意哉

国子生严陵王以宁字说

国子生严陵王康字以宁奉旨分教中都凤阳府之临淮既二年以予在斯文之契求着字说予惟康之为言安也安者宁也诗曰济济多士文王以宁言用贤之效也以宁其取于是乎夫贤才之生世岂偶然哉盖将出为圣人之用以膏泽天下为万世太平不拔之基也圣人不世出人才亦不世出故有文王之为君则有太公望散宜生之为臣用以开八百年定鼎之业者实在于此是则多士之生诚千载一时文王所以宁者其非多士之功也耶国家龙兴淮甸建都江左人才之出所以奔走疏附成一统之盛者固非一人矣以宁之生岁在辛卯适元运既微草昧蠡起干戈抢攘者数年际今盛明菁莪乐育专教学之责任师道之重将使成人有德小子有造才者能者各随器使以垂社稷灵长之裕则以宁者其周之多士矣世之善言古今者常自生人之盛而推本圣代之昌今天下经术之士皆萃于成均凡股肱耳目喉舌之任于是乎取向与以宁同研席者已脱颖而出矣况若以宁之超迈俊逸其不使见诸事为乎异日登诸要途上不负其君下不负所学所谓王国克生维周之桢者庶几在此名康而字以宁其名与实之允称者耶以宁曰先生之言吾不敢当也勉焉斯可矣书以为说

四明王氏二子名说（厚斋应麟之裔孙也公权即千里先生之宗云）

四明王公权有子二人请名于其父彦伦君彦伦以告诸遂初公公曰吾年余七十庆及孙曾王氏文献之绪殆未艾也以长者名驯少者名骈云遂初公叔远先生之兄也而彦伦所生父公权伯祖也遂初公即世之二年彦伦以书来中都求为之说予为之言曰驯之为言顺也骈之为言聯也驯有柔习之义骈有合比之义字皆从马以骐驎比君子以其德也马之性驯周旋进退安其教驯以之齐驱比驾不趋以前不殿以後无颠越无蹶失任重致远无不可者是故驯言其德骈言其才有德斯有材无不德矣名以制义义以出礼其不有取于是乎哉王氏世着簪纓昔者厚斋尚书公与弟常博公继登词科世以麟凤比之至遂初公及叔远伯仲以尚书嫡孙文章学问克绍其传叔远无子以彦伦为後遂初公之心厚矣故于其二孙曾而名之曰驯者欲其温厚谨勅而不为刻陋也名之曰骈者欲其会聚辑睦而不至于乖争鬪鬪也由是教诲似之式谷诗书昆季後先玉佩琼琚从容仁义之域驰驱道德之途入闾阖履天衢踵前修之步武用以扩大其门闾使天下之人号之曰此王氏之骐驎也不亦遂初公所望于二孙曾者乎二孙曾郑氏出也予亦以是望之故着其说以复异日告老南还得其有成庶以

验予言之不诬也乎时洪武十一年岁在戊午二月既望鄉贡进士同郡郑某撰

予既着为说适有自陕右来者惠及虞永兴公孔子庙堂碑拓本用以寄二子八法之妙以永兴公期之

季纯夫字说

晋王府纪善括苍季璠字纯夫求为之说予语之曰纯之为言精也粹也诗曰於乎不显文王之德之纯又曰纯亦不已此言圣人之德与天道合也今子名璠而字纯其于义何居窃尝求之大东之诗曰琚琚佩璠子朱子释之曰璠者瑞也而古释文直以佩玉名之其致一而已矣君子无故玉不去身玉所以象德也德贵乎纯君子之佩玉则其德之纯也然则子其纯德之君子乎天子之佩以白玉公侯以山玄玉大夫以水苍玉世子以瑜土以璠玫其玉固贵乎纯矣趋中采齐行中肆夏周旋之中规折还之中矩视听言动之必以礼酬酢处置之必以义匪僻无自而入也惰慢无自而生也忿戾无自而形也非天下之至纯者乎纯夫世家文献由儒入仕侍亲王起居撰述记注简在王公志虑之纯足以成辅翼之正文字之纯足以成黼黻之功以是日求其未至其于圣人之德何有诗曰言念君子温其如玉温即纯之谓也以玉为璠非其人之德之纯者不足以当之纯则不杂不贰不贰则不息不息则不怠不怠则久其为至诚之君子也必矣纯夫尚勉乎哉洪武十一年岁在戊午二月既望鄉贡进士四明郑真撰

王廷采字说

礼人生而始名既冠而字名所以正体字所以表德也国子生永嘉王君名绶字廷采就其德观之其扬于王廷者欤其为縉绅君子之贤者欤其光显而有耀者欤夫采者青红赤白黑之谓也位为九宫列于四方分於四时於五行属金木水火土于五常配仁义礼知信其功用不细矣书曰以五色彰施於五色作服服者上衣下裳之制也日月星辰山龙华虫则绘之宗彝藻火黼黻则绣之于是有组绶焉有佩玉焉绶者所以佩玉而承受者也天子组绶以玄公侯以朱大夫以纯士以緼上下之有章也贵贱之有辨也服而御之朝覲则分义明燕享则欢娱接祭祀则诚敬格其于礼盛矣士之生世以文章学问自致明廷之上用黼黻之才任谋猷之寄所以致君泽民者其犹采色藻绩之施乎廷采世家簪纓由郡府入贡成均奉上命分教中都国学公侯贵臣皆为竦敬仰占天陞威顔咫尺聯鵷行之步武覲龙袞之光辉綰绶佩玉炫耀烜赫吾知其有日矣传曰观国之光利用宾于王其廷采之谓乎因书以为记

达观说

予薄游淮海间见有高蹈远引者以瀕洞为家无何有为鄉莫高于天初若不以为高也莫厚于地初若不以为厚也深广莫如江海险峻莫如山岳初若不知其深广险且峻也一盼睐间皆其所憩息也一俯仰间皆其所经历也物我两忘逍遥傲睨惟所意欲焉或曰其可谓达观者乎予应之曰此庄生之流托虚无以自诳者岂反身穷理真知其所以然哉夫天道之流行人性之赋予一而已矣是故尽其心者知其性也知其性则知天矣天者何理而已学而至于

知天其为达观也无疑矣达者四方上下精粗隐显内外本末无所往而不通之谓也观乎天地之故万化之运而默契其妙用推之于彝伦日用凡吉凶晦吝之萌疾疢死生之迫有以定其去就而验其安危非至诚之学孰能与斯噫其亦微矣予方为此说而金华蒋孟瞻以医卜有名中都凡五运六气陰阳表里与夫日月星辰时日支干孤虚旺相之说拳拳焉予揖而为之言曰子得非达观者耶夫富贵利达命也子其如何静存动察与造物相终始斯其可矣善乎贾谊之言曰达人大观物无不可虽其伤悼无聊之故庶几不以细故芥蒂自累者孟瞻年方少壮好学古人文章谪居以来怡然愉然辛苦患难有不以为意者而理明术精人信服不疑自兹以往殆将尽天下之大观而无余矣昔者圣人作易于观之九四曰观我生无咎而上九曰观其生君子无咎夫其所以自观者如此人之所以观我者如彼无媿于出处矣推而至于观国之光利用宾于王其孰御之哉孟瞻学易者也其尚有得于此乎因书以为孟瞻勉孟瞻世儒家以俊选入成均奉上命分教以归省後期为同门累居瞿相山云

李藻字文奎说

临安李君名藻字文奎以俊选受业成均奉上命入禁遂授行人司行人以使事过中都予用斯文礼见求为字说遂为之言曰天垂象见吉凶星奎之系乎天其势圆曲具波磔鉤趯之象昔者苍颉仰而观之作为六书遂为古文之祖天人上下昭然协应之符其来久矣君名藻而字文奎其以文学鸣于时乎藻者水草之名世以词藻文藻互称取其芳且洁尔古圣人以五采彰施五色以藻绣之于裳定为十二章之一则藻固其文之着者也然求之在天则星奎又其着也按晋天文志奎为西方七宿之长其星十六名曰武库又为大将主诛暴禁乱之事其义系乎武其象类于文而密聯图书府故世以奎壁并称若乃五星序奎则占者以为文治太平之应夫天不言以象示之而已君生本盛时家东南大郡有先生长者以为依归当圣明在上以胄学之英应周官之选周爰驰驱固已能宣德意協皇华之咏矣故其以文奎配名者盖特以人文之祥合乎星文之祥也吁不可尚也哉虽然文以明道也太上立德其次立言即文也六经之文所以载道也文不本于六经可乎然则君其务于道哉异日署之词林登诸册府用以黼黻皇猷恢张治道典册训诰焕焉可述使天下之人曰立言君子也斯不负以字配名之义哉予老矣将归衡茅仰窥东海徐鲁之墟降娄嫫訾之次煜煜煌煌有如昔人所占者于是时也使君诚得在讨论撰述之列信乎天象之着協人事之着矣因着为之说以取徵于将来云

荥阳外史集卷三十四

卷三十五

●钦定四库全书

荥阳外史集卷三十五

(明) 郑真 撰

○题跋杂识

敬跋御赐起居注臣韩燮诗

足趁銮舆赶不前为因肥盛及多年崎岖石径难扳陟达顶方知上九天此诗上幸蒋山而还之时驻蹕特召近臣韩燮奉命不时至上问燮安在其同僚以老行不及前为对燮既至上复问之燮跪对如前言上慰劳再三因赐以诗云夫君命召在宫不俟屦在外不俟车臣子敬君之礼也而况文学侍从之臣职记言动尤不可须臾离者臣燮以召命不时至上不以为罪而又宠之以诗君之于臣眷知之厚如此至圣至德之盛孰能形容之臣燮再拜受赐奎文宸画永为百世之藏後有望气者言宝光起而烛天矣鄉贡进士四明臣郑真谨焚香百拜书於下方

跋宋高宗御书孝经赐秦桧墨刻

思陵万几之暇即以读书作字为工其勤如此今观所赐秦桧孝经墨刻真草相间其当金人归梓宫复太后之後欵夫孝为事亲之本思陵以亲之故日事祈请虽至于屈膝而不辞当时可谓孝矣然不能恢取中原扫除陵庙始终以桧主和而至于若此帝王大孝岂谓是耶

跋宋高宗临唐人帖墨刻

古之帝王若汉章帝及魏晋诸君暨唐太宗皆有书法传世若宋高皇则又得帝王书法之传者也当建炎绍兴间天下亦多故矣帝也万几之暇从容翰墨取唐人诸帖悉临之八法之妙备见模勒噫何天纵之多能耶岂太平翁当国一於和议南北少安遂得毕心精意于奎文宸画间也耶昔鹿眠山人袁德平着书学纂要谓南渡後思陵大萃衆美信哉

跋宋高宗赐岳飞手诏

(诏曰敌犯和淮西与张浚和州相拒已遣亲札趣卿倍道前来合力击贼早夜以俟卿忠智冠世今日之举社稷所系贵在神速少缓恐失机会也)

此思陵所赐岳穆王飞手诏也其当刘豫称帝犯顺之时乎淮西去襄汉千余里飞得诏十五此其一也飞拜诏即日引道至盱眙上书告师期敌已退次舒州待命帝以飞为小心忠谨不敢专进退为得体飞之勤用王命天地鬼神实知之而张浚辅臣秦桧之奸卒以援淮西不力且谓山阳不可守为沮士气至于瘐死其所赐御札与往来日月道途皆可考据当时辅弼近臣终无有为之辨者哀哉然则此诏其杀飞之由起乎亦可以见高宗惑于奸宄而无以大中兴之业矣

又

（诏曰朕惟国之用武必据形胜以为地利今西南之重实占上游既已委卿移此要害深图战守之计卿宜以朕此意谕将佐抚劳士卒勉思忠力一心叶赞事机庶克攸济有功必报朕不汝忘）

古之帝王必据形胜之地以为基本故汉祖欲灭项氏则先定关中光武欲诛王莽则先定河内根本既定国其有不兴者乎宋遭阳九之厄而天不泯其社稷戎马驱驰仓皇南渡国势地利其何所恃以为重哉高宗用岳飞复湖湘则杨天平取襄郢则李成遁国之基本于是为有赖矣此诏其当飞驻上流之时乎其曰西南之重既已委卿深图战守之计则帝有为之志可见矣然终不能北取中原奉迎二圣者岂形势使之然哉虽然帝之在临安也胡寅上疏尝欲以荆襄为重矣盖以地近中州上下不过千里要害易守非如淮泗漫衍易入而难备也飞既廓清襄汉则夫京西两河南北固已在其掌握矣岂不能使之图功攸终乎朱仙镇之役去汴京仅四十五里金人已谋北遁矣而秦桧沮之故始而班师中而罢兵终则置之死地有可为之机而卒于无所为则皆桧有以致之也诗曰其车既载乃弃尔辅高宗有焉谁生厉阶至今为梗秦桧有焉如可赎兮人百其身岳飞有焉

跋宋高宗临晋帖

御墨思陵八法得诸智永禅师晚乃深造二王所临晋帖往往流落人间善鉴者以为克萃衆美向见吾明越社史相府所藏大率类此虽未敢决以为真亦可以得其波磔夫宋至南渡中原陆沈二帝弗返而豢养湖山游神翰墨昔之君子谓帝王盛德大业不在于是母亦太平翁当国时也耶

跋宋理宗内批

右内批一通宋理皇赐丞相郑忠定魏王者始帝因玉牒宋氏入继大统而史忠献卫王又以定策功仍居相位郑忠定甘盘旧学遂相维秉钧君臣际会可谓盛矣此批其当忠定视⁴⁴翰林之时乎观其首言寇盗尚未殄平至於丞相史氏特不名之且令叙再三谢意则其图治励精眷厚大臣之礼可见矣享国四十余年其有以哉

按故事禁中处分谓之内批多内夫人代书而所谓御宝批者或上批或内夫人批皆用御宝

惟亲笔则上亲书押字不用宝凡郑氏所藏者多此类此外有封皮署字今不复存云

王府启对录

洪武十一年戊午正月十九日晋王府校尉二人奉殿下令旨召真入邸真闻命祇谨翌日昧爽踏雪如皇城纪善臣括苍季璲纯夫导以入日巳午传令旨就承奉司赐酒饭王坐东阁内入见叩头免再拜礼王从容言曰尔治春秋耶谨对曰春秋旧所尝读失久矣大义若何曰春秋约鲁史成文二百四十余年所书朝聘会盟侵伐败灭暨日食星变山崩地震水旱灾祥之类皆所以示褒贬明劝戒也王曰然使内官取左传以进曰传释经即事明义开朗明畅王为倾听有疑难者诘问再三至通晓而止日暮引退次日复召校尉召入王曲为奨问及出处大致且曰汝识贝助教耶对曰以春秋试浙闈时贝助教为考官取臣为乡第一座主门生之契非一日矣王曰汝之来用贝助教荐也复进讲如初日午赐膳而退越二日复入王曰春秋与他经孰要对曰五经俱有补治道春秋为尤切儒先谓五经如药方春秋如用药治病为人君者不可以不知春秋为人臣者亦不可以不知春秋王曰然此邵子及董子仲舒语也一日王复问曰左氏与公谷氏胡氏若何臣对曰先儒谓左氏长于序事而理或未明公谷主于明理而事或未当至于胡氏当宋社南迁外则金人之患内则贼桧之专故其一书专以尊君父抑臣子申大义雪复讐耻为说于经筵奏对言之惜乎宋高宗勿及用也王曰然当一一观之復复进讲如前日真窃惟春秋圣门传心要典当时游夏不能赞一辞况後世学者耶敬惟殿下天资颖悟当进讲之际意领神会于颖考叔则喜其舍肉以启君之蔽而责其挟輶以致身之亡于郑伯之克段则深责其不友于繻葛之拒战则深罪其不君季良之谏随君使楚不许而後战则曰此谋臣之智而今或勿如也邓曼告楚武王以盈而荡天之道也则曰此妇人之贤而今有勿及也晋士为潜杀羣公子则恶其君嬖邪佞而戕本支骊姬潜杀世子申生则恶其君溺宠爱而戕冢嫡下阳之灭则曰此虞公之贪也城濮之战则曰此晋文之譎也其他微词奥义于圣人之心中多有默契焉者而肤浅末学何足以知之汉河间王东平王皆喜延儒硕辩论经史其有能如殿下于春秋之学论定是非于一言之顷者乎王之嘉言臣季璲已尝纪录兹复记其一二以志不忘其随问答文义缕缕者不能详也抑茅寒贱不识官府礼体而殿下特赐恩厚命内官呼召辄曰郑先生云三月一日某谨识

一日进讲春秋胡氏传隐公五年夏四月葬卫桓公传引程子曰正终大事也必以正寝而不殁于妇人之手王曰不殁于妇人之手何谓也臣对曰此礼丧大记之言也男子不殁于妇人之手女子不殁于男子之手欲其以正终也不殁于其手者非执手诀别也谓不使妇人居其前也曾子曰吾得正而毙焉斯已矣死丧之际或使女子妇人居前则各恋私昵不得以正终矣魏武帝将死见妇人而分香卖履涕泣咿嚶正所谓絶于妇人之手也王曰九月考仲子之宫传曰存则以氏系姓以姓系号没则以諡系号以姓系諡者夫人也存不称号殁不称諡单举姓字者妾也惟春秋之法莫重嫡妾之分圣人笔削备见轻重真既克详其说殿下谛听之复命内官顔福取笔札以进躬画着具所以曰吾已深识之矣於此二编仰惟殿下好学之至是日呈之国表藁

读晋帝纪

先事而应谓之异随事而应谓之灾灾异之应于天者盖人为有以召之也夫天之于人亦岂遽绝之哉人主於灾异之来曰君失道欤臣失职欤谗佞进欤淫贼兴欤政治日敝而民病日滋欤货赂公行而宠赂日章欤何变异之日臻也耶如此则可为格天之诚虽有其象而无应矣晋主荒淫无度羣小弄权长星之见盖天以警告之也曾不自咎乃曰长星劝汝一杯酒世岂有万世天子耶是不惟不能弥恶而益以长恶矣变起闾閻之间身殒妇人之手宜哉

读梁帝纪

书所以载道道则二帝三王之道也故书者所以治天下而非所以失天下也梁主绎当侯景叛乱之余父既饿死兄复殒弑所宜流涕枕戈卧薪尝胆以雪莫大之耻惟恐其或後可也不是之顾而乃同气相残掩恩义莫知所以为君臣上下之分父子兄弟之伦矣虽读万卷果何以为治国平天下之本哉及夫藩邦劝进又不能正位国都奉安陵寝修明国政申敝边防顾乃施施然安於一隅无愤耻自强之心敌兵压境且讲老子口占为诗至聚书十四万卷焚之而曰文武之道今夜尽矣乌乎能尽文武之道夫岂至於今日乎行之不臧不责之已而反以读书为无知亦甚矣哉使後世不知读书而失天下者其梁主有以啓之乎

论湘东王赦任约

自古乱臣贼子必多助党与然後敢肆于为恶是故春秋讨贼之法尤严于其党党与既离为恶者孤矣侯景叛乱围犯宫阙逼辱君父薰秽宗庙任约位其司空膺爪牙腹心之任此乃乱臣贼子之党剖心破胆犹不足以偿其罪也今幸而获之湘东王不能肆诸市与衆同弃乃冀其一旦之用赦而任之失政刑矣

论齐肃宗杀济南王

始齐肃宗之为常山王也太师录尚书事受遗诏辅政未几卒以太皇太后诏废帝为济南王而夺之帝之既废也太后戒肃曰勿使济南有他也此其意欲如之何哉乃不用其言扼而杀之弑君篡国之罪于是为有归矣及夫长乐王湛嗣承大宝曰百年无罪毋效前人呜呼肃宗既杀其兄之子矣而欲其弟勿杀己子彼为长乐王者以为一息尚存人心或有所属吾岂得而自安哉又岂得而自已哉异时百年终见杀盖非长乐杀之亦肃宗自杀之耳昔者孟子有云杀人之父人亦杀其父杀人之兄人亦杀其兄吾於齐肃宗亦云

跋王以文文卷

予年二十始知以学为事王君以文以敏达之资力学绩文凡天人造化之微礼乐制度之要言语之菁华体制之严整备见於文字间粹而观之岂非士而底于有成者哉

记所见

宋留梦炎以状元及第官至仆射同中书门下三品大兵平江南梦炎从少帝入覲擢吏部尚书夫托孤寄命临大节不可夺此君子分内事梦炎贵为辅相国亡身俘不能死事乃腆然以富贵自终没不百年子孙流落江海至乞食不可得呜呼善恶之报其在是也耶虽然梦炎之仕天朝也世皇尝欲仍旧税江南山地以梦炎谏而止是所谓利泽及人者耶夫以利泽及人者尚如此况於奸党贪蠹至死而不悟者哉因书此以为世劝

扬州罗君保以才望敷历中外仕至中大夫广东宣慰都元帅其子巴延特穆尔奢侈非法尝以金钱掷地俾衆妓争拾以为戏人目之为罗金钱中奉公既歿红寇陷维杨资产荡然窜身江南贫无以自存後來明之鮫川予适与之遇出示先公宣命及其所为诗词隶若且厉言平生欢乐事别去不知所适後二年曹郡张镇抚来始知其乞食于杭餒死途路间呜乎世家子不知习以礼义至於淫奢无度以破家辱身者矣若罗氏者岂不可为永鉴哉

跋画卷

昔苏长公论画以为人禽兽居室器用皆有常形至於山石竹木水波烟雪虽无常形而有常理世之工人虽能曲画其形而鲜有不遗其理者今观陈君某所作画卷凡而峰峦岩石之回翔偃伏花木草卉之生荣枯落风水之奔趋烟云之冥晦与夫宫室之幽情异状宛转曲折未始相袭而各臻其妙斯所谓既得其形而复得其理者欤郭熙画记谓画山水数百里间必有精神聚处乃可书其知常理者欤陈君师郭熙者也於此有以得其意于语言之表者矣传曰我思古人悠悠我心展卷三玩钦慕不已

跋杨慈湖墨迹

晋人行草二王为最文元杨公独以为心术不正使然盖公之学以尊德为本故其作字俨然正襟端坐略无一毫褻玩意昔柳公权谓心正则笔正吾於公见之某人得公所书二诗披玩之余为之竦敬不已

跋张从申玄静先生碑

唐去晋不远以书名家者无虑千百自非有絶人之学者莫克厕於其间张从申所书李阳冰多为之篆称为二絶今世士大夫多不喜之何古今好尚之不同欤玄静先生碑含蓄笔意略无一毫妍媚之态所谓不同乎今而合乎古者也昔李西台建中亦以书知名其弟子秦珣尝语欧阳公以其学从中书及欧公出从申所书王师乾神道碑则珣大惊以为西台未能至也以是知学书者固难而评书者尤难然则从申之书其可妄议乎哉

跋顏鲁公书清远道士诗

顏鲁公历事三朝正色不挠作字刚健方正诚非一时逞姿媚者可及所书清远道士诗凜乎其见其拒禄山而忤辅国谄卢杞而骂希烈也昔人谓其字实类其为人信哉

跋顏魯公磨崖碑

大唐中兴颂前代论者详矣自当时言之灵武之嗣位岂有明皇之荒淫不君养成祿山之乱固无有为之望矣天下虓虎之士雷动云合争愿致力於储君者亦欲自致於功名之会耳巴蜀僻在一隅使肃宗从之而西虽能执温清之小节其果能号四方以恢复两京乎所谓一呼而千麾万旛者吾知其涣散崩溃而不肯止矣顾安肯捐躯致命於四十余年耄荒之主也耶惜也肃宗自上皇既归之後内惑於张后外间於辅国刼迁之罪知而不问虽感山人李唐之言为之泣下终不敢一如西内父子之道其能以自尽哉则所谓宗庙再安贰圣重欢者其不有隐讳於其间耶抑此碑字画之精文章之妙则又不待言论而後显也

跋谢先生书叙千古文彦实字晖名

章草者隸书之变也昔汉章帝爱杜伯度草书令上表亦作草字章草之名其昉於斯时乎汉黄门侍郎史游作急就章伯度暨吴皇象皆书之嗣後若晋之二王及索靖诸公皆妙絕一世然视古法已少变矣其诸子点画偏旁一以急就章为证兹其笃志於古者乎往来尝以子弟侍立窃闻先生谈书法之要时方有事科举业不能服习其一二後先生没数年始从其子仲贞君得此本临之庶几以为学书者之一助尔呜呼先生已矣安得从容左右复如昔者之所闻哉我思古人爱莫起之先生字彦实故礼部尚书南儒公之孙无周斋其自号云

跋王以文文卷

人声之精者为言言而成文其有弗精者乎予友王君以文自幼治经传为举子业既有成矣复取战国秦汉唐宋古人文章复习之长篇短章或模写物状或敷叙事实或以宣其忧郁或以发其志意濡毫泚墨各极其趣言之至精有如此哉予末学无文亦不可谓忘情於斯譬之砒砒鱼目形丑呈露视夫明珠美玉光耀炳烈为何如也吾乡文献之传其尚有人矣乎虽然文之难也尚矣思致少则质俚胜华美尚则真实希守规矩则失之拘背绳墨则失之放文乎句读云乎哉昔欧阳子论谓有山林之文有台阁之文山林之文其气枯槁台阁之文其气温润君之於文固几乎古人矣其尚慎考其中而务养其气哉因书以规之并以自勉君名应璋故宋参政（阙）裔孙云

跋谢彦实先生临草书急就章（名晖甬东人）

右急就章一卷汉黄门令史史游所撰唐秘监顏师古为之注宋礼吏部尚书厚斋先生为之补注可谓博且详矣按周宣时史籀着大篆秦汉间李斯撰苍颉赵高维造爰历太史令胡毋敬作博学篇司马相如作凡将篇史游因之遂作急就篇元成之间列于秘府虽皆出於小学者流博物洽闻之士深有取焉自东汉章帝好草书令杜伯度上表亦作草字伯度与张芝亦尝用以写此章世通谓之章草嗣後书之者吴皇象鍾繇卫夫人王羲之索靖是已宋太宗下诏访求先贤墨迹有以鍾繇书急就篇为献者字多踳驳上亲书草书一本刻石分赐近臣历代之可考者如此今世所传者惟皇课所书然重模叠刻久已失其真矣吾鄉谢彦实先生以

字学有名尝得善本勒之以为楷式先生捐馆其子仲贞以为手泽所存不妄以与人也予尝从而求之踰年始得其不易得甚矣昔逸少兰亭在僧辩才处唐太宗萧翼以百计得之及太宗崩以天下传之高宗而兰亭弗之与也呜呼君臣父子之间其靳惜乃若此况予之於仲贞君者哉因搨一本以归之且録其正文櫟括师古谨以释其义併记于後其尚慎守之哉

书宋故虚庵怀禅师题五世祖金刚普门经後

此宋故虚庵怀敞禅师题五世祖朝奉公所书金刚普门经後语也师道高腊尊为世称重住持天童山与朝奉公有方外之契公业儒而医好缮写尝以往来馈遗书札编写海上名方积十余帙与安人王氏事佛老谨时嗣胤未立王氏刺綉金刚普门品经二卷藏诸天童山公仍以黄绢手书之王氏家世业儒今祀絶不存有王惟善者其宗侄也父为太学生与天派赵氏为姻性疎放文章敏捷着春秋备要十二卷先祖蒙隐公録之与朝奉公遗墨并存朝奉公後生子为监仓公文行为缙绅家模范丞相郑忠定王尤礼重之虚庵之言曰会有清庙瑚璉之器以极其所报然後知予言为不诬也学佛者以为知言云

读张端义奏劄

右宋张端义奏劄论故相史弥远权奸罔上本末备着其忠愤之激者哉方弥远当国恃其拥立恣意所为士大夫为之侧目及其既没朝野之士始有为帝言者向非穆陵寬仁终始保全之吾见其子孙有不为汉霍氏者几希今观端义之言凡数百端皆可考证至其甚者谓文移施行讳史诏之诏而易照以为证军器舟楫避史浩之浩而易号以为记夫有国家者不讳嫌名况宰相乎何其如是之甚哉及考之宋史嘉定癸未云发德音下明制宁皇遗诏下谓之遗诰夫事孰有大于诏令者乎犹以宰相家讳而改之则不特易诏易号而已呜呼是岂出史氏本心哉盖逢取悦者为之耳当时之畏宰相如此知有朝廷者果其何人耶端义不能言於宰相之时而言於身亡之後其非亦有所畏哉

书春秋捷徑後

古春秋捷徑五卷失去序文一叶其中亦复不全严陵徐氏伯恭甫所着故进士江淞儒学提举天台胡先生世佐手书者也往年先生尝语予以治经之法以为春秋凡例不一学者于传注求之吾见其有不得其门而入者矣因出示此书予伏而读之凡会盟征伐之事朝聘祭祀之礼与夫城筑土功蒐狩之役皆总缉而论辨之其于王伯之消长夷夏之盛衰君臣之强弱善可以劝恶可以监者粲然具在呜呼是岂非治经之要者乎夫徑路之小而捷者古人行不由徑而此以捷徑名篇何哉夫千蹊万徑皆可以适苟从其一道而入则九衢康庄不难致矣人之于学也亦然然则捷徑之名其本诸此乎先生字伯衡故宋胡三省诸孙家有史学其发解淞省尝有得于兹书者也居四明婿蒋氏与家为亲契故以传云

荦阳外史集卷三十五

卷三十六

●钦定四库全书

荥阳外史集卷三十六

（明）郑真 撰

○题跋杂识

读王厚斋掖垣类藁

记曰王言如丝其出如纶然则诰命之体其可不慎乎文章至宋季风颓波靡矣而王言终不失体南渡以来浮溪汪公平园周公号为冠冕若厚斋王公尤所谓杰然者也咸淳德佑间社稷倾危近在朝夕而公四入中书遍行诸房词命方除目填委他舍人阁笔不下公独从容授之若行云流水悠然泛然而莫知其纪极者今读其词盖皆会集羣言而以已意发之信所谓博极羣书者也昔三槐王公序南丰文集以大手笔目之且谓名与天壤相敝呜呼岂独南丰也哉

读玉堂类藁

制造之来尚矣自晋开运元年诏翰林学士与中书舍名应麟厚斋其别号也人分为两制有唐号为全备至宋而尤盛文章之士极天下之选然後用之任不亦重乎故事翰林书诏付门下者为内制而以中书行词者为外制凡大册命锁院则命内侍於学士私第传旨执事者异常服呼喏以俟劳以酒馔然後上马传呼夹道行者辟易既至宦者迺以入制成翌日黎明捧金盘进御以金刷印可既宣读乃谢恩受赐而归吁其不荣矣哉故翰林学士厚斋王公尝三入北门咸淳德佑初多独直且兼掌西掖词命一时宣锁多属之至於獎予批答之辞词疏册祝之礼纷纭杂遫昼夜不停盖自有宋以来其敏捷如公者可数矣今即其词而观之激烈奋发足以感泣三军勤摯淳复足以警惕百揆诚敬惻怛於以威格神明渊深博洽于以包络今古方其一词之出土大夫传写殆遍纶言以苏轼比之孰谓宋社将亡而有斯人也耶书曰俾万姓咸曰大哉王言其公之谓乎

题留梦炎与谢敬斋书亲蹟

（梦炎顿首端拜申稟敬斋先生相公钧座前梦炎五月八日专指行府拜违而车马之音已远新四明王总管回自上都切知入覲清光倍膺殊渥圣上虚怀重席尊用耆儒何异于大老之归周也某敬拜手为苍生贺某身归圣朝迹困羈旅自寇攘之後室如悬磬南冠之士如某最为涂穷近者吕端明李尚书皆得圣旨发放各有生意独某作粘壁枯若以梦炎曾备员宰

輔別已經論罷南方宰執如某比者何啻十數人先生預聞大政若于分閑之際特為施一援手挈之坦塗而返之鄉里寔拜生成之造茲因總管便行附此申控尚須嗣狀伏祈鈞照○六月日具官留某劄子)

此故宋丞相留公夢炎所寄敬齋謝公書也其當京師羈旅之時乎公以德佑元年登相位用徐囊為御史黃萬石為參知政事時給事中王公應麟方公應發繳奏以為囊與宰相同鄉有私人之嫌萬石南昌失守誤國罪大不可用公遂引去明年少帝瀛國公入覲公亦繼如京師久未得旨謝公既被召公嘗貽書畫一首言社稷之亡關於天命次言給指為賣國牙郎遂不得扈從謝公歸老四明王公尚無恙嘗出書相示但相戒以毀之而已予嘗聞王氏諸孫論前代得失人物每及之退而詢諸謝氏因得此書而所謂畫一者不可見矣抑其中言已經論罷者殆謂此耶始公以狀元及第仕至宰輔當時士大夫咸以安危望之今乃自比於粘壁枯何其卑也耶嗣後謝公以深衣幅巾為侍從十餘年帝以南儒稱之俾於宰相下署名劉公亦以謝荐自吏部尚書至翰林承旨大矣哉世祖之仁乎詩曰殷士肤敏裸將于京吾于此書深有感于二公云

跋周敬堂行卷

四明周敬堂以岐黃之學世其家傳而復參叩釋氏證三乘之說其游金華也諸先尊宿賦詩為贈而雪竇大基丕公為之序引內翰潛溪宋先生為推衍其說以醫之學有合於釋氏之說者意以為天下之道無不同也抑予以為天下之道皆本於心心同則道同矣醫之學原於三聖人三聖人之心天地之心也天地之大德曰生醫者能以天地生物之心而求三聖人之心斯其為醫之良矣豈必仅仅焉如釋氏慈悲之說哉夫存心莫大於敬察脈觀証之士於是有所勿焉忘焉庶几不誤人於生死矣敬堂月湖之孫與予家有三世之好其來中都出示此卷因即潛溪之說以擴充之敬堂以為然乎否耶

跋楊孝婦傳

傳曰婦人內言不出外言不入楊夫人孝行孰從而知之耶夫孝為百行之首天地鬼神實臨之而況於人乎夫人生衣冠家習聞先訓來相君子雖不逮事舅姑而得奉其夫之大父朝奉公朝奉一鄉表儀其稱夫人之孝孰不喜談而樂道之哉潘公伯修朱公右指事摭實或為之狀或着之傳今太史宋公取以銘夫人之墓夫人為不死矣自世教不明婦道多闕稷鋤德色之慮昔之君子不能不太息於此矣夫使天下之為人婦者皆如夫人焉關雎麟趾之化其不在今日耶夫人有子五人皆克承家教名會字建文者由先朝史屬為今虹縣文學掾道德文章縉紳士大夫所敬禮夫人之為母又可知矣詩所謂永錫爾類者其楊夫人之謂乎

跋柳公權書玄秘塔銘

柳公權八法得諸顏魯公所書玄秘塔銘遒勁端重深所寶愛其文裴休撰所稱迎真問法場事則韓文公上表受貶時也其說以為國家參用真宗必有冥符玄契使韓公見之能不慨然

于兹乎吁此士大夫学术所以贵乎正也

跋顏魯公争座帖

宦官莫盛於唐以鱼朝恩之骄横郭令公至为委曲承顺不顾文武班秩使坐左右仆射及三公之上門生国老之号不基於是耶顏魯公貽令公书昌言弗忌真可谓不畏强御矣然以朝恩功高欲使於宰相师保座南横安一位斯固以义起礼者也按唐史朝恩以代宗广德元年为观军容使永泰元年将神策北军大历五年三月癸酉伏诛此书首称十一月某日而不系年当在大历二年後也自朝恩既诛後十余年为建中二年令公薨背而魯公且死李希烈之手何忠直卒不见容於世哉观是刻者不但见魯公梗槩亦可窥当时朝政波瀾云乎哉

跋顏魯公家庙碑

昔大苏公谓晋魏书法至顏魯公无余蘊即其作字可知其为人盖忠直之气见於心画如此世以公所书磨崖碑与家庙碑并称磨崖之雄伟家庙之端重诚为公书之冠今观诸家庙碑偏旁多用篆隸法文亦高古不但可考其家世当时官制所谓薛王友柱国者亦可槩见噫是足为千载不朽之传矣武林李文奎以此碑求予为字说装潢成帙用为二子东昇复昇学书之一助云洪武十有五年三月朔日

跋苏长公书撰司马温公神道碑

苏长公文高当代书法亦自成家以司马丞相之重德硕望公之文既足以发之又躬为书上石是足为斯文不朽之传矣而後來用事之臣至为偃仆而磨灭之噫独何心也哉

鄉友陈复礼由监察御史出倅簿夏县过濠梁为予言此系重刻旧碑高二十余尺宋崇宁间蔡京当国党籍祸兴仆碑灭字埋之土中金时有令夏县者至公墓所但见龟趺覆以高树羣蜂窠穴其上少人不可近若神明司之者遂踪迹得旧石掘而出之於蜀中购得苏公真蹟横锯石为四段模刻之作屋宇龕置诸壁主僧世守打拓无虚日资以为衣鉢费令有题识刻石失记其姓名若斯者亦可谓垂志先烈嘉惠後人矣洪武十五年三月朔日四明後学郑真识

题孔子庙堂碑

欧阳公言余为儿童时常得此碑以学书当时刻画完好後二十余年复得斯本则残缺矣物之终敝虽金石之坚不能以自久此公所以有感也古刻今世不多见若此本者系王彦超重刻在陕西三段石磨灭残折尚如此後來或就湮没好古之士宁不有如欧公之一慨者乎

又

孔子庙堂碑为永兴公法书之冠碑首有大周国号者为最古世不可得若先朝金圈本亦不

及见今所盛传者惟陝右三段石而已波磔视古刻为曾玄比之定陶锦江诸本则远胜人为言青州亦有刻本求之勿得不能较其优劣也

题白石将军碑

右白石神君碑不称书撰姓氏隸法与校官碑相类文亦简古其曰光和六年则汉灵帝纪年也后刻燕元玺三年正月十日则慕容隳僭国时纪年所记庙灾日也自汉灵季世至今凡千百余年碑犹无恙夫亦神君之灵也耶神君庙在相县相山即旧相州彰德府是也

题秦王告栢谷少林寺石刻

此唐太宗为秦王时告栢谷少林寺者也书得晋人法度系唐时书诏士所作御讳则太宗亲署此告其东都王世充未平之时乎文多用佛乘盖一时诱掖獎劝之词殆非堂堂正正诛暴禁乱之意唐时佛教之盛其肇于此矣

予往见鄉先生袁文清书多类是帖岂公尝用力于兹耶学古君子必能辨之

题皇甫君碑

欧阳率更书昔人比之草里蛇惊云间电发金刚瞋目力士挥拳至於意态精密似孤峯崛起四面削成若所书皇甫君碑其殆兼之矣予在濠梁每得陝右刻本辄以予人不留也而刘季瞻尝见予骖馱之辞自河南因鄉友尤彦恭用此以通意予感斯文之厚佩以为好因装潢成帙寄二子东昇复昇云

题化度寺碑

欧阳率更书化度寺碑俗谓青鸾白鹤帖盖取其碑中所有字以为名尔公书得王羲之笔意而险劲瘦硬自成一家此碑用笔专用勒法而沈着持重与轻柔婉媚者自为不同非精于八法者莫能办也

虞恭公碑

吴兴陈绎曾伯敷论虞公碑为欧阳率更法书之一观其结体精密而左右上下屈折各臻其妙笔力刚劲有执法面折廷争之风而肥不露骨後有作者孰得而过之哉

题黄庭经乐毅论

右黄庭经乐毅论系越中博古堂帖黄庭为鼠嚙去其半甚为惋惜因叹曰陰类恶物亦咬嚼文字耶兹不忍弃用附诸卷帙云

题昭仁寺碑

昭仁寺碑为唐人法书而不着所书人名氏宋元丰缙绅君子若欧阳公但取其字画之工而不质言为谁何蒋之奇隸叔素号能书与僚友张淳同观亦仅识其岁月下至绍圣郡倅曹鼎臣及县宰陈雄父之刻于碑陰者莫不皆然惟河南张重威甫定为虞世南早年所书而亦托诸传闻後生晚进不能窥见古人波磔安敢议儼然观其笔法深稳精密意非永兴公不能在至正间鄉友徐仲裕叔逊昆季善削间为人模字上石多用欧阳率更书予诘之曰何不用虞永兴公书仲裕昆季曰永兴公书传世惟孔子庙堂碑使用以模勒非得昭仁寺碑不可是勒工家固以昭仁为世南书矣予客中都凡两得之後并得其篆额及宋诸公题志装成一帙思欲与徐氏兄弟究竟斯事则固已邈在九泉之下矣呜呼惜哉

跋唐人断碑

此唐人石刻前後缺文不知书撰为谁书具衆体而多用欧阳率更褚河南笔法虽以缺文勿能句读然亦可以得其波磔之妙好古之士当视为断圭缺璧而不害其为宝也予儿东昇由淮南还明松江夏先生士良用以为赠外装潢纸系宋熙宁间衣冠家门状有曾南丰名讳其後跋语曰睿者士良以为黄伯思云

跋子房进履图

予往年以使事至下邳过圯桥慨想张子房进履事窃有感于心夫坑焚之祸挟书偶语之禁秦之法亦已极矣而奇谋伟略隐然见于一编授受间孰谓人心义理之天而可泯絶乎哉世之议者以黄石公为古隐君子之流识子房之为人使之取履用以抑其少年之气其说似矣今以其图观之匍匐偃偻无留难勉强之意岂一时抑之所能然也耶盖其天性之美有过人而恭敬奉承自勿能已者此所以运筹帷幄决胜千里而卒为王者之师也画史得其情状亦足以明其心术矣哉

题上虞柳氏二节妇传後

传曰苦节不可贞夫节为天下之大闲妇人莫大于守节节至于苦信不可贞矣苦节而能勿失其贞不难矣哉上虞柳氏姑妇二人早丧其君子当贫贱患难中有常情所不能堪者而克相守以生相保以全且使同姓来继以不絶其胤祀斯节贞而亨者欤近世临汾许氏以侄从姑亦以两世守节得书而吾同郡奉化陈氏自五世祖而下守节者五世五人有如一世一人焉此天性民彝之不可泯者今谢氏两世孀居真所谓二人同心其利断金者太史宋公传着其事殆与卫之共姜纪之叔姬并传於世矣

三警（为周彦高作今其人以青州知府得罪）

南山有虎猎者欲得之畏其强勿敢动也设机穽旦夕睥睨焉虎伏丛薄左顾右盼惧不敢出

饥饿之逼咆哮震掉张爪布牙攫狐兔鹿獐而食之意有未噍稍出田野毒牛羊猪豕且及于人恣意狼藉以为莫已当也穴垣墙以求其豢养焉猎者曰虎命在吾掌握中矣挽强弓引毒矢一发而毙封而膊之食其肉而寝处其皮焉君子曰志之骄祸之及也奚独虎哉蛙在^廿泽间努若目膨若腹天雨新霁鸣声嘈嘈蛇伏石穴中侧耳听之若鼓吹然疑为奇物蜿蜒而出蛙不知其噬已厥声如故蛇曰汝非井底物耶何为也哉吞而食之君子曰使蛙蠢蠢然暗暗然蛇未必为己害也气满而声晓能无及乎呜呼天下之不为是蛙者其亦鲜矣祝鷄翁居东海上畜鷄数百一鷄五采班班峩冠长距奋然一鸣羣鷄辟易祝鷄翁以为异也献之公囿穿以金环花竹间鸣啄自如意以为凤不我若也一日主人大合乐设宴夸享具之丰也赐之匕首而献诸鼎俎时凤在千仞之上顾而语其类曰彼向以为我不若今其若我何哉嗟矣鷄物类也肆志遂意其谓凤则宜君子谨身畜德小人乃轻侮而慢骂之不自知其祸斯及也亦独何哉

记失鷄事

先祖蒙隐公在时西隣李妇失鷄至家柵认其羽色之类者取之以去曰盗吾鷄先祖默无一言已而李得所失鷄还鷄以谢有慙色先祖曰吾不汝较也此与刘寛认牛事何异李素凶恶一子戮死一子野死善恶之报昭昭矣予在濠梁客至烹鷄侑酒适训导洪彦漳失鷄以为予所烹者即其所失鷄也閤然一日其妻复诟詈不止逾三年以失白鷄意以为予父子扑杀弃置^廿中夜以火炬遍照之且倡言诸学仆曰必矣既而鷄在笼中初无所失也予俱不之辨後其鷄有死者则又以为予父子扑杀之夫率意诬罔律有常刑以理言之其获报于天也必矣彼李氏凶家也于先祖犹有媿耻之心彦漳冒为儒者以教子弟而乃顽然不革至于再三而不已焉独何心也哉悲夫

题褚遂良圣教序记

褚河南书用笔遒劲王逸少体魏徵尝为太宗言之苏长公谓其清远萧散微杂隸法赵子固以为容夷婉畅今以圣教序记观之二君子可谓善鉴矣公书法传之薛稷宋徽宗瘦金书实其遗法云

按褚河南所书唐两朝圣教序记昔人定为公晚年所书陕西有二石本一在咸宁县鴈塔一在同州倅厅鴈塔本为二刻皆称永徽四年建独月日不同前称中书令臣褚遂良书後称尚书右仆射上柱国河南郡开国公臣褚遂良书同州本合为一刻但称龙朔三年癸亥六月癸未朔廿三日乙巳建龙朔纪年在永徽之次又後但称大唐褚遂良书与鴈塔本称臣及勲阶爵次不同是同州本为翻刻无疑此刻即鴈塔本也二刻一顺一倒疑取向背之义令改而正之庶便观览云

题陕右峰阳碑

峰山篆刻秦丞相李斯所书盖始皇东巡颂德之辞唐封演云後魏太武登山使人排倒而历

代模为楷则邑人疲于供命聚薪其下因野火焚之碑遂残缺後县宰取旧文勒于石碑之上欧阳公集古録谓峰山实无此碑人家传者各有自来此本即江南徐铉所模其门人郑文宝刻石长安者也闻青州府学亦有二刻不究世以为甚古若杜子美谓枣木传刻者则昔人尝于登州海上得之殆其别本耶按斯所书为小篆之祖论者以为骨气风云方圆妙絶遺蹟之传至使重模墨刻而焚书坑儒乃卒为万代名教之罪人君子于此宁不为慨然哉

跋李西平王神道碑

古称立德立言立功为三不朽以李西平之勲德裴晋国之文章而又重之以柳诚悬之书法信古所谓三不朽者矣千载之下观是碑者宁不有所兴起哉

跋郭太保庙碑

顏鲁公忠义出于天性作字实类其为人以郭汾阳太保父子家世勲业鲁公既为撰述又躬书上石足以为千载不朽之传矣昔欧阳公着集古録载公麻姑仙坛磨崖等碑至于片文只字亦所不弃独此碑缺焉何耶今即其文而观其字浑厚典雅之风与劲正刚大之气殆如见其抗折权奸执节死凶逆时也碑在安西布政司广盈库予友李弘道为亲王王府典仪械寄二本用装潢成帙外一本以赠博古君子陈仲良云

跋云麾将军碑

李北海书得王羲之卞将军碑笔法其传於世者若婆罗树岳麓寺诸碑而云麾将军碑尤胜近世松雪赵公深重之晚年所作大字多用其法善乎天台胡先生伯衡甫之言曰水晶宫里神仙人学书初学王右军晚见云麾受北海不羨柳骨并顏筋云麾将军唐李思训也碑在陕右蒲城庄浪知县朱怀玉入覲时所赠言得诸王布政熙阳下半截鑿凿不完殆王溥着琬琰録後耶杨文公谈苑云周世宗议访凤翔谋帅于辅臣王溥独荐向拱可任遂充之拱徙镇京兆思有以报之问其所欲溥曰无也陕长安故都多前贤碑篆高文妙笔愿悉得见之拱至分遣使督匠摹打深林邃谷无不诣之凡得石本三千余以献于溥溥命善书者分録为琬琰集百卷尚未成而卒当拱之访求石碑或蹊田害稼村民深以为患虑其求不已多鑿凿其文字或镌斲击折取为柱础帛礧略尽亦摹刻者之厄会也

荅阳外史集卷三十六

卷三十七

●钦定四库全书

荥阳外史集卷三十七

（明）郑真 撰

○题跋杂识

读宋史

刑赏天下大柄也赏一人而天下有所劝刑一人而天下有所惩此人主为政之要而家国所由兴也夫苟失刑焉滥赏焉大柄于是而去矣又安能图回人心於溃散分裂之际哉宋至理度朝国势诚岌岌矣襄阳榷场之置坏于文德之玉带此与虞公贪璧马以亡虞囊瓦取裘佩而亡郢者何异哉文德既死文焕继之虽拒守有年然卒不能以死报国宋社云亡实其兄弟致之宋之君臣能暴扬其罪戮及其家使夫不忠不孝之人无所容於天地之间然後收合余烬背城借一胜负犹未可知也计不出此乃封文德为和义郡王而以其子师孟为工部侍郎以冀和议之成焉是所谓当刑而不之刑不当赏而赏焉者是尚足以持天下之柄哉天下之人以为朝廷举动例皆如此各思献封疆以图取富贵孰肯委身竭节以励勤王之勲哉此宋社所以卒于亡也噫

论范氏

善恶之报不在其身则在其子孙吾以范文虎观之斯言不诬矣夫文虎以殿廂之重受援襄樊之命坐视危迫不发一矢襄樊既破遂以吕氏子壻举安庆而降之自是而後为大兵向导者文虎也迫二王及杨镇者亦文虎也舁太后之牀驱遂督促而为宫人诟责者亦文虎也弃君叛国图取富贵资产之盛遍及东南又开慈溪茶贡以固其宠自以为百世无穷之利矣及钱塘盗起子孙效其故知至身戮家灭是岂非善恶之报不在其身而在其子孙也耶申包胥曰人定胜天天定亦能胜人故以降取富贵者天之未定者也以降取夷灭者天之终定者也苟使其孙复如其祖则天者诚茫茫矣世之言天者岂可求诸天之未定而谓善者无福恶者无祸哉

读玉堂类藁祭济王文

此卷载济王祭文一篇王葬湖州山水恶絶盖当时权臣为之昔朱全忠篡唐降昭宣帝为济陰王济邸之封取济水独絶之义又萧衍篡齐降和帝为巴陵王而济王亦降封巴陵公用心如此亦可谓无忌惮矣岂礼官承意为之耶夫巴陵之变踰五十年羣臣以济邸为言者皆斥

去及天兵压境继絶崇赠之典始克为之踰年社稷为墟矣春秋祭祀之不享岂独王哉袁文清公曰吴夫人复封端平之初也复立济祀德佑之末也驯至于此其何可言于是窃有感焉因并録之吴夫人济王配云

读臣僚请免不允批答诏

臣僚请免不允批答七卷夫君子之仕也才不胜任则引分以辞荣老不堪事则全身以求退斯固大义所当然者宋至咸淳德佑间廉耻道丧文武小大之臣或偷安苟且为自保之计或纳赂请托为迁叙之资患得患失无所不至幸而得之乃假托辞免故事至于再三且烦词臣敝敝于文字之末君臣上下之间其矫诬甚矣哉今观所载辞免答诏不允者四十余人若王爚赵葵谢芳叔之考终马廷鸾叶梦鼎之善退所谓全始终之臣也江万里之死于井李庭芝之死于兵所谓守节义之臣也文天祥崎岖患难至死不屈其扶天理而正纲常者乎至于吴坚谢堂则奉使祈请屈膝大廷矣陈宜中则展转无成弃身蛮貊矣留梦炎则奔走京师干求仕进矣若夫守封疆之臣夏贵以淮西降黄万石以江西降高达献江陵赵孟传献明越弃君叛国若敝屣然节义安在哉其他或遁或降或散其是非亦不暇计矣夫当天下幸安无事之时于一官之转一阶之升则假辞让以为高及患难之来乃复偷生免死卖国献城贪取富贵回视前日之辞免果何为耶批诏淳复之辞君之所望于臣者又何如耶

读史氏手书三朝政要

右宋三朝政要载羣臣及三学生论丞相史嵩之起复事为详其言以为宋三百余年之天下必坏于史氏之手盖以史氏秉钧子孙相继春秋世卿之戒有国家所当谨者是诚有激而言也後贾魏公当国以家憾史氏不得与政至国亡卒无有一人献一城一邑者亦云幸矣其子孙读之细书其上而于後尤致意焉请抑之所以全之盖将欲释祖宗既往之愆而昭示于无穷者其用心亦可谓厚矣为之後者乃不能诵其言以永其传而以鬻诸人焉是岂文献之足徵哉

记明庆寺化度碑本後

此武林明庆寺化度禅师石本也旧货是本者得数十钱辄售自红巾盗奔突寺罗兵燹殃及此碑其间传诸人间者视之不啻金玉物其有幸不幸哉

録乡先生词翰後题

先祖蒙隐先生乐于称道人有一词之善必手録之夷考其人皆吾乡典刑後学模范数十年来衣冠故家凋丧零落问其子孙不知宗谱之传况敢望诵其遗文于残编断简之一二乎此原伯鲁之训当世君子深嗟重叹而不自己者也予于是窃有感焉词凡若干篇并録集後皆仿此庶使览者知吾乡文献所自云

书谢黄牛地铃後

地理之学尚矣汉青乌先生着为葬经昔郭璞祖之迨至唐杨筠松曾连口相授受于是龙穴砂水之法独以江西为宗宋大儒考亭朱夫子与元定蔡氏亦讲明之故其立朝论孝宗山陵事尤拳拳焉是格物致知之学固非止陰阳技艺之一偏也金溪谢氏精于葬法盖远继曾杨而有声者也尝往来台明间凡目之所经意之所营着为地铃其山川之趋伏踊跃横直弯邪高下远近聚散停伏所谓若龙若凤若虎若象若马若龟鼈若麒麟若车若箱若玉印若金钗若明珠然者为图其形着其盖拈倚撞吊插脱吐钳截之法复诗歌以赞咏之以为人得而阡之者公侯将相皆由是而出焉其开示後人可谓明矣然而二百余年以来人即其处而求之茫然莫之见者岂山川形势有时而变移耶抑山川神灵靳其藏而勿妄以畀人也耶不然谢氏岂欺後世哉吾闻有吉地者必待有德之人彼千金之家多行不义及其终也乃欲求富贵之地以为嗣续久远之利吾知其对面有勿能逢矣然则孝子慈孙之为祖若父窆穸之计者岂曰按图索骥而已哉此书得之姚江李师家命录以为家传云

记俞氏春秋集传後

予既辑春秋传适友人以此书见贻者其于去取多获助焉惜上二帙未及全尔夫龙泉太阿金铁之精昔人得其一犹以神物久当自合况圣人经邦大训穷天地亘古今者乎吾知其合也必矣因书以俟云

记黄氏日抄春秋後

褒贬论春秋三传祖之而诸儒和之至朱文公以为直书而义自见于是圣人公平正大之心有可得而推矣慈溪东发先生黄公着日抄一书其于春秋独能以朱子为宗而杂取木讷赵氏岷隱戴氏断以己意大抵多直致而无润色是以读者有不满焉夫当于理者不必工其辞而合于古者必有戾于今先生之言其当于理者耶其合于古者耶予尝辑春秋传多有取焉者既成乃追録而藏之此书得诸定海凤湖钱氏其所刊板已毁于火云

题沈氏春秋比事後

凡例之学出於啖赵氏宋世大儒因事着词凡而会盟之好战伐之争朝聘祭祀之礼蒐狩兵赋之制宫室之增修土地之与夺先後始终之详兴衰消长之异莫不备见则亦有功於学者矣沈氏比事之作其得於是乎但其言多指摘三传而其是非取舍往往有不得其实者又文字委靡不足以发之读者不无憾焉予近辑春秋集传集论二书取其善者録之庶几学者穷经之一助也此书旧传之张先生子西今将二十五年而已腐败不可检阅矣易世之後当何如哉予於是益有感焉兹不复辑而略记其後其小册者系奉川蒋良手笔不幸短命死矣

记刘敞春秋权衡意林後

予近阅袁文清公集其言宋乡先生楼宣献公尝为止斋陈氏序春秋传晚岁悔悟遂焚其藁且谓学者治春秋当於清江刘氏下手旨哉其为言也今观意林权衡二书既有以正三传得失复有以明圣人之归趣而凡世儒之名称爵号日月凡例褒贬之说有不待辨而知其非矣呜呼是岂非三传之忠臣也欤予于止斋传诵宣献之文知其为赞成一家之言而袁公所谓宣献晚岁悔悟之说犹可传信谨识於权衡意林之後

记萧氏春秋辨疑後

三传作而春秋散近世儒者有是言也夫三传虽未尽得圣人之意学者舍三传其何所据乎萧楚着春秋辨疑多抵牾三传至其所自为说往往有不得其事情焉者然所以传诸当时而行于後世则以胡公铨为之弟子也公尝以和议事上疏论宰相秦桧当斩金以千金购其文读之大惊其有得于春秋君臣之大义者耶暇日於此诵之数过而其言之精者附録春秋集传并记其师弟子传受之略于其後云

识先教授墓铭後

右临川云林先生左丞危公着先教授府君墓铭一通中讹数字盖公集中録本也先君文行公所素知身後之托见於易箴之际乡先生程公仲能舒公汝霖致书於公皆以为言其後公复书程公曰郑先生铭文谨当具藁复书舒公曰已撰定寄去幸有以教之时兵革繁兴中路阻絶竟杳沈弗之得岁在戊戌秋八月天兵克大都在朝之士皆遣南行而危程二公与俱入觐程为刑部侍郎危拜翰林直学士明年程公之弟季甫遣其侄彦中入侍复令以斯铭为请危公出以示之曰此吾在金合山时藁定南来忧患未尝为人作字但録去可也未几程得罪病死彦中奉丧东归遂以致之危公出处大节天下具有公论而先君平生大槩固有待於铭文而传者况临终之言在吾人子所当致力者乎今既得之其于存没之感为何如哉因缀辑家乘之末且识其所自後之人其敬守之哉

书陈氏五节妇卷後

予读同郡王君敬中论着长汀陈氏五节妇事既深悲之後深喜之夫世之远近不同人之情亦不能以相一也陈孟雍家自五世祖暨高曾祖考皆以疾夭其得祸诚已多矣使家室之中有变其初志翻然改适孰得而禁之而五妇皆能以节自着此有以见秉彝好德之良固人人所同者矣呜呼寿夭系诸天节义系诸人系诸天者所不能必系诸人者所当自尽彼夭亡者固非一世一人而守节者有如一世一人予安得不深悲之而复深喜之哉昔者莆田陈太史衆仲作彰德李氏三孀传并其女之嫁者数之犹以为千百人中絶无而仅有者况陈氏五节妇之萃於一门者乎诗曰孝子不匮永锡尔类陈氏其有焉

録乡先生郑公景尹擎天柱歌後题

右擎天柱歌一章明乡先生郑公景尹父所着观其寄兴取义宏濶高远非其学之所至自为

一家之言乎尝试推之其意以为至高者天至厚者地人於天地之间所以特立不倚者以有理为之主也理既在我则虽极天下之骄悍皆将委然听命而去而郑公特於小孤山一柱峯发之是所谓不知反求诸已而窃比于外物者其非寓言以成文者乎夫先生之所以论公者如此盖公之文如长江大河澎湃浩荡莫可遏御诚所谓一代之杰然者然究其归大抵谏世之言多而垂世之言少是以道学之士往往议之诚有如先生之言者予自幼时尝好诵公之文而家贫无资久莫能售乃假诸友人録而藏之以备一家之采择既成发故篋得先生擎天柱歌与其所以论公者用附诸末简乃若是非之实有公论在非予所敢知也

録先祖为郡府告社稷风伯雨师文

按此文先生旧藁自注既告而雨夫其哀恳直致无所隐避而当时为民牧者复能受而用之则其一念之间足以通乎神明矣而天泽之应见於俄顷岂偶然哉夫人人事感于下则天变应于上天人相与之际甚微非直以应故事而已执事既多失而为之辞祝者又复委曲隐护而不敢尽其情焉其何足以消变异而以致休祥也耶以先生为郡长着吁神之辞如此録而传之固不以其文也

録乡先生黄东发两朝政要

按东发黄公着读通监其中兴大要本学公心传系年録与朝野杂记理度两朝则公在史馆多得於见闻者文约事详亦可谓良史矣理宗以支属入继大统四十余年君子小人更进迭用治乱消长固可为当时之一慨矣至於度宗十年之政一则贾氏二则贾氏在朝之臣无有以国事为言者襄阳被围久勿克救北兵駸駸近在江左帝也迄罔闻知焉使宫车晏驾少忍须臾宁不牵羊肉袒为燕蓟之俘囚耶何至於孤儿寡妇而卒撓其祸哉公之此书至贾氏既败而终其忧深思远可谓至矣故其论宰相台谏专阬之非人所以致强敌之凭陵者尤拳拳焉夫公在咸淳德佑之际其所见所闻如此今之士大夫处于至正之朝者其所见所闻当有甚焉想夫社稷之亡河山之易未及百年殆无有今昔之异者遗民之痛其不至於痛哭而流涕者乎昔孔子作春秋昭定哀之间多特笔公於理度两朝其致意于世道之终也深矣斯其学春秋者哉因取而着之於此以为亡国之鉴而其他有不能尽録也

跋于景贤文卷

往年业进士经义者谓之时文率皆拘於程度以求有司一日之合科举既废然後取唐宋暨两汉文章诸大家肄习之多有以古文鸣者于是文风为之一变夫文章何有古今之异哉世道之淳漓风俗之厚薄执业以时高下今之文不得不异於古之文矣且文之古者莫经若也学足以穷经则於为文何有予友于君景贤旧以举业自奋今观杂着一编遣言发声辄如其意之所欲出吾不知是果有得於经学否耶昔宋傅公景仁尝语西山真先生曰长袖善舞多财善贾子归取古人书熟读而精甄之则鬱乎其春荣薰乎其兰馥有日矣予以景贤之文不敢以为已合乎古独取古人授受之言以告焉非独以勉景贤亦所以自励也

錄史卫王遗事

按理宗着卫王神道碑铭论其平生之功张端义奏疏论其平生之功本诸人子孝爱之情平生之过即诸士夫是非之正功过不相掩而其为人大略可觀矣予生也晚不及亲见当时之事而於端义奏疏莫知其然既不为之辨明亦不敢为之隐讳而尤不敢藉是以为褒贬也

记黎氏圻志後

按黎氏为卫王侍妾两宫所以宠恤之者如此可以见当时国家之于史氏无所不用其恩矣抑卫王称其端靖诚慤表里如一予得以国尔忘家者黎氏与有功焉岂以其贤而得书也耶

书史卫王除拜词制後

按史卫王除拜词制凡十一篇其文详贍整蔚极当时制作之盛至其褒獎之厚虽古之周召伊傅何以加哉然其功名事业备载史册而其公论是非固有昭昭不可掩者矣始王自参政进拜右相陈自明草制有昆命元龟语知福州倪正父上言人臣不当用乞贴麻自明援引累篇卒以赵普制全语为正正父遂降三官一时士大夫小小议论不关事体但昆命元龟终是舜禹禅授语其首言故国之有世臣亦犯俗忌今之擬制者不可不知也

錄永国公灭金露布

按破蔡获完顏守绪露布有二篇大抵相同未知何者为的纵知其的亦未必出永国史公之手但即其辞而知其事固在所錄也夫资蒙古之力以灭残金国家之体已失矣残金仅亡而蒙古之患固有大於女真者况残灰余烬莫辨伪真而露布称扬君臣上下盛言功伐此志士之在当时不能默默而遂已也

錄史忠清遗事

按忠清圻志载其历官之详行事实无所考至观郑丞相请卫王享配宁宗则言其定策之功太学生裘棼伏阙上书则论其核田之害此可以见功过不相掩矣至其当时有谓经筵清选遽及乳臭从橐重职轻畀痴儿寔指公兄弟而言此固出於一时矫激之论而岂知其异日宥府本兵之任有不止於从橐者乎使假之以年其荣爵重任有不知其何如然则世卿之盛孰有过于史氏者哉公所着有云麓藁旧尝见杂诗一卷以遭覆瓿之危不及纪录独得其贻从兄丞相永国公及从侄从事菊屏府君数通墨妙笔精实可以想见风采乃錄而传之以备一家之言而其他有不可证者则其後人有如原伯鲁不说学之过也

錄王厚斋郕国沂国配食大成乐章

宋咸熙三年度宗幸太学诏升曾参郕国公孔汲沂国公配享先圣孔子庙廷时厚斋公权直

学士院乐章实其撰着宋亡元世祖皇帝诏定先圣先师释奠仪其邾沂二国乐章遵而用之遍及天下迨将百年莫有知出公手者固宜表而出之世祚既移郡邑庠序之事为之暂辍後有举而行者不知能复用之礼文被之弦歌以昭格享之实否乎观於此者感慨系之矣

錄請度宗听政七表

按公本传度宗即位礼部郎官草百官表旧制请听政四表以上一日入临宰臣谕旨增撰三表公援笔立就丞相总护还辞位表三道使者立以俟公从容授之丞相惊服即授兼礼部郎官其载公敏捷如此以上七篇即宰臣谕旨增撰者观其萃诸经史为一家言而变化开阖自然贯穿所谓不期工而自工者也某自早年尝读其文至於成诵终不能彷彿其万一而近世士大夫上书於朝乃欲禁絕偶俪其亦不思甚矣呜呼使士大夫习为偶俪尽如公之为表亦何害其为文哉

录宋杜清献公论史宇之离异洪氏

（臣闻政者正也正人之不正也善者有所恃以立恶者有所惧而革人伦以正风俗以厚而王政行矣林氏乃卫王之嬖妾也以色而媚其主怙宠以专其家卫王在时醞恶之声固已彰露今舍潭潭之居挈其痴顽子而寓於京城纷华之地以身便其私人言藉藉闻者掩鼻洪氏乃宇之之妻卫王在时所聘之妇室家已成已有子女则夫妇之情未尝揆也今一旦以其不孝而欲出其妻使其果有不孝之迹出之固宜而人皆谓洪氏不能合污同秽而林氏不得淫恣自如以邪疾正以恶诬善而然也陛下纵不能以王法正之詎可遂其奸计而许之耶宇之迫于其母之命以夺其夫妇之情是殆处人伦之大变此一家之不正尔何至上关圣听行下都省都司疑之宰臣陛下至形宸命使洪氏横被诬出之罪宇之痛受出妻之名而林氏丑声益彰彰于天下出一家之不正反以累朝廷之令亦至於不正也陛下以林氏为卫王之嬖妾而曲徇其情独不思洪氏为卫王之妇乎宰臣固卫王之族也且不念及此其可以宰正天下臣愚欲乞睿断先寝前命访问其家正其内外主仆之分戒林氏以恩抚妇戒洪氏以顺事姑戒宇之以义理家使上下和睦丑声不闻上以正朝廷之令下以正卫王之家其于王政诚非小补所有勅未敢书行谨錄奏闻伏候勅书）

杜清献公事宋理宗清忠劲直帝以司马光目之为相八十日而薨御制謚以赐吾乡黄东发氏备着其事及阅三朝政要载公两居相位予窃疑之以问羽庭刘先生先生以黄氏为信且举杜氏家乘所载以为公素嗜书史氏以毒药涂简册使人以献公旦夕翻阅毒气薰目遂失明以死予时以为不然夫毒人以死非怨恨之深者不至此彼史氏亦何憾于公哉及阅故篋书得公缴奏论史宇之将离异洪氏事极言其母林氏且谓正其内外主仆之分则其帐簿之间必有干犯之者当是时卫王薨背未久嵩之继秉国钧而公乃昌言不忌盖上以正朝廷之体下以正大臣之家拳拳恳到一至於此初不计一身之危祸为何如也理宗不能听而用之而洪氏终至於见黜徒使史氏怨公愈深而异日之事虽莫知其如何其家乘所谓毒而杀之或者於是有徵焉谨錄以志传疑之义且以备重修宋史者择焉

读王绩翁遗事

元故闽国忠愍王公绩翁在宋德佑年间守南劍州职为兵部尚书宝章阁学士福建制置副使其任不为不重矣宋既奉表纳土乃夜抵福州行省以八郡图籍上之得为宣抚使此金华黄公潛着王氏祠堂碑所载也景炎新造之初王世强舟师至福安积翁为内应王纲中遂以城降张世杰攻泉州蒲壽庚求救于元帅索多而积翁亦遣于索多乞兵此陈仲徵着二王本末所载也合二者所载观之其叛君卖国之罪不容诛矣祠堂碑本王氏自着行状其全篇多述宠遇之盛锡予之隆而其终乃有愿作驴报大元皇帝之语其命词丑恶士大夫为之泚颡汗顏而祠堂碑言曰本事颇详备且以捐躯殉国为忠其迹为近似矣夫忘故国累世之恩而希新朝一旦之宠故不死于宋而死于元盖亦贪生而终不得生畏死而终不免死者果何取于捐躯殉国者哉

读赵格庵墓表

故宋格庵先生赵公上承朱子之传所着四书纂疏天下咸所传诵而临川危公以失节称之清容袁公亦言宋季卖降者多道学之士虽不专指公言意公当内附之日必有降志辱身之事而金华黄公着墓表有曰范希文修京城之策不行于庆历李伯纪经制两河之策不行于建炎而公救里之策不行于咸淳天之所废孰能兴之其所以称誉之者甚重略无有一言及失节者岂墓上之文本其孝子慈孙之情扬其美而不扬其恶耶危公既讥其失节至於其身乃不免焉是所谓大义责人而不能律己所以卒为名教之罪人欤记

高昌国五婴儿事

故蜀郡邵庵虞公着高昌世勲碑载其祖之所自出有天光降於树生瘿而裂得婴儿五收养之其最穉者卜古可汗遂能有其土地人民而为之君长此即高昌之君也而金华黄公论五婴儿事以为两树中而生瘿既与天光之说不同且谓其先为国之君长而又谓以为神异而敬事之因妻以女约为世婚而秉其国政其国主即今高昌王之所自出也则又以为高昌之臣矣夫怪异之事圣门不道五婴儿之说若天问所谓水滨之木得彼小子者儒先固以为不足信矣况一事各为一说或以其为君或以其为臣吾不知今之修元史者果孰从而取证乎

录厚斋词科表後题

按此以上三篇盖公词科试中暨所业者观其措辞立意前後次节丰贍缜密信所谓法度之文也今世文章之士能为俚语者甚多而识制作之体者絕少故其空疎繆戾有终身勿悟者矣若此三篇宜表而出之以为矜式

荜阳外史集卷三十七

卷三十八

●钦定四库全书

荥阳外史集卷三十八

（明）郑真 撰

○题跋杂识

读陆秀夫遗事

宋益王崖山称帝邈乎云海之间诚不可国矣羣臣所以不憚险阻而从之者盖将尽其力之所至云尔力之不至则以死继之此忠臣孝子之本心也陆秀夫位为宰辅虽在危难俨然正笏如平时语及国事以袖擦泪朝衣尽湿其在帝前犹手书大学章句进讲此岂一息忘君者哉兵既败乃仗劔驱其妻子曰而去怕我不来则固无有家虑矣然後登御舟与其主同死斯亦处死之得其道哉世固有患难之际俾其妻子以赴水死而其身乃不免于迁延避就是诚负其妻子者矣斯不亦公之罪人乎呜呼大节人之所难善名天之所靳故有奋身於生死之际而其名乃与天壤相弊若公者何其少哉

书夏承遗文後

按朝散夏公出处大略见中大夫周公撰夏主簿墓铭主簿朝散公父也若郡乘所载本诸宋史集既得兼考而备存之今观其着舒周唱和序详瞻整蔚实为能文之士即其文而求其行固君子之所动心者况其所争根枯皇族一事寔出于忠义者乎周公载主簿有文集七十卷其七子皆业儒或预荐太学而今皆不可考证矣尝从故老问之莫知其子孙为谁何夫仁者必有後若夏氏者何其閭焉无闻也耶呜呼悲哉

题周遗集後

谨按周氏为吾乡望族自宋有国以来一门以科第显者八人而自正议公讳造者始处厚温厚师厚则造之子也锸则造之孙师厚之子也焯则造之五世孙坦则造之六世孙也衣冠盛事录备着父子兄弟之目而预乡荐者有不尽书亦可谓盛矣造即银青公锸即中大公铢即承议公也中大公直亮方正元符上书奋不顾忌其在元佑奸党余官之目固为公之不幸然当国家将乱邪人指正为邪其势有不可遏者而公得与司马公诸先正同列实与天壤永垂不朽其非公之大幸乎宋社既墟衣冠世绪多就零落而周氏保有二三百年的诗书之泽有如一且斯足以见忠臣正士之报矣予尝过其家得中大夫鄞江先生集附承议公所着二十卷及银青公遗文一篇遂得次第辅之而其他有不及见矣惜哉周氏裔孙名字字伯生者去

中大夫已十世矣克自飭厉楚楚自将读书为文有法度自着家乘以传是所谓能世其家者周氏之兴信乎未艾也书曰绍闻衣德言又曰迪惟前人光於周氏深有望焉

识録王惟贤春秋指要序後

真幼过庭时先教授府君尝称惟贤王氏经学文艺有过人者今观春秋指要二序会衆说为一家诚可谓博矣若其夏正一说则吾乡太师存畊赵氏奏议实主之而东发黄氏日抄读春秋一书则又多有取於岷隐戴氏者也二序前称钦若天时自岷隐始後称黄氏考证尤备岂王氏与东发生相先後里居密迩尝有以得其传耶王氏世居境清寺後今其後嗣已絶独女兄适赵氏者年九十余以死当时不及往拜而问之故其一家父子兄弟文献之传皆不可徵独指要一编则先祖蒙隐府君尝手自缮录某幼习经先君实以授之故其可见者仅止此云

识录先祖杂着後

某往年尝闻卓先生习之曰吾既冠时师事汝祖蒙隐先生先生早以经史论策有声而尤工於俚语晚岁专志古学每拾片纸细书顷刻成文求者立以俟在庠序间凡庆贺宴饯官所命藁者多出其手大槩辞取达意工拙勿论也汝祖之学嗣而弗絶实在尔兄弟乌乎勉之哉某受而识之重惟先祖文行一乡推重至今人能言之其所着曰蒙隐藁者凡十余帙其为赵氏甥持去及藏於先叔父者皆泯没已久家所存者仅残编断简之一二而已尝会粹而甄别之凡十有二卷謏焉弱资先泽一线之微凜不自胜其能无媿於长者之言否耶兹所录者诗文大小四十篇自先生以上若国子进士公监仓公皆有着述厄于兵燹不可得而详也

记春秋後传

永嘉陈止斋先生着春秋後传立意精微措辞简当其论世变有若身处乎二百余年然其中亦有违戾自相抵牾者是以明经之士论据事直书者多致疑焉吾乡楼宣猷公尝为先生着序引而清容袁公谓宣猷晚年悔悟自焚其藁今其序引与传俱传其亦可以会其旨趣之归矣哉

跋史观文与从侄菊屏君帖

此宋观文殿学士谦斋史公贻其从侄菊屏君者也其所谓松壑即赵太师郡王存畊之子孟传官至沿海制师与公亲厚菊屏求公具书松壑盖将为入仕之地者而公乃为之委曲如此後菊屏实以公知处州明堂恩得官麻城主簿历平江司户阶文林郎而止则公终始亲亲之恩可见矣传曰岂无他人不如我同姓其公之谓乎

跋史忠清公贻其兄判部尚书墨迹

故宋史忠清公丞相卫王次子理宗念其家旧勲特眷厚之仕至同知枢密院事其薨也赐龙

脑水银敛以一品礼服累赠太师世臣之盛者时莫与比公平生事业不槩见实能念及亲族尤爱仲子菊屏君菊屏则忠定越王母弟知江陰军渊之曾孙即公所与判部尚书书中称六一侄是也卫王在日常欲命菊屏为待制後则其为人盖可想见而公屡以明爽可喜称之至欲命之以官职不待有请于尚书户部也所以迟迟者正如书中所言尔继而公奉书丞相永国公请以第四子会卿所受卫王解政恩改奏回授菊屏之入官虽不以此而公亲亲之恩于是可见矣世之尊官大臣以功名富贵自矜视其族之贫贱如不知相识甚至奴隸而役使之少不如意辄詈辱斥逐有终身不得至其户限者多矣欲望其出一手力援引之可得哉吁此公之所以为厚也与某以晚生托壻史氏得见公所与永国公书及会卿绂诰一通因着菊屏墓表特书其事而其所与尚书手帖则以归公之从曾孙公袭俾永手泽之传按史氏自三相外为侍从者无虑数人此书尚书不着名号以其时计之岂大资壽乐公也耶今固不敢质言用取徵於世家文献之君子若书中所称和仲则习庵先生陈公塤盖史氏之甥菊屏尝师事之其历官行事见宋史列传云

跋李西台墨迹

李西台书擅名一代其弟子秦玠尝语欧阳公以为学张从申书源流盖可考也今观此书盖其意有自得而不拘拘於古人者波磔云乎哉

跋易元吉双獐图

易元吉画獐生动意态妙絕古今前代遗老若端明参政古浯文公暨吴兴赵氏应钱氏舜举已尝审定其迹无可疑者然皆以画言之独陵阳先生大理于公以为秋风櫛叶呦鸣相命自乐其乐而人得狎玩之者迹其物性之自然也至戒其深藏决逝勿为射士所得者推乎仁心之爱养也呜呼此所以为先生有道之言欤

记董秉彝先生文集

按董先生秉彝杂着一什多乡里朋旧赠饯唱酬之辞夫士之立言成文盖其学问之充心声之着有如此者以秉彝弱冠即以文鸣使当时有气力者引而置之台阁当礼乐制作之任与诸公驰骋上下则其所着岂特如是而已乎世之敝心苦志於文字者盖欲见之行事传之无穷也然其命之不淑时之弗利而寿之不永者岂特一秉彝而已此予所以重为之悲也秉彝之死金华黄公既铭其墓而豫章揭公复为着集引固足以慰秉彝於地下矣而乡士之论秉彝者以为文主於气秉彝气短不寿亦为知言者云

书李节妇王氏诗後

古节妇见经者二卫共姜録於诗纪叔姬书於春秋女妇之贤独共姜叔姬也耶盖妇不二天人道之常固有不尽纪者矣若共姜迫於其母叔姬不归宗国而归於鄯此处正而出乎其类者圣人取之所以为天下後世之为人妇者劝也同郡李节妇当其夫友杰氏之歿既不肯归

父母之家而又不为宗■〈尚卩〉之言所惑乃抱伯姁之子以为己子誓以死守庶几於古节妇者矣至其旦夕之间饘粥不给亦不以语人乡人有戴生者自海上以米馈之是虽不足以频续其有无然其区区好义之一端在节妇亦不必辞矣予友陈子浩既取诗春秋遗意为之咏歌以显节妇之行若生者可不因使之表见於士君子之间耶子浩与友杰为同志交谊笃生死兹又为节妇经纪其家世必有执笔之士为之特书者予也愿拭目焉

题张南轩先生手札後

（栲比者祇拜钧翰宠报下情不胜感激（阙））

前宋士大夫往来书问皆有定式其首多不署其人字号爵位而惟见于三摺外封若南轩先生亲书手劄可考也今外封既亡其全集世亦罕见不知曾载与否无以考其人为谁何然其曰运动枢极体貌益隆精神折冲何远不届又曰备藩岭右正托荫余此必自宥府连帅上流者按先生忠献公长子初荫补右承务郎孝宗即位忠献奏为书写机宜文字以军事入见诏为直秘阁後复以秘阁知静江上经略治状则淳熙改元之初元也此书之作其在斯时乎旧制直秘阁为卿监出带八品职名承务郎为小京官从九品阶即先生初荫之官也以阜陵去文武阶左右字故右字不书先生筮仕十余年四典大州而旧阶尚未改转岂未经磨勘有司者之失也耶夫自南渡中兴以来先生以道德文学为己任交际之间实以诚敬为主故其揄扬称颂着於言辞者如是此圣门大贤之气象後生小子所尝观感而慕效者也呜呼休哉

跋史越王进陈正言禾四经解劄子

宋右正言陈文介公某政和间以童贯与政引裾强谏帝留所碎衣以旌其直後坐陈瓘子论蔡京得罪除名至绍兴时复以秦桧沮抑未及昭雪孝宗朝史越王当国乃上其所着书请赐恤典帝为嘉叹命藏书於秘馆嗣後显官美諡实王发之夫公以硕学高行生死厄权贵向非侃为帝言九原之气终不得伸矣某生也晚窃好论着前代人物典故至观公引裾一事人以辛毗比之诚不为过间尝辑四明文献集求公遗文则散轶已久今岁以秋试乡贡如钱塘见售公易传者惜无金不能得归语其七世孙讳璿字元良者元良意甚恨怅将浼人购赎暇日阅旧藁有越王进公四经解劄子一通深叹大臣告君有以彰显公之大节者如此乃录以遗之元良盖有志於先世者也

跋史观文贻其从侄司户世卿书

史氏父子相继至观文公荣显富贵克承先泽然在当时犹有佞者背主擅使及小人奸计诬妄者况其後来子孙不振时耶公作书俾从侄司户致意制幕其於门户之事委曲如此足以见其不挟贵所称履斋则制帅判府丞相吴公潜云

跋史连州挽诗及书後

按奉直公一之系太师宋臯先生讳渐之孙知郴州弥应之子而齐国文靖公弥忠之侄也公尝知连州与司户有叔侄同门之契司户之死公既为诗哀挽复作书以唁其子至诚惻怛词意藹然足以见古人忠厚气象矣後世有号同宗而死生不相顾者彼何人哉

跋史氏父子问遗帖

按前观文公问遗帖为公亲迹至其赠赙之礼奠祭之文公实署名其後送殡一帖则公之子寺丞公承事聯书者也司户平生为公爱重以公恩泽得官其疾其卒其葬而公与其子所深致其厚者如此敦叙之义足以风厉薄俗矣

跋文林郎史世卿诰

按宋史德佑二年三月丁丑日三宫出降此文林郎诰在其旬日间所授者其无印署岂事势仓皇而有所不暇也耶是足以发黍离之一慨矣

题洪制帅焘亲帖

按洪公焘临安人内翰端明学士咨夔之子与其兄勲俱以才名见知於世号天目三洪在宋季尝为沿海使与史氏实有亲契今观所与司户二书纸墨之精实可以想见其为人矣

题史忠清公帖

予与史传叟氏同阅此帖传叟以集贤为督相永国公大资为齐国文靖公予以史氏家乘考之淳熙四年文靖除资政殿学士已而告薨集贤虽无考证然以上一句语势观之则集贤为永国无疑书中言集贤已颁夺情之制当须急遵承圣上眷倚之意必不俟驾于同宗属望之心厚矣其如当时士大夫公论何

跋史氏官诰及忠清公亲帖

按史会卿承奉郎诰一通会卿为卫王孙忠清公子会卿既早世忠清欲以其泽与宗侄世卿改奏回授且奉书丞相永国斡旋成就其於亲亲之意厚矣至于忠清答世卿催改奏文字有丞相不纳等语又谓吾侄疑御前取秦元奏陈但稟集贤於奏事之暇略扣圣上圣上必须明谕则其间固有曲折难成者岂当时国家定制有所妨也耶永国既以外艰罢相忠清继云薨背改奏之事转成无用嗣後世卿以观文公知处州明堂恩始得官累迁文林郎而宋社亦已亡矣是诰是书今为史氏家传真以门墦获得拜观辄论次其後以取正世家文献君子云

题孔子庙临帖

虞世南孔子庙堂碑欧阳公辨论已定此系太仓仲士敏临写以寄者虽波磔殊为失真然足

以见其用意之勤乃装订成帙俾儿子东昇习之若其源流所自则赵周二公跋语可考谩书以识是时予以计偕将如京师云

荜阳外史集卷三十八

卷三十九

●钦定四库全书

荜阳外史集卷三十九

(明) 郑真 撰

○题跋杂识

同年录後跋

科举之设尚矣三年大比肇自成周汉晋隋唐因革不一迨宋尤号为盛国初每岁行之嘉佑易以间岁至治平中以三岁为定我国家诞兴文治经术取士既仿姬周而复用宋初连岁之制盖求贤审官惟恐不及初不以常律拘也洪武壬子秋濶省遵承诏旨合九郡之士试之得四十名上诸京师而真忝以末学获在首选既归明求诸进士之文辑为同年录既而客有自钱塘来者出示乡闈小录名号爵次因得取正而按察佥司吉安刘公序诸篇端历称前代得人之盛所以獎厉後学者甚至可以见我公之用心矣呜呼使为进士者咸能以公之心为心则於朝廷设科取士之意其庶几乎因录之末简用以自勉云

题赵仲穆马上挟弹图

宋李伯时画马人谓其洞入马腹若吴兴赵氏仲穆所画生动意态尤为神品伯时不专美于前矣今观马上挟弹图偃仰步骤殆寓畋游之戒观者当于意外求之母徒以画言也後学荜阳生郑某书

题倪主事试中所业及日办事蹟後

士之为学明体适用而已有其体而不见诸用奚可哉今观松江倪士恒氏试中疑义辞意允称既以见学术之正而其官守日録细大不遗又以见事功之勤是所谓明体适用者耶其能奋身自拔而见用於盛时也宜哉

题雪寮诗卷後

古之所谓世其家者非以穹爵厚禄也文献统绪之传道德风流之雅盖有赖焉南昌聂氏为故宋儒族其先名子充者以科业称与其子元老孙仲贤及仲贤之兄弟十有二人同试於乡文学之盛萃于一时而仲贤尤克承祖父而有声者也在穆陵朝丞相履斋吴公尝扁仲贤读书之所曰雪寮百余年来嗣其业者相承不废有名坊字复性者为仲贤之四世孙去子充七

世矣构堂数楹取雪寮旧扁署之教二子监钟从师授学钟以某经中洪武壬子江西秋试乡贡进士选且将进而用之於朝矣呜呼文献道德之懿其不在是也耶夫物之至白者莫雪若也士之於世以清白世其家而不污于流俗其不如雪矣乎昔者堂构轮奐之美仲贤作之而吴公为大书之所以貽後人者其意至深且远也後人而不思所以继承之则世泽之存者殆无几矣乃今复表而揭之俛仰先哲百世一日也其不有以耸然兴起乎吾知其名显者绳绳不絕矣传曰绍闻衣德言又曰尔尚迪前人之光其复性之谓乎予以瀾江进士计偕京师与钟相遇闻其备言所以其友蔡象贤以是卷来因书以归之

跋乌先生序陈氏孝友卷

父母兄弟为五人伦之目人能孝父母友兄弟推之于君臣夫妇朋友之间无所施而不可者昔者夫子称闵子骞以为人不间其父母昆弟之言而先儒以其孝友之实积於中而着於外者如此今观慈溪乌先生序陈氏叔铭孝友事委曲详备有以见叔铭能知人伦之重矣其为公侯所知而参赞列卫也宜哉

跋吴兴赵公临禊帖

吴兴赵公书法冠天下识者谓其於晋唐诸公克集其成今观公所临禊帖深得右军之妙抵掌孙叔敖殆谓是邪

跋西旅献獒图

此西旅献獒图也其当周太保作戒之时乎观其人物之异服饰之别盖其生稟习俗使然而皆有恭敬向慕之意有以见明王谨德万国咸宾矣後之作王会图者其有取於是也耶代孟先生

跋蓝采和昇仙图

按濠梁志仙释转载蓝采和踏踏歌一阕言采和一日即市楼饮酒有五色云覆冒楼上乘云而去今通真观即其地也岁在丙辰观毁於兵燹主者王兰谷去之江南事定兰谷复归为治祠宇奉北极真君像绘采和昇仙图并刻踏踏歌以传是其志行清修慕古仙人神而从之者欤（刻石观中）

跋云闲诗卷

真读中都太守严侯自着云闲诗一章何其属辞之精寄兴之远哉方侯家居从容无事与世相忘固若云之漠然於山谷中矣羣雄鼎立强邀屈致不得已为一出殆有如云之浩荡飘忽自北自南随其所之而已尔及如飞龙在天位登九五然後躬城社之寄成霖雨之功侯之心固以是为偶然耳而向之所谓云闲者自若也然则侯其可以形迹求乎哉夫观诸物者观诸

人观诸人者观诸心君子於是知侯于云有合矣诗曰维其有之是以似之其侯之谓乎

跋谦斋卷

谦易六十四卦之一古汴黄德明氏取之以扁其斋居是其用易者欤会稽杨铁崖先生为之铭所以期之者甚至卒章有曰以能保我子孙黎民於无穷噫非谦德之至盛其孰能与於斯哉夫地中有山谦卦之象以崇高而处卑君子象之所以损过以补不及者固有当然之则矣德明中原望族历任南北殆将十年卑而弗志於高损而无意于盈政化所及民有遗爱庶几于谦谦君子矣虽然谦者君子素履岂曰保其位云乎哉传曰谦以制礼德明即是用力焉所至可量也耶杨先生推其效而极言有以也夫

跋唐十八学士夜宴图

此唐十八学士夜宴图也其弘文宿直之暇乎衣冠人物其雄伟不凡如此哉若其器用之备品饌之丰皆有以极夫燕乐之情焉其诗所谓不醉无归者耶方是时太宗以秦王天策上将开府际会风云千载一日也诸公论思献纳所以图报其上岂以暮夜樽俎从容饮笑而或忘之哉览是图者可以想见有唐得人之盛矣

跋李後主观奕图

此南唐後主李重光观奕图也世言奕碁如用兵一着既失危亡因之重光承祖父之业保有江南其於理国之术踈矣兵家胜负之机既於观奕见之然不能修德自强以底於亡异日肉袒请降视夫向之游惰纵目於碁奕间此何时耶彼何时也耶

跋周文矩画琉璃堂图

按松江夏氏图绘宝监周文矩金陵句容人事江南李氏为翰林待诏画入神品尤精於人物楼观此琉璃堂图行笔瘦硬战掣类其主重光书法信为文矩所作琉璃堂莫知创始意者江南僻在一隅穷奢极丽土木之工过为此制故文矩得用意於毫楮间也耶呜呼是可为鉴观矣

书吕朴卿春秋五论

传春秋者自左氏公谷胡氏之外凡千百家大抵以褒贬赏罚为宗独文公朱子以为圣人光明正大不应以一二字加褒贬於人直言其事善者恶者了然自见名世大儒若四明太师郡王存畊赵公深得其说着奏议百余卷在穆陵时于进读恳恳言之温陵朴卿吕先生出与赵公相先後其学亦本朱子有五论以发其端有集传及或问以辨析其义旨趣之归於是诸说之破碎支离者不足论矣自是而後赵氏之学再传而得同郡程时叔氏程氏本义尤有取于吕氏者也真自早岁以先训习是经间辑集传集论二书凡有出於独见而不惑於三家如吕

氏者细书其下盖有以见儒者穷经切己之学而不专于科举利禄为心者洪武壬子忝冠瀚江多士选典教中都之临淮以使命至虹县而南海孙进士蕢仲衍适簿是邑相与论吕氏之学盖有合焉既归书五论以遗之仲衍其必因是而得圣人之微意矣哉

跋欧阳率更九成宫帖

欧阳率更醴泉铭世所盛传然重模叠刻失真已久此系陕右石本笔法有特立不挠之势人以是为贄求着文者予笑而受之因装潢成帙以寄儿子复昇云

跋虞世南孔子庙堂碑

予向与周止斋论虞世南孔子庙堂碑旧刻至春字磨灭不存後是者殆其曾玄矣相视一哂此在陕右名三段石虽非旧刻而稳重俨然有冠冕佩玉气象亦足以穷波磔之妙矣

跋皇甫君碑

欧阳率更书如大将持戈有特立不挠之势若皇甫君碑尤世所宝玩者此系陕右佳本後磨灭不存者剜去之恨不得见其全耳

跋黄府史传

传曰死者人之所恶也孰肯舍生而就死哉然死有重於泰山亦有轻於毫毛视夫义之所在而已黄府史庐陵一椽尔非有专城方面轻重安危所系寇盗之来虽弗死可也而卒至於愤詈再三以死是盖知夫义在殉国初不计其身之贵贱禄之厚薄也昔睢阳既陷张巡谓南霁云曰男儿死尔不可为不义屈霁云曰欲将以有为也公有言云敢不死夫云职为偏裨义当同死然亦巡之义有以激之若庐陕之难空一府遁去而府史独以死当之岂非人所难世所罕哉孔子谓杀身成仁者府史其庶几乎传以传之非耶

跋贝先生胡敬德字说

能敬必有德春秋晋大夫之言也数千百载之下紫阳朱夫子即河洛诸说而集厥大成其开示後人无以加矣今观樵李贝先生着四明胡敬德氏字说以操舟涉险为喻自为一家之言夫出险于无虞蹈险於不测诚有敬怠之分且天下之险莫海若也予与敬德同居海岛上其於涉海而卒蹈于海者固尝目见而耳闻惟先生能形容而发挥之此立言之士所以有关世教也敬德慎守而始终焉则于以字配名之义其庶几哉

跋宋学士送吴教授诗

予读此诗词如雅颂非宋公不能作非吴先生亦莫克当也其治世之音矣哉

跋吴教授义孚招客疏文

洪武九年闰九月初九日中都凤阳府教授吴先生义孚书疏文肃客饮酒翌日客至皆先朝缙绅文献遗老酒酣予起执爵先生诵其文在座者皆倾听尽欢而罢予辄效先生而为之辞曰定时置闰九阅月两过重阳会友以文十余人摠为上客惟先生之扬觶类司正之致辞于胥乐兮允为好也醉以酒饱以德蔼令闻广誉之施忠於国孝於亲有於语道古之意既成因语先生曰齐谐鄙俗书生习气置之不复道也明日诸生有传先生之藁者谩识其後

跋程羽肃行卷

君子赠人以言所贵於言者以其有所劝勉警厉益于人耳程羽肃由涿州守左调扶风丞天官以示殿最也羽肃不以卑且冗欣然拜命以去翰长宋公既为文以赠而孙氏仲衍蔡氏宗默皆本其出处诗歌叙述不以颂而以规所以为善言也羽肃克蹈斯言於国家慎选责成其庶几乎夫殿最者赏罚之权衡唐虞考绩之法周官三岁大计羣吏之治古今不异道也今日之殿异日之最顾所行何如尔扶风在汉为三辅视涿尤为重地羽肃不负其为丞斯亦不媿於为守矣殿最云乎哉

跋汉高祖大风歌碑刻

真尝以公使至彭城登亚父塚西望丰沛慨想汉高祖兴王旧蹟及预纂修九郡图史得载所谓大风歌者夫其蹙秦灭项醢彭诛黥来归故乡贵为天子富有四海与父老儿童悲歌击筑有安不忘危之意其帝王之雄哉历千数百年今圣天子龙飞淮海定濠上为中都而丰沛为彭城属邑在畿甸之内与汉祖先後相望岁时归幸以赐以劳不特歌大风以侈一时而已呜呼盛哉览王侯之章者亦可以壮今古之怀矣乡友傅佑知沛县以石刻古篆见遗谩识於後云

跋孔子庙堂碑

虞世南孔子庙堂碑传刻甚衆首题有大周者为甚古盖碑额相王旦篆题相王在武后朝为藩臣易唐为周相王从而附会之唐既返正碑遂琢去其角後刻者皆仿是予闻博古君子松江夏先生士良实云此在陕右名三段石较之古刻不啻曾玄而亦可以得古人笔意所在矣

跋柳州罗池庙碑

右韩文公柳州罗池庙碑中书舍人沈传师书传师居典诰之任功业载唐史列传其书与公碑流传至今信斯文之不朽也耶观其笔法顾盼有情而结构不窘殆得欧薛微意信为能书范石湖谓米元章尝学传师书至及晚年始入太令之室盖知传师者也柳州府知事孙原哲予同乡人尝学於先君子以书附此碑来濠梁求予着清白轩记予重其意装潢成帙寄儿子复昇为学书之一助云

跋九成宫碑

欧阳率更所书醴泉观铭曰在今麟游即九成宫旧石刻也昔人谓率更貌寒寝陋而敏悟絶人其书劲险刻厉正称其貌今观此碑用笔坚劲如直臣正士规行矩步有中立不倚之势予在濠得之因以转寄乡友李辅仲氏辅仲学于先君子博学好古尤知书法必有以辨之

跋永禅师真草千文

世传永禅师书骨气深稳体兼衆妙精能之至反造疎淡如观陶彭泽诗初若散缓不收反复不已乃识其奇趣信知书者也今观石刻千文用笔妍媚遒劲深得右军笔意其盛传于世而为人所爱玩也宜哉

跋顏鲁公多宝塔碑

苏长公论顏鲁公书雄秀独出一变古法後之作者殆难复措手世盛传其大字稍少而楷者独多宝塔碑耳碑系南阳岑勋撰勋之文不槩见而此文乃以公书得传其斯文之幸也耶

跋定陶石本孔子庙堂碑

此济南定陶县石本也县有是碑不详所始至正间黄河泛滥碑没入水中县尹王瑤叔璵垂意斯文俾夫工拽出之复立诸县治石文理若银星日出光曜天陰辄湿润水流如缕亦其异也文人嘉兴盛起潜为予言之碑画视陕刻颇瘦较之锦江石本则相伯仲云

跋九成宫碑（送王叔远先生孙驯骈二器）

予往见胡先生仲厚讲授弟子时临欧阳率更九成宫碑波磔之精辉暎毫楮客居中都怀想风流恍二十余年有如梦寐偶得陕右石本系太宗时旧刻敬致远意夫先生焉用此哉姑以贻二令孙学书之一助云

跋皇甫君碑

晋人书法至唐而变欧阳率更寔得右军兰亭笔意所书皇甫君碑遒健坚劲识者定为晚年所书信矣碑在今西安府学

跋褚河南书

褚河南书下笔遒劲得王逸少体魏徵为太宗言之而後之论者谓其清远萧散微杂隸体其为善鉴者哉

跋九成宫石刻

九成宫在陝右驪山唐时故宇尚存率更所书则在今麟游碑仆为三段以木匣构置於地太宗时刻也率更书学右军书法至率更而变而此碑八法实得之兰亭予与鄱阳周先生克复夜宿论及之时霜月满空残灯明灭不知为羈旅也翌日书以附乡友徐子民氏子民尝从先君学书隐居教授弟子常数十人必能深辨之

跋王景彰行卷

此怀远邑大夫及寓公寄士赠王博士奔父丧诗也夫见星而行见星而舍奔父丧之礼也王博士罹此大故其情亦云亟矣诸君子所以发其哀思者何其从容深至耶噫其秉彝好德之良者欤

题孔子庙堂碑後

虞永兴孔子庙堂碑传刻甚衆首题有大周者甚古碑首系相王旦题相王即睿宗也武后尝立以为帝已而被废为周王嗣者九年为相王者十年武后易唐为周相王题额用大周国号唐既反正碑遂去其角後刻者皆仿是碑盖永兴官著作郎时书撰距武后大足长安间逾六十年安得相王书碑额耶此必先有其人至武后时重刻因易以相王耳予闻夏氏士良言之虽未敢必然亦传疑之义也士良松江望族好古博雅旧时尝用白金五十两购一善本来濠梁减原价三之二以售天台戴颖仲戴已谪死嗣而守者其谁哉每为惋惜此在陝右为三段石又名王彦超本较之古刻寔其曾玄亦可以得八法之妙旨张士信在吴爱学虞书多士慕效之时陝右阻絶若兹者视之不啻宝玉然则斯文之好尚其亦在上者有以鼓倡之耶予客居得南北刻数本辄辨其所自出因以得於夏氏语书陝刻後以寄里友陈子云氏并求教于乡先达君子云时洪武十年五月既望寓中都郑真识

题永年郭先生行卷後

永年县博士郭先生颐卿以通经博古徵广平府教授吴先生士英着序以赠之始终大槩以圣朝崇尚斯文为士者上体圣天子之心其於属望盖拳拳焉可谓得古人赠出与处之道矣颐卿入天官以告老归复教职与士英敦叙旧好菁莪乐育所以上报吾君者庶几不媿斯言哉予与士英同里閤久不见其文读之再三因书二诗以赠颐卿且为士英致意云白髮如霜告老还故园秋菊正班班相逢却咲淮南客望断瀛洲海上山文明盛世照三台博士重欣教席开为语延陵吴季子好令多士咏台莱

跋虞永兴公孔子庙堂碑旧石刻缺本

此陝右旧石刻也识者谓其深得永兴公笔意今王彦超本是就其中翻刻者世传永兴此碑在唐则天时所刻首题有大周二字者为古於今已不可得其在元至正间夔夔子山所进金

圈儿本藏在秘府亦不可见其为人宝玩若此者殆亦不多也予同年友三衢徐景顔教席颖上以通经博古徵至凤阳府辞归着序以赠临别出此为润笔虽非完本譬诸缺圭半璧得善琢者当别为美器况金石所刻八法之精不啻宝玉者耶得其一二习之亦可造其微矣因略装辑寄儿子复昇使谨藏之以为异日学古之一助云时洪武十年岁次丁巳嘉平月朔日荥阳外史姓某谨书

跋欧阳率更九成宫碑

右欧阳率更九成宫醴泉铭乡友知咸阳县事臧九畴所寄碑在今凤翔府麟游县唐太宗时故刻字画日就磨灭而凝重劲正如见率更於数百载上视江南诸翻刻锋铓削露高下居然可见九畴在陕右以能书名其寄此帖深寓古意用转寄弘道李君弘道方以八法教学者於此能契其要矣

又

虞文靖公论欧阳率更书如深山道人肌肤若冰雪绰约如处子者以其瘦硬通神之可贵也醴泉观铭外坚正而内混融寔得右军兰亭笔意虽渐就磨灭殆如见肃肃其容正襟为宫僚时也予客濠梁海州学正刘先生南金求予着事物提纲序以此帖藉手遂书以寄乡友俞茂弘云

跋范太史五体千文石刻

宋高平范太史五体千文山阳沈生在新购得之临濠宋人书法以薛绍彭米元章为首称今观此帖汉唐之法无不备具其何慊於米薛哉在新临写之余当有得八法之妙毋徒为篋笥宝藏之秘也

跋三藏圣教序石刻

右三藏圣教序石刻拓本唐僧怀仁集羲之书识者以为深得右军笔意夫心经於佛书为最古梵释之学莫先於此其与吾圣门全体大用之说异矣唐之太宗亲御翰墨制序以传创业之君慕佛如此後世子孙固有迎腐骨入禁廷求福田利益者矣名士大夫不求其本乃欲人其人火其书可不可哉

跋醴泉观铭

欧阳率更所书石刻如皇甫君虞恭公等碑用笔皆同而精神丰采则异矣岂非所书之时有先後耶醴泉观铭今在陕西麟游县虽磨灭已久而浑厚劲直之气殆如见其峩冠肃容为宫僚时也

先伯父府君谱系後錄

先伯父府君姓郑氏名孙字以承先祖考学録蒙隐先生长子也为人精悍短小动如礼法人严憚之博学颖悟日记千言蒙隐公朝夕坐堂上取经史训迪诸生府君侍侧听受不倦他所不及识者辄先解科举未行故家子弟以诗赋论策相尚府君援笔立就每出一篇则咸以为不及也前太学生黄君（阙）时寓居于舍之东偏其为诗文多用古语府君笑而指摘之黄君不以为忤亟称之年二十以疾卒蒙隐公为丧服卿士大夫咸出涕监察御史王公余庆少与为友为诗歌什以哀挽之後按节四明尤悼念不忘云葬鄞县桃源郷先莹之侧不娶无嗣时先考处州教授年十二自幼至老言之必涕泣岁时丘墓则徘徊松柏间不忍去尝以春秋三传及胡氏传他书俾子真曰吾兄书无不读而此书者尤其苦心精意而不已也传其学而承其祀其有望于汝乎又曰古者重宗法吾兄所谓继祢为宗者也以吾子为之後不絶其宗而已苟日远日忘於二世三序则吾兄为不享矣忘亲之罪其孰当之及疾革将属纊呼不肖驹等曰自吾父来後郑氏宗祀不絶如綫吾长兄不幸早世尝以次子真类之俾为後继因循至今者盖有待也今吾目其瞑矣不可使吾兄无後於郑呜呼汝念之哉驹等哀經之中默思此言辄恸哭陨絶以为先世以来贫而且贱固非有资产之利与禄荫之及也而先君所以眷眷不忘其兄岂非念其宗承之重而人道莫大於继絶欤为人子者岂忍舍所生而後所後哉而所生父母之名终不敢改焉庶几以为恩义之两尽也传曰君子之泽五世而斩意者郑氏其复有人乎因书于家乘之末使後世知先君於兄弟父子之间所以致其重者如此伯父君有文集为隣人胡氏假去不存此尤先君所深惜者也其生死葬月日皆不书

荊阳外史集卷三十九

卷四十

●钦定四库全书

荥阳外史集卷四十

（明）郑真 撰

○题跋杂识

书盘峰先生墓表後

予读元故侍讲黄公着盘峰先生孙公墓表窃有感于心宋至咸淳间权奸擅命强敌构兵剥床及肤之时也先生以科第显而弗得在尊位其为硕果之君子乎当时缙绅之士号知先生者若王公龙泽对策以舍和吐气为说附会贾氏遂取上第逮仕北朝官为台谏出处大致殆无足言方公虚谷上十可斩之说得领郡符不旋踵降敌复领守事言与行违士论羞之与王公无以过也留忠斋由状元至宰辅不能出一言效一策以救其危乃从瀛国入覲复取显宦视先生有愧矣独则堂家公以清节着其不署降表首为文丞相所称虽以祈请使北终不受爵命居河间讲易北方学者师尊之归歿临安遗爱在民有不忘者於先生其志同道合者乎先生与诸君子生相先後而同仕於朝运去物改其富贵也非有攀附之荣沦落也不失久要之谊节义天下大闲惟先生守之终其身是岂不足以扶世教敦薄俗也耶侍讲公论着其平生而表之墓隧宁有浮辞溢美者乎子光王君侍讲公高弟已而复以铭其弟求心翁一门师友之言为天下後世取重孙氏伯仲文献之传其不朽矣哉

跋彩烟杨氏族谱

予尝习谱系学杨以邑姓周伯侨之裔号杨侯系本轩辕世家弘农汉太尉震其流派也自汉至宇文周胤祚久远普六茹由隋公受禅杨氏遂为天族贵莫与比今越之彩烟者相传为隋荣王之後盖自三评事以下次第可谱凡十有三世夫万物本乎天人本乎祖黄帝子孙有本有支分封别姓散满天下传数千百载以至於今日殆不偶然也彩烟之族知其祖之所自出始於荣王庶几本水本源之义矣後人嗣而承之足见世胄神明之盛而其族之亲疎远近与其人之贵贱贤愚因可考证岂非古者维持宗姓之法欤昔荆国王文公谱临川许氏天下後世诵其言而信之杨太史秉喆叙彩烟族谱文雄事实无媿前烈士大夫乐道人家世者孰不取证於是哉

跋番阳范氏宗谱

士大夫家敦睦之法莫重於立宗立宗莫先於叙谱谱所以辨昭穆明长幼分远近也世异事

殊仁义诗书之泽微忠信孝敬之道缺大家巨室有铁垆步之讥家世图谱狼藉废弃至於贵贱分殊亲疎势隔遇诸道涂如不相识其有能追念本始而克尽其情者乎呜呼古者九宗五两之法既已废矣有能叙其得姓之由自源而流由枝而叶以永一家之传岂非先王遗意哉番阳范氏系出高平家於蜀西始祖招在唐时为番阳守黄巢之乱徙居乐平岩前招之子鑣为都大司官领衆攻巢战胜罗婆桥旋师屯岩前卒死之唐封为忠勇侯庙祀不絶自唐历宋以至於今日数百余年以诗书守其世祚寔忠勇之报也有某字仲暹者好学而文际今兴运以秀才徵入太平府（阙）县簿陞平凉静宁州庄浪县丞尝着图谱自番阳府君以下官阀世系历历可考范氏子孙守而勿失虽千万里而远千百年之隔一有会合亲亲之义将悠然而生矣其为敦睦之计何深且远哉予家四明先祖学録公亦以范氏式斋从孙来继式斋事宋宁理两朝累官至文华阁学士工部尚书赠少师与番阳范氏皆本高平夫天子建德因生而赐姓姓不可变也支流派演分而为二可不谗其祖考之所自出哉孟仲季同出於鲁向华同出於宋栾高同出於齐吾郑氏之出于范木水本源何可忘也予弟奇倅簿庄浪与仲暹为同僚谊如兄弟况宗盟所自可不敦始终之好哉

书昭仁寺碑後附欧阳公跋语

（右昭仁寺碑在幽州唐太宗与薛举战处也唐自起义与羣雄战处後皆建佛寺为阵亡士荐福汤武之败桀纣杀人固亦多矣而商周享国皆数百年其荷天之佑者以其心存大公为民除害也唐之建寺外虽托为战亡之士其实自赎杀人之咎尔其拨乱开基有足壮者乃区区於此不亦陋哉碑文朱子奢撰而不着书人名氏字画甚工此予所録也）

此欧阳公集古録昭仁寺碑跋语也碑在幽州宜禄镇荒烟野草中拓工罕至碑传于世者少予至正间居四明与博古君止斋尝论及之际圣运典教临淮七年始得于乡友知咸阳县事臧君九畴碑盖朱子奢撰所书不着人姓氏识者以为虞永兴公按太宗朝以八法擅名者欧虞褚薛四人而此碑劲正深稳信非永兴公不能欧公称其字画甚工而不质言其人亦阙其所疑尔公尝言陈隋之间字书极其精妙而自开皇仁寿至唐高宗以前碑刻往往不着名氏岂此碑尚袭故态耶抑尝特牵于事势不得已而书谦让不欲以姓名传世耶此岂予所测识哉因装潢为学书之一助云尔碑在幽州而集古録以为幽州盖幽与幽相类必刊者之误也

又

唐昭仁寺碑不署所书名氏以笔法观之萧瘦似褚遂良劲正似欧阳率更而谨重整密顾盼有情如端人硕士衮冠博带规行矩步从容献纳于庙堂之上故文忠欧阳公爱而録之而近世士大夫以为非永兴公不能作也碑为阵亡士荐福建寺而作朱子奢之文类六朝俳俚体宏辞广辩不可涯涘而委曲回护尤见笔力文忠所谓自赎杀人之咎者盖在於此观是碑者有以见唐时异教之盛而先王之道日以湮微矣字画之波磔云乎哉

又

唐太宗效虞世南书以为甚似至戠字难於落笔命世南补书帝以示魏徵徵曰此戈法似世南书也帝服其精鉴太宗天纵多能尤善书法然于世南书终不能彷彿也况其他者哉此碑八法絶类世南其用笔行锋尤胜虽不着所书人名氏识者以为永兴公殆无疑矣

跋李靖上西岳神书真蹟

予尝阅武经七书於李相国卫公问对信其善于用兵今观卫公上西岳神书勇烈之气强毅之词诚可质之明神然其末云斩大王头焚其庙建纵横之略不谓之褻傲不可也夫其语明神者如此则其御土之严可知矣此所以际遇太宗开拓疆土位兼将相图形凌烟与唐家相为无穷也呜呼雄哉按华山为西岳卫公京兆三原人西岳固其鄉也然石刻在今广西藤县不知何如予友松江沈文举云其下有宋人题志可考今不可得矣

又

诸葛武侯事蜀汉三分天下身都将相与草庐初见先主议论始终不违其振古之豪杰哉李靖佐唐兴运功名事业与武侯相望视其微时上西岳神书以英雄之略自许亦无一言相背者可与武侯之言并观矣

跋桂阳周府君碑附欧阳集古録後题

右汉桂阳周府君碑按韶州图经云後汉桂阳太守周府君碑庙在乐昌县西一百一十八里武溪上武溪惊湍激石流数里昔马援南征其门人爰寄生善吹笛援为作歌和之名曰武溪深其辞曰滔滔武溪一何深鸟飞不渡兽不敢临嗟哉武溪多毒淫周使君开此溪下合真水桂阳人便之为立庙刻石又云碑在庙中郭苍文今碑文磨灭云府君字君光而名已讹缺不可辨图经但云周使君亦不着其名後汉书又无传遂不知为何人也按武水源出郴州临武县鸬鹚南流三百里入桂阳而桂水真水卢溪曹溪诸水皆与武水合流其俗谓水湍峻为泷韩退之诗云南下昌乐泷即此水也碑首题云神汉者如唐人云圣唐尔盖当时已为此语而史传他书无之独见于此碑也

汉人隸法在东南予所见者校官碑与此桂阳太守周府君纪功铭尔笔法高古尤可宝玩而磨灭不可读欧公集古録论着凡两见其一録如右其言此君检汉书无之今碑石缺不见其名惜乎遂不见於世也南人纪其所修泷水即韩文公所谓昌乐泷者是也至今以为利祠宇甚严云夫兴利除害长民者所宜用心也周府君泷水之绩赖此碑垂诸不朽然则文章金石之传何可废耶按周君字君光下邳人下邳今为凤阳属州予预修郡史时于人物传不得纪载信乎学不博而文之缺也碑在今韶州府治乡友乌先生继善用以为贖且问曰碑首称神汉者何予曰犹圣朝称圣明尔继善曰然及閱欧公集古録所云亦不出此有以见义理古今所同然也

跋魏大飡碑

魏大飨碑在今凤阳颍州亳县盖魏太祖飨军之地也世传鍾繇所书笔法高古信繇作无疑三国鼎沸蜀先主以宗室之胄志兴汉室子朱子通监纲目大书昭烈皇帝系以汉统後之作史者莫敢异议有以见天理人心所在矣今观此碑目蜀吴为因为虏岂不夸且诬哉然其甲兵之盛物品之丰飨賚之厚亦足以见武功之成矣

跋玄秘铭

唐大达法师玄秘塔铭柳公权书笔法刚劲严整八法具存如正人端士義彡正笏特立廷陞而不可屈挠殆与顏太师同出一轨唐穆宗尝问公权书何由善公权对以心正则笔正穆宗悟其笔諫今观此碑则其中之所存可想见矣

跋汝帖

此系汝州刻本记以汝州之印自皇颡至五代帝王名臣篆隸真草凡九十余种其法随时而变然则人文之作其有关於气运然耶石在今汝州儒学文理粗疏拓工有事则其声琤然如协律吕亦其异也

跋顏鲁公多宝塔铭

欧阳文忠公谓顏鲁公书如忠臣烈士道德君子端严尊重人初见而畏之然愈久而愈可爱也今观鲁公所书多宝塔碑文忠之言信矣夫浮屠之学圣门所不道楚金法师感应之事涉於虚幻其纪载乃托鲁公书遂传後世其亦有缘耶樵李沈君茂玄官凤阳教其子学鲁公书予以此碑赠之茂玄於鲁公不特慕其书寔慕其为人也

跋唐晋帖

王右军笔阵图与怀素圣女律公藏真帖装成一帙右军笔法固可尚已其云张旭乃唐时人不知何谓岂别有其人耶怀素落笔飞动之势尤为书法之杰异教之士技成业精乃千载传之况儒者学圣人之道者乎书为六艺之一圣门所取学者诚不可不留意也

跋裴行俭帖

唐太原郡王鲁国太夫人杨氏墓志铭裴行俭书在今县以修唐时园陵得诸土中盖当时陪葬故也书法类欧阳率更而森严整密尤为可法惜尘土久蚀至不可读然摩挲拂拭亦可得其波磔因裂为三十余叶装潢成帙而不复次第其文云

跋曹娥碑

此吉安新刻本也萧散遒劲汉魏之风度可见矣夫娥之孝通天地与江流相为无穷淳于之

文足以发之鍾繇所书笔力寔与之称斯文万世名教之传岂不伟哉当涂公与娥同姓其逆节媿於娥矣而色丝幼妇区区校智於三十里间至於妬贤杀人其不可憾也夫

跋化度寺碑

右欧阳率更所书化度寺碑在今平凉府华亭县近有董县丞者得诸萧寺塔中留置私室後移诸县治遂传之人间笔法苍古老健视清微婉媚者优劣不同陕右欧书当以为最临学之家可槩见也

客有自陕来者言碑为人窃载又军士争夺用丁斧凿而碎之惜夫然则雷轰荐福果命也哉

跋虞恭公碑

虞恭公碑欧阳率更所书其文剥落不完土蚀其半书法高古杜少陵所谓瘦硬通神者殆此类也耶彼柔婉妍媚如妇人女子情状其亦末矣碑定为古刻在今陕右醴泉县

跋魏受禅碑

魏受禅碑欧阳文忠公论汉魏纪月日之差以碑为正所署劝进名氏自臣歆以下皆汉廷名臣受国厚恩者也其屈身辱节一至此哉夫唐虞公天下三代家天下可公也故其贤当让可家也故其世可延其致一而已魏武欺孤寡狐媚以取天下然徘徊隐忍终其身弗遂岂其心犹有慊於公议耶迨及其子丕偃然为之汉廷之臣且引舜禹禅受之事以为口实独何心哉此篡逆之祸所以接迹於後世也文忠着五代史有杂臣唐十臣传之目臣者不二其心者也臣而至於杂亦可怜已若臣歆等其非杂臣之流哉

跋魏上尊号碑

古之隆号极称曰皇曰帝曰王皆以明尊无二上之义至秦始皇兼皇帝而称之後世因之当涂之篡汉转载其事至为明白而此碑请上为号首以舜禹为言夫尧之授舜舜之授禹盖以公天下为心舜之事尧禹之事舜犹君父也魏之于山阳公其如舜禹矣乎欧公谓读其书者可为流涕而大书深刻乃欲为千古之传其亦可为慨然矣

跋玉枕兰亭

此玉枕兰亭唐人临本系临江新刻晋人之风度居然可见世传兰亭在辨才处唐太宗令萧翼以百计得之而近代高公似孙胡公石塘咸辨其诬然自昭陵既出定武石刻为世所重宋理宗周汉公主下嫁以为第四奩後赵子固得之尝中流失船诸物不问独喜兰亭无恙古人之宝法书者如是若此刻者可不爱重矣哉

跋索靖月仪石刻

汉黄门史游作急就篇解散隸体谓之章草今世所传者吴皇象所书索靖月仪实本急就章然急就古重典质拘翦不失隶体月仪则变化曲折晋人之风度见矣其称君白不知所谓乡友乌先生继善为予言此月仪书式未及施用故不称名氏而称君犹今言某甲某乙尔未敢以为必然録之以志传疑之义石刻在临江天宁寺乌先生所贻云

跋智永真草千文

晋人书法至隋唐变矣智永禅师独以王氏之裔不失其正所书真草千文遒劲婉媚实具晋法欧阳公尝以其中笔法有不类者疑为後人补足辄去其伪者不以文不足为嫌也盖其识鉴之精如此今世所盛传者陕西刻本学书者视为筌蹄世传梁武帝时以王羲之所书有海咸河淡之类故欧公以为不独始于羲之恐羲之增益而兴嗣遂得衍而成文尔濠梁沈生在新得此本装潢成帙请予识其後

题篆书偏旁

篆书以偏旁为正偏旁不正岂学古之士哉许慎之於说文戴侗之於六书故以偏旁犹深意焉梦英方外之士垂意斯文其书偏旁字源自以为继李阳冰之美郭忠恕谓可万古教人信知言哉予友鄱阳周克复字学得其父雪坡翁之传尝言吾篆用螭匾法姚江赵撝谦以为未至艺学之士自负所见各有不同安得如梦英忠恕者论定其是非之归哉石刻在今西安府学其称咸平二年建则宋定陵即位初也

题西岳华山碑

西岳华山碑弘农郡书佐郭香书宋洪适云东汉循王莽之禁人无二名碑称郭香察书者察泄他人之书尔隶法与文章同一高古惜撰述不知为何人也夫巡狩方岳柴望祭告三代以上则然汉兴诏有司以时祠祭武帝定为宫殿之制後虽兴仆不常而终莫之废所谓国家礼亦宜之者也当时二千石若袁府君周阳恭肃明神孙府君山陵钦若功业皆足以垂诸不朽後是者亦牵聯得书何其幸哉碑云元熹四年八年盖桓帝纪年之次魏太和宋元丰间有题名岁月若唐李德裕亦系名其上云

书金兰帖後

右五言诗及後语定为欧阳率更行书世取诗中二字名金兰帖词与字称而笔力意态实有二王遗意盖其正书有法纵情所至无往不得其妙者如此惜其诗不知所贻为何人亦不见其自署姓氏矣博陵崔氏克广其传岂非用意斯文者哉

书道经後

黄帝陰符经汝南袁正己书生天得道经及消灾护命常清静二经则姚平龐仁显书俱得欧阳笔意若仁显则抵掌孙叔敖矣虞文靖公谓宋初自蔡君谟犹有前代遗意晚宋学欧阳者纖弱仅如编簞亦气运使然仁显当宋盛时气完力壮庶几逼真使欧阳见之宁不谓其得心画之传哉

书范府君墓铭後

始真客临淮为范府君着墓铭其子与权装潢成轴持入京师缙绅士大夫追挽之後数年与权由春官掾出宰灵壽三年考满入覲奉命复任过临淮寓舍出以相示真伏而读之词意凄怆若欲起夫幽沈閨寂而不可得者何其忠厚之至哉孝子扬父之美与权为庶几矣夫积善之报不在其身则在其子孙与权以才行贵为七品法当请赠异日金花紫诰恩及泉壤精爽钦承山林改观而真以宗家子弟当有大书不一书者矣与权者特刻是铭山中用志於後

跋宋高宗御墨为吴道延作

古称圣人载黄屋佩玉玺以为纓紱其心今观思陵书赐近臣至忠诗四章在万乘之尊而悦山林深远之趣所谓黄屋非心者也其将逊位储嗣退居德壽宫时耶书法本智永禅师而出入二王善鉴者以其克萃衆美云

録石坛龙祠石刻後

右龙王诰词缺文及吕招抚跋语録之石刻上及以宋史考定得其大略如此初预修郡史蒐访古蹟庙东民家某氏年九十余龐眉皓首言故宋封诰多藏其家兵乱携石载以出事急弃道上今不复矣车驾归幸尝面奏其事云

荅阳外史集卷四十

卷四十一

●钦定四库全书

荥阳外史集卷四十一

（明）郑真 撰

○事实

史氏先莹事实

史以官为氏其先高阳氏之裔名黎者为火正与重氏典司天地弟吴回克绍其职历夏商世守之周太史佚其後也子孙散在列国鲁有充卫有鱼有朝及朝之狗皆以才显汉鲁国史恭子三人高曾玄高官大司马乐陵侯二子术丹丹为左将军武阳侯孙均均子崇自杜陵受封溧阳侯遂为郡人崇裔孙宋乐乡令瓌瓌七世孙务滋相唐武后生清河令惟肖是为宣城史氏又丹裔孙後汉归义侯苞晋永嘉乱避地江左是为建康史氏以至高容京兆史氏皆本丹後而京兆有随太平公万岁若陈留考城史氏则汉京兆敞之後其散在传记功业可考者若後汉汉阳太守充南凉祠部郎中曷唐节度使宪诚及其子检校工部尚书孝章皆文武之秀杰云宋在东都时鄆史氏始着其源实出於京兆有名惟则者是为始祖府君娶余氏生二子长某次成成娶陈氏继任氏成後以鲁孙才事高宗拜签书枢密院事得赠太子少保陈氏赠南昌郡夫人任氏赠咸宁郡夫人即所谓五祖者也少保生二子长某次简次翰简亦以才贵赠太子少傅暨曾孙忠定越王浩相孝宗累赠太师追越国公初忠定之入相也孝宗诏赐家庙祀及五世暨罢政东归慨念始祖至高祖少保及其配两世五人俱无坟墓春秋泛扫哀寓无所乃卜地于东湖下水之原窆为五穴具衣冠葬焉仍植楹其上自着招魂文勒之贞石实淳熙戊申之四月四日也自忠定王至今乃二百余年水砂龙穴之秀俨如一日王之四世孙公袭每过其处为之慨然不鄙谓某托婿史氏俾追述其事求当世立言者为铭碑以传不朽某惟孝子慈孙之于其先苟可以用情者将无所不至以衣冠为饰躬之具士君子平日所御其所以有威有仪者寔在於是窆而藏之不必其体魄之存而其神明固有所凭藉而永安矣冥漠之间出游以时气类之感孚不有以如见其咲貌如闻其音声者乎某尝读王所着拟招词意高古实可与宋玉景差相上下而其功德疏文有曰道骨既销於黄壤仙游已在于青霄伏覲光明下昭窟宅潜德九原而可作遗芳万祀以长存则其惻怛悲惋勤拳恳到之情何如耶故其庆泽所鍾世相王封为当时东南之冠想夫来祭之时云仍後先绯紫辉映荐盥兴俯规应而矩随肩齐而踵接俎豆之馨庖烹之熟格享顾歆锡兹祖福不亦盛矣乎哉世异事殊俛仰今昔然而聚族数千百指犹有以经术致科名产业植门户者其世泽可谓深达而无穷矣矧如公袭力学笃行文献所存有足徵者而其追远崇先复有以心忠定越王之用心者乎诗曰无念尔祖聿修厥德又曰以引以续续古之人於公袭见之矣仁人君子其必有动心者哉谨序其世系如右其五祖行实及生歿岁月不槩见兹弗録

先妣蒋氏安人事实

先妣姓蒋氏讳某字（阙）蒋氏世居淮之光州固始县有讳光者徙居毗陵後复以董昌乱徙鄞因家焉光生宗霸号磨诃居士宗霸生侃侃生浚明在宋时赠金紫光禄大夫浚明次子璿与其弟琬师事陈忠肃公瓘相继登绍圣（阙）崇宁五年丙戌进士第忠肃扁其堂曰连桂璿赠中大夫琬赠宣奉大夫于先妣为六世祖琬生台州通判赠中奉大夫梗梗生南昌府通判赠太中大夫如愚于先妣为高祖如愚生岷中庆元二年丙辰第历侍御史谏议大夫刑部尚书以宝章阁学士奉玉隆宫致仕官正奉大夫于先妣为曾伯祖此蒋氏官阀之可见者也曾祖■〈王荣〉祖逊父善孙自号处士母赵氏宋宗室秦王伯升与术之後先妣处士幼女在弱龄时处士特所鍾爱先人处州教授讳觉民字以道方弱冠以文行有声于处士有舅甥之谊论辨往复情孚意合遂以先妣来归先祖妣蒋氏以得兄女为妇深加爱喜先祖妣患昧目先教授日候寝兴舐之以舌始得见明先妣躬左右不少懈祖妣既亡先祖考庆元学録公芳叔复以老病寝卧累年先教授亦患疾而剧先妣左周右旋而於学録公汤药饮食奉事益谨学録公尝谓之曰新妇孝敬异日当使有子若孙以祚吾门学録公即世先教授服丧三年既阋家居虽簞瓢屡空而以道自任澹然无营大家贵室往往修书致币为其弟子传经授业去之旁近邑米盐细故先妣躬亲之岁时祭祀斋宿治具而于宗姻亲党备尽款洽之礼先姑适赵氏病风累年问候不怠其死也出首饰治棺衾冒雨送殡姑之子维亡殮具复如其母迨姑女之嫁尤尽心焉先外祖处士年六十九而终惟外祖母及光妣所生母陈在而归宁以时慎终如始自是而後男婚女嫁俭薄随宜既已毕事将优游岁月以成寿考之庆矣不幸先教授即世先妣忧病危殆数四既愈起治家事葬祭之具悉临泣之且从诸子所请岁时躬上塚以致哀思因欲结庐其旁以图就终而以无资弗仄遂意俄一日大风惨栗天色冥晦晨起盥栉饮食如平常至午不病而卒年六十有九先妣生于有元大德五年辛丑六月二十六日卒于大明洪武三年十月十九日以明年之十月初五日祔葬于鄞县西罍山先教授之北子男三驹今为金华府义乌县儒学教谕真澗江乡贡进士凤阳府临淮县儒学教谕凤平凉府静宁州庄浪县主簿女二长适同郡刘濬次适天台叶亮侍夫兰亭为山长死节义孙男五翁昇同昇东昇允昇复昇女三初先教授将葬启殡及涂而雨执紼者衣为尽湿先妣泣言曰古者雨不克葬者为其无备也故在庙未发之时得为雨止今既在路矣如之何吾异日获从夫子及期而雨其必少止矣乎至是先妣之葬天日澄霁送者缟素哭泣而去皆以先妣夙愿所致云惟四明文献望族莫久于蒋氏先外祖处士践修世好以先妣归我先教授公当贫贱患难之时得左右维持之助妇道母仪为儒门贤耦驹等不肖奉遗教之万一托名士列而困窶不振莫致怡愉之养不孝之罪日累岁积昊天不吊先教授奄弃诸孤而先妣亦相随地下呜呼痛哉先教授行业执友王先生叔载既为之状前翰林承旨临川危公取以志墓而先妣内范未有传之者谨致其平生大略及生歿岁月求当代立言君子载之贞石以传不朽云

○行状

故叶君行状

君讳圣翁字贤仲叶氏出自芑姓沈诸梁子高食采于叶谓之叶公因以为氏子孙散居谱牒

莫考其在台之宁海者世为大族有名梦鼎者仕宋官至右仆射君之先相传自台徙明其居慈溪有名某者为著作郎于君支为近曾祖崇昌祖士龙父福孙祖不娶无子而君之父实以从子来继皆隐德不仕君幼而岐嶷长而魁伟端重人见而敬之从乡先生桂叶音摄今呼为枝叶之叶盖声音变也（阙）游经史辄能成诵为诗文发於本实风形月状皆所不道云君孝友天出父早卒君未弱冠即能自力疏布飡粥哭泣无时暨葬庐墓三年见虎不为动母刘氏尝病不解衣带奉匭抱就之构为精庐以祈福问安调膳终身如一日与其兄道翁弟（阙）翁同居共业勤俭齐一凡可以大其先者力为之家渐饶厚乡保正里胥推君为首君事上奉公旦夕维谨县令簿待以客礼时两税之法为急系官田民久荒业者君代输恐後岁饥或轻粃或作糜以赈恤之所居面小江无择浦以张孝子得名有桥潮汐冲击而圯君倾已资以复旧观其道路之泥淖者补以石行者便之建别室为敛藏所暇则与宾客载觴豆其中剧谈古今行事之迹人莫窥其际好书史图画有售者辄不吝于名公巨卿文章关世教者手抄成卷帙尝曰叶氏诗礼之泽累世矣吾惧其中絕焉乃书遗诫数百言将建屋置田延师以教合族而君以疽发顶卒其子承祖等以母命卒成之人至今称焉君生于某年某月某日卒于至正某年六月十日年四十有七以某年某月某日葬于里黄奥之原娶章氏君从母女也世居鄞城高城姆教贞淑年二十始归于君相敬有礼妇道克备君既先卒恸哭几絕除丧薰泽不御寻常间念及辄悲咽流涕朔望修斋事于墓下姑年八十余朝夕奉养愈谨比作佛老事以寓追悼姻戚上下雍睦相尚举无间言时诸孤长者年十九余皆幼延师教育曲尽礼意宾客至则俾之具酒馔秉灯火执弟子职以求海益年既长矣乃出君遗诫手泽示之曰此而父未终之志也吾尝夙夜于怀其可不使若等继为之耶诸子泣拜奉承惟谨于是一门弦诵之声藹然在耳他如室居土木之工婚娶嫁送之事亦略备厥妇及孙少长侍列奉盃为壽则自慰曰吾庶几不负君子于地下矣尤好善乐施隣有穷乏无告者多为之资助里有下湖庙尝祈祷辄应为修其祠宇作夹山亭延方外士煮茗以饮往来者嫠居十有六年扶持植立辛苦百端而鼎养弗终人子之痛宁有已耶生於某年某月某日卒於至正某年四月十三日年五十有九以某年某月某日附葬于君之域子男五承祖敬祖建祖慈溪县儒学教谕立祖弘祖女一适台州路推官金侯章之子麟孙男八如珪如璋如瑾如林如松如如栢如女四君德性温恭不为表襮遇事坦然常有余裕长裾博带恂恂焉古人君子幸生太平无虞之时不事建功立名而修己行谊惟恐弗及故闺门守贞信之节而子姓敦礼让之教则君遗德之及有不可泯者岂非其贤乎哉某始与君为文字交承君慰藉良厚及君既歿承祖等笃叙世契且致母氏之言以礼致诸义塾为教导称首以是知君为详乃叙其世裔行业生歿岁月大槩求当世有道之士铭焉谨状阙阙

故山西贾克夫行状

克夫姓贾氏讳从仁贾氏系出晋大夫季之後世家山西太原忻州定襄县南寇庄曾祖文玠妣某氏祖和妣何氏父干妣刘氏自干以下五世同居共爨七百余指庭无间言克夫生而端重质直不拘细行精律学笔翰如流尤长於筭数刑名年三十余推择为吏历石台二州及冀宁大同两府处事必法度交际必以诚实或谓之曰今之奉公者鲜勿以虚诞自诡吾子平日言未尝伪其异于人哉克夫咲曰为吏患无才败迺事一有虚诞其间是贼其心也吾岂忍为之耶士大夫咸称之曰若克夫者其谚所谓有吏才而无吏心者乎檄书上考授保德州河曲

县典史以廉勤称冀宁府长鉴衡公平不妄许可克夫造府白事獎勵再三僚友必使预席有訝之者府长曰使吾府幕得此人何慮哉固当以宾礼待之其见重如此秩满慨然曰吾岂以簿书为形役也耶幸生天下太平而志不及展吾其从此逝矣拂衣（阙）江东湖南宪府入刑部为令史纓自胄监出为全宁路教授皆能以功业自见克夫夙至京训迪成就之居处不见形迹虽隣友不知为叔侄也述先训作诫拳拳以修身齐家为言禁止私藏及奢侈费耗专制独成之事凡三百余言一日得疾将属纊呼其次子统曰尔兄不幸早世尔年尚幼读书为善士可保先业怠惰逸豫则弃人耳勉之哉克夫生于元至元十八年庚辰三月初四日卒于至正十年庚寅十月初十日享年七十有一以是月十有五日葬于庄西祖塋之次原娶张氏继郭氏罗氏子男三长继张出少有逸才年二十充贡先卒次统郭出博学能文次维罗出女二刘某霍某其婿也孙男女一其一适侯在廷克夫清苦俭约不嗜饮酒为吏二十年未尝以罪累大意以为官之与民上下相维为政者使两无亏损斯庶几矣倘未得已宁亏官可损民耶处心利物多此类其居家也婚姻祭祀宾客之礼皆有品节而以敬为本治丧不用浮屠孟州倅韩某将上官道死克夫棺敛返葬之又资嫁其女经纪家事尝言吾早失所怙误入为吏後輩毋效吾为也吾家积善累世天复祚吾门出一读书人足矣於是子纯之子守正绪之子守一或受业上庠或出就外傅守一以易经膺河东鄉贡进士荐由霍州儒学正官工部司稻至正戊戌守正与弟守质侍其父避乱蒙山寇至欲杀纯守正拜且泣曰吾父老且病愿以身代即欲杀守质守正曰吾老不能备养旨甘之事实赖吾弟何不杀我寇曰吾杀人多矣宁见此子义者耶遂两释之且问其所生年曰是吾兄也留所掠驴二再拜而去会稽叶砥作传以实其事人以为克夫家教之及也大明洪武元年忻州内附版图入职方氏朝廷徵用儒士布列中外克夫次子统以按察僉司郭公桓荐詣阙下拜监察御史旨来中都真以诸生礼见语及先世慨念不忘君子以是知克夫有子矣夫贤者之报不在其身则在其子孙以克夫才行足以见诸设施而以心处靖退故弗克享有禄仕当时君子盖深期之而勿果于所期也年逾耄耄从容归全委庆诸祉至其後人嬰患难则有以成节义之名际文明则有以被恩光之盛殆所谓没世而不可忘者耶夫德厚者流光本大者末茂定襄边鄙用兵之余向之同里閭者十无八九而贾氏屹然其间迺今御史发迹仕途上承天子耳目之寄推本教忠增封泉壤当有大书不一书者是用状其生歿岁月大略求当世立言君子勒之名诗以传不朽云

卷四十二

●钦定四库全书

荥阳外史集卷四十二

（明）郑真 撰

○行状

四明孙先生行状

先生姓孙氏讳元蒙字正甫孙氏系出河朔名全照者有功澶州其仲子某当补牙校以让其季南游吴越遂为明之鄞人曾祖讳愿质宋朝散大夫国子司业工部侍郎祖讳璠宋通直郎知临海县父讳嗣明宋将仕郎曾祖妣黄氏祖妣庄氏妣周氏先生生而静重寡默自幼颖悟有志于学岁在戊申先生年十有八遭家多艰父母连丧与其长兄元厚次兄元佐拮据丧事哀踊如礼既葬服阕潜心经史家事一不经意值国家新学校法有司选故家俊秀补郡庠弟子员先生抠衣以往适乡先生鲁公月卿杜公孟传皆以老成重望训导太学一见问其家牒以先世同官于朝有通家之契喜而谓之曰文献之真传其惟有人乎盖先生之四世祖技与其子起予同登宋嘉定七年进士第以迪功郎监潭州南岳庙累赠朝散大夫尝师事宣猷楼公钥端宪沈公焕正献袁公燮及见徽国文公证其所受学正文粹蔚为儒宗所着海上藁人多传诵先生既得诸家学之懿又有鲁杜二先生以为依归且以东南诗学莫萃于明鲁先生既得其源委于是先生请授诗经诸家之说旁通曲畅学遂以成胡松石奉礼币招致为师馆谷之礼十年如一日郡庠延聘为训导从者云集逾年以一言不合拂衣去太守丁公某与教授张遵道留之不能得陵阳牟公应复景阳都司宣阉屈诸宾席俾二子执弟子礼且请掇教鄞学而兼其廩禄先生力辞不能叶先生恒敬常以国学生释褐为余姚倅奉书走百里延居馆下州守刘公某文大同知宇文先生公谅子贞咸致敬礼遣子就学四明自宋绍兴以来有乡饮酒礼先生以其礼行之姚庠揖让进退衣冠文物彬彬焉宋童杜州先生得杨文元公慈湖之传其孙子舟请于朝创书院奉其祠事司教者自黄彦实以後难其人先生以童氏致请之勤勉就东归申明朱子教条季考月试具有成式朔望读吕氏乡约书善记过以示劝惩远近裹粮而至者凡数十人太守埜堂阿殷图公闻先生名复以训导屈致郡学当时与同其事者若先教授郑先生以道蒋先生景武伯威桂先生德称彦良协力作兴士习为变广平董公搏霄孟起金帅濶东于先生雅爱重至正八年河南兵起公以复濶省功陞参知政事驻师三关辟先生为余杭县儒学教谕或谓先生宜谢不往先生曰董公吾知己也况教职为斯文世教所关者耶既至公为欣喜慰藉倾盖如平时时兵甲之余旧染污俗诵弦絶响先生延请师儒讲明忠孝闻者兴起殿廷斋庑焕然一新监郡李颜公继总制三关平章左答纳失礼公驻劄余杭尤相礼遇访以世务先生条画以对皆中事情二公虽黜之而不及於用有以见先生经济之学蕴蓄之素如此在任二考调松府清忠书院山长於是先生已老矣喟然叹曰吾何

复仕哉得为晚节完人斯可矣归隐于家为就终计然当时名公巨卿四方士大夫学者咸以先生乡之耆硕典故因革就而取证焉先生高下随时不矫不屈各得之所欲大明洪武六年朝廷以六科取士有司以先生仲子章应诏先生语之曰吾就木不远赖汝等扶掖以尽余日今与汝诀吾念汝从政未之能也以吾老故得以告还幸矣脱不汝听其以清白勿堕家声哉因呜咽不自胜逾二年得未疾日犹夙兴盥栉有来问谒者必冠带以见举手谢焉属纊前一日始就枕席不食饮次日四鼓怡然而逝神色不变生于元至元二十八年辛卯十月二十六日卒于大明洪武八年乙卯五月二十二日享年八十有五娶庄氏沈静寡默不事华饰年二十有七来归治家勤俭先生之得安于教育者其力也生有元至元二十九年壬辰六月六日卒于至正二十五年丙午十月三十日享年七十五葬以至正二十七年丁未十月十七日子男三长弘次章河南府永城县税课局副使次传女一人适同郡金华府义乌县儒学教谕郑驹孙男六人复生端生震生谦生道生阳生孙女四人长适同里杨启明余幼在室弘等以明年又九月初三日奉柩葬于鄞县丰乐乡黄山之原与庄氏合兆盖先生所自辨定云先生姿禀纯粹绀颜白髮起居视听康宁不衰而冲淡夷坦得诸内养始终不为势利声色所惑待人接物和气可掬酒馔享具丰约随宜而久交愈敬信不渝有善极口称扬有恶未尝出诸口恐不为人所齿天性孝友岁时昭穆祀享思慕终其身不牵于鬼神巫祝幼子传尝病巫有劝祷於祖祢者先生曰祷之诚是也然祖宗岂不欲嗣续之盛耶且寿夭有定瀆祀徼福非时与礼奚可哉传竟得差人咸叹服先世产业以让二兄一无所预已鬻质而用资复还者亦不为已僦居城中从容自给不以贫窶为戚二兄年几八十常延致于家委曲承顺竭力周济不为吝疾病躬调药饵忧形于色愈则觴咏务尽其欢比其歿尤尽殯送之礼其笃于伦理若此平生书无不读至老勿倦而以性命道德为根柢文章出入今古尝两造漚闾不售遂不复践场屋尽出以传学者且曰圣贤之学知行体用尽之在己而已爵禄有命焉诲谕谆切不以富贵贫贱礼意厚薄为轻重愔怠不振者深加责让不假词色故从游多底成立以科第登显途任州县者前後五六人所着序记碑铭赞颂书疏题识诗歌典重温厚成一家言缙绅君子若柳公贯道传黄公潛晋卿危公素太朴咸相推美漚东金宪史公铨季衡亦以先生可登馆阁草剡以荐而勿果早号映雪子有映雪斋藁若干卷藏于家其亡也呼其子弘等戒之曰吾家自河朔府君以来历十二世几四百年诗礼相承吾幸嗣遗绪今死矣引而勿替实在尔等勉之哉先世著述吾祖知县欲刻以传在官每以自随以临海兵难同歿焉残编断简之仅存者吾欲继志勿及竟汝其勉为之兹固先泽所系也呜呼先生于死生之际可谓克致其重者矣惟吾四明自宋以来衣冠之家栋宇相望百余年来胤祚凋落文学节行求如先生者几何人哉若稽郡史庆历诸老模范後进淳熙大儒阐明正学仰止高山永言前烈先生老成闻望师表一乡硕果不食官止於儒而身居两朝年逾八秩深衣大带岿然如鲁之灵光庶几于儒先君子哉真慨念先处州教授在时与先生齐名兄驹又为先生子壻累世亲契过从周旋而久客中都忽焉闻讣敛不及凭棺窆不得临穴负媿九原矣然念卯角以来号知先生乃为泣哭吊序其出处及生歿岁月大槩求当世立言之士铭其墓使後世君子知斯世而有斯人焉谨状洪武九年十一月初二日南至鄉贡进士同郡眷生郑真状

王先生叔远行状

先生讳宁孙字叔远姓王氏王为琅琊着姓後徙居开封祥符宋保信军承宣使安道公四世

祖也靖康末金人入汴公以兵扈从南渡遂定居鄞曾祖摛文学治政为时名臣官至礼部郎中崇政殿说书祖应麟中宝佑博学宏词科历事三朝掌两制者十余年高文典册当世传诵官至吏部尚书翰林学士号厚斋先生父昌世承务即世称为承奉公故侍讲金华黄文宪公铭其墓母杨氏先生幼岐嶷侍承奉公侧循导规矩出就外傅庠校诸老若赵公山心石公仲刚咸獎厉治诗经得优柔温厚之风继以春秋帝王经世要典取左氏公谷氏胡文定氏张氏主一陈氏止斋吕氏朴卿及乡先达若息斋高氏存畊赵氏时叔陈氏昼夜复习订正同异史传有未得其要者必推明事实极其始终而止读范晔後汉书欲为注释勿果为文敦尚本实然不肯拘有司绳墨未尝一造场屋崔植傅浮尝就焉二人者後亦为名士夫郡守知其贤以币招致郡学训导弟子员郡大家邵氏梅氏尝屈诸家塾不久辄弃去西游淞江以所业赘丞相府丞相以其先贤子孙将署为白鹿书院山长辞疾东归人遂称为山长先生云同霁山去鄞县东四十余里山高水深自承宣公下至承奉公皆葬其地先生构庐其中时致其思先世手泽宸章御墨宝藏珍惜凛如不胜尚书公所着深宁集等书累千百卷先生与其兄厚孙遂初公同为校讐晰分目别肄习成诵其玉海及他书十二种请於部使者镌梓以传天下学者读其书者以王氏世有人焉郡有乡饮酒礼先生每岁周旋其间升降揖让具中仪式太守礼敬之值世事日非养恬肥遯中更脚气疾常不出户限而遇事辄慷慨直言至正末淞东宪金戴公东臯按治于明民颇安之分省参政杭州巴哈淞东佾帅多尔济不使其所为时御史廉呼噜岱将由海道入京嗾其以它事诬构戴罪系诸府治父老民庶寓士论行台诉冤及上书者相继未报先生慨然曰此非吾所当言耶率明士大夫抗疏台端戴得复職会多尔济自海道遄师踰城以入变在不测戴帅郡将讨之事定将荐剡先生谢絶之于是先生年已艾矣将卒以家事属其兄请异日葬同兆域且命以啖赵春秋殉生于有元大德十年某月某日卒于至正二十四年某月某日年五十有八以是年某月某日葬于同霁先茔之左尝娶杨氏无子以兄子隲为後孙男一公权女一先生天资颖悟书无不读而性理文章之懿制度典故之详深致意焉其文章根柢班马出入韩柳欧曾诗文未尝留藁惜乎散亡者多性尤孝慈承奉公谢世已久事母杨氏克致其谨杨氏深爱之仆隶养之如子至为构庐娶妇割膏壤以给之早与董先生秉彝蒋先生敬之为友二先生已物故独兄事先君子求我先生敦始终之谊酒樽碁奕论辨今古真时以子弟侍立尝为论唐正衙内殿之制词科制诰檄书露布之体以世之学者不暇致详而独许真为能学宋景定末度宗即位尚书公以礼部郎官草百官表奏旧制请听政四表已上丞相贾魏公命增撰三道尚书公至幄殿一挥而就先生酒酣尝论先朝制作之盛真素习其文因为默诵先生喜曰汝殆为吾家子弟也耶呜呼先生已矣世无复有论斯事者矣真窃观四明郡学先贤右祠尚书公在庆历淳熙诸大老之列而他不与焉盖道德闻望有不可以勲名爵禄并者尚书公名满天下传及三世遗书旧藁先生与其兄嗣而承之非文献之足徵者耶仰惟圣运文明士自一艺以上皆得与礼乐之盛使先生尚在不使居撰述之司勒成一代大典乎慨逝者之如斯悼来今之勿继真所以欲图其不朽者实惓惓焉因述其平生出处大略求当代立言君子为之铭焉谨状洪武十一年二月朔日鄉贡进士同郡契家子郑真状

亡兄金华府义乌县儒学教谕郑先生行状

先生姓郑氏讳驹千里其字也其先自吴兴徙四明世祖讳钧宋端平淳佑间奥学硕材有闻

于朝丞相郑忠定魏王延致宾馆仕为迪功郎衡州军事推官再转监平江府百万西仓卒官曾祖讳登国子监进仕国子不娶无嗣祖芳叔以工部尚书范公楷从孙来继入元以荐授庆元路儒学录学者称为蒙隐先生翰林侍讲柳公贯铭其墓父觉民处州路儒学教授学者称为求我先生翰林承旨云林先生危素铭其墓祖妣蒋氏教授生三子先生其长也生而娟好静秀姿貌玉雪时漈东阉帅赵公某与学录公斯文之契麾节过家从容竟日抱以示其母夫人母夫人置膝上华以色衣爱弄赏惜期以远器稍长先教授教以性理字训大学中庸论孟书易等书辄至成诵十岁余遣入郡庠王先生宁孙叔远蒋先生宗简敬之张先生用庚子西相继训导弟子员先生得其绪余科诏复行先教授俾专治诗经先生服勤不辍自朱子集传外若迂仲李氏东莱吕氏潜庵辅氏新安胡氏集传释童子问等书裒集纂辑统宗会元以为明白纯正无出朱子吾不幸不生於二百年前亲在弟子之列而犹幸于二百年之後读其书而尚论其世也每形诸论议温润缜密而用意精到天台陈公廷言主为文会深表异之年二十时受大家聘币为人师有颜司狱者其子与先生年相若愿执子弟礼而不能得盖先生学务平实而待人接物心平气和人人羡慕敬爱之西游吴中翰林张公逢原待为通家凡性理之微言之懿历代典故之详中朝文物之盛讨论往复而先生之学为不可及矣既归而学者争欲礼致之慈溪叶贤仲规为义塾以教族人未成而卒遗言谓其子非郑先生不可师先定其规约而为之首创好义者有所兴起尝造漈闸不售叹曰吾宁较得失于一旦耶修身律己以淑诸人斯亦可矣值时事日非讲道山林间未尝迹公卿之门家事巨细一不经意漈东金宪戴公东臯荐为本郡学录於是先生年四十余矣後十余年际圣运肇兴复以科目取士有司请就试先生力辞继用三年叠试又命大徵儒士县大夫敦迫甚至先生辞之益力会郡学训导缺员郡通守以币踵门先生曰吾祖若父师表郡庠以经学淑後进多矣此岂不可为耶就勉职座下以材艺荐成均者岁有其人朔望讲经反覆明畅郡守谛听而竦敬焉象山堂试请为考官取舍之公士论为服四明文献之邦儒服为盛任府州县者多至二百余人疲冗不胜任及奸赃得罪居其大半於是在仕籍者以山林为安伎害嫉妬相与牵挽而出之而同郡杨侃由夔府上剡先生曰吾乃为险巧不肖子所荐耶辞之二年会御史按临漈江督促尤急先生不得已去之吏部会杨侃以事败系秋官瘐死先生曰果然累吾出处矣引老控辞吏部侍郎增城张公度景彝曰先生才行久在识知所着经义考功置在高等学所以为用先生乃不肯一出以为身荣耶不敢烦以有司当授以近使教职幸勿让先生遂领金华府义乌县儒学教谕过家上冢而去义乌故侍讲黄公之里衣冠礼乐遗风具存诸生受业训以知行体用之说渐渍成就如时雨之化踰年入贡礼部者凡三之一自县长及缙绅士大夫暨山林高道之士咸羡慕礼重以得人为喜内相宋公自翰林归里第先生两造焉公待以宾礼握手论议从容竟日且曰吾官翰林十年见天下学官多矣老成典重先生莫尚焉传以潜溪集复为志先妣蒋氏之墓其见知遇如此所寓扁曰西山^廿堂一榻坐忘尝笑曰广文官独冷欲辞不可得矣聚春秋五传及诸经史温绎旧闻誓以立言自见而先生年老多疾志虑向衰饮食起居意忽忽不乐一日去之傅御史家中风疾昇归而绝大明洪武十一年五月一日也子翁昇侍侧无一钱以敛知县事孔克源为买棺主簿（阙）及父老致赠贖诸生奠祭如礼以是月某日藁葬县东颜孝子墓山明年十月二十一日归葬于鄞县桃源乡先教授墓左先生于有元延佑七年庚申十一月初四日距卒之日享年五十有九娶孙氏正父先生之女子男二长即翁昇次同昇早夭女二长适王中传厚斋尚书公四世孙次许嫁吴某未行先生天性温纯气貌充伟乐天知命不以贫贱富贵为忻戚事亲至孝得其欢心先教授疾亟先生在达溪山

中闻而亟归先教授为之喜嘱以遗言而逝先母蒋氏不疾而卒先生见其属纊人皆以为孝诚所致云在外觉心动归平生用志古学自三代秦汉唐宋诸家罔不涉猎而于文章正宗及玉海词科十二体之中为有得以为世之为文者不过议论叙事两端而贵於识体体制不立而别出新奇可乎或蹈袭成言支离骛骛将焉用哉论及史传以为司马资治通监专于纪事朱子纲仿春秋目仿左氏因事以明理自成一家其书帝在房陵用公在乾侯例识者犹以天子不当下比诸侯而同郡人陈桎着续通监于景炎祥兴犹用之何也盖宋至德佑二年三宫北上宗社陵夷图籍符玺尽去闽海亡魂崖山遗烬岂得与中宗比哉此作史好奇之过也会朝廷修元史慨然论纪载之法以为此当属之名世大手後生晚进于司马氏子朱子书法未领其要乃欲执笔厕于其间耶所见大槩如此至於诗律之精特其绪余之一尔观者目以台阁气象非山林枯槁者所能晚年理明义精王先生叔载以博洽名家以为士林凋瘵可寤语者惟先生一人有所疑者谘以辨决焉他如酒樽碁奕古今图画彝器辨别真伪用以致清趣云有文集若干卷藏于家惟吾郑氏以儒名家至先生累世矣虽不及显荣于时登两制三字之选然獎成多士以为世用比之高爵重禄不既多乎哉真以同母兄弟友于之笃四十余年洪武壬子以鄉贡计偕京师恸哭为别及典教临淮先生在义乌屡以书来曰吾老矣兄弟天涯宁复有相见曰耶真时读之不以为然而今其果然矣为言之效乃至是哉呜呼痛矣夫昔明道先生程公歿其弟伊川状其行表其墓者文潞公也东坡先生苏公歿其弟黄门状其行署其庙之神道者近者虞文靖公传之宋史者欧阳文公也真之兄弟不敢窃比古人然彝伦之重万代一日也况先生之问学行谊果有志于先烈者哉则夫华表之辞勒之金石以光昭泉壤者不有文潞公虞文靖欧阳文公其人乎谨录平生大槩及生歿岁月告诸当代立言者

卷四十三

●钦定四库全书

荥阳外史集卷四十三

（明）郑真撰

○墓铭

郑同昇墓甄铭（有序）

洪武六年秋真以乡贡进士典教临淮家兄明学训导以书来曰同昇以六月三十日死矣以汝有叔侄之亲用以讣汝又曰是子气性颇异常儿吾老且贫庶望其底于成也今吾望绝矣柰之何真捧书恸哭再三四默念同昇之生之病之死深有足悲而家兄之言尤不可忘者因执笔论次其略云同昇姓郑氏故庆元路儒学录蒙隐先生讳芳叔字德仲之曾孙处州路儒学教授讳觉民字以道之孙今明州府儒学训导讳驹字千里之次子也母孙氏训导与真为同母兄弟先教授在时与同昇外祖正父先生俱以德行文章师表一乡婚姻之家为郡士大夫家称重同昇之生姿貌玉雪在襁褓中能伺人意先妣蒋氏深爱之起居坐卧尝与之俱年八岁出就外傅读书琅然会真馆授韩氏同昇亦就学焉四书朱子集注杜少陵诗选读之略徧授以诗易二经能通大意作字遒谨释疑解义多可观论语诗骚长篇短制已渐就绳墨矣其居家也不好戏弄意有所忤虽饥渴不辄饮食论事之是非曲直亦时有中者以是一家之长皆称之先教授即世同昇患鹤膝风经年而愈迨先妣卒家难相仍同昇疾以复作卧枕席上挺挺骨立项背拘挛展转不能作气痛不可忍常终夜有声其母抚视顷刻不倦诸母亦怜之间以针刺少缓值六气不齐寒热复作疾益甚医者用药或温以补或凉以疏曾不一效计日数之殆更三岁去冬十二月真来京师与同昇执手为别相顾各涕泪不自禁嗣是累以书问其痊否噫同昇今不复见矣悲夫昔昌黎韩公祭兄子老成有曰吾兄之盛德而夭其嗣矣汝之纯明宜世其家者而不克蒙其泽矣一在天之涯一在地之角敛不得凭其棺窆不得临其穴自今以往吾其无意於人世矣三复斯言未尝不叹其悲且哀也呜呼孰知去公数百载而真之於同昇其悲且哀有适相似而甚焉者乎同昇生於丁酉岁二月某日距今岁癸丑死时年十有七以某月某日葬於鄞县桃源乡西巖山先教授墓左真向尝以春秋同盟之义字同昇曰彦盟而未着於人人兹特系以旧名铭之墓甄以慰其灵云夭殇罹兮骨肉乖而父老矣其何以为怀也耶故

清河张处士墓志铭

圣天子即位之三年龙集庚戌诏天下以明经科贡士於是广州府增城县张度以书经就试广东行省明年徵诣京师再试吏部中选拜监察御史赐豸冠锦衣银束带谢恩奉天殿下既

就职奉命分守北京已而巡历中京绣衣所临风采凛然间尝以朔日展敬先圣庙下浚仪赵某以癯老请见御史怵然有言曰度以非材备员宪属实先考处士教训所及先考卒葬迨今有年而墓上之铭未立先生尝逮事前朝於书事为宜敢以不朽请某固辞不获则退而按状论次其大略云处士姓张氏名复礼即名为字礼庭其号也世家广东番禺之礼园社曾祖■〈木罌〉业儒弗仕精於易学祖一飞父彬甫两世克承其传曾祖妣某氏祖妣麦氏母罗氏处士生而凝重寡默无疾言遽色志行卓异不为流俗所移博学善文尝抚手泽慨然曰吾家易学之传今三世矣虽不资以取富贵所赖乎淑诸身以遗後人者其庶几乎於是穷采幽索深契玄理观夫日月星辰之着风雨霜露之变昼夜冥晦之往来寒暑陰阳之代谢以之达诸辞象通於变占吉凶悔吝视为趋舍动静起居罔弗以礼事父母以孝睦宗族以和待乡党以敬处事接物悉得其要先墓在礼园之南山由祖始葬泊处士考妣与伯父隣甫伯母蔡氏先後告终处士窆四穴安厝之展省封殖岁时不废嗣守先训笃意教子时科举盛行以乡落间鲜师儒挈家居广城俾诸子肄业郡庠学既成矣长子度为肇庆高要儒学教谕得禄以养凡六年处士喜且慰曰吾家斯文一线之脉当不坠矣会兵甲繁兴抚时感事尝郁郁不乐一日以疾不起郡境分据家难殷忧度因奉丧避地增城之西有章山壠羣峯拥从盘礴左右罗浮耸翠绵亘其前遂为处士墓时广郡内附矣处士生於有元大德五年辛丑九月二十四日卒於至正二十一年辛丑四月二十三日享年六十有一以大明洪武元年十月望日葬处士之配曰林氏至性纯行悉可仪法先处士卒今葬附焉子四人长曰度即御史也次曰转精楷书善大字次曰峻深词律皆早世次曰熙好学而文未仕女一人适董桂荣孙男二人曰汝嘉曰吉祥女一人某惟故宋南渡以来经学之士视古为盛变故相仍文献故家渐以湮微而处士乃能敬谨弗坠遭时孔棘弗克享其禄仕賁志以没而有御史以为之子际今熙朝膺天子耳目之寄说言弘议日开於上可谓难能也已呜呼处士其有後乎是宜铭铭曰於惟圣朝取士以经广海东隅文献可徵嗟嗟处士遁世弗仕家学之传以遗其子上膺荐书旅于明廷冠豸戢戢赫焉宠荣追惟教忠貽谋罔失奚徯疏封式表先烈章山巍巍宰木青青兹惟其藏以妥以宁明发寤怀罔极恩报勒此铭诗永世克孝

元故四明范府君墓碣铭

府君讳源字仲渊姓范氏府君其追称其先居汴宋建炎间讳某号八府君者扈跸南渡遂家于鄞生赠中散大夫某中散生子五人长曰宣义郎某次曰工部尚书楷由宣义至府君凡六世曾祖某祖某父谨字亨甫母某氏初八府君以勤俭致富好义乐施人以庆门期之传及三世而尚书奋自科第入中书掌制晋登八座为时名臣经筵讲易啓沃帝心穆陵御制长春花诗亲洒宸翰以赐积官至文华阁学士赠少师嗣是代有显者宋社既墟不得有其世禄而府君之父亨甫翁移居奉川老成闻望仪表郷校有子三人长沂由绍兴衢处三府掾升集庆路上元县典史仲灃老於农事不求闻达府君其季子也府君生当盛平以才敏试吏羣有司积劳升府史由明调越两郡名守有若安图公僧格实哩公咸相器重荐司刑曹两造在廷理断曲直有冤者多所平反人服至公越富民有杀人者府君司其牒富民以厚利陷诱不为动卒寘于法会濶东金宪图们特穆尔按临于越罗织起狱事府君以他累罢归句章从容泉石间絶口不与世事俄一日得疾奄然而逝年七十有四娶汤氏有妇道先卒子男三长懋历定海慈溪临海县吏以卒次与权定海长山场典史次士彬昌国正监场典史女二长适奉川李本

仁际今圣朝以儒士预修元史授山西行省照磨次适定海王立礼孙男四道同文同真同穎同孙女五如玉适慈溪陈怀德如瑛适定海楼某如玖如璫如琚皆在幼府君性刚介处心仁恕奉公以勤至忘寝食而清苦自持虽老於吏事莫致显荣而笃於教子见其成立有禄以养终其天年庶几无憾矣乎府君生於某年某月某日卒於至正二十（阙）年某月某日以某年某月某日与汤氏合葬慈溪德门山之原从先兆云大明洪武之癸卯距府君葬凡十（阙）年矣真忝以乡贡进士典教中都之临淮府君次子与权自颖上以书来言曰先人律身累行子若孙蒙福多矣吾兄既早世而吾与弟士彬谪居在远六年于兹南望故山不得泛扫恐一旦溘先朝露家世源流後将无徵子於范氏为宗盟敢以墓上铭文为请倘归而刻诸石先君犹不死也真受其言而深悲之慨念先大父蒙隐先生以范氏子来为郑後与亨甫翁为同母兄弟义相友爱久不见必涕泣先教授求我先生践修世好府君俾仲权来授诗经师友叔侄之谊莫尚焉先教授即世已久府君又不可作渺焉淮海与仲权相望一水间所以慰九泉之思承不朽之托者非真其谁也耶铭曰法从之家衣冠奕世命也不辰而试于吏吏本於儒不执不拘老而归全式完其初善积于躬貽厥孙子窀穸之藏永固勿圯

杨母黄夫人墓志铭

大明洪武七年甲寅冬天台杨文会以尝逮事先朝徵入京师谒予史馆以前乡贡进士潘伯修述其母夫人行状求铭墓石按状夫人讳丑字集义姓黄氏其先自宋工部尚书懋由金华徙居台之黄岩柔川里曾大父希文承信郎长信宫干办公事官大父元泰太学上舍生父荀龙登咸淳四年进士第调迪功郎安庆府宿松县尉母童氏夫人生於元至元丁丑十一月十一日天性聪慧幼年县尉公授以内则等书多能成诵至孝经三才章言天之经地之义人之行意领心悟语兄弟曰孝如是其重耶自是承顺二亲惟谨尤勤女红县尉公鍾爱之既长择所宜归得同里杨氏是为元衢州清献书院山长载至之妻宋知奉化县中甫之冢妇朝奉郎珪伯之孙女妇夫人归杨氏年方十九舅姑已歿惟朝奉公大耄之年屹然为一门砥柱夫人衣礼服晨昏定省凡十年躬治饮食制衣服随所欲而进寒暑饥渴不失其时或有不悦色则怡声下气侍立问所意向俟复常然後退朝奉公每谓人曰孙妇甚善事我朝奉公即世夫人佐其夫山长奉襄如礼山长历任义乌宁海儒学教谕家事大小夫人实纪纲之年四十有七山长公先歿夫人不茹荤者三年讳日恸哭如初丧延名师教子有成立贫无食者赙之死无子者买棺葬之丁未岁歉发所积谷钱赈以济乡里既尽毕婚嫁事遂清心礼佛通其三昧一日感风疾遗训诸子诵观音普门品经怡然而逝至正乙未八月十三日也享年七十有九以明年丙申二月十六日葬於儒奥山之原与山长公合兆子男五长文昌元绍兴路嵊县尉次文治次文贤忠翊校尉绍兴路揔管府判官次文会由处州儒学教授陞将仕郎翰林国史院编修官次文淑庶出女四蔡廷芳王元掀黄果潘承栢其婿也孙男二十四人女十一人曾孙男二十八人女十人夫人令仪淑德名家懿范承先裕後心实惓惓每以不逮事舅姑为恨於母家尤克致其厚割奩田之半以归其兄初杨氏之族百数十人多罹至元丙子之难惟朝奉一门无恙山长公尝作堂曰宜诜盖有望也後子姓既多夫人构精庐山长公墓右命曰诜诜前左丞周公伯温题其扁用以慰山长公之灵云予向居山中闻夫人以孝称前参政金公原素尝作杨孝妇三大字表异之今翰林编修朱右为立传载其事甚备徵诸潘君之状诚可信非诬系之以铭可无媿词矣铭曰女妇之贤莫重於孝懿惟夫人奉其先教既择所从周旋敬

恭宗事之托壹其初终七十余年曰福而寿宜尔子孙永绥吉佑

蓬庐处士史公墓志铭

上在位十有五年岁在壬戌夏六月诏前奉直大夫知北平府涿州事史行可进阶中顺大夫官山西道提刑按察司副使行可既拜命入谢侍朝三日面闻圣谕陛辞上道过临淮访真县庠曰行可荷国厚恩实先公遗教所及先公歿已有三十余年而墓石未有刻文失今不图後将奚及子其执笔焉真退而论次如左公姓史氏讳公珽字搢叟蓬庐处士其号也世居鄞之甬东八世祖简宋赠冀国公简生赠太师越国公八行先生诏诏生赠太师卫国公本木生赠太师齐国公东臯先生渐渐生宝章大监鄞县开国男弥恣公四世祖也曾祖讳望之秘阁大理少卿祖讳仪卿从事郎监泰州丁溪盐场父遂伯入元隱德不耀乡称曰处士曾祖妣郑氏丞相安晚魏王玄孙女特赠硕人祖妣郑氏恭人母卢氏公本端山先生讳彦伯季子以从弟遂伯无子来为之後公生而秀爽词气温恭早志於学通诸经子史而尤邃於易延佑科诏行郡守举堂课法公年未弱冠以书经屡占前列庠序间名声籍籍安晚曾孙习斋先生奕夫奇之愿敦世好妻之以女先生素以道学文章自任述作论譔多俟公鉴定先生曰韩昌黎婿李汉而文誉益振吾於搢叟庶几哉公不自矜喜学日进而德以成家居教授从之游者每数十人诸生范枢赵景年贫不能为礼公不以介意训迪成立卒有闻时方承平故家子弟多跻仕版公慨然叹曰王者之民皞皞如也吾得为王者之民足矣爵禄如彼何哉程先生端礼尝荐为甬东书院主奉即弃去两试漕闈不售絕迹场屋用意古作者慕陶靖节之为人追和其辞薄游西州陶写性情自以为得江山之助名士大夫若黄公望柯九思俞镇与为神交诗酒从容俛仰今古论宋季台阁典故朝野人物亶亶终日至於国亡忠臣义士之死节者必慷慨流涕两遭大丧克尽礼制每春秋祀享忌日裸荐哀慕之情见於顔面虽家道中微而田园犹足自给将芟柞整辑为终老计而竟以疾终惜哉公生於元大德五年辛丑十月十九日卒於至正八年戊子八月十六日享年四十有七以是年十一月廿五日葬于阳堂乡华奥之先茔所着有蓬庐集若干卷易演义象如发挥三卷配郑氏克相其志子三人长景祖即行可有司奏户籍时即其字为名次晟祖次晏祖早夭女二人长适郑必政次幼亡孙男一必宠晟祖出也女二公性俭素而好施与不倦广平李尧民亡丧不举公賙之累岁且为着哀辞告其常往来者过钱塘西湖遇老人汤姓年七十余盖德佑遗民知旧事甚悉公悯其孤贫解橐中半与之暨归无买舟费徒步不之悔处心仁厚多类此一日语其子行可曰门户之托实在汝等汝及我在厉志于学可也未几公即世行可年方十五佩服不忘与其弟晟祖受业先君求我先生年几二十大家间左要致之教子弟有师法际圣运肇开以诗经中洪武四年浙江秋试计偕京师授承事郎同知华州转承务郎调乐安州同知升知涿州奉母以养人以为荣云真窃惟史氏自冀国积德累行历八行至三世而枢密公才位登两府自後世相王封父子叔侄焜耀前後天下之人歆艶而慕望之乃若独善文华公以卫国之裔与公高大父大监同母嗣中散讳泓之後风节行谊世以甬东读书种称之独善之孙果斋蒙卿泝考亭正传从子公琮实学焉公以本文系序之正学于公瑗而克嗣其承信乎文献足徵矣然以运去物改不得与世禄之盛岂非命哉乃今行可踵美世科所至有声上膺耳目之寄相门复兴其在兹乎真为史氏门婿视公为外伯父行且与行可幼同研席亲契之厚非一日矣斯文不朽之托可辞耶铭曰烈烈四明有华相閼公生其间率履弗越天地蓬庐我菑我畲仁义蓬庐我诗我书上下周流

万化一理反身归全孰呼起起有子象贤对敷明廷绣衣持斧服兹宠荣慨思教言声容如在锡类疏封时其有待华奥之原宰木光辉公侯复始福履其绥

○墓表

故宋文林郎史公墓表

呜呼是为故宋文林郎史公之墓宋有天下垂三百年南渡以後台袞相继者鄞史氏为盛子孙衆多荣爵宠秩与其国家相为始终故文林郎史公其所谓世济其美者欤公讳世卿字景瞻世居鄞五世祖讳诒赠太师越国公号八行先生曾祖讳渊朝奉郎知江陰军妣姚氏李氏并封恭人祖讳弥高赠奉直大夫妣陈氏赠恭人考讳损之国子监发解进士妣陈氏公幼聪悟生七年失父十六年失母从表兄陈习庵先生学习诗赋援笔立就补入太学朝黻莫盐视贵游纷华泊如也端平二年公试入等嘉熙四年请国子监文解称进士永国公在相位签书同知枢密院忠清公宅之欲以其子会卿恩保奏回授淳佑九年观文殿学士谦斋公字之以朝议大夫知处州公始以明堂恩奏补将仕郎十一年铨选出官準告授迪功郎黄州麻城县主簿兼酒税赋政平允吏民称之宝佑二年改授平江府司户参军治狱明刑为时称首举陞入格升朝奉郎直敷文合两漕转运司寄收库兼提领户部犒赏所钱库引赦文度宗登极恩转修职郎幼主瀛国公登极恩转从政郎明年正月太皇太后有旨应在朝见任奇居特与进秩转从事郎未几转文林郎诰曰朕为万邦之君诞膺天命士自一命以上莫非王臣载考彝章咸增显秩以昭明初政以激励贤劳王者无私己悉沾于大赉善人是听宜知报于湛恩公既拜命退归清江里第宋社既墟絶口不言仕进自号菊屏扁一室曰勤有读书耕田优幼自适一日以疾不起公生于宋嘉定六年六月六日卒于有元二十三年五月二十有三日享年七十有四以是年九月庚寅葬於鄞县杨堂乡十里下水南畝之原娶厉氏子男一巨伯女一（阙）适将仕郎杨嘉孙男六公顺公竦公翊公竣公竚公竞女三（阙）公仪观丰伟言论疏爽奋然植立动有志操丞相忠献卫王尝欲立为长子待制公後王薨遂不果故枢密公观文公特深念之理宗眷遇勲臣家当时以攀附致荣显者不可胜纪而公谦卑自牧不以荣贵累心其过人远矣世异事殊丘园肥遯而老成典刑蔼然为故家范模孰不企而仰之某获登公门距公之葬已五十余年矣间尝展敬拜遗像使人兴起而不已焉者今公之孙公竚以外舅之好且使晋拜墓下流涕言曰自吾祖若父至于今三世吾兄弟六人死者已过半矣而吾又无子吾祖之祀赖以不絶者其惟吾亡兄与吾弟之子矣吾惧後來者之无所徵也子盍为文以表之呜呼孝子慈孙所以不忘其祖者如此然则光昭令德可终已耶是为表

元故洪处士墓表

元故洪处士既卒之十六年其次子实以尝从事藩省来居濠梁与真相遇敦叙世契怆然有言曰先人终归全所以貽吾二子者实拳拳焉吾兄以承宗之嫡志存堂构而今老矣眇焉小子无所肖似而名在谪籍亦已九年墓上之木拱矣而勿克以时致享孝之礼每自云南望未尝不为恸哭而流涕也先人之葬天台胡先生世佐已铭其墓冀子复为一言表诸墓隧实幸不即死异日获得旋归将与吾兄同尽其情焉真问而悲之因为论次其略云处士讳梦良瑞

卿其字也世家明之慈溪大隱山五世祖師顏樂余姚上林之風土而徙家焉曾祖樟仕宋至湖南宣撫使祖子文父正之以方州試待補入上庠釋褐授承直郎值宋社亡杜門求志遂不復仕處士生而性質剛直氣色溫恭自幼失怙承母訓讀古今書明理達務自處儉約而有濟人利物之心歲丁未戊申大歉飢殍者衆處士捐己廩以食之鄉鄰貸鋤者悉焚其券人皆賢之或勸之仕則曰人生幾何而以微名薄祿撓其志慮也耶幸先世遺緒保守勿墜使後人有所承藉足矣遂優游泉石間絕意世事年及耄矣衰病日亟謂其二子曰吾資產雖薄足備衣衾周棺槨不為無具有子有孫不為無後賦形以來歷四百二十甲子不為無壽死亦奚憾俄一日奄然而逝生於至元癸未十二月十九日卒于至正辛丑九月二十五日享年七十有九以是年十有二月二十日葬于鄞縣通遠鄉環邨錢輿之原娶方氏繼樓氏樓故參政鉞之後處士樂其文獻遺俗遷郡城王墩而附近焉子男二長炳元衢州路龍游縣儒學教諭次即實也孫男四禧禔禎■〈禔 冀〉初處士之卜葬也將窆穴霖雨流潦畚鍤既舉云破日出及扃殯風雪交作輦車登舟天倏開霽薤歌前導哭泣縞素襄事而歸既虞以祔微雨沾洒咸以處士積善及其子孝感所致焉惟宋自南渡以來洪氏貴顯者代不乏人鄱陽洪氏自忠宣公皓以忠節名天下傳其三子適遵邁皆以詞學名科至宰執侍從天目洪氏自內翰端明咨夔傳其二子勲焘亦以才名見知于世以今處士家牒遍觀之宣撫公累官行事雖不槩見實與鄱陽天目相望後先胡先生謂與鄱陽源同所出信矣處士以前人遺緒隱居獨善隨所在而不失其傳臨終遺言又能順受死生之正可不謂賢乎況乎有實以為之子雖在異鄉而風雨霜露之思無日或忘詩所謂威儀孔時君子有孝子者于處士見之矣真忝以同里知處士為詳序其平生大槩而傳之固不得而辭也是為表

○葬記

陳以通父葬記

同郡陳以通父既卒將葬其孤（闕）縉經踵門謂某曰（闕）等不孝罹禍先人今襄奉有期未及乞銘當代巨公叙其生歿歲月大槩而納之幽敢以屬之真辭再三不獲則退而為之記曰以通諱公享陳氏系出妣姓其先廣平人宋時有以醫官入翰林者建炎間扈蹕南渡定居于鄞曾祖諱後良祖諱瑞孫入元以季居禮貴贈從事郎行宣政院都事嘗師事厚齋王先生得文章典故之傳着難經辨疑援據該洽識者稱之父諱居仁龐厚老成洞明經史治奇疾神愈後學尊之為先生以荐署昌國州醫學正不就再以教授荐命未下而卒前鄉貢進士潮河楊彝壯其行治母黃氏以通教授先生第四子也少有異質循導規矩嘗學于鄉先生紀十之暨其子文凱能為詩文而尤志于家學自靈樞素問難經及諸家奇方秘論鈎玄撮要如指諸掌日與諸兄侍教授先生側參扣辨問教授氣嚴色庄不少假借以通益自警飭年二十余以善醫聞上而貴官富人下而閭巷疏賤有以疾告必為治理風雨寒暑勿憚也所制藥必澤土產及色味之精良者至于銖兩之等烹炮煉養之度高下隨宜而不戾于古故藥無不善用无不效其售諸人往往不計其直貧不能得錢者則周給恐後用是聲譽隆洽能言者多為詩文以贊美之長編巨軸觀者以為無媿詞云至正（闕）年藩省大臣上其能勅署江潮行省醫學提舉以通以非其志不為就際今天朝仍舊制郡縣官醫二人以通雅為故郡張侯所知以本府提領荐諸潮江省行省報可有司捧檄至門以通辭避再三至敦迫不已龜勉就職未

及一年得上气疾以卒年四十有九呜呼悲夫以通生於元（阙）年某月某日卒于洪武四年六月某日以明年某月某日葬于鄞县五乡硯之原娶何氏子四人长（阙）次（阙）先数月卒次（阙）次孙男二（阙）女一惟四明以儒医称者推陈氏为首以通既克承祖父之传拳拳焉济人利物而勿以爵禄为荣其於自处得矣然以名不可卒遏才不能终己为之少出而死遽及之此固士大夫所深悲者也真辱在契家相知为深庸取其律身行己之大者叙而志之用以慰其嗣人云

阎学录圻志

先君姓阎氏讳宝奎字瑞卿世居奉化州忠义乡之九峯曾祖讳安祖故宋朝奉郎新改差权发遣邵武军事兼管内劝农事妣（阙）氏祖讳（阙）妣杨氏父讳（阙）妣（阙）氏两世皆以儒行有名州庠先君生于（阙）年六月廿五日癸巳幼聪悟长端谨厚重处事有法克广先业从乡先生南仲李公问学书史通大义至大庚戌始来郡城东山松崖谢公招为赘婿居数岁得城东厢一廛遂徙家焉先君性孝友二亲色养备至连遭大丧吁祠追荐抚弟姊益笃于宗族尤尽恩意教子若孙必求名师祭祀婚嫁务尽其礼宾客相过从时饮酒赋诗以为乐急难赴义恤贫恤寡名势一不动念至正乙未江南诸道行台监察御史李公志以先君晦迹丘园荐诸浙东元帅府署处州儒学录先君不之就尝曰九峰衣冠故里吾不敢东忘也时往来其间得地一区溪嶂旁遶远列因累土植木竈穴为归藏于是年既老矣不问家事辟一楼雪庵李公尝题其额曰怀安栖处其中不越户限者数年以至正二十一年三月二十八日卒于正寝六十有九呜呼悲哉娶谢氏先十年卒男二长恭早卒次思敬海道都漕运万户令史女二长许嫁卒次适同里李某以卒孙男一汝贤女二思敬不孝忍死将以是年十一月廿三日甲申奉柩归葬忠义乡德星里阎公稿之原与谢氏合兆日薄未暇乞铭当代钜笔姑志其岁月大槩纳哉（阙）孤哀子泣血谨识

荥阳外史集卷四十三

卷四十四

●钦定四库全书

荜阳外史集卷四十四

（明）郑真 撰

（阙）

荜阳外史集卷四十四

卷四十五

●钦定四库全书

荥阳外史集卷四十五

（明）郑真 撰

○碑铭

元故赠中宪大夫海道都漕运运粮副万户上骑都尉追封高阳郡伯韩公墓碑

国家着为定制凡官自七品以上得封赠父母迨至三品则及其祖父母所以为忠孝劝也乃至正二十有七年秋七月今皇帝诏中外文武羣臣秩资有差于是奉议大夫海道都漕运正万户既上官有司援例以为当封二代于是其祖妙心居士赠中宪大夫海道都漕运运粮副万户上骑都尉追封高阳郡伯祖母陆氏赠高阳郡君父封武德将军温台海运所千户骠骑尉定海县子惟善改封太中大夫海道都漕运正万户轻车都尉高阳郡侯母定海县君朱氏改封高阳郡夫人命既下郡侯率其弟及其子姓录副黄焚告于郡伯墓下既代作而公服设褥位北望再拜礼毕徐言曰惟善不才忝承先绪謏焉弱息获备官使锡命之典赉及泉壤惟善亦与有荣焉则皆我先公遗泽积累之所致也其可不昭示来裔乃修书致币奉江潮行枢密院副使天台羽庭刘公所着妙心公墓铭来长汀山中俾某书其事于墓道之碑公姓韩氏讳能字君屋後复即字为名妙心居士则其号也世居庆元路定海县西曾祖讳德昭祖讳清之父讳祖亮皆韬光匿素不在仕籍曾祖妣陈氏祖妣林氏妣李氏王氏公王氏出也公少有志操长克以勤俭活产业家用富饶天性孝友事二亲温清之节滫瀡之奉备尽其欢二弟以匱乏告厚给之至终其身海滨广斥岁多水旱里民之饥者周之以粟寒者予之以衣死者给以衾棺商贩者假以厚资贫不能偿者弗问尝出行闻哭声甚哀公默计曰是必丧无斂具袖镵躬诣置诸几上谓其家人曰吾尝逋负死者今偿之尔惠施之及人往往类此家世奉佛其先考在日尤笃信阿育王山藏释迦真身舍利岁率其徒膜拜瞻礼示现者及疾革将属纊若有欲言者公侍左右问曰得非以莲社为意耶少差即为之卒有不讳亦不敢坠厥志父曰果若是吾死庶瞑目且福汝矣既逝公奉丧如治命效释氏法奉遗殖瘞玉几山中在会者凡数百人庖饔告勿给既宣扬秘呪就食者皆属履视甌釜尚有余者或有妄言不敬则相继以死当时学佛者以公孝心纯至故感应之妙有如此者皆尊为妙心居士而不以字称之自是繙阅内典深契玄理凡佛舍之增葺金像之庄严治道涂驾桥梁倾囊发廩一无所靳晚得城东（阙）徙居之当天下太平从容宴息文献遗俗足为子孙依归而公亦已老矣公生于至元十七年九月二日卒於至正二年四月二日享年六十有三以六年十一月二十九日葬於鄞县阳堂乡盛峯山之原娶陆氏名庆字德宁即高阳郡君有妇道始议昏时協梦于神公之家业有成者郡君实相之公既卒郡君菲衣素食焚香梵诵致永慕资冥福会公冢上产竹一本二千者郡君曰此吾合葬之兆也其死矣乎果得疾以终生于至元十五年二月二十七日卒

于至正十五年十二月二十八日年七十有八以明年十二月二十七日祔葬于公之兆子男二长惟善即高阳郡侯次可善女三长适胡允文次适冯元晟次适应可立孙男五懋简懋和伯瑛伯璋伯珪女五曾孙男二中庸女二懋和以郡侯次子始以材请受知漕省丞相荐诸朝署忠翊校尉庆元绍兴等处海运所千户以功陞金漕东道宣慰使司都元帅府事散官如故再转奉议大夫海道都漕运粮副万户今陞为正万户佩双珠虎符阶则太中大夫其推恩祖父实一乡荣观云夫贤者之报不必在身大夫之家则知尊祖以公积德行义貽其子孙者如此则夫身歿之後所以追锡而宠绥者不为过矣郡侯克广已成之业踰六十年亲见其子荣爵之盛而其异日窀穸之事必依祔先域使夫一世再世至无穷焉则所以光昭先德而侈大君之赐者当有大书不一书者矣传曰积善之家必有余庆于韩氏见之庄自京师归佐漕阃辱交郡公父子知公为详而羽庭刘先生之文又有可徵者其敢以老病不文为辞铭曰於皇圣元广孝锡类爵秩疏荣以古之制侃侃韩公励行恪勤不有其位今终厥身燕及孙谋亨衢接武推本教忠惟祖惟父生歿显荣乃赠乃封实大声宏德厚报丰相而新阡苍苍松柏泉石辉光龙章有赫尔子尔孙望拜阙廷精爽不昧式克钦承奕奕庆门尚其善积裒裒公侯百岁一日文臣勒石铺扬王休冀诸来者眎此岩幽

宋故光禄大夫建安郡开国朱公神道碑铭

宋故太师文公晦庵先生五世孙斡谪居颍上训导县学以书致其高大父光禄公之状来濠梁谓荥阳郑真曰斡忝系儒宗先文公立言垂训天下家传人诵亦既列诸从祀载之史册矣而斡高大父光禄公以文公季子式克钦承以至于今佩祚不絶墓上之石毁于兵燹久未复旧先考员外尝垂志于此不及遂以歿遗言所属在我後人子为撰次其略斡幸遂南还勒诸隧道异日见祖宗地下庶几有以藉口矣真惟大贤之门道学渊源如长江巨海岂未学小子所能窥测再拜复书以辞斡复使来言曰吾计已托诸子矣无让按状如左公讳在字敬之姓朱氏其先在唐时有名仁轨者与其弟敬则居亳州永城县敬则仕唐为宰相仁轨之後讳古僚者以陶雅员半千之命总卒三千戍徽之婺源因家焉曾祖讳森字（阙）赠承事郎祖讳松字乔年登宋宣和（阙）进士第授建之政和县尉禄养其父承事公卒服阕调延平尤溪县尉改监泉州晋江县镇召试馆职除正字迁吏部郎官与时相秦桧议不叶屡求祠禄出知饶州尝与豫章罗仲素讲求河洛之学谓辨急害道取佩韦之义号曰韦斋有文集若干卷以绍兴某年某月某日卒于建阳县年四十有七赠通议大夫有至正辛丑闻宪请諡南宫太常博士河东张翥临川危素议曰立人之朝风节弥高晚安祠禄不慕浮荣笃生令子为千万世儒学之宗宜褒赠以宣文化请諡曰献靖而天官定为公爵遂封越国公考讳熹字元晦文公晦庵先生也以建炎某年某月庚戌朔日献靖尉尤溪时生而是夕新安井腾虹采年十有四献靖知饶州病亟命师事刘草堂勉之胡籍溪宪刘屏山子翬既冠而字屏山以顔子之学期之年十八举进士虽中春闱为泉州同安县主簿赴任道经延平始学于李侗愿中以斯道为己任历事高孝光宁四朝仕于外者九考授祠禄三十六多以去就不合于理固辞不起在朝仅四十九日盖君子小人势有不两立者以秘阁修撰致仕庆元六年三月初九日卒年七十有一赠太师封信国公改封徽国公赐諡曰文有元至正辛卯改封齐国公所着书有易本义啓蒙蓍卦考误诗集传大学中庸章句或问论语孟子集注太极图通书西铭解楚辞集注辨证韩文考异大全集门人问答语录所编次有论孟集议孟子指要中庸辑略孝经刊误小学

书通监纲目宋名臣言行錄家礼近思錄程氏遗书伊洛渊源录仪礼通解共若干卷行于世曾祖妣（阙）氏赠（阙）人祖妣祝氏赠（阙）人元封越国公夫人妣刘氏草堂之女先文公卒维祝氏俱徽国公夫人元追封齐国公夫人公（阙）出夫人也幼承先训力勤不懈文公既没抚手泽遗书慨然曰斯文命脉尽有在是矣探讨紬绎至忘寝食故性理之渊微文字之浩博天地鬼神之奥礼乐制度之详人事之得失政治之理乱靡不精熟由科第台阁出守信袁平江三大郡以治状闻召入历拜工吏侍郎时理宗以支属入继大统终始崇獎正学以公为文公子尤所眷厚公尝入对内殿论人主学问之要帝曰先卿中庸序言甚详朕读之不释手恨不与之同时也初文公生于尤溪官舍後以为南溪书院祀献靖以文公配及文公寓建阳之考亭四方从游者衆架屋百十间居之号竹林精舍继改沧洲至帝在御勅赐考亭书院亲洒宸翰书额以赐焉公上有二兄长讳塾字（阙）尝从东莱吕先生游先文公十年卒後贈中散大夫次讳埜字受之户部监酒退隐家居亦先卒独公从容晚节年七十有一而终同于文公云公生於某年某月某日卒于某年某月某日以某年某月某日葬公先墓在新安号文公阙里从事葬建之政和献靖葬崇安文公葬建阳之嘉禾上里至公遂葬建城东门外光禄坊皇华山之麓公娶吕氏东莱成公女维娶黄岩西桥赵氏复娶武林方氏俱封夫人子一人铸字子顔以荫授出身仕至朝请大夫湖南运使以元至元丙子某月某日卒年六十有一娶刘氏封夫人孙沆字端凝元初以世泽为将仕郎邵路建宁县主簿某年某月某日卒年五十有四娶周氏延佑戊午八月二十一日卒年七十有八沆子五人曰某殇卒曰栢字正甫不娶延佑庚申某月某日卒曰桦字仁甫号云涧生于至元丙子正月六日适元兵南下乱离之际既长知学而家事艰难上奉二亲下抚诸弟年三十有九以荐授汀州儒学正借注海北警曹雷州遂溪县濶州寨巡检升漳州路儒学教授天历戊辰十二月十日卒贈承务郎江淞等处行中书省左右司员外郎娶倪氏至治癸亥八月七日卒（阙）十有五贈恭人曰■〈木戊〉字茂甫隐居不仕至正丁酉十一月十八日卒曰栲字正甫延佑丁巳某月某日卒娶（阙）氏于光禄公为曾孙皆不逮事公矣桦子一人即斡也栲子三人■〈木荣〉字三观年五十一而卒瑯字明忠年五十二而卒光字明凯际今大明任平凉府（阙）县主簿于光禄为玄孙至是盖四世矣斡二子坻年三十二而卒垸早殇今无子自朝请以下至斡之子皆祔葬光禄公墓生没岁月用牵聯书之使有考焉失于记忆者不悉书也斡字明仲读书有气节尝两为学官升福建江西省掾慨念先世欲一振起之在元至顺间朝廷将改封文公命礼官集议以为文之一字理不可易第徽以本乡宜封大国以致崇德报功之意定为齐国而未下至正辛卯斡适在京始覆议付奏事曹又十年斡复至京中书遂奏遣使奉制并上樽内醢礼物祭告家庙越二年而献靖越国之封至矣斡之光绍前烈如此真窃惟道之大原出于天而系于人先圣孔子集羣圣之大成先师文公集羣贤之大成文公不可尚已光禄公以文公家庭授受之正奋身科第践扬中外上承帝眷蔚为名臣委庆绪余绵及累世而斡以谋模画诺从事藩省际今内附犹以老成耆硕为学者师表君子於是知大贤之有後矣然而暮景駸寻眇在淮颍之上慨念皇华山之阳云深木寒先兆魂魄之藏盖百数十年于兹矣衣冠出游俨然如在孝思德报之情何如哉传曰盛德必百世祀若光禄公之泽信未艾也为之铭曰大道之行如日丽天泰运肇开笃生英贤於惟考亭学泝邹鲁往行前言会其统绪侃侃光禄是谨是承名父有子文献足徵乃登名科迺扬显要从橐清班毋烦训诰于时理皇龙飞乘乾燕闲穆清广厦细毡公入内廷从容劳问献纳论思唯公是听公归徐徐玉佩琼琚奉身归全不昧厥初遗表上闻帝心是惻开国勲封以贈以恤公既远矣逮于孙玄周旋恪恭世赏是延

时异事殊系名谪籍俛仰古今百年一日故山峩峩窆窀祔依封之殖之式遄其归返本廼原前规後矩告尔来叶绳祖之武

（初明仲求着此文约以归闽南
质诸家谱墳岁月名讳封赠然後上石後明仲死濠上此本在朱良初处良初文公远族也）

黎氏重建祠堂碑

礼曰君子将营宫室宗庙为先宗庙所以寓诚敬也三代以还定为庙制自天子至于官师视其上下以为孝差至汉有易为祠堂者考亭朱子家礼于其制度详矣今士大夫家用之顾于门堂寢室或不能尽合焉者有能因人情而为之节文尸而祝之其非有得於制礼者本意哉惟广东黎氏遂有今绪粤在高阳氏命南正重司天火正黎司地子孙因之以字为氏当宋高宗南渡有讳猷臣者自贛迁惠居博罗之白沙治三礼致身通显晚知雷州以文学政事有声其後讳宿者迁东莞之湟濠丰于产业敦尚行义尤好施与乡里化之族日以大讳弼者至孝奉亲朝廷尝表其门署其里曰德本因建祠里门之东以奉先祀有田以为经费又于祠西建义塾延师教族之子弟凡先世诰勅之在白沙者尽得而藏之宋德佑末祠与义塾毁于兵元至元癸巳兴复如故又至正乙未复罹兵燹遂为草莽之墟矣际今圣朝治教并兴黎氏族党追念本始迺洪武庚戌之岁再复义塾辟祭田修祀事其中而权宜草创者踰年卒成之岁时享祭焄蒿凄怆降灌燎瘞礼无不备合族子姓几六七十人睦婣之义远迩所称宋元以来为教官为邑宰者比比有之国家徵用儒宿十世孙光起家监察御史君子于此有以知世泽之厚矣会御史公巡历中都真以非才忝教临淮以斯文礼见俾书其事于石夫礼有合祭之文盖追远尊先事亡如存固孝子慈孙所当致力者非有閼廬之地神而明之其何以通幽显而无间哉黎氏自雷州府君肇始官闕昭穆祠世世承传自南渡至今荐更事故废而辄兴诚敬之心百年一日岂但春秋享荐如见其笑貌闻其容声而已耶今御史上承天子耳目之寄绣斧所至风采凜然异日推本教忠疏封泉隧其祀事仪等又将增益而侈大之矣诗曰永言孝思孝思维则黎氏子孙尚引而不替以延裕於无穷哉真既备着其本末复系之以诗曰南广海寓文献攸聚有闻厥家孔乐斯土乐土是营宗事以承奕奕新祠神栖宴宁豢牲告硕以侑酒食孝享苾芬惟礼是式至陰冥冥格享欣欣工祝致告嘉尔後人後人多祉出司宪纪冠豸高峩皇华使指庆门煌煌祖考之光时其烝尝永禋勿忘

荊阳外史集卷四十五

卷四十六

●钦定四库全书

荥阳外史集卷四十六

（明）郑真撰

○传

遂初老人传

遂初老人姓王氏名厚孙字叔载王为琅琊着姓其先在宋居开封祥符高祖保信军承宣使安道扈从南渡始家于鄞曾祖擢吏部郎中崇政殿说书祖应麟号厚斋先生中宝佑博学宏词科历事三朝典诰册命皆出其手官翰林学士礼部尚书父昌世承务郎世称为承奉公老人人生於元大德庚子十二月一日距今明洪武之壬子年七十有三谓人曰天地生人之初吾不得而知也可知者理而已理之在人初何尝不善克遂其初足矣吾幸以世家子持身律己实拳拳焉今耄矣其庶几乎乃自号遂初老人云老人在幼知学八岁诗成四韵读书日记数百言十岁已竟论孟诗书礼记皆成诵并阅尚书深宁集习书义兼词赋操笔立就乡先生王金判叔龢赵太社孟何戴教授表元闻其异就见焉科制行改治诗经盖东南诗学以明郡首称舒文靖璘传李国博元白王於舒李世亲具得其源委时四方承平文物殷盛承奉公守先训弗仕登门皆老成博雅老人日侍左右面命心传充积溥洽由是熟於性理治道礼乐法制及台阁职官典故世胄谱牒乡里欲言其祖者多咨问之袁文清公桷受业尚书後自翰林归里第辄问所学老人对曰近於濂洛关辅建安西蜀诸书稍已通习惟读书记衍义正宗意有所得以其明洁整密有成法易知而可守也因言世之学者涉猎朱子如干卷书自谓得其真传且讥议淳熙诸老不知诸老与朱子同时言论虽不尽合而博闻实践为朱子推许今人耳目所不及乃藉口性理以自文其寡陋高谈濶视渐成虚诞之风先生达尊宜惩其弊以新士习文清者四明志命老人分撰二考且言子家世太史亦究意否老人曰经与史同出而异名古有编年司马氏为纪传隋志始称正史非古也作史必曰三长年代协体统之会人物萃品类之归叙事由颠至末不为详修辞以一当十不为简彼謏闻臆见杂见衆手舛讹遗漏欲以传信久远难矣因举累代高下得失甚备文清为属耳复阅其郡庠试中程文阉府表稿作而叹曰先师之道兹不坠矣门下老客得见继祖之盛何幸哉金华黄文宪公潛尝三至鄞其曾祖朝请梦炎视吏部为座主谓叔载余兄弟行假宿细论因为志承奉公墓也其始也躬草剡荐为郡学训导而帅府都事曹愚金宪孙揖郡守郭侑同为劝引老人累辞不获至则开说名理辨析疑难请业者顷刻数十篇诸生皆悦服老人既以师法传庠序嗣後二十余年蠡吾王元恭鸿吉哩氏安图公相望来守亲诣门屈致之前後与同列者程先生端礼郑先生奕夫胡先生世佐应先生奎翁皆气类欣合座以下材艺称者世有其人朔望讲义往时就章立题率一篇而止老人病其拘取四书五经关世教者质以己意为之直说抑扬反覆音吐洪畅闻者

竦服老人三试澗閤不偶叹曰得失有命苦心求售奚益用词学十二体为古文根柢三代两汉博以唐宋诸家属词平顺絕去雕巧富人奉礼币招为师力辞不就陵阳牟应复都司澗东论年家契力招致教其子屈行辈敬憚之台彦博侍宪副曾某来虑囚谓叔载文行宜为学官宪副即署郡直学老人以不任烦琐辞牟都司曰先儒谓钱谷亦为已之学圣人辞尊居卑乃就职与吏辈不合拂衣去李金宪綱强起之涂田在鄞砂岸在昌岸在昌国为豪民侵夺力陈其事皆得复廩粟有贏例归职掌老人独输於公会大修庙学请于郡守俾通吏事廉干者司之遂得与诸儒专论名教事教授陈先生廷言始与定交秩满授象山教谕尚书富于着述玉海最为详洽然未脱藁失而复得多阙误老人考订编次请帅府镌梓并他书十二种以传袁文清所撰四明志或有谗於金宪沙木斯鼎毁其板老人白之王太守元恭曰袁公中朝名臣书法高古不可毀也太守持书以进金宪惊悔命与旧志并行属老人成续志若干卷四明自宋绍兴间有乡饮酒礼其後寢废岁首仅序拜于学程先生请王太守复其礼属老人与郑先生某考订一遵仪礼用宾兴岁行之搢绅韦布周旋者每千余人经费田为吉祥寺僧所据老人与郑先生白诸有司僧乃市负郭田归我岁积粟余置庄一所象山学久失教养老人设主善为文会以兴士习租粟数百石每患逋负乃精加考核仓廩充足欲渔取者志不敢逞蒋景武中乡选送宴津遣慨然当之以郡檄归校玉海诸书调婺州浦江教授甫逾阅月即解官归养母杨氏无禄仕意适朝廷遣大臣李国凤经略江南以便宜用遗逸既至鄞有司以老人名上李曰此危太朴所深敬者署衢州儒学教授而中书复用荐者除邵武路教授福建分省又陞为副提举皆不赴惟期内外无媿以待归全而已老人天性质直尤清苦介特日用服食随其所有娶史氏系出相门有贤行尽斥其粧具为公家费承顺父母惟意所与疾则尽心调治药必亲制煎煮至愈乃己在弟侄子孙皆然姑适史万卿贫归养之嫁其女而葬其夫从兄震祖死其子在他方棺殮葬之士友蒋宗简以死托率先劝财葬以礼求鸿文以志妹适杨氏以疾归母家调治八年而卒一子侃早孤抚教成人侃亦笃於舅奉祭祀保坟墓凜如不胜亲故相依馆谷之或以匱告假贷不吝弗偿亦不问患难救御犹己事有过则面折无隐品别人之贤否不以势位高下为轻重不以待遇厚薄为是非送死厚于奉生恤小笃于事大报德重于念恶勇退急于趋进或有侵其产业恃强凌辱设计倾危造谤损誉者则曰犯而不校其重义轻利处常顺变多此类晚年诗酒娱乐客至谈宋季事亶亶不倦且及至正史官詮次弗当欲为厘正尤极论奉化陈經续通监前後之失所着多名言有遂初藁三十卷尝戒其子陞与隲曰承家不在名利而在于不失身敬身不在外貌表襮而在于毋自欺读书当贯古今处世必审进退其有同流合污以为通矫时干誉以为高患得患失以终其身者此吾所深戒亦非所望于尔等也呜呼敬之哉二子奉教不敢失坠老人有弟名寧孙通春秋诗二经先世手泽悉能记诵其亡也遗命与老人葬同兆域友于之谊盖始终弗忘者宁孙无子隲为後云

茆阳生郑真曰伏观前代儒学之盛莫过於宋东莱吕氏先生西山真先生虽以宏博显实广道学之传厚斋尚书於二先生泝流承源故於性理制度文章实兼诸子之长世之论四明之学者徒知祖陆氏而宗袁杨而不知言紫阳朱夫子之学者实始於尚书也尚书既歿遗书旧藁老人既服膺弗忘而又师友遗老名儒其言其行实足以膺黼黻谋猷之任然以心处退让终不克大其设施惜哉世运推移丘园肥遯而老成典刑藹然为乡邦後学模范有以学问之无穷命分之素定精思力践以遂其初者矣赞曰

古学传宗曰惟四明文献世美斯为可徵伟哉老人克广先绪发言成文本乎邹鲁藐彼来学辨说纷非不有先觉孰其依归道非难行时或我舍安命乐天浮荣何假浑乎粹真曰遂其初威仪冠裳繫德之符洛社耆英往古同传申以赞辞有侈其践洪武五年十一月十有六日

驹一日谒遂初王先生从容慰藉甚欢因指几格上一小轴谓曰此尔弟为我所作遂初老人传且言乡之学士大夫知我者莫如尔父尔兄弟能继父志亦能粗知我者尔复为我写一通以来庶几见两家契谊之厚退念先生与先入生同年学同业其相好为至笃先人不幸仅获中壽以歿先生状其行治而使传载之吾兄弟之事先生如事吾先人焉既承命不敢辞先生方膺期颐之壽承文献之懿问学渊博操履笃诚传以传之非得显荣在上而名文词者不可顾吾兄弟何人而能模写其一二乎虽然此传序述大抵皆常所亲见质以平日先人所称又摭诸门生弟子之善言先生者一言一语宁有虚褒溢美则吾兄弟之执笔可谓无愧而未始以显微工拙论也以驹兄弟颇继先志而能知先生至於心术所独得冲澹夷旷以遂古初则又非浅识之所能尽知也先生家世如此文行如此声誉又如此世之人知先生者岂独吾兄弟哉观於此必不以字画之拙恶而废吾兄弟之言为可信也

大隱处士传

大隱处士姓洪氏名梦良字瑞卿系出共工氏之後至宋南渡尤号为盛在丹阳者名兴祖绍兴中召试馆职在鄱阳者名皓以礼部尚书使金不屈其子适遵迈并中词科入翰林位两府在天目者名咨夔仕至端明殿学士二子勲焘皆有才名处士之先相传本於鄱阳曾祖樟为湖南宣抚使樟生子文子文生正之正之太学生释褐授承直郎宋社既墟絕口不言仕进处士其子也处士家大隱後徙居余姚上林大隱在慈溪县南为四皓黄公之里山高谷深良田广亩犬牙参错庆历中乡先生杨适道德闻望师表後进太守钱公辅荐之朝不起学者尊之曰大隱先生处士以乡里之旧往来其间慨然以不及见先生为恨因号大隱处士以志景仰不忘之意云处士天性刚直而温和柔恭待人接物各适其宜婚丧祭祀先事备具而以诚敬将之宗姻宾客岁时过从姁姁相乐时四方承平世家子弟多以攀附致显荣处士独慨然曰士岂以爵禄为荣也耶立身行己垂裕後昆斯亦可矣中年丧偶昼锦楼氏故宋参政钥之後慕处士之贤招为子婿处士亦爱其文献遗俗挈家附近勤俭取足年七十有九衰病日亟谓二子曰吾尝恐坠失先绪以遗身羞今有子若孙居足以庇风雨田足以给食饮衣衾棺槨之备足以容身大命近止吾其死矣复何憾哉奄然而逝至正辛丑九月二十五日也鄞县通远乡钱奥实龙虎蛰藏之地卜葬得吉将庀工风雨晦冥窆穴则天日晴霁啓殡大风飞雪如掌执紼者皆股栗暨輦车登舟风雪为止觉晴煦和畅薤歌载道窀穸之事罔不如礼既归祔主而微雨沾润送葬者以为处士积善之报焉处士有子二人长炳以部使者荐为游龙县儒学教谕次寔才行自晦天台刘仁本深加器重署浙省从事今居淮水上论先後天之学占吉凶如前知人谓处士有子云

荥阳郑氏曰予读四明郡史厚斋王公着大隱杨先生传於其道德行义备矣处士尚志先烈年逾耄耄委质从化而天复彰显之斯所谓隐君子者乎赞曰

大隱之陽世有哲人高風凜然霜空秋旻卓哉處士尚論百世反求諸心克警克勵老矣歸全完而山川至理弗妄格于幽玄堂構貽謀曰有嗣子善贊善述世有良史

郭進士傳

郭進士諱可學即諱為字明州鄞縣人也家世業儒在宋時有入中書掌外制者洵經兵燹文行不槩見其後名溥字子通者治尚書善詩文鄉先生慈溪嚴某妻之以女二子長名可立次則進士也子通以部使者荐分教處州青田縣復署上虞縣儒學教諭未上而卒進士與其兄俱在幼母嚴氏守死自誓嘗涕泣指進士兄弟謂人曰吾未亡人所賴以亢郭氏者其在茲乎躬紡績資之使學李允中館授同里倪氏進士與其兄挾冊從游允中訓導郡庠進士復居座下是時鄉之耆文碩獻多有其人進士遍登其門復取父書窮晝夜習之學遂以成為文章累積編帙出示其友多稱許之間受大家聘幣為其弟子師心所弗樂也家素貧亦力田十畝歲釀酒二十斛得什一之利以自給西游淞江省憲論荐署為學官以時方阻兵不就而歸值其母喪考禮送終求信筆着傳紀其母之節縉紳士大夫復為詩辭挽些君子以進士能盡人子之道矣服闋家居杜門求志若將終身明洪武之三年聖天子下詔復進士科明年有旨三年疊試復大徵儒士暨山林遺逸明郡有司以名上者凡百余人進士累辭獲免又明年壬子秋試敦迫再三進士遂以書經荐淞省考官姑蘇魏俊民永嘉孔克表會稽錢宰嘉興貝琮共稱其文置在四十名之列是冬計偕京師明有司歌鹿鳴勸駕逾年癸丑春過淞省入謝知貢舉官徐參政某命賦甘露等詩甚見稱賞謁選天官大宗伯而下見進士長身肮脏將奏為在京官弗果既而同年進士有以弗能任事辭者衆議以中立府國家興旺之地中都肇建四方視為取則師儒之職盍使諸進士為之於是淞江八人同授中立府屬縣教諭而進士得在宿州之靈璧淮北當兵革之余教席虛曠少衣冠之士旧家長老聞進士至出郊遠迓皆矜喜德色為設享具進士亦不敢辭也然進士南產終不樂其風土又念母嚴氏葬地卑濕詣中立府援例乞歸改窆不許得家信知少女且死遂遇滯下疾既亟謂其友張克忠曰吾讀書二十年今年三十有八至於是而死於是也耶遂卒是年十月十日也靈璧縣丞盧某來主喪事克忠歸櫬訓導丁繼先致衣服知縣郁仁以槐筒殉以是月某日葬縣之西鄙縣人以其俗剪紙錢狀若幡導迎柩車者凡四十餘縣長貳以下及其父老里長諸生皆割牲以祭流涕被面執紼至墓所窆竈深固畢事而歸雨下如注人為致其思云前淞東閩帥趙宜訥謫居濠梁嘗友進士至是聞訃悵然曰可學官不稱其志死誠可惜然靈璧之民長者何其能用情也耶傳曰慎終追遠民德歸厚矣信矣哉進士娶徐氏有子一人方五歲贊曰

朝廷以科目取士士明一經克預其選者功名祿位取榮一時然施之政事不勝任者多矣若進士官為師儒以道自任一邑上下皆重為敬禮不幸而歿祭葬之哀慕之進士其何憾矣乎

頃予以使命過靈璧邑長以下出迓道左因得幸與丁繼先張克忠（闕）卜仲祥諸君子相識皆予同年進士可學友也是夕諸君子訪予所寓勞以酒饌且以進士不可得見矣得見先生誠為喜幸而益增故人九泉之悲也翼日共出而往詣進士墓為之一恸既歸慨念諸君子死生之誼有如此者昔昌黎韓公着歐陽生詹哀詞以寄清河崔羣彭城劉伉僂喜古文羣蓋哀詹不得志以死者故公於是時致拳拳焉今進士卒於教職无葦功近親之助諸君子乃克

尽其情焉足以见厚之至矣予向为进士立传既备着之因书二通以寄继先克忠言辞浅陋不敢窃比古人庶几於不没人之善者诸君子幸即是观之老懒不能悉书也

陈刚小传

陈刚字子浩明州鄞县人世居慈溪昭义里以农商为业刚少好读书因去习吏事见有舞文法丧心术者嫉其所为投笔弃去与甬东傅恕就白衣僧舍借榻用程氏读书法誓以科业自见尝挟册游郡庠始阅月其父母以家贫复使习吏资以为养刚坚志不从因开门授徒复去受春秋经於林渊渊所辑春秋四传号为详备而於左氏先经始事後经终义尤拳拳焉刚复习是经露抄雪纂不少怠天台许广大以进士出身来为鄞县尹倡文会作兴士类刚多在选列自是庠序之间籍籍有声大家巨室往往招致教其子弟知奉化州事李枢亦尝聘为诸生楷式退处家居忍贫蔬食间以医药为济人利物之具其父母暨伯父先後告终刚拮据丧事买地以葬好义者多赙助之至行焯着缙绅乡党皆为竦异然刚性雅尚所学日进终不一践塲屋会天下入今职方圣天子下诏新学校贡举法於是刚复受知定海县事姓某聘币为训导洪武庚戌之秋复以郡太守命敦迫就试漣省以弗肯少屈有司绳墨不在选列明年奉旨预徵京师羣试吏部中选授知神木县事赐纱帽绮衣银束带拜恩奉天殿下神木延安府葭州属邑控西北还与青海为隣宋时西帅经略之地刚徒步上任历数千里不以为劳所过用武关要荒榛故垒吊古徘徊悲歌慷慨县值兵革之余连岁饥饉民人稀少牧马往来钞掠以文墨执事於官者率不循法捡刚列官抚视疲羸民思复业奸胥猾吏痛以律惩治之党与咸惧谋引贼入寇时官军方屯葭州远不相及刚仓皇备御猝遇石山子有白敬臣者素号险黠旧尝在军职得隸籍为民役充弓手刚尝譴而杖之至是与其徒刘继宣挟刃逼令降贼刚曰汝果致贼为逆耶吾与此邑同存亡恨不寸斩汝等敬臣令继宣夺刚所佩邑印杀而弃诸岩谷县吴辅在京师时与刚同受命义如兄弟率兵欲援走憩石穴见石刻言宋时有人避难者被兵焚死为之惘然出宿萧寺贼至其下力战手刃数人遂得脱後如葭州谒州守张木讷二人同夕见刚梦寐中适朝廷命将讨贼造舟踰日而就渡河尽殄灭之咸夸其神速庶以慰刚之灵云神木荐罹疮残井邑为墟主簿王啓宗未到官实封上言县治遂不复置啓宗与刚同里閤久留葭州遗民往往自贼中来言因得状刚死事吴人金文徵山陰王原皆为论着以刚进思尽忠殆古所谓死封疆者耶贊曰

四明多笃行文学之士缙绅士大夫称之晚节以明经授列者刚及博恕庶几焉圣运肇兴之二人者皆能以功业表着於世可谓逢时也已然恕以痼死刚以寇死士君子於此可以考其人矣哉

上虞王氏五老传

昔亚圣邹国公论天下之达尊三而齿居其一故周以伯夷太公为二老汉以董公为三老至於夏黄公绮里季东园角里及夫桓荣之流或称四皓或称五更皆所以尊重而优之也夫人情莫不欲壽求之一乡亦罕矣况五老萃於一门者乎作上虞王氏五老传上虞王氏为周子晋之後世家琅琊其居上虞不知所自始上虞为越属邑包络山海广袤二百里余民淳俗厚

王氏世家诗礼多以眉壽称有名某者生子五人长幼均年九十岁次二曰均盛年八十（阙）岁次三曰均礼少均盛（阙）岁次四曰均贤次五曰均德均贤少均礼（阙）岁均德少均贤（阙）岁此五人者皆皓首龐眉朱顏白髮衣冠杖屨从容步趋乡党见者肃瞻敬仰每值所生辰輒奉觴称壽以为广成子之流焉均礼之孙名（阙）字处仁扬言於衆曰保令终而躋遐耆在一乡羣姓中求之实难昔香山九老叙其事者白居易也睢阳五老叙其事者钱明逸也洛社耆英凡十有三人则丞相司马光叙之此羣姓之萃於一乡者也宋既南渡四明史氏号为至盛淳熙间丞相越王归里与五兄弟五人为其女兄陈夫人为壽绘为六老图参政楼宣献钥执笔叙述夸诩炫耀此同姓之萃於一门者也上虞去睢阳洛社为远而与四明为同壤王氏一门同气之盛庶几史氏矣乎虽勲名爵禄有弗能及而道德风范有可传者世之君子岂以显晦论人物哉於是图诸縑素縉绅士大夫咸为歌诗同邑夏时为之序引以为五老降福之厚如此尚论王道者其有得於兹焉

荊阳外史曰物类之为祥也尚矣在天则有景星甘露庆云在地则有醴泉嘉禾芝草连理麟凤则羽毛之祥龟龙则鳞介之祥也至於耆年碩德躋仁壽之域则人为之祥夫物之祥岂若人之为祥哉五老聚一家历两朝泝其始生至於终老皆在太平盛际岂非天地乐育之盛国家治安之徵乎今天子隆养老之礼四辅之职比诸公孤若王氏五老者吾见上膺天宠三壽作朋如冈如陵者矣贊曰

洪范箕畴壽为五福惟天之命惟人所欲煌煌五老有弟有昆道德辉光萃於一门逍遥冠裳从容凡杖清风穆如有仪可象维时唐虞春台熙熙躋於仁壽叠矩重规於皇圣明养老有礼百岁为期乐只君子

赵府史传

赵府史名达字兼善越之山陰人故宋太祖之後世系备见玉牒宋社既南麟族之盛多居於越爵禄与其国家相终始入元以来世泽湮微而以诗书守其先绪曰谷祥者为君保翁之子提宫端四翁之孙谷祥疏通敏达敬贤重士生二子长即府史次名友府君生而岐嶷秀整谷祥甚鍾爱之延师家塾教之有成以诗文自见天性孝谨事父母未尝有忤洪武三年谷祥滴居颍上县留府史兄弟应门而与府史之母俞氏偕行颍上系今颍州为凤阳府属邑府史家居朝夕恋慕与其弟友徒步二千余里以来侍其父母辛苦给养得其欢心暇则与县博士太末徐景顔论经史甚见赏重县大夫舜江车诚则名以同乡之故待之如亲戚永嘉黄思诚倅职颍州以为贤将辟以为吏知不可辞遂逃去既而知颍上县高翼强之使白事郡府不得已如凤阳府知事归峡向志仁见其札翰言诸太守滑台李汉使典簿书府史退而叹曰吾先代之後也可与刻木者为伍耶人有解之者曰道德刑政本末一致学将以见诸行也孰谓吏不可为哉勉焉从事越二年遂司刑曹凤阳隸九州二十六县刑辟之多岁累千百成案之具详审精密凡逮捕置对繫治决断等事所以裨贊其上者无不得其公且平焉縉绅君子乐称道之以为儒术吏能克世其家云

荊阳外史曰刑所以辅治也民命之死生系焉书曰式敬尔由狱以长我王国司其柄治其事

者可以协于中哉府史一郡吏尔而留情狱事若此庶几以政学者乎某为临淮学官府史以徐博士书求见及居凤阳吏舍以事至府必请寓宿视为父行益恭谨至闻其论宋季事则曰东汉之祸原於党锢宋季伪学之禁视党锢甚矣欲不亡得乎今圣治文明尧舜之道灿然如日月之在天何幸亲身见之哉此其识见超卓有出於治律明刑之外者呜呼斯其可传也已

孙孝子传

母子天性也生之膝下可顷刻离哉当患难孔棘骨肉为睽固有大不幸者矣古之人君及公卿士大夫若汉武帝宇文护周存杜羔之流皆以失母故汲汲求之也求之得否固不能齐而人心义理之天有不可泯者夫求而不得固为终身之憾求而得之喜慰何如哉作孙孝子传

孙孝子名让字义甫世家汴梁元初有讳某者官至安抚阶镇国上将军守御临濠府遂占籍焉安抚勲名事业不概见然濠之长老犹称为孙安抚家云阅三世讳允武者为安抚曾孙以功充千户阶明威将军守御安庆府生二子长继祖袭武爵次绍祖孝子大父也绍祖生二子长德忠次德远孝子父也元至正壬辰汝颍兵起绍祖携二子避兵淮安昔淮安已为毛氏所据毛氏袭青州驱孙氏一家北去使冒矢石与元兵相拒德远死焉孝子始生三岁侍其大父及伯父母史氏家於曹州兵至逃遁不相顾遂失其母史氏孝子哀号不自胜大父怜之展转济水间抚视益谨岁在癸卯孝子年十余矣思见其母不啻渴饥泣谓所亲曰吾不得终事其父未如之何也已母之存亡未可知吾不得见吾母何以生为逾年丁未为吴元年天兵下山东孝子侍其大父及伯父转至曹州得其母於李氏恋恋弗忍舍既复业临淮授学郡庠告之太守给告以往徒步七百余里其母抚之而哭孝子再拜伏地呜咽隣人皆为歔歔欲迎归以养以李氏故未遑也既而有为之言者曰兵难之交勇夫烈士不能保其节多矣况女妇乎史氏之失节於李迫於势不能已若孝子於母克致其情如此不谓之孝可乎於是咸称为孙孝子云

荥阳外史曰真尝与修凤阳九郡图史古昔孝行若壽阳之董邵南李兴下邳之江革匡国政浮光之丁兰滁之荀与齡王彦成皆备书之及辑中都访古记复得彭城华光刘审礼思贞孙棘刘平亳之夏侯佩等遗事再书不一书也独泗州天长朱壽昌求母事与孙孝子类壽昌为名太守又得苏轼巨笔为之发扬遂传诸天下後世孙孝子生於帝乡又在俊选之列异日名爵之重安知其不与壽昌等乎

蒋节妇传

女妇之道以不失节为贞节至於苦则其贞亦不可恒矣贞而恒恒而久久而安于其道斯亦常情之所甚难者哉真观史传汉烈女八人唐烈女六人而独皇甫规妻房元齡妻郑廉妻为最着史家叙述之公如此哉夫秉彝好德人人所同也千载之下闻家令姓女妇之节不有克如汉唐者乎作蒋氏郑节妇传

节妇名某字申中姓蒋氏四明郡人蒋号金紫家讳舍之字子才之女性端严幼失所恃恪恭

姆教年二十归於同郡陆某（阙）之子士元系宋太师山陰楚国公佃之後宝谟阁待制渭南游七世孙也家室雍睦生子二人长名公庆次名公建士元以勤学致目疾节妇鬻资粧延名医疗之稍愈复治简册目遂以瞽节妇扶持调护几十年一日士元以隆暑患滞下而逝节妇执丧尽礼亲戚有哀其蚤寡者微意讽之节妇泣曰水不逆流理势然也为人妇而容再醮耶吾未亡人得奉老慈幼不媿吾夫子於地下斯庶几矣以死自誓亲戚乃不复言时其舅及姑某氏年已老事之甚谨未几姑亦卒节妇年甫三十二雏在襁抱中婴时多难不常厥居值舅疾复甚节妇旁徨无措而龟勉从事饮食汤药之供未尝少缺舅疾既革而襄事未终复尽鬻家资以备葬而节妇口体不给弗之恤也尝抚其子公庆等流涕言曰汝父以勤学丧明而殒命之不淑非学之过也汝等如之何哉继若父志思自树立可矣遣就外傅旦暮覆考所业躬纺绩给事师之礼际圣运肇开公庆以鄞学俊还入成均奉廷命出使未几得请而归与其弟公建致养今节妇年逾五十而其舅亦康宁壽考云

茱阳外史曰予观节妇蒋氏何其不幸之甚耶既嫁而患难殷忧殆犹君子之亡也既寡而坚持自力则犹其君子之存也星霜洊移而其心冰檠有如一曰正所谓苦节而贞久而安於其道者欤蒋氏为真母家节妇在表外弟行故为着之如此呜呼若节妇者岂不可为天下之人妇者劝哉

陈本辉传

予读史传两汉循吏共十有八人唐循吏十人夫自三代以後享国之长者无如汉唐而循吏仅止此岂世运之降而人才之难也抑上之人务於苛急乐於暴戾不有以作成之耶噫何其寥濶也哉然尝夷考其人初无奇勲异行惊骇观听而史册传之至今太史公所谓奉法循理不求名而名自随者若乃任司州县为民兴利如汉任延修理沟渠王景修浚仪芍陂唐常丹筑堤扞江薛大鼎开渠属海贾敦熙立堰庸水绩用章章与国无穷其不谓吏之循者乎作本辉传

陈本辉讳本以字行其先汴人名汝锡者宋建炎间扈从南渡授知越州思陵移蹕於越陞州为府就以汝锡知府事子孙遂家山陰之葛洪岩四传入元名某字宗珍开拓基业其族益大时人目其里曰陈村又再传而名某字士信者儒术自持睦族二百余口朝廷尝徵辟不就侍臣奏赠节义处士生四子本辉其长也次本固次本德次本荣本辉慷慨有志操种学绩文手不释卷少从舅氏朱兴父游既长名声籍籍值世运中微慨然欲以勲名自见见诸诗咏流传缙绅间至正丙申江南行台御史大夫纳琳岳卿奉旨徙治於越御史安居仁求得之辟典吏曹案牘以能勤称越二载考满调江西宪史考满勅授将仕郎广东都元帅府照磨调静江知事所至以治状闻未几内附入覲南京中书奏为江淮行省掾洪武初元徙省治山东入朝授雷州海康知县郡城东阡陌犬牙相错号万顷田去海咫尺每■〈风贝〉风作潮汐辄至禾苗淹没农民失业宋咸淳间有堤崩塌已久本辉建议合雷之属县循海筑堤开河置闸时其啓闭而蓄泄焉本辉昼夜督工弥月而成父老咸曰此百世之利也微陈令其至此乎县之政大小毕举学校公廨以次兴修丹碧焕然郡志遗缺与其乡老讨论订证志以复完暇日延见诸生讲习经史邑政教并行平生不憚权要事弗合理者正言无忌尤廉谨自持海康有德公

者饋巨魚一仆者私受之本輝數日而覺召饋者賞其直立斥去其仆人以羊續擬之方期大用以東還道病卒年四十有七娶同邑宋宗室趙氏君玉女妙觀有賢行居家盡婦道生二子長煥次某在官常以自隨本輝既歿煥侍母携弟以归依其舅趙氏以居煥讀書克承先志云

荊陽外史曰陳以國姓其世系著矣若汝錫之為守本輝之為令祖孫相望二百餘年間可謂源遠流長也已夫守令系國家重輕宋遭陽九之厄而天不泯其社稷汝錫再守陪都贊治中兴亦為逢時矣本輝律身修行迪光前哲由勝國入仕新朝所宜登躋廟堂贊輔雍熙之盛而綏綬所臨僅止一縣惜哉然以循吏之政足系其民之思庶几不沒矣況有煥以為之子故家文獻之傳其有艾乎左氏載陳敬仲之占曰八世之後莫之與京吾於陳氏深有望焉

宣節婦傳贊

女婦從一而終古何有節婦之名乎世道既降人心不古有失身改事者則全節守義斯為貴矣乃合卺方新外患狎至骨肉乖睽而欲死不死其視讎敵不容兩立矣創鉅痛深終天罔極而能報讎戮罪使生者死者兩得伸焉吾不知孰為主持而彰顯之耶作宣節婦傳

節婦名孟先姓宣氏系出魯宣伯之後世家上饒縣白芒里父仲良讀書明律執事於公節婦幼育閨門奉家訓通孝經女誡小學書年二十有三歸同邑魏子溫子溫有賢行而節婦為之配室家雍睦內無間言及兩月草竊蜂起子溫與節婦奉其父谷章母胡氏及弟妹入靈山隱居子溫日以盜寇為虞節婦曰妾誓以一死不負君也既而強寇周率羣不逞之徒乘夜燃火炬帕首抹額執白刃突入子溫及父母與其弟子恭皆遇害節婦恐不免急引刀自刺踣地流血被體寇謂其已死不為意肱篋取財物執其夫之妹以去歲戊戌十二月二十一日也節婦氣息奄奄有以勺飲調侍者逾一日乃蘇顧夫家荼毒殆盡哭不能作聲輿疾归母家既愈乃曰吾志欲殄此賊念舅姑及夫暨叔暴露山谷間幸獲歸藏伸我情事則請劒司刑庶可圖也制衣具棺如死者數而剩其一人以問之則曰吾設復遇賊必死殯葬以耐吾夫可謂同穴矣以逾年己亥二月某日窺窳如禮遂列詞控訴郡府郡府以寇姓名下縣逮捕欵鞠具獄斬首以徇得夫之妹以歸多難之余家無留貲析其田業為三二以給衣食一以供祭祀今其夫之妹既筓而嫁節婦亦年五十餘矣欽惟聖朝崇尚節義鄉進士禮部尚書徐貫道傳其事父老將上送官以旌表其門節婦流涕辭曰吾未亡人焉用此為人以是益賢之歌詩贊咏稱為宣氏節婦云

荊陽外史曰女婦柔婉之姿於患難死生若惴惴然不暇者今以宣節婦觀之剛足以自固勇足以不辱固烈丈夫之所難哉當是時使節婦不幸斃於賊手彷徨四顧無伯叔近親則死者孰葬冤者孰雪陷者孰歸魏氏昭穆之主（闕）死而生以報讐復耻推亡固存為心而情無不至義無不尽豈非天有以默相之耶然念百年之俊無有繼者節婦亦未如之何也已昔漢皇甫規妻以罵董卓而死卓大盜劇賊非尋常暴客比威行天下不能使一婦人為之屈也斯不以見天理人心之正乎若宣節婦不死於賊而復能報賊視古節婦何遠哉贊曰

好生惡死繫人至情我節我義不系死生患難孔殷誓以身斃不死而生有一無二泚潁谷崖

有觜有骸我具我棺以葬以埋请讨复讐气愤词激肆诸市朝吾志既毕竭归奉祀苹蘩载修
既歆既享求安宴游宴彼小姑言旋言复以养以慈慰尔茕独天性民彝往古来今不有君子
孰明其心岁月如流力云孔瘁始终周旋庶曰无媿涕泪泛澜形只影单照镜凄其翩翩悲鸾
节苦德贞矢言皦日申以赞词用贻壺则

荥阳外史集卷四十六

卷四十七

●钦定四库全书

荥阳外史集卷四十七

（明）郑真 撰

○传

灋东耕者传

耕所以求食也伊尹之耕有莘诸葛之耕南阳岂专求食哉夫出处隐显殊途同归穷而耕达而仕有道焉尔因小以明大即古以验今取人于山林隐微间史氏之所宜用心也作灋东耕者传

灋东耕者姓黄氏名黼字成章淞江上海人也家於淞之东五十里滬泥泾去泾东南二里皆广野沃壤构屋其上潞水为池塘环列杞柳是为耕者别业别业东二里曰黄浦通江海潮汐浦之後曰黄家渡自耕者上世居此故其地皆号黄姓云浦上有田百亩耕者之先以农起家致巨富祖某以善厚称父某号双清翁好学笃行刻意教子耕者遂业儒为善士其外家名仕儒学官尤獎勵成就之淞介居淞右哲人高士若龟蒙先生及诸陆氏相接踵耕者尚志前烈不乐仕进尝读杜甫蜀中诸诗有曰遗穗及衆多我仓戒滋蔓慨然叹曰杜陵其有道者耶因号灋东耕者灋盖蜀方言谓江水横通山谷处灋东在夔州赤甲白盐间耕者相望万里如亲历其地东作既兴耒耜钱鏹躬亲先之瓠窰污邪之祝致谨将事秋风■〈禾罢〉極黄云覆陇塲圃斯筑我稼既同播而揄春以揉红鲜玉粒熟饱数岁伏腊作苦炮羔烹羊招邀邻社豆筵有秩劝酬交错歌呼呜呜神交梦寐俨然古人之在左右前後也天下入今职方耕者随衆徙居颍上颍上为中都属邑人物辐辏耕者受廛为氓勤苦自给尝从容谓人曰是岂不如灋东也耶达人大观物无不可土生斯时无所往而不得所乐何间彼此哉邑长车诚则名淞左名家以兴学为己任尤喜荐士语耕者曰子岂久居■〈亩犬〉亩者耶天下文明可以出而仕矣率县博士三衢徐景颜奉币聘为颍上学训导弟子员耕者勉为一出犹以颍阳之田可耕不肯食禄云赞曰昔长沮桀溺耦而耕孔子以为天下有道丘不与易也夫圣人未尝有一日忘天下之心岂若辟世之士长往不返者哉耕者以世家子当天下有道进退出处审择所从安义命之正其志学圣门者欤

安定郡梁安人传

安人讳仙字某姓王氏其先家严之壽昌父讳某母某氏安人生而娟好静秀姆教婉婉听从尤工织紵父母爱之谓当择良配同邑梁某伯起世儒家敦厚谨饬有古君子风遂以归焉安

人既来嫔相君子躬执妇道朝夕上堂拜舅姑礼毕退为治具饮食汤药务适所欲好善乐施隣里贫乏者倾意周恤随所有不计也宗姻乡党皆称为贤云以明洪武八年十一月二十日卒年六十有三子男三原辰恕女一秀适郑某先卒孙男四人辅轼琰琰孙女二贞辉安人律己贞肃治家勤俭而笃於孝敬尝曰吾庶几无媿於为妇矣幸而有子若孙见其成立没齿何憾哉洪武初元朝廷新学校法壽昌有司选旧家俊秀补弟子员夫人之次子辰执经以往学既成试礼部中选入国学为上舍生奉上旨赐寒暑衣分教河南之新安县始去家时夫人流涕谓之曰殆不复见汝矣汝好自爱辰在新一夕梦母若疾病状惊悟欲告归弗得居无何讣至数其属纊日则其梦时也县大夫来慰唁为咨嗟者久之有解之曰周礼梦卜之官有献梦赠梦之礼梦有正有噩有思辰念母不置故其疾病见於梦寐如此辰哭泣面深墨见星上道过濠梁其友叶焱留之少憩不从则曰我情事未伸天地一罪人耳可迟迟也耶将归卜葬以尽始终云

茱阳郑氏曰妇人之德不出于闺门梁安人于妇道备矣若辰之为子远在羈旅而梦符其死何其神也耶汉蔡顺常出外其母以客至啗指顺心动即归而齐庾黔娄为孱陵令父易在家遭疾黔娄忽心惊举身流汗即日弃官归家盖生之膝下一体而分疴痒疾痛彼动此应理其宜也然蔡顺黔娄皆去亲不甚远克尽其情若辰在数千里外母在弗克尽调治之宜没不及亲棺斂之具斯可憾也哉夫其气志神明之交示吉凶存亡之兆其亦可以见人之（阙）心矣哉

贞一居士传

昔欧阳公着五代史於一行有取焉盖乐道人之善所以劝後世也嗟夫史氏之用心何其微也哉洪武乙未景彰以博学召至京师拜命州绂上任如濮阳论及四明贞一居士韩氏名乡耆硕律身累行有足称者因传之人人夫贞者正也一者诚也贞则能固一则不贰惟贞则一一则无不贞矣非居士其孰当之哉作贞一居士传

贞一居士姓韩氏名常字惟善明州人世家定海县西曾祖清之祖祖亮皆以积善有闻父君厘号妙心居士人称为妙心公厚质粹容由商贾致富饶居士生而神秀岐嶷既长威重严整人见而敬爱之年逾十五即以干蛊为任妙心公喜曰使吾家道有成者此子也事无大小悉以委之居士承顺弗懈庶弟可善自幼暨长以及婚娶厚爱如一妙心公由定海徙郡城既奠厥居而年渐高欲二子以生业自见面命析财各受一廛以资赎济人之急妙心公卒执丧过哀事母陆氏尤为孝谨可善两厄於灾居士问抚周至值其疾病招良医用药至愈乃己孝友盖天性也少尝读书而通於易忧疑得失一以决之应答如响俾子孙习之且曰天地造化之理会於吾心至诚求之斯得矣四明道学自宋为盛慈湖杨先生简文靖舒先生璘置书院列诸学官居士闻其风而慕焉助田以给祀事阿育王山藏释迦真身舍利岁时示见祥光炳焕居士自其先世崇奉信向膜拜瞻礼敬承弗坠妙法莲花经默诵精熟素衣长斋旦夕规矩梵学释氏以为弗及平生尤好施与有贫不能丧者给以棺槨贫而产者资以饘粥病滞下者用秘方和药饮之立愈老嫠亦赖焉元至正乙未岁大禊居士建斋天封塔寺施食以济贫者大家多傲之定海故里以妙心公遗命眷念不忘县治由江入海涛浪险艰居士择要地建通津

庵买石修治道涂作渡舟由甬东泝河直涉其境行者便焉腴田三百亩皆灵岩乡者弛其租入三年故居规为义塾值兵燹废每以为恨鄞佃人褚姓岁入米二十石一日其家老妪以难告尽以畀之且为偿其他逋郡城南鄙栎社里南鄙戴某治墓隧以居士之田犬牙相入欲以他田贸易而难于言居士闻之延诸家请如其意尝曰吾惠不能遍及也心之所存随所在致力焉尔居士娶朱氏妇道母仪协於壺范生二子长名懋简次名懋和元至正间懋和以才请见知漕省奏之朝授忠翊校尉庆绍等处海运所千户以功累转太中大夫海运都漕运正万户有司援例推恩二代於是居士自武德将军温台海运所千户驃骑尉定海县子进封太中大夫海运都漕运正万户轻车都尉高阳郡侯朱氏由定海县君进封高阳郡夫人妙心公赠中宪大夫海道都漕运运粮副万户上骑都尉追封高阳郡伯陆氏赠高阳郡君居士既拜命燎黄山中以为先德所致际今内附有司以户赋之重推为粮长每岁旅朝於京拜伏奉天殿下闻圣谕尚局珍饌饱饫宴赐归语乡党以为千载荣遇感恩难报至於涕洟初妙心公既逝卜地东湖盛峯山之原与陆氏合兆缙绅之士若羽庭刘仁本长汀舒庄为着之铭诗大书勒诸谿道扬名显亲君子称焉尝建精蓝为思慕地僧某本同族延以为主衣鉢食饮资以终身女兄适胡仲武生子名安道复以长女妻之後其姑妇後先以歿居士为治葬事使耐诸先麓弟可善终於别业居士痛惜之会其庶母楼氏继亡慨然谓所亲曰吾弟欲崇重所生以庶并嫡於礼经合乎否耶按孝慈錄以庶母之礼丧之皆命耐近盛峯而藏焉居士年七十有（阙）历四百甲子康宁强健如一日家居无所嗜好惟购法书名画及古彝器以资後人监观而已尝戒其子懋简等曰寡慾可以养心俭节足以裕己力勤足以奉上衣食取给不必精华赋役克膺不宜退怠暴横之临静以待之毀污之加弗校可也於是二子懋简懋和卒能有立懋简尝两以庆元幕长荐不就年五十（阙）以卒生子一人名庸庸方娶而夭懋和以故官谪汴尝召至吏部将用之以疾辞今留居京师生子一人名中中子二人文童义童居士以义童奉长子懋简祀为庸後云赞曰

易坤之文言曰积善之家必有余庆居士承累世之旧积扩而大之享富有之盛而崇道尚义儒释一贯至於晚节躬际明盛入覲清光宴息从容跻於仁壽而裕及孙曾善承善继古所谓吉人长者居士之谓乎

李元亨传

予客中都八年於兹所见四方谪遣之士以功名自许者居多至於文武才艺足以表着於世者不可以数计也求其言行终始足以承先裕後者何其少哉作李元亨传

李元亨鄞人先世隐德不耀父浩生元至元间好清静之学尝入犹龙氏之门以荐者授道判未几弃职家居绍承宗祀人以道判公称之娶陈氏生子名亨继娶叶氏元亨其字也幼时道判取易卦彖辞命名元亨既冠人欲以字配之元亨曰吾父命名惧弗克当也奚以字为即名为字终其身别自号曰元斋云天性聪明多谋略商确世务无不曲当人有求质所疑者一为剖析初蹙额而至者莫不心领意得以去尝试府史同辈贪污视财赂多寡为枉直轻重叹曰吾不忍见也拂衣而去教二子以礼授之诸经子史俾出就外傅朔望归省辄问所学逮夜躬剪烛坐听讽诵虽不甚解而喜见顔色郡滨海沮洳夏秋之交暑溽湿蒸人病疴及痢者相继

元亨焚香告天按秘方货善药制为丸散施之辄效求者如市每有馈遗力谢却之置田慈溪之罗江佃者於常租外倍输若干石元亨曰汝误矣按籍取所当得者余悉还之佃者惊叹感谢有年耄耋者谓不意垂老见此平直其於取舍盖如此时四方多故所在调兵从容谓其家人曰艰难惧不自保我安得如婴儿在怀抱中无知识者耶至正戊戌之秋得滞下疾初即安小寝度势不起大步登大床曰吾得正而毙焉斯已矣此吾所自生也子能问所欲言则曰吾志气扫地矣汝其以奉母抚弟妹为念遂卒九月初六日也年三十有九室中置几筵朝夕哭奠座席屏幃皆作声人以为其灵云元亨天性孝友道判双目失明已久有善医自外郡至元亨请诸道判将延致开其瘴瘳道判曰吾先世卜葬日者言掘土有生物见阳则飞飞则地气散矣及窆穴果见一龟两目如灯光亟掩以土宅兆其上後有术者过其处言当出高道惜至三世无目吾今三世矣吾老将就木治目何为元亨曰使吾父复覩天日死且不憾医至门欸洽甚恭约以厚币相报竟不效而止道判寝卧每患口乾元亨侍问盪置珍果以资其津液夜参半闻探果碌碌有声颇以为慰及卒奉囊如礼人称其孝云平生勤俭恭敬处乡党以诚信患难相济惟恐不及故其亡也人为哀悼之娶江氏奉化儒族生子二人长即能次某女一人能业儒治春秋授弟子业

荊阳外史曰君子之道尽已以及人元亨庶几矣然其以药济人危疾而身陷危疾以死何哉夫死生一理尔天下岂有不死之人哉和缓卢扁以术济人生死者也而皆得疾以死其於自救何如耶彼以为其人能治是疾不当得是疾以死者斯亦惑矣若元亨之死其命也夫虽然善必及於子孙元亨有子克报先绪天於报施之道不在兹乎

蒙古哲尔德氏家传

昔元太祖肇基朔土蹂金■〈戚〉宋四传至於宪宗躬事西略宫车宴驾大勲未集世祖以亲王介弟入继大统貔虎爪牙之士云合向应时则有若蒙古哲尔德扬恰尔以膂力奋於行间东征南讨靡役不从海■〈禹〉一家行赏定功受专阃之寄传及孙曾或以节义自着或以文学见知可谓世德也已然而世运代更闾閻之家废兴代谢子孙不知宗派之次多矣是宁不可慨然哉作蒙古哲尔德家传

蒙古哲尔德氏世居乌桓之北与哈塔锦氏萨察氏扎拉氏索欢氏济喇敏氏鸿吉哩氏辉和尔氏奈曼氏克呼氏扎兰氏斡色氏扎拉尔氏泰楚特氏珠勒根氏博都哩氏斡尔噶氏等五十三部俱号贵族宋开禧二年为金太和六年蒙古太祖号青吉斯汗即位於鄂诺河之野以博尔珠博勒呼穆呼哩齐哩勒为腹心号为四杰时哲尔德氏亦以兵从有扬恰尔者魁岸奇伟勇猛多力善骑射居亲王哈必齐麾下宪宗即位之七年帝自将侵蜀次於六盘分兵三道入扬恰尔以兵从围宋将王坚於合州会帝崩於钓鱼山歛兵而还世祖即位中统三年山东行省李壇以山东叛帝命哈必齐王总诸道兵以讨之山东平宴彻以功赐羊皮圣旨蒙古改号为元至元四年阿珠受命经略襄阳言诸哈必齐王请以扬恰尔自近与同攻取王从之扬恰尔从阿珠以死力自効与丞相巴延会师襄樊樊城既陷襄阳亦降分兵围枣阳拔之由襄阳趋郢自青山矶济红攻阳罗堡复从大将顺流东下败宋师於丁家洲所向克捷遂自独松关入临安以瀛国公入覲其功为多师还宣授国上将军淮西道宣慰使佩金虎符时至元十

三年也以是年三月十八日薨於私第讣闻帝为闵悼诏封范阳郡侯太常定諡曰襄敏享年五十有五配鸿吉哩氏讳旺尔封范阳郡夫人年四十有九生子一人讳布色少从南征多获战功赐金束带一佩其父元降金虎符宣授信武将军庐州路达噜噶齐改昭勇大将军镇守庐州军民达噜噶齐至元二十二年调昭毅大将军镇守池饶枣阳万户府达噜噶齐以某年某月某日卒享年五十有五配明安伦氏范阳郡夫人享年（阙）十次萨勒珠特氏得年二十有九次蒙古真氏享年八十有二生子二人长名巴拜蒙古真氏出也用其祖文职廕授承务郎淮安路判官年六十三而卒次名壽老萨勒珠特出也宣授怀远大将军袭其父武职乃镇池州年三十有三而卒巴拜娶唐古氏封宜人年五十有五而歿生子一人雅勒呼也壽老娶雅克氏封范阳郡夫人年五十有五而歿生子一名舒拉巴哈袭父爵怀远大将军将其军以守御功陞漕东道宣慰使司都元帅至正十八年以王事终壽三十有六娶文殊努氏封范阳郡夫人无嗣且琳沁壽八十二生男一人名完前饶州路总管韩庸爱其材举为府吏改授临江税务副使以兵变隱迹於家娶段氏生子二人长古次蓝盖自镇国公至是四世矣镇国葬大明路滑州白马县马村信武亦附焉承务以下则葬今池州某县某山镇国於雅勒呼为曾祖昭武为祖承务其父怀远父子则其从父从兄也雅勒呼既济世美又生承平时亲见閼閼之盛折节读书好贤下士攘去膏粱屏远声色授业潘嘉多吉之门通诗易经为进土业尤以古诗文自许挈家避地宣城士大夫多为延誉今都督何某侯待以宾礼归池阳别业郡太守闻其贤置币延入郡学训导弟子员凡十年会朝廷命举文学之士以雅勒呼应诏得为从仕郎凤阳府六安州判官赐衣冠入谢在官逾年名声流闻人以为克承先烈云雅勒呼娶郑氏生子宗岱江氏生宗道丁氏生宗德皆岐嶷秀整修弟子业哲尔德之泽盖未艾云

荊阳外史曰古称将门有将盖气类使然也哲尔德氏父子际兴王之运属橐鞬擐甲胄与诸将奔走御侮赞成一之功裂地受封任方面之寄传及孙曾守正效死可谓不失其官矣夫楚国有材晋人用之昔金日磾以南单于子入仕汉朝七世貂蝉震赫炫燿与其国家相终始今从事系出北部以先朝将家妙膺盛代文学之荐向用於时如木之春所谓公侯克复其始者不在兹乎因传着其家世而为之赞曰

粤惟前朝兴於北部豪杰景从云龙凤虎惟元帅公始从宪宗为王先驱孰当其锋逮事世皇仍率有衆拜命煌煌金书绶凤江流汤汤慨彼宋强襄樊既拔一苇而航维时大将如郭如李公在辕门实承器使以战以攻俘馘于于婉彼弱嫠奉玺献图幕府上功公实称最淮海之疆十连为帅将星遽殒壽不百龄恤典之加精爽钦承嗣子象贤人百其勇从於南征身彰锡宠乃佩虎符金斗之墟或武或文帝命以俞载长万夫移镇江左曰池曰饶式谨边锁貽厥孙谋閼閼有辉伯仲後先吹埙吹篪武弁有戢以义相让銛鏹鏐膺交弓虎■〈革长〉迨及四传际时多艰羽檄星驰慨其永叹职在为臣忍违君父伏劒一挥以备以御自我先公有此专城义同存亡誓死为贞力殫势孤抗节不屈忠血之殷溅此遗纛惟从仕公际今文明刻荐登朝服膺宠荣咸曰熙哉承务有子四世克济其美先陇之藏松柏苍苍奠祭不时南北相望追惟教忠泽及於後有书有诗以奉悠久簪笏在床为龙为光嗣而承之益大以昌木本水源有谱有牒述赞有辞以示来叶

吴处士传

昔者圣人作易於山下出泉之象曰君子以果行育德夫行者德之着德者行之存因用以该体者也三代以下圣贤之道微矣中世偏行之士成名立方风范足怀者史家犹取而录之况诗书德义有以淑诸人而传诸後者乎作吴处士传

处士讳忠字彦中其先为钱塘着姓五世为鄞人有讳安礼者入元为徽州路儒学教授转嘉兴路总管府知事其祖也讳祥甫为福建道帅府奏差则其父也妣钱氏徐氏周氏处士在幼而奏差君即世鞠於其母周少长出事外傳周旋肃恭以为读书当见诸躬行词章记诵奚益故其律己以严待人以敬宗族乡党并敦义让丧葬嫁娶必力为营办规助人以是多之性尤孝谨每以不逮事先奏差府君为恨祭祀必流涕母周疾病常不解衣带饮食药餌调治以时暨其歿也棺斂祭葬礼无不至情无不备由是懿行日闻有劝之仕进者则曰昔泰伯三以天下让孔子称为至德延陵季子让国吾圣贤之後也宁不闻风兴起耶功名爵禄岂所愿哉至正间濶东戎师辟为从事不就大臣有荐者勅授绍兴路萧山钱清巡检亦不赴惟端居静念保冲养和而已士大夫家子弟有执经授业求为擊蒙者则朝夕摩励期於进修而止尝作亭桃源山中万松林立风晨月夕鸾笙凤竽清响迭奏从容清悟尘坌有不能入者因号松亭处士自比於古之逸民以洪武七年十一月十七日卒享年五十娶同郡李氏生子朝宗早夭次伦次浩次潜伦明易经领洪武五年濶江行省乡荐计偕春官选入成均引唐何蕃故事得请归养处士既歿服阕复以明经召致阙下上亲为覆试授当涂知县文章政事有声京畿人谓处士有子云

荊阳外史曰士有所不为亦将有所必为以其无用亦所以为用为与不为用与不用惟其时而已亚圣所谓穷则独善其身达则兼善天下者固其宜也处士美学懿行推为一家之政而功名爵禄有不存焉卫诗有云独寐寤言永矢勿谖其处士之谓乎

吴先生传

自孟子没而正学不传久矣暴秦煨烬之余汉儒掇拾缀葺着之词说其果有得圣贤之心哉千百载之下向非伊洛建安诸子出而发明羽翼之二帝三王之道泯矣然而经学名家若欧阳生夏侯胜之流汉史犹联编得书况生於儒先过化之地得其绪余有以大经学之传乎作吴先生传

吴先生讳烈字义夫方斋其号也兴化府莆田县人世家县之黄石里曾祖讳瑶宋幼主德佑时为潮州通判北兵至与其长子斗祥死之祖讳清太学上舍生入元归隐不仕引清湖灌田万顷濶省平章乌玛喇欲湮为田上舍争之在当时得不废乡民词彩帙以谢者至百数考讳栢号石亭克植先志先生年七岁失其母某氏石亭以广大期之年十六石亭即世先生内治家政供赋税树门户外则从师取友汲汲不遑粤昔建安之学蔡沉仲默承文公朱子之传着书集传实得帝王心法之要延佑间科举取士定为国是先生师事郡人郑献可林学矩典谟训诰敷扬紬绎通其精蘊间左大家以书币请教其子弟佩衿林立构卧云精舍以居处之世事既非豪杰分据士大夫媒取禄仕者骈肩接踵有呼先生与俱者先生恍惚云中报曰吾梦黄粱未熟也卒不起圣运文明洪武初诏以三年叠试取士有司敦迫弗得已较艺闽省考官

永嘉林温奇其文置诸前列计偕京师适御史增城张公度景彝分巡中都上言帝乡戚里学校首善之地教官缺员非所以表仪天下天官精选十有三人以先生为首遂授中立府教授即今凤阳府也凤阳洊罹兵燹草莱新复以耕牧樵采为事四方谪处者甘心商贾视简册为何物有司数数焉逼迫之始遣子弟就学先生朝夕督励经史文艺知行两进登岁贡试春官者岁有其人督阌留司郡府诸州庆谢表笺以币请为修撰公侯大臣以下待以斯文之礼性严毅以礼自持或时燕集有嫚慢及诋议者则义形辞色人以是敬惮之九年考满进牌入覲考功书其称职得谢天官奏升王府官不果遂以常调授鄞县主簿既上任士大夫贺为得人值正旦入朝陛辞复职适官掣弓张钱价侵欺移易者事干前官而郡之境清寺僧诬告累及先生付濶究置对不胜考掠遂诬服刑曹定输作四年放还赴大理司审録瘐死洪武十九年某月某日也年六十有（阙）适凤阳诸生壽春阳吉评事大理为经纪丧事赖其力先生妻陈氏遂得归骨于里庶几古师弟子之谊云先生尝三娶无子有女适同邑方某先生尝请告还命族子某为後不事先生日以宗祀为忧陈氏兴化宋金紫家寓居凤阳求之得为伉俪志於产子逾年乃毓一女今十岁云所着有倒捕貽笑集凡若干卷

荥阳外史曰宋季科目取士视前代为盛端平二年穆陵御延英策士五百余名其首二卷难为进退帝躬为审定携首卷以入外廷不之知也比揭卷读卷官定为三等以内失一卷为辞穆陵出诸袖中曰状元在此取其辞翰兼美云及唱名乃兴化吴叔吉也嗣後科第不絕为太守者五人里有万石君家及挂籍状元坊之号可谓盛矣予向闻先哲语及之在凤阳与先生同为学官乃知叔吉在曾伯祖行先生自少至长卓立不羣晚际兴运而以科第为名教官出为县倅爵位虽不大显亦可谓世济其美矣彼髡■〈不页〉叵测忍於构害而耳目纲纪之司不为别白乃罗织而鍛链之呜呼亦独何心也哉始公之赴逮也有过上饶相遇者先生语之曰为我谢信郡郑广文吾不复有相见时矣予儿东昇自四明来先生复语及之尤勤真闻讣悲伤出涕念无以为先生出一死力者因叙其家世出处大致以告其乡之君子志人物者有考焉

荥阳外史集卷四十七

卷四十八

●钦定四库全书

荥阳外史集卷四十八

（明）郑真 撰

○铭

白云轩铭

白云轩者三衢陈侯可斋所居也侯家世业儒自儒而医以术起死者千百计早岁游京师受知王公大人辟为中书省医再转擢庆元路鄞县尹鄞与三衢俱隸浙左公航海之官去家将千里以慈母在堂惧滹澠之养弗以其时也登高徘徊欲舍去不可得枢密分院大臣怜其衷檄命使者为之取以就养焉于时兵革繁兴音问弗至晨昏之恋有加无已此轩所以得名也呜呼孝为百行之首以公之孝思其亲如此其与唐之狄仁杰登太行而怅然于怀者岂远乎哉诗曰维其有之是以似之又曰孝子不匮永锡尔类其侯之谓乎乃作铭曰英英白云在彼青山漠然以静悠然以闲时焉腾空时焉触石轮囷氤氲寵嵒葱郁变化不时苍狗白衣粲焉光辉玉叶金枝岂曰无心亦曰有象懿彼哲人以寓遐想哲人伊何产自三衢以时行藏以道卷舒覲日之光钧天帝所志存伊傅为霖为雨帝有恩言出宰于鄞诰命宠颁焕焉增新遭世孔艰革兵纷扰以望乡关鸣音邈渺慈亲在堂既壽而康倚门倚闾朝夕所望煌煌斋居揭此巨扁匪时不思动静幽展彼云徐徐吾亲何如曷云能来以奉以娱彼云孤飞吾盍归止泄泄融融以燕以喜念惟梁公陟于太行载顾载瞻慨彼河阳千载一朝前哲是效作铭以劝永世克孝

谷口庄铭

维古哲人躬耕谷口岵焉高风孰其尚友侃侃郑公天府之英绳彼烈祖昭兹令名赤城之阳盘阿考室其中靖深其外棘翼栢松槎牙岩壑洞飭元气鸿蒙天地一家仓庚既鸣爰适南亩既种而获孔多且阜啸歌翩翩曰此有年鸢飞鱼跃契彼渊玄相在尔隣紺瞳白首饮酒酌醴以介公壽公乐徐徐公志不渝寤寐兴怀以赫厥图轩冕非荣金紫何贵用也斯行岂以形累嗟我同姓如途之迷谷庄戢戢誓言同归

湖山轩铭

明之属邑曰定海西去八十余里地名灵绪乡山水清淑是为故宋宗正少卿兼吏部尚书致仕文洁黄公之里予二年来以某事尝过湖山书院拜观公遗书旧藁盖深有啓发焉者裘君

可道筑轩其旁亦以湖山自名则凡言行出处之常理学文章之懿其有得于公者多矣不揆凡陋铭诗其间用以致景仰之意云铭曰

有植其轩控络湖山皎焉清猗岿焉孱颜懿哉裘君曰适有居左右秩秩厥图与书粤惟良朝廓无氛祲鱼跃鸢飞适契尔心乃命乃戒乃游乃遨载涉其深载陟其高纈英茹华采芳扬芬灵台湛然不芥于尘念彼先哲有若黄公冠带立朝展也儒宗亭亭新祠与轩相望炳堊流丹山川增光俯仰百年实公允师明发寤怀如或见之愿言蚤夜式克钦承庶几来者保尔令名

愚斋铭

四明柴君元中扁其读书之室曰愚斋予因为之言曰凡人得天地之气以生其清者为圣为贤其浊者为愚为不肖於是品类之高下习尚之美恶固有不能相同者以君神气清明学行纯粹凡天道之流行赋与家国之理乱得失莫不知其理之所以然与其事之所当然者乃今以愚称之岂将沉晦免患如甯武子之愚乎将不径不窵如子羔之愚乎抑将默识心通如顏子之终日不违如愚乎虽然古人不可尚己志於古人者其非古人之徒欤不揆凡陋着铭以申其意铭曰

茫茫堪輿气化氤氲参为三才曰惟斯人人生伊何稟乎是气清浊或殊知愚斯系懿哉柴君既清而虚胡为居室扁之曰愚嗟君有言吾岂无意世途纷纭淫巧滋炽审其所由慎厥攸从此静而吉彼动而凶乃安乃居乃慰乃止及视默观鸿蒙太始母事诡随以徇俗流毋为夸毗以丧厥修喜誉两忘得丧一致抱朴全真乐哉斯世

拙巢铭

昔宋大儒周濂溪先生着拙赋始之以吉凶劳逸终之以天下拙刑政絕呜呼拙之时义大矣哉四明李（闕）以拙巢命其所居其有得於周子之言欤夫拙者巧之对世方以巧自矜而子之於拙乃甘心焉人之好尚相越岂不远哉铭曰

厥初生民有事巢居懿哉李君尚友隆古岿彼蘧芦扁曰拙巢左图右书於焉逍遥世方诡随我克以正世方容悦我罔弗敬乃慰乃止以嘯以吟如凤在梧如鹤在林影与身俱心与神会动静随宜何间显晦斷轮匪知抱瓮匪愚全真反朴为德之符

种德堂铭

建安留氏止轩故宋屏山先生文靖公裔孙屏山忠显公季子以道德着称於时考亭朱夫子尝师事之止轩以世家子克承文献之传而复以医自辅所活人不可胜数尝筑堂於其郡之南浦尽挹溪山之胜扁曰种德云夫德犹木也种之於前者获之於後者也古人云十年之计种之以木百年之计种之以德所谓百年岂一朝一夕之故哉止轩以种德名其堂吾知必尽力於所植而其效之所获有不待言矣为之铭曰

有岵者堂南浦之阳面胜溪山烨其辉光作堂者镗揭名种德攸芋攸跻以偃以息岐黄有书功探化枢起废扶僵为德之符惟德在人天所赋予人弗善修厥德或沮至理流行生意何穷盍务尔力盍树尔功尔源既深尔本既植勿助勿忘毋厌毋斲粤昔汝祖惟文靖公崇祀俎豆焕焉新宫象贤绳绳在而孙子善种倍获永绥多祉

见南亭铭

见南亭者同郡王彦伦氏读书之地也亭在城东同礄山谓之见南者盖彦伦之始祖察使公由汴徙明既歿卜兆於其山之南乡人因谓之南山由察使三传至厚斋尚书公复祔葬其旁此见南所以名者盖不徒资为游观憩息所以寓夫展敬瞻省也夫南者阳明之地八风所藏四灵所聚窈窕之营於兹得吉文献之泽所以荫被後人者可知矣居斯亭也慨想先世绂冕之藏顾瞻松柏徘徊泉石精神血气之感通固有如见其声容笑貌者矣目注心存愈远而弗忘焉所以奋起家声绍承基绪与其山相为永久者不在兹乎铭曰

明城之东曰维同谷涧溪杳深冈陇回复一峯岿然审势面南远近亭亭拱焉相参粤昔先哲扈从南蹕乃归乃藏窆此幽室灵聚秀鍾词学名科文献之光耿焉弗磨懿兹曾孙保有遗绪優焉长怀庶几日覩亭焉其间於以解颜松风四来飒然佩环求声审形即象显义衣冠九原默如有契我畜我储手泽之余玉海青箱时卷时舒山高水深焕发华采嗒然忘言瞻寤斯在问所见者何有何无天君湛然造化与俱古往今来百世一日先德貽谋愿言无斲

养素轩铭

苕溪严氏质夫以养素扁所居轩要予铭诗其间养者顺而不害之谓故养颐见於易养气见於孟子养之时义大矣哉质夫以养素名轩有古人尚质之意斯其得所养者哉不揆瓦石辄为之铭曰

泂泂苕溪枕於东吴隐士氏严曰适有居不雕以华爰简而质以藏以修以偃而息至行内充动无不宜有如食饮匪渴匪饥简秩静幽琴樽芳洁山高水长寤寐先哲从容周旋泰然安然於斯乐育以全其天世途营营斲丧本实所养既亏匪惕则忧泛观静思我其焉如抱朴全真往古为徒令誉靡忘百岁一日铭以申之有永无斲

爱日堂铭

同郡许孟和年踰弱冠刻志好修从名师讲学为文章能中律度洪武癸丑以秀才徵至京师羣试吏部既中选调官有日矣来谓予曰某幼失怙恃所以抚育而至於成立者大母某氏之力也明发有怀德报罔极若吾父母者既不得致其亲亲之恩矣幸而大母之在则於奉养供给其可不如吾父母乎於是扁大母所居堂曰爱日而化州石隆知县慈溪乌先生江西参政天台陶先生文以实其事所以勗孟和者甚至窃闻古之居室及盘盂几杖皆有铭先生幸铭诗其间庶几夙夜惕励以无负先达长者之训哉真乃为之言曰懿哉孟和之心也夫爱发乎

情根乎性触物而动有爱焉弗爱焉爱而得其正斯其知所爱矣哉惟日为衆阳之宗自明及晦迟速进退行有常度人之於世也幼而壮壮而老老而衰则固随日而变矣然而昼夜之间日之出没循环不穷今日犹昔日也民生几何侵寻常迟暮今日宁复如昔日乎此孝子之於亲其爱日之诚吾知其不能已矣且亲者我之所自出也大母者亲之所自出也吾亲既溘先朝露矣大母而在则吾亲也而况慈哺之恩有终不能忘者乎爱日二字昔人尝致意於其亲而孟和独为大母言之君子是以知孟和之心孝子慈孙之心也因铭於堂之户曰朝以出夕以入日在桑榆短景急铭於牖曰皓日行空不常在萧萧白髮朱顏改铭於壁曰阳春熙熙奉甘旨大母在堂顏色喜铭於几席曰心所安意所便寝处食息罔或愆嗟哉孝孙盍勉旃大母壽考兮用介百年

自牧斋铭

四明塔山俞氏寓维扬江上司微巡之职属时隆平境内无事将扁其斋居之室取易筮之得地山之象筮者曰吉在易谦卦初六之爻辞有曰谦亨君子利涉大川而其象曰谦谦君子卑以自牧也夫谦者卑抑之义君子以谦卑自处以之涉险犹无不济况平居无事适寝处食息之室者乎於是以自牧名斋而求铭於予为之铭曰

地中有山易卦为谦往圣取象义密词严有美君子卑以自牧岿彼斋居迴谢流俗俗尚之趋崇高跻攀既蹶而跋罹彼险艰天道好谦而况於己处下就卑斯其可矣至理存心适彼自然命分之定孰违吾天於时隆平鼓桴息警泰然安居静存默省左图右书从容舒徐朝斯夕斯厥功焉如曰无不敬曰谨其独贞吉令终永矢弗告

竹屏铭

予客居都中属邑之临淮清苦日甚既二年始借署察院营所居於厅之东房旧床敝席缚竹为屏风糊以纸而系之铭云

朴俗随宜坐卧偃起夜气之存默契玄理三载从容一贫如水淮海天涯梦魂千里

屋舟铭

茫茫江海匪舟曷济尔屋如舟吾其焉逝以藏以修以泳以游蝉蜕春融乐以忘忧时焉琴樽时焉诗酒天地浮沕於吾何有盼彼川泽我居我家匪隆以崇匪肆以夸岁月悠悠吾生犹寄或泛或浮廓焉无际至理忘言湛然心渊鸢飞鱼跃其乐也天孔道不行乘桴是托懿哉而人圣贤可学

东园庄铭

淮水东作尔室去浮华敦本实伟儒先聿来居神孔完味道腴相原田比而栢痔钱罍力黍稷

岁之余仓廩储为酒食斯乐胥匪斯今追古昔有嘉客岂不悻书帙编以永年金石谐宫商宣
藹时髦佩衿肃道是传岂私淑地之灵惟其人俯仰间孰主宾彭泽翁杜陵老今名昭古仪表
庄东园契我心山增高水加深终厥身保贞独作诗铭矢弗告

杖铭为徐景顔作

挺兹嘉植好尔正直以扶以翼爱纤尔力返乎颍水之阳用以适进退之宜全君子之德

灵壽杖铭

得於华岳之颠即诸莆阳之野时止时行无或我舍学变化而为龙恐不得而从也

风木亭铭

国子生平阳董璿仲石年十有二时值其父伯高翁弃世既葬慨其亲之弗得养也筑亭山中
扁曰风木岁时祀享以致其思云夫木欲静而风不停子欲养而亲不待此臯鱼答吾夫子之
言也鱼在春秋时舍其亲以去不得仕於其君又弗克致养其亲志愤心激卒以死亡人至今
悲之夫先王制礼本於民彝适乎情文而莫之过也若鱼之死君子以为过於中矣然其言也
虽圣人不能以非之而当时门弟子亦有因是而归者则以为情之至也世言事亲如事天起
居温清惧其违也滫瀡滑飴惧其缺也不幸而天命有定人事之不齐则亦致其罔极之思而
已养之不及思之无穷此风木之感所以不能自己者而况於松柏丘陇体魄所藏神明所安
俎豆樽筵之荐如将见之者哉范文正公为参知政事告其子曰今而得厚禄欲以养亲而亲
不在矣而欧阳文忠公之表泂冈载其父崇国之言曰祭而丰不如养之薄也文正少贫不能
备养文忠少孤不及於养是殆有感於风木者二公既登政府皆以公师之贵赠及其亲国家
之恩九原必及岂虚也哉仲石於此有事焉勿忘焉显亲扬名以无忝所生斯足以慰风木之
悲矣使夫日改月化忽焉不加诸心岂人子事亲之义也耶虽然仲石之父歿矣幸而有母存
焉夫不及养其父而犹足以养其母所以不忘其父也孔子曰生事之以礼死葬之以礼祭之
以礼人子之於父母各尽其职之所当为而已彼有哀毀亡身若臯鱼者何容心焉为之铭曰

岵斯亭山之麓肇嘉名曰风木木之生有本根植以培枝叶蕃风飏嘘气烈烈撼以摇惨摧折
人之生本厥亲大义全重彝伦命短修生死诀养不逮痛呜咽霜露降祭以时酒醴冽牲庖肥
攀松柏盼泉石心悠悠思罔极精爽邈音容遥长夜寂不复朝伟臯鱼古名哲情莫伸并殒灭
繫名言我所师感由衷曷不悲孝通神善克报我作铭申以告

杞思轩铭

永嘉王綬廷采以国子生奉上旨分教中都扁其所寓轩曰杞思予尝过而问之曰魏诗之三
章孝子行役登山以望其亲自父而母自母而兄序其一家之亲设为念己之言寓其思慕之
意庶几以亲之心为心者廷采越在畿甸去家三千余里念母而不以及父其於义何居廷采

曰魏诗之孝子自其亲在者言之尔吾生十閱月值吾母某氏弃世抱养为姑诸父取以为子年几三十吾父曰綬吾适嗣也而为弟後可乎使归而复诸正侍养左右而吾母之声音顔色莫之识也夙夜寤怀庶几如吾母之存焉此岷思所以名也予应之曰可乎哉夫思发乎情人莫不有所思思夫宴安华好则为宫室饮食舆马服御之奉思夫功名富贵则有公卿爵禄之求是皆非所宜思也若乃母子之亲念一气之分慨九泉之邈倚门失望陟岷兴思有如吾廷采焉者此天理人情之至也魏诗亲在而致其思廷采亲歿而致其思亲在而致其思亲可得而见也亲歿而致其思亲不可得而见矣使夫廷采得如魏诗之孝子行役而归其庆在堂起居孝养宁有慎旃无弃之辞也耶廷采幸而得致养其父不幸而失养其母此岷思所以终其身无穷也扁焉而朝夕观焉其亦见廷采能用其情矣哉虽然孝子之於亲不徒思而已也昔吾乡先生袁文清公生六日而孤母夫人史氏寢疾形神欲离以公在乳母襁褓中犹注目焉公既长念之不置屡形於言及贵为内相史氏得赠陈留郡夫人文清太师越国曾孙外家史氏世相封王为四明盛族公既绍承华阅荣及其亲燎黄山中缙绅君子以为其母庶几不死矣夫扬名显亲士之所谓孝也廷采成均之望行将大用所以兴怀名哲迪光先绪者不在兹乎岂曰恋恋於陟岷之思也耶为之铭曰

言陟彼岷言思我母彼天者何曷不眉壽我生之初厥声吟吟厥月甫旬罹此毒荼婉孌诸姑慈养育抚谁其子我言有诸父厥既有立以书以诗寸草春心熙熙春晖椿树在庭霜雪愈劲嗣续之传言归於正滫瀡旨甘克敬克恭而母不及涕泣焉从漠漠重泉冥冥幽隧隧而相见怅莫之致惟山有岷载陟载升言致其衷天高气晶盼睐踟蹰以丘以壠宿莽其萎宰木斯拱大孝终身着日存心有扁者轩肃然如临哀哀劬劳欲报罔极奉以周旋德礼无斁日月易流寢兴遑遑恩需锡类不显其光以孝移忠惟古名哲我作声诗言笃其烈

来德堂铭

平阳林与直敬伯氏故处士文卿之孙敬伯在总角时值其父彦晖有事行役而文卿以大父之尊抚之至而教之笃也文卿即世祖母程氏继承厥志如文卿之存与直亦感激思奋从师取友受春秋经贯通诸传学正而文会程氏继歿买山将合葬且构堂若干楹为庐墓计适朝廷诞兴文治与直以俊选至京师入成均为上舍生奉上旨分教中都将二年而大父母之■〈穴上之下〉竟弗及临罔极之思不知涕泗之交颐也将告归墓堂下期尽其心焉而助教先生樵李贝公扁曰来德且着记以勗之予闻之作而言曰先生可谓忠厚之至哉夫德本诸性分者也而谓之来者岂自外至者耶盖即其用力以底其成功用以迪光前人垂裕後昆尔譬之木之生也有本培植而生息之则其末益盛水之发也有源濬决而疏导之则其流益深人之生也本之以仁义持之以朴茂见之日用彝伦措之功名事业高明正大之规深长悠远之虑不止一世一人必至於百世子孙曾元以至於云仍无穷也後先相望大小一致丰融而醴郁沉浸而涵育德之来也可胜用哉若稽林氏系出泉南在唐时名攢者为福唐尉後以五季之乱徙平阳之四溪而析居於岭梅岭梅之族始於宋参议遵治行倬着有名於时至其子季伦以直道晋司谏省轮对上殿长疏短劄士大夫传诵其後有名望之尝知道州为名太守望之子太玉入元由郡博士至建德推官奕叶相承衣冠蝉联而文卿以建德子虽不克享有世祿而从容自适以教孙为已任际今圣世敬伯受业成均承先生长者绪余被菁莪乐育之

盛珪璋闻望非一日矣兹又将从其父彦晖依大父体魄之藏以居思其志意笑语居处与夫所乐所嗜神而明之玄德升闻嘉祥沓至振阙下之家声艷谱牒之光荣者不在兹乎诗曰无念尔祖聿修厥德敬伯其有焉庸敢本贝先生命名之意而为之铭曰

粤惟林氏泉南肇居由福唐出系绪有初至孝显闻亲丧庐墓嘉应自天白乌甘露植表亭亭阙下着名平阳散处煌煌厥声惟参议公实为始祖大谏立朝克踵其武桓桓道周江海一麾建德决狱民以不亏闾閻之华善承善继百世千禩有引勿替惟敬伯氏绍志遗经以嗣以续惟德其馨自本而支贍谋燕翼天性民彝岂曰外铄岁月如流盍谨厥修厥德之来厥心休休其来何从其即何所浩然沛然孰竭孰御积之既育式厚以丰囊探券付以事以功皇天无私惟善有报人之弗力天曷以造人文交孚伊德之符诏尔子孙永终令图

兰室铭

兰草之香者也咏於诗载诸易春秋传纪之离骚经赋之隐人君子有取焉真以非材奉上命教授广信府道经玉山邑教授程先生德武要致之家岩谷间崇构秩然俯仰上下浅青丛碧可爱可玩皆兰云德武署其楣曰兰室是所谓托物比德者耶为之着铭曰

岿彼作室有兰其馨天风四来吐芳敷荣其芳葳蕤其荣炜烨灵根幽丛紫茎绿叶懿美哲人慎厥攸居眄焉华兹为德之符曰维援琴曰维纫佩菲兮弥章纷兮繁会相彼庸流一薰一莸不有君子其谁与俦盍懋尔功盍勉尔力朝斯夕斯以培以埴毋若申椒专佞慢悞毋若荃蕙化而为茅不流乎同必谨其独息焉游焉永矢勿告

荥阳外史集卷四十八

卷四十九

●钦定四库全书

荥阳外史集卷四十九

（明）郑真 撰

○铭

晚翠堂铭（并序）

予友单守道氏前朝宦族家於晋之临汾临汾密迩太行多幽崖穷谷固陰沍寒独行犇确间见长松离立偃蹇自傲不可狎玩而根深干硕苍翠郁然若有待者因喟然叹曰事之成就亦犹木矣其在於晚乎於是扁所居堂曰晚翠取范鲁公诗语也鲁公在石晋时由翰林登宰辅入宋以旧德仍居相位其出处大节未容轻议而於保身之道盖庶几焉从子杲求奏迁秩诚所谓躁进焉者鲁公之诗昭昭乎立身行己之诫至其後复以园花涧松为喻可谓深切着明也已使鲁公诸子服膺斯训宁有异时贬黜之命乎夫富贵在天行藏在已反而求之斯可矣且松之在涧谷一物类尔然而坚冰甚雪之变虬形自如则所以受命於天托质於地者诚非凡草木矣是故随时而变荣华之骤盛者也历时而不变质直而慤实者也土之生世以坚忍之姿致贞特之操不有耀於前必有闻於後不苟伸於一时必有济於无穷斯有得於鲁公之言哉守道厚质修仪而邃於问学以明经中选为国学生同门之士历宪台登省部官承宣布政使者相望先後而守道奉旨分教中都恂恂退让自齿韦布世之锦绮华好朝荣暮悴者曾不以动其心斯不亦古君子之道哉夫天下之物不期於用而自无不用况於士君子之学果足以为世用者乎积之既充养之既厚登诸庙堂为柱石为栋梁出类拔萃艷晚节之光荣其不望於守道者耶守道元故湖南宪副明卿之孙同知通政院事仁美之子以兵难失其母来京陵访求得之人以为孝云

有丸其松在彼崖谷岁寒雪霜蹇立乎独匠氏曰咨梁栋其材孰用其良维其时哉凡物之生纷纭交错萌者栢者或葩或萼造化循环柄其枢机盛衰生息厥理则宜人曰木公挺然晚节正色凌空沃兮其烈彼美君子有闻厥声惟气之清惟节之贞相彼宦途荣耀夸诩勇进疾登联翩步武反已植躬退然不胜咏歌声诗藏修燕宁寤怀先哲悔言在斯岁月迟迟寧不吾待冠冕非尊韦布非卑大器晚成福祿其绥草木英华托兴比德归哉堂居过者必式

白云亲舍铭

白云亲舍者国子生陈士方氏奉亲之地也在今永嘉郡平阳五十里南湖一曲其地有金峰灵鹫之胜而仪岳一峯高出天表龟山鴈荡冈连陇接映带远近或起而翔或拱而伏其外大

海盘礴一瞬千里风雨四时各极其变顾瞻白云常近衽席间如鸾如凤如象如马如车如盖如苍狗如白衣如玉叶金枝有不可胜状者焉土方之父南庄公年踰七十雅志隐幽樽俎琴奕日与白云相为主宾土方与其兄紘弟徽朝夕承颜问候备得其欢翁尝慨然曰吾其有子矣乎於是土方请扁为白云亲舍而助教樵李贝先生着记以为秉彝好德之良有得於古人之所同然者可谓善於立言者矣尝试言之云之为物陰阳二气之所聚也察五色以验灾祥则保章氏掌之太史氏书之盖即天象以验人事有民社者所宜谨也托物君子因其所见形诸咏歌至谓白云（阙）瞻者谢世离俗之云也若乃登太行而望河阳以为白云孤飞吾亲舍其下者盖其千里之远一念之诚随感而应有不能自己焉范文正公着其事於贞碑以为凯风孝子之用心诚有以知梁公矣若土方者其心梁公之心者欤然梁公登太行而思其亲在外者也土方居平阳以事其亲在内者也同者其心也不同意者其迹也不於其迹而於其心使梁公复生亦当谓其出处之同者而况师友之间见而知之不以喜谈而乐道者乎且夫父母者我之所自出罔极之恩不可量也土方少既失母今幸有父存焉存者养之终身歿者思之终身各尽其心斯亦可矣岂直溟然茫然自托於太空之浮云也哉土方清修谨飭而懋於为学洪武八年以有司敦遣入京师由国学奉上旨赐袭衣分教中都且将二年盖尝登庄周惠子之台鍾离国之故墟慨然而思泫然而悲者数矣是果不同於梁公欤孝为百行之首人苟不知之天固有以知之矣白云之垂象不在於土方耶诗曰惟其有之是以似之士方之谓乎为之铭曰

眇彼白云矗乎浮空时焉郁葱时焉寵嵒翼日以飞触石而起一气鸿蒙莫究终始变幻不时粲兮光辉普致神功同符化机惟山有云以近非远岵彼高居煌煌巨扁白髮尊顏穆然宴闲进退卷舒抗焉尘寰人曰耆硕必恭必敬介福维祺伊天之庆嗣世象贤堂构是图有仲有季或穀诗书起居趋隅诲言斯在拜舞肃恭烂班衣彩庖馘樽醴既旨而甘吹埙吹篪以雅以南俯仰山川白云在目寤寐寢兴矢言弗告彼云徐徐吾亲以娱心与神游冲然太虚大义彝伦保其遗体托物兴思庶几在此粵狄梁公言陟太行河阳顾瞻踟蹰旁徨万人一心万世一日是则是傲永终贞吉

落云亭铭

山林潇散之士随所遇而得所乐初不以物累也是故以天地为室家日月为户牖山川为阡域江海为界限俯仰大观物无不可浮云太空随时变灭何独介意也哉此无他物之在宇宙间者皆至理所寓也外之所触内之所得有不可以言语形容者特假云以见意尔不在於云也噫岂浅浅乎哉泗州博士陈先生楚宾世家天台尝行所居东园得奇石如砥其端有洼隙似砚可贮水楚宾曰吾少好古法书而业弗及竟今得此石岂造物者默有以相之耶遂凿沼於石之东构亭其上旁有松数十章高出亭表楚宾日往习书有白云自松上英英然飞坠几席间楚宾顾而乐之因题其额曰落云取李谪仙诗中语也夫造化人事相为流通君子之心造化之心也云行雨施品物流形乾道变化各正性命天下之理孰有过於此者乎云形而在下者也就其动静去留而察其所以然天地造化之精具矣夫理会乎心心融乎理悠然怡然殆与浮云相忘於冲漠之表其孰计夫咫尺之近耶昔曾点浴沂风雩咏归识者谓其有天地万物各得其所之妙然则楚宾之所自得者诚不在云矣区区翰墨之微尚奚言哉铭曰

茫茫太虚云其邈矣秩秩斯亨云其落矣彼云无心幽思愔愔曷不膏泽以雨以霖彼云有象变幻忽恍玉叶金柯以寓遐想德人天游神与道谋如彼浮云从容夷犹上有乔松下有文石一镜磨铜秋波湛碧泚笔如杠有锋有铍挥洒纵横以锺以王书有象形浮空五色造化之妙尔曾尔臆冥冥化机孰主孰持瀕洞鸿蒙曷测其微返视息声忘形物我云形焉如来降来下动容周旋其乐也天有如弗信请质幽玄

植勤轩铭

临川王熙谦和以植勤名其轩居之室中朝縉紳士大夫既论着其义行工部主事彭公德修以谦和同乡亲契之厚复请予铭诗其间予何足言之哉夫天下之事未有不成功於勤而废於怠者君子之植其身亦惟勤而已植者立也树也易曰自强不息书曰所其无逸植勤之谓也谦和以植勤名轩其知所植哉独不观诸木与稼乎植之既勤期以岁月材不可胜用穀不可胜食也一或怠焉弃焉其不至於芜废而茅塞也几希且夫学问之道无他亦惟其勤焉耳勤则成怠则废古之人皆然也今之人皆然也舍其怠者就其勤者学其有不成者乎谦和荆国文公之裔荆国之宰吾鄞也筑台读书其上（俗谓荆公台）遗风故蹟犹可考见其在相州幕夜诵及旦出而临政不遑栉沐韩魏公初不之知以少年远大期之其励志勤力有如此者故其文章学问高视千古致位宰辅建立制度以尧舜其君民其亦可谓命世之才矣世运既移故家乔木不与风花霜叶俱就泯灭迹其言而考其行殆有如声容笑貌之接者则所以迪光前人垂裕後昆者不在於植勤矣乎於是有所事焉勿忘焉如木之植稼之获斯可矣母若人之握以拔撼以摇也为之铭曰

凡民在勤勤则不匮有若植焉匪勤曷艺衆方嬉嬉我独孜孜母怠尔力母懈尔为如植於山如植於亩既息既蕃终善且有藤蔓斯除荼蓼斯薅黽勉有事匪劬匪劳厥功告成有居有食令终永图君子贞吉懿哉君子式克似之扁焉观焉厥鑑在兹若昔圣贤布我方册道尊德崇兢兢业业古往今来岁月如流惕然於心敢荒厥修堂堂荆公曰惟尔祖相业煌煌蟬聯珪组文献之传兹三百年子孙绳绳象其德贤惟勤有功惟善有报善植善获是则是傲

至乐堂铭

世言人子之事父母如天地然不得意於父母则为得罪於天地至亲之分其严矣哉夫使父母具存同跻上壽婉容愉色克尽孝养之心斯亦人道之常尔若乃睽违於干戈患难之时会聚於礼乐盛平之日食禄奉公历堦称壽縉紳君子举称其孝噫非天下之至乐其孰能与於斯凤阳行大都督府都事宋公原敬在元季时年十有四侍其父某母某氏宦游山东适青齐兵起原敬与其父母相失为卒赵某所得官军既至有员外陈礼从赵取以为子遂冒姓陈氏居淮安之桃源从师取友志学为务而於其亲至於一举足一举目之间未尝忘焉圣运肇开徵试吏部授潼川同知遂寧州事会山东朱岩来为倅具以其事告之且曰吾非陈氏不至此使吾亲尚存幸而得见死不恨矣岩为感动及以内艰去职遂为访问得其父母於历城以书来报原敬取以就养闻诸朝复旧姓因请扁其亲所居曰至乐云夫乐根乎性发乎情凡其应事接物适乎心意而形於顔貌者率谓之乐而况至亲彝伦之重二十余年之别一旦相聚以

生相养以全者哉若稽前牒老莱子之衣毛义之檄穎考叔之羹所以致孝其亲者不过平居无事时盖其常也至於霍去病迎其父於平阳朱壽昌得其母於同州二家之事固有由然他如周存杜羔之流以乱离失母所在後或得见与否则有幸不幸存焉然时之君子乐称道之诚以秉彝好德之良有不可泯者以原敬之於二亲滨死展转而得遂其安养孝敬之实宁不大书特书使天下後世歆艶而夸美之乎想夫云雷邁屯■〈六禹〉县兴难锋鏑之交玉石俱弃疮痍呻吟惊骇耳目市邑之聚所过成墟百口之家存无二三及天日昭明衣冠文物俛仰畴昔感慨系之矣其有父母俱全於久离濶别之余得见其子爵禄之荣而享夫福壽之盛者岂非人所难世所罕哉谓之至乐信乎其至乐也已乃为之铭曰

天壤之间渺然有身是身之自曰吾二亲恩斯勤斯天地比德养志终身期尽厥职命也不辰草昧氛尘奔走遁逃敢言逡巡骨肉之乖患难斯亟起居兴怀孰侍亲侧遑遑东西子我者谁有効之後庶其依归日月悠悠既思既慕视世茫茫孰殫情愫圣作物覩值兹文明守官潼川以宠以荣暨暨同僚薄言是诉所云周旋遽以忧去书来翩翩曰亲在焉生我鞠我克全吾天历城之阳驾言千里安车奉迎亲顔以喜怡怡愉愉上堂起居滌滌旨甘朝夕是须鞠躬奉教载色载笑儿今健强亲聿其耄昔相别时指天为期遇合非难曷云其迟昊穹至仁俾遂所欲眉壽燕宁百年是卜花诰需恩王言是思以锡以封粲焉光辉人孰无亲目斯为盛我刻兹铭以侈具庆

玩易轩铭

天台胡先生惟中世家仙居问学老成於书无不读而尤邃四圣之书尝扁其轩居曰玩易从容夷犹余五十年际圣运肇开有司敦迫就试泐闈考官永嘉孔公克表正夫樵李贝公琮廷琚读其所着易经义词理优等置在四十名之列铨部拟为凤阳府五河县学官五河中都畿甸国家兴王之地自兵燹以来学校废弛草屋如椽不蔽风日先生不以为陋宴坐其中观於天地之变化陰阳之消长鸟兽草木生育动植各得其所若有默契者於是仍以玩易揭之国子助教会稽钱公子予既为记之先生复使其子伯霖来求铭诗而真奚足言之哉夫象辞变占其道虽四其理则一玩者观之审也观其象而玩其辞吉凶悔吝见矣观其变而玩其占进退忧虞着矣学易之道何以加焉且易之为书广大精微孔圣读之至韦编三絶况学者乎自周子着为通书太极图说上承羣圣之统伊川程子考亭朱子又为易传本义而项公安世复作为玩辞由是天地鬼神性命道德之蕴廓如也朱子之学散在东南天台董公楷实为传序之正董公附录纂注天下学者家传人诵其有功於名教不细矣先生生於其乡得其绪余因其所学以推其至通乎天人达乎事物登名科典教席观象玩辞观变玩占由着以知微由体以适用非至诚之学其孰能与於斯尝试论之天地一易也吾心亦一易也万物不违於天地而天地不外乎人心即吾心以求之天地万物之理在我矣昔四明乡先生文元杨公着已易即诸心发明之说者谓与先天学相为表里然则先生之玩易其果於心矣哉想夫肃容正襟朝夕晤对羲文周孔如在目前俯仰上下端倪呈露动静语默莫非妙道精义所在其孰得而窥之真不敏无闻於乾坤六子之说不能通其义而神其用独念先教授府君尝治是经多所着述手泽具存而趋庭日远无所是正先生同年之契其尚有以教我哉遂为之铭曰

粵古初人文起庖羲画闡玄理後聖作有象爻動靜涵陰陽交偉宣尼繫精義質著龜考卜筮兆既成示吉凶事物來慎所從懿若人具全易相厥心與天一默齋居造化樞盼八極睨六虛龍馬圖妙探頤表里融上下察氣之神中夜存萬理備徹本根無極翁彼先覺發精蘊淑來學思乃精神以靈水之清月之明儼至和眇流俗詩以銘慎其獨

宜晚堂銘

宜晚堂者四明奉化江君濬遠歸隱之地也濬遠世為奉化儒族精於易學元至正間客游燕蓟公侯貴人樂為延譽得官閩南值時事既非解綬東歸作堂以居曰吾不復仕矣夫士之大致晚節尤難保身斯不辱身肥遯所以無不利謂之宜晚蓋將留連光景致其貞信自守之意豈徒杜陵咏歌一時取快於山水間耶昔宋四明鄉先生鄭忠定公端平罷相歸號安晚穆陵以謝太傅比之俯仰百年先烈如在濬遠殆聞其風而兴起者耶為之銘曰

長汀之墟黃甘輿區有美江君作堂渠渠翠屏在列寤對宜晚日居月諸樂矣忘返夕陽山西澹然清輝魚勞欲潛鳥倦欲栖曰動而靜曰作以息一氣靈神萬里凝寂太虛無塵幽思愔愔嘯歌聯翩愛適我心宦轍迷途豈不歷涉人生百年盍樹明哲粵惟四明文獻相望舊學甘盤太師魏王安晚言遄東山故里歲宴華予高風仰止母曰尚強慕彼華妍左顧右趨或戾或愆母曰未耄進不知止車仆馬蹶旁笑竊詆保冲養和允也其時令圖貞吉古今同歸

古鏡銘

知宿遷縣慈谿馮道常至鳳陽府白事以同郡斯文契家之厚訪予臨淮學宮將別出一鏡以示形制殊古予語之曰此世所謂壽光先生也不獨監子之貌亦足監子之心矣道常曰府推宋公廷臣所贈也公豈有他哉以某方宰百里欲燭理之明處事之精有如此鏡焉爾予遂解之曰道常可謂得公之心矣永以為好庶几在茲為之銘曰

湛光晶監妍丑塵莫昏貽永久正爾躬肅爾容皎若月行太空燭隱幽發欺蔽政日新矢勿替

友于堂銘

曲陽為中都畿邑山水清淑今公侯將相之地楊文裕作堂以居與其弟文質恂恂敬讓數十年如一日邑文學新安胡士安先生扁之曰友于不揆凡陋輒為之銘曰

懿彼君子有嘉德音奕奕堂構山高水深維爾伯仲因心則友侃侃怡怡豈不永久吹埙吹簫既樂且和酒醴具備式燕以歌施政一家同氣異體肅焉匪譁冠裳濟濟相在左右有琴有書造物與游浮雲太虛賓客斯集以篤爾慶上堂後先金玉交映春日載陽棣萼敷榮天風四來播其芳馨鴈鴻聯翩鳳鸞軒翥俯仰踟躕攸躋攸芋動容周旋其適也天光澤之遺保茲百年禮讓莫愆爵祿何貴彼有閭闔胡不知媿

行素斋铭

金华武义高先生思聪取沂国述圣公语扁其斋居曰行素周府长史为之着记会思聪以鄢陵学官谢事归里舟次淮汴要予铭诗其间不揆瓦石辄为之铭曰

至灵者人参天两地素位而行往无不利勿外是求盍反诸心貌其德音如玉如金富贵匪夸贫贱奚愠患难夷狄孰为吾病道之在躬爰厥执中曰居月诸优游从容彼索是隐彼行是怪欺世盗名沦胥以败或饶以致或幸而成蹈险弗测忧危兢兢我所弗为彼或自得善恶予师敢不自力斋居君子儒林所宗佩服斯言庶几中庸志坚信笃如射中鹄守以终身永矢勿告

永思庵铭

君子之思其亲惟其诚而已诚本於心根於理则其思也无穷焉一有不诚则人欲其间之矣其能永思也哉人非父母不生鞠育之恩昊天罔极於其简册之存则曰手泽存焉杯棬之存则曰口泽存焉况於山川宅兆神灵体魄之存其不慨然而长思者乎江西南昌郭子巡检伯高氏东南世家由宁海徙居东阳凡五世伯高踵学绩文卓有名声自其先府君惠实既没奉其母厉氏以居及以荐者登朝授山西绛县司征谒告归省则其母不旋踵亡矣彼其禄养不逮而心不能忘故於邑之槐风里二亲合葬之地构庵曰永思云噫不有以见其诚之着乎想夫岁时展省云深木寒音容之恋不胜蓼莪之悲绪业之遗凛然堂构之责以是而慎焉修焉则凡日用常行之间处事接物之际所以不亏其体不辱其亲者可不思所以自尽乎思而得之为而必力行而必遂九原之下岂不绥我思成而致福禄之盛乎诗曰明发不寐有怀二人伯高益以致其诚哉为之着铭曰

繄若人思悵悵岁则久月则深人之生惟父母养以娱我当厚风木悲孰致之邈窀穸见何期攀柏松盼泉石感动劳匪朝夕思乃精神靡宁庭宇构陟以登列饌牲纷俎豆享而荐骏奔走山穹崇水渟渟神灵来风冷冷思古人舜其孝终身慕我则倣慎厥修报所天奉先训肃周旋感则通诚之至福履绥俾昌炽告嗣续永乃心矢勿援貊德音

荥阳外史集卷四十九

卷五十

●钦定四库全书

荥阳外史集卷五十

（明）郑真 撰

○赞

苏逸民论赞

古有豪杰之士不屑为世用至於长往不返杳不知其踪视夫名声爵禄若将逸焉其逸民苏翁矣乎翁广汉人字云卿身長七尺美髯宋绍兴间来豫章湖东岸结庐独居辟废地为圃治蔬织草屨市鬻不二价日给薪米有余则资借贷负偿不介意张魏公浚为相驰书函金帛厉豫章漕及帅曰予乡人苏云卿管乐流也近闻灌园东湖非折简能屈幸亲为我必致之漕与帅乃更为游士造焉翁方坐茅檐补衲二人前揖问其乡里曰广汉人也识张德远乎曰旧与之识今已三十年矣曰上起公为相其识量何如曰忠心可矣但长於识君子短于知小人恐未了国家事尔因入携敝筐以杖击松花分盞以饷二人笑谓翁曰某等承乏帅漕得张公书知公寓此俾以礼招恐仪范莫亲故假士服以来已而旌旗填道力祈同载翁谢以明日就见挽之再三坚拒不能得至期两司交伺不至遣使迓之则书币家具如故而翁已往矣夫宋至高宗南渡易所谓穷则变之时也广汉之间哲人生焉其在布衣王伯将相之略未尝不朝夕往来于怀也国步孔艰张公出而以一身任社稷安危之寄慨念故交云泥迴隔岂不欲其陈力就列以共致太平耶逸民胡不翻然一出以慰其渴见之思耶盖当二圣播迁中原涂炭宗泽渡河之请沮抑至死李纲招抚之议贬窜相继陈东以上书见杀胡寅以直言不用豢养湖山忘国大耻南北之议固以不待秦桧有言而已蛊惑于帝心矣祸福起仆张公尚不能保其他复何为哉逸民盖有知乎此矣况夫有志之士犹有欲蹈东海而死不肯处小朝廷求活者则夫书币千里之贻漕帅野服之见逸民岂为时出哉呜呼布袍草履与承貂裘冕者孰荣荷锄举锸与当轴秉钩者孰贵然而张公诚可谓好善而忘势者逸民岂非乐道而忘人之势者欤虽然世有古今人无古今百岁之後山林江海之士庶几有如逸民者乎吾尚得而见之矣其词曰在宋南渡风教以漓功利所趋声应气随逸民氏苏蹇立乎独古有作者以嗣其躅豫章东来有屹其庐宵尔扉屨昼尔畦蔬以贸以易衣我食我傲睨呼啸我无不可煌煌相君翱翔青云函书以将颁我阍臣我本忘形岂以形累出虚入无溘焉如蛻相是君臣东南偏隅富贵如云我其何居吾侪小人附势逐利劲节高风邈不可致汉广之阳生气凜然九原可作吾其执鞭

九臯处士传赞

予读甬东史君行可所着九臯处士传叹曰呜呼是岂非有道之士乎哉夫身不外道道不外物彼役於物者岂足以语道哉晏处士居鸣鹤山之下讲授弟子暇则援琴松陰命歌鹤鸣之诗亦云乐矣而其所以乐者则不在是斯真与道者也昔者儒先君子论顏子曰非乐疏食饮水也呜呼其学顏子者乎作九臯处士赞

鹤山之墟至人所居神游物初逍遥虚徐彼鹤在林载好其音我歌以琴天地之心

予往年读书凤浦湖处士以事来获一再见挹其顏色听其议论有不能释然者後史君出示其传遂为之赞尝以质诸顾先生德润因循未寄数月德润自慈溪归言处士死矣斯文且不及见矣悲哉夫是非混於生前公论伸於死後人之於世无不皆然以处士立身累行其生也人固乐称道之矣其死也孰得而泯之哉予家去处士舍百里未克奠生刍以矢其哀乃书此以遗其子世有知处士者必为之恸哭而流涕云

杏林图赞

同郡陈君子云居闾閻中自其先世尝以医入翰林逮至祖若父复以其学游缙绅间名声益大以振君既克绍其传凡以疾来告者为之胥视不少倦发药率不计其直以金帛致谢者亦不以经意人以是贤之子云尝慨然自念曰道之在人初无间於显晦贵贱也使有一毫及物之心亦足以为道矣古之人有如董奉者庶几所谓有道而隐者乎而世之好奇立异者詫其卖杏一事指以为神仙清虚之流则亦不知用心之所在矣吾尝想其为人企而慕之早夜之间若有以见夫形声影响之接者於是绘为一图庶几千载之下将复有如斯人者焉予既聆其言披其图喟然而叹曰呜呼若君者其亦所谓尚友者乎夫时有古今道无古今道同则人无不同矣古今云乎哉以董氏之在当时为人愈疾而人为之植杏暨夫卖杏收穀而复以济人之贫之者斯所谓德於人而不责报於人者矣陈君聚药为饵而以济人利物为心斯不类於古人者耶岂必玩芳取实区区以追逐其形迹也哉覽者当有得於是图之外粉墨之工毋徒以议为也

瞻彼阳林有烨其葩锦綉纷披敷荣耀华生物之功流行不息睨彼树间有磊其实来贸来易以斗以升或肆其贪虺虎震惊厥积既多我储我贮以恤以调厥功斯着至人逍遥佩琚飘飘抚图寤怀千古一朝太丘之裔默焉心契死者可作吾其勿媿

采芝生赞

真尝读汉史志紫芝歌为四皓作窃疑焉夫人声之积者为言言而成文则其声之着也若紫芝歌者岂四皓同为一辞哉盖心同则道同道同则言无不同彼四皓者处则有违难之义出则有靖难之功所谓心同道同而言无不同者复何致疑矣乎四皓夏黄公其一也黄公为吾四明郡人墓在慈谿县西南六十余里至今其地呼为黄墓乡先生内厚翰斋王公尝为之赞载在郡史其子孙散居江之南者往往有之在松江者尤号巨族有名大有字原威者以采芝生自号其善学古人而无忝厥祖者欵按传记云土和则芝草生又云王者仁慈则芝草生是

则芝者固非凡草木矣彼秦何时哉而芬芳瓊丽在山林之间有以得天地之和者如此则於托物咏歌固若有如诗人之赋比兴也而其辞曰富贵之移人不如贫贱之肆志则玩世洁身盖可见矣故其卒免焚坑之惨逐鹿之祸者岂偶然哉世运代更昔之秦者今汉矣四皓者为时而出精神丰采动乎九重之上而一语之建足以定主器之危疑开前星之晦昧虽韩彭之功良平之智有所不及者然则其身之出处系乎人之治乱矣哉今生当太平之时固无事於隐矣顾乃却荣华而甘澹泊舍奔趋而事肥遯所以自适其适者无往而不得焉岂必居商岭之高擷三秀以取芳洁也哉且夫名者实之宾有其实者名必随之生以采芝自名其必深知古人所以乐夫隐者矣岁在癸丑真以淞江进士分教临淮与生相遇濠梁上见其神清气明诚不为事物所汨者固心敬之矣讲授之暇尝得铁崖杨先生大雅孙先生所着采芝生传观之其序事详实得太史氏遗法乃为之赞以窃附其後异日扁舟东归尚当与生入句章山中造黄公墓酌芳荐英薌其荒芜野草焉赞曰

古有隐民曰商山翁茹芝咏歌凜焉高风美哉而人黄公之裔诵诗读书尚友百世言瞻商岩岌其险巖紫盖亭亭日月光辉灵秀所鍾芳华可挹内美之修曷敢不力相彼俗流混然薰莸不有君子其与谁俦地下天高千古一节寤寐勿谖庶几遗烈

诸葛孔明画像赞

功盖三分名成八阵前修有言式赞其盛天弗愍遗巨星斯殒汉不复兴兹惟气运

又

炎祚日微三分鼎列羽扇纶巾天挺豪杰巾幗之遗彼甘屈弱千古茫茫仰止风烈

陶渊明画像赞

晋祚微冠裳裂柴桑翁抗高节三径存菊松列解印归自娱悦保厥身明且哲邈千载耿不灭

又

斗米折腰身口交累田园归来澹兮忘世逍遥冠裳高风雅致彼名利徒视宁弗媿

王羲之画像赞

觴咏风流衣冠仪矩胷涵万仞之渊神游羣玉之府一扫千军兔毫茧楮攻艺学以絶伦在名教为有补千载之下想其声容庶乎耳闻而目覩也

又

潇洒冠裳名家仪表神妙天成风云挥扫波湛鵷池光涵墨沼仰企仪容列星秋晓

梓潼帝君遗像赞

井络精英邦家显祀默相斯文思皇多士晬容穆如观者兴起信笔纪灵良有古史

真尝过武林登吴山梓潼帝君旧祠读宋高尚书斯得所着碑载开庆中贾太傅督师江上时向土壁驻夷陵比师南伐太傅命土壁援忠南土壁诣帝君问出师利害帝君降笔言看取车攻七月诗土壁曰车攻非七月诗也帝君言後当有验既而土壁断桥战胜宪宗晏驾太傅班师穆陵书车攻以赐正七月也以为灵云高公文章大家书事当得其实祠旧在蜀中自蜀破後士大夫顺流东下者随所在立祠至今遂为通祀然则帝君之为灵非一日矣神而明之其天下後世人心所归仰者哉若乃化书所传则妄谬不足信四明後学郑真识

高僧赞

宋李伯时画罗汉识者以为洞入罗汉腹中此画殆得伯时笔意使相遇石桥流水间殆悟其为五百中人也赞曰竺国西来风沙枯槁咄彼空山永谢烦恼色相本空真如大道神通无方幽深广浩世情贪嗔孰能我讨优鉢金莲一笑絶倒

邳州判山陰陈先生惟仁画像赞

以兰亭之风流倅下邳之守宰修容洁仪燕笑乐岂政教涵濡从容自在肆衣冠之俨如煦朝阳之春蔼殆将继明於前修集勲名於盛代耶

蠡庵杨先生建文画像赞

前朝太史盛代文学道德仪型先觉後觉出处从容俯仰何忤淮海天遥弦歌礼乐委羽之仙神交冥漠晚节言遄一丘一壑

汉四皓图赞

予家四明时友人胡先生仲厚为作汉四皓图得李伯时笔法及客濠梁以赠国学生王君以宁以宁入京装潢成轴名士大夫多题诗其上宦游山东每以自隨後自辽山还丽陵值予尚在濠梁复出以示为之赞曰白髮朱顏先秦遗老心同道同冰霜皜皜商岭巍峩采芝咏歌前星弗耀云如之何礼聘敬恭幡然而起万代纲常君臣父子羽翼之功汉祚以隆审图观像穆矣清风

鍾馗画像赞

骨格棱层形顏磊砢森髯下垂怒髮上起风霜凜然日触手指羣魅百邪震慑披靡有服厥辜解磔裂毁在当时为不第矢志之人千载之下貌之者知其为正直聪明之士

姜先生羽仪赞

道学儒宗文章英杰气量江湖襟容玉雪鸾鹄逍遥神游寥沅我怀斯人蓬莱秋月

唐十八学士登瀛洲图赞

世言海上有三神山瀛洲其一也室居琼楼玉宇其人多美门偃佺韩衆王子晋之流乘风御气倏忽万里後天不老凋三光好奇之士喜谈乐道长望而弗得至也若乃气运文明云龙际会儒学清显则以彼喻此其亦人情趋慕之至者乎唐武德五年太宗为天策上将於宫西辟文学馆收聘贤才得十有八人并以本官为学士秦王朝谒之暇引见讨论恩隆礼厚天下号登瀛洲云以其人观之若杜如晦之断房玄龄之谋于志宁之论譔苏世长之机辨虞世南之书李守素之谱薛收之方略褚亮之文辞姚思廉之节义陆德明孔穎达顏相时盖文达之经学蔡允恭许敬宗薛元敬李元道苏勗之才业智能皆足以承清光而敷宠命其所以致公侯将相之盛开太平以诏後世者盖在於此可但飞腾变化过托於神仙渺茫之域哉阎立本之画褚亮之赞藏在秘府人莫得见後來画史辈复托诸毫楮以髣髴其形似於是波环凝碧峯耸羣玉松柏重陰杏桃芳艷碧柳綠蕉灵芝瑶草琅玕之属参错前後四时长春有仰而睇袒而偃趋而前足举而手指者有隅坐听琴环席观奕者有捧卷欲舒援笔欲题盘膝携轴背阮侍立者童仆巾巾捧执趋侍服饰态度瑰奇僂异信所谓人间天上者也虽无以知其孰房孰杜孰虞孰褚亦足以见朝谒之暇幽情雅致所在矣武林刘公（阙）得而藏之旦夕间有若形声影响之接者是所谓慕古人而从之欤夫仙者虚无之谈儒者体用之学得儒以致理固无取於仙也然而瀛洲在海外无何有之乡孰若瀛洲之在禁籞密迕也耶仰惟皇上奉天承运开文渊阁以延臯夔稷契之士都俞吁咈致洪武一统之盛盖不止唐时十八学士而已以公践历中外通守东南名郡视唐记室参军之职固已远矣或者召还在论思献纳之列是今日之瀛洲即昔日之瀛洲也天下所慕向何如哉予不佞实於公有望焉乃追为之赞曰

鲸海瀛洲鳌戴山立神人攸居尘凡超轶昔在唐兴蟠李其植日表英灵龙姿凤质天戈所挥车书混一离两继明文馆斯辟学海波澄嘉葩美石俊髦于于攀鳞附翼内饌天厨恩赐洋溢更日分番青绫上直金匱紬封稽经考籍黼黻谋猷咸吐忠直跋烛畴咨夜分乃寂致治隆平於皇美绩圣有恩言眷尔鸿硕盍绘是容盍赞尔德缙绅荣夸谁其俦匹譬彼仙山丹梯峻陟驾凤骖鸾翱翔八极孰仪图之千载一日清风肃如炳丹凝碧自公委蛇图书碁奕美观殊形冠裳屨舄壽域春台燕笑游适贤哲於今寤寐在昔奉以周旋永作尔式

金郡公彦和画像赞

老成朴厚之质福壽康宁之庆生际两朝与物无竞杖履冠裳仪容斯称怡然三友之交傲睨岁寒之劲命琴鹤以自随阅西州之名胜灵台湛然太空明镜会一本於万殊恒反视而息听

噫是古之隱人君子保冲守正用以养修齡而安定分者耶

二程贊

伯仲一家豪杰千古道统正传泝於邹鲁襟容步趋前規後矩斯文在茲肅拜瞻觀

邵康节先生贊

理闡先天數探皇極天地之心妙寤默識安樂有窩漁樵紀述道德儀容肅恭履舄

三苏画像贊

眉山自三苏氏父子出而名声重於天下其始也欧阳公識之王荆公嫉之而轼辙伯仲聯登制科行躋臚仕終不免入元佑黨籍士君子之出处当何如耶然宋家南北三百余年文运实三苏氏扶助而振起之盖天使之然也噫此其所以为泰道离明之盛乎为之贊曰井絡之墟秀鍾人杰父子为三規重矩叠一氣之傳雄文直筆我怀若人蜀天秋月

洞玄传宗画像贊

世言洞玄雷法以刘真君为宗真君手蹴水轮足踏火轮金鞭白马周流上下代着神异今图像面黑怒目被髮披衣佩金环握宝劍者盖洞玄教主即真君变相用其法以呼吸驱叱者也其次则白玉蟾马玄君玄君马太守之女渡海不死闭目随风至泉州坠地叩泉之道观即其故宅也遂事玉蟾为弟子又其次则汪雷日薛洞玄丁松隱倪了然凡七傳盖宗教緒次以雷部有功於生民云夫祈禳之说尚矣礼记有坎坛之制春秋有大雩之文汉书亦有土人土龙之制盖国家礼典所不可无者也且天地万物本吾一体吾之心合天地之心吾之氣叶天地之氣則其感應之理固有不期然而然者若象山陆先生在抚州按方画卦默坐其中遂致雨泽之应盖儒者至誠之德有功於化育者如此符水词祝云乎哉今道家行持取其心腎相合水火相濟故有一氣原神之說盖有求於陰陽离坎之义亦其理所当然而神明有足依者耳以洞玄觀之嗣教者七人生稟殊形冠服异制然而动天地感鬼神則見其心无二致而法无二門矣为其學者宁不信向兴起者乎予忝以经史学托於圣贤之門於神怪未之学而先代祀典明文有不敢忘者忆在凤阳值夏大旱郡太守有事山川俾奕坛羽士用正一法弗应又来广信连岁不雨有言及龙祠江殿帥者迎至郡城亦不见答噫其非奉神者功行之未精事神者誠敬之弗至耶予兩以學官从郡府後尘瞻拜懇禱至於苦心焦思流汗浹背而不自已於是時也安得洞玄傳宗者出使肤寸八荒以膏澤萬物者哉夫方技之學史家不棄况洞玄之學為古今所宗乎虞文靖公之記王侍宸宋潛溪之傳莫月鼎其雄文直筆皆足以傳諸後世予何足以繼其百一哉而會稽陳宗澤求着其實至於再三因不辭而為之贊云

法道之傳先天後天後先挹橐籥洞其玄伊惟教主幻化雷雨我實真君何論爾汝誰其嗣之有白玉蟾冰雪肌膚肅爾具瞻婉變玄君女德之懿大難不死夙與神契曰王曰薛淵乎其心

豹关九重俨焉若临懿哉松隐吐吞导引衆妙希夷谷神玄牝彼美了然佩裾蹁跹龙虎名山
妙悟真詮我怀诸真太空寥沅飞劒龙吟清风明月

自赞

茫乎学海望洋而未之见也遽乎词林守株而莫之变也老病相仍痛心丑面虽曰尚有志焉
而不能不厌且倦也盖将上休致之章遂归来之愿待命听终庶以依先人之窆穸也

又

似我非我我无可可是不得我心之微曾何事乎容仪之琐琐也

荥阳外史集卷五十

卷五十一

●钦定四库全书

荥阳外史集卷五十一

（明）郑真 撰

○颂

拟进平益都颂

伏以圣德昭明诞着声容之盛戎功赫奕式陈歌咏之辞俯沥微忱仰干睿听窃以韩愈之在唐室诗载咏於元和石介之仕宋朝颂实名於庆历於惟圣代隆冠前王当羣凶鼠窃之秋正上将鹰扬之日九重拊髀百将痛心国有其人成命焕扬於有日子之於父世雖不共於戴天兵衆一临罪人斯得藁街悬首馘丕告成功河汉洗甲兵用扬善颂辄少殫於铅槧占上瀆於冕旒恭惟皇帝陛下纬武经文拨乱反正听鼓鼙而思勇士提斧钺以授元戎濮沿以北祝栗于南既德洋而恩着天保以上采薇以下复内修而外攘遂臻大业之成再见中兴之盛崖碑峰刻事未尽於形容鼓吹铙歌文曷殫於纪述庸陈斐讷冒进威严臣某蛰处海邦睇瞻京国周诗归美媿非比兴之才舜殿扬言共迓都俞之治

拟进平益都颂

皇帝在位之三十年壬寅夏六月逆臣田丰贼其主帅河南行中书省平章政事臣（阙）讷闻皇帝震悼玉音若曰兹予硕辅仗义服劳肃将明威戡定祸乱於社稷民人是赖大功甫集遽闻死事盡伤朕心其命将出师正名定罪肆诸市朝与衆同弃乃辍视朝遣使行賻赠之礼仍以其爵赐其子臣（阙）伏斧钺总诸道兵以讨之逆臣窜身益都凡百卿士罔不执干戈擐甲冑以敌忾复讎为事冬十有一月破其城取丰以献磔尸梟首其胁从者以皇帝命赦之山东平呜呼自古兴衰拨乱之君必有同心戮力为之辅佐故功光祖宗泽及黎庶伏见周宣王中兴北伐见於六月南征见於采芑一则曰王于出征以佐天子一则曰征伐玁狁蛮荆来威平淮夷曰徐方既同天子之功平江汉曰经营四方告成于王君臣上下之间所以称颂形容之者如此呜呼盛哉伏惟皇帝陛下天啓神断克清大憝宜有召穆公尹吉甫之流传之咏歌与周宣匹休臣僻处海隅澡沐膏泽目兹盛事不敢怀默自己谨铺藻拜手稽首扬言曰

天命我元奄有九域百十余年休养生息彼氓蚩蚩谁其萌孽朱巾冠裳奸宄攘功桓桓虎臣仗义秉忠起师陝右驾言徂东义旗攸指云行风从蹂淮蹙汴以奏肤功于时贼臣鼎鱼假息是怀是来匪诛匪殛有莽其蜂肆尔毒蛰负义贼恩衅成肘腋讐告上闻帝为震惊蠢兹小丑毙吾股肱国有常宪敢逃天刑哀诏诞颁精爽钦承嗣子忧莸斧钺是锡穹爵崇阶是继是袭

盍扬尔威盍鼓尔力以复父讐以纠王慝拜手稽首曷敢不虔誓师励衆不共戴天纁墨即戎以为尔先乃类乃禡乃翼乃前骑车纷纭戈盾委填如蝟如蟥如蝟如蚁百将万夫奋命兴起仰天大呼怒髮上指寇昏以顽遁逃益都益城戕戕临冲徐徐中权後劲左剪右屠如林之旅摧朽拉枯矫矫猷囚连连获丑势孤力殲元凶授首维彼攸居援抚而有犒乐休嘉裔炙行酒圣有明训咨尔相臣罪止其魁毋戕我民贸贸羣生播告欢忻奔走来迎岂曰逡巡筐厥元黄壶浆载路是旬是宣是煦是呕弛而贡输蠲尔征赋曰寒而衣曰饥而哺益人咸言祸乱疮痍王化弗沾历年於兹孰图今日汉官威仪载覩载瞻宁不涕洟告尔有隣暨於同类吾义是归汝强曷恃毋俟显诛以貽後悔弃甲来降涵育盛世大明当天昭回重瞳皇曰嘻哉裕乃考功青齐既平四方来同荐诸庙郊咏歌颯颯

至正壬寅岁真馆授凤湖方氏着为此文归呈先教授府君颇为之喜时方学为古人文章因俾録示执友张先生子西王先生叔载咸见称赏此不忍弃者以先君尝指授其体要故也

拟晋平王敦颂

维晋永昌元年春王正月逆臣王敦犯建康夏四月自石头城还武昌越明年今皇帝即位改元大宁敦移镇姑孰自领宁益都督及扬州牧皇帝集多士於廷诏曰天祚有晋江左中兴先皇帝抚运握图思与二三大夫暨万邦黎献经营图回光复旧物亿万年永孚休而王敦凭恃宠灵构图凶逆乱君臣父子之纲忘覆载生成之德称兵犯阙睥睨神器赏罚黜陟威福自己忠臣义士骈首荼毒先帝道隆包荒志存含垢隆爵重位宠賚有加而敦过不自悛不朝而去凭陵险阻大肆贪婪江汉湘沔吞并踵告肆朕嗣阼移兵内向矫制干命惟所欲为稔恶穷凶道路以目夫人臣无将将而必诛春秋之义也敦之罪人怨神怒朕不敢不正以继先帝之志敢以少牢昭格於庙率尔有衆底天之罚曰导（王）尔戮力同心肇造我家大义灭亲予惟汝能其领扬州刺史凡诸军之在石头者咸都督之曰峤（温）尔夙以贼谋告朕先为之备惟忠惟智朕实嘉之其都督东安北部诸军与右将军敦（卞）助尊以守曰詹（应）尔秉师以律辅成朕志其为护军将军凡前锋及朱雀桥南诸军实都督之曰亮（庾）尔为戚属国之安危与尔同之其领左卫将军曰壺（卞）尔出师其中军将军曰峻（苏）曰遐（刘）曰邃（王）曰瞻（陶）尔各以忠荃为国屏扞其咸以兵来卫呜呼尔有衆尚称乃干戈擐乃甲冑峙乃钱穀予惟汝望一乃心力慎乃禁令明乃赏罚予惟汝能毋戕不辜毋戮已降用命赏於朝不用命戮於市呜呼念之哉是月敦使钱凤及邓岳周抚等帅兵向京师皇帝出屯南皇堂遣将军段秀中军司马曹浑等及战於越城大破之敦以疾毙帝还宫大赦命诸将讨沈充王含钱凤悉平之发敦葬出尸焚其衣冠跪而斩之策功司徒导太保加殊礼西阳王兼领太尉詹江州刺史遐徐州刺史峻历阳内史亮护军将军峤前将军复诏某臣传之咏歌以貽万世夫出而治兵归而振旅舍爵策勲以数军实此先王之礼也畴敢不敷张扬厉以仰答休命乎於是拜手稽首为之颂曰

维我有晋自天受命君臣之纲万世彝训蠢彼逆臣恃功以骄如虎如狼如獍如梟夸尔甲兵恃彼徒旅悖慢叫驩凭陵险阻外招奸隣大其朋俦百千其师泝彼上流石城戕戕国之门户据而有之跳梁跋扈飞章叩昏要上不君涂戮将相秽驰腥闻大国十连请命致讨虎旅桓桓

刻期电扫惟我先皇道大如天赦其罪辜锡宠联翩位极鼎台任隆方伯中外诸军咨尔谟略敦党贼恩悖慢自恣天颜咫尺朝覲有违旋兵武昌肆出侵刺持国大权废置生杀汉江之浒湘水之阳狡焉思啓以封以疆駟报星驰匪有朝夕凶谋孔棘移屯内逼皇帝曰嘻岂不在予国有大法敢稽天诛汝导汝峽秉忠植义社稷之臣为国扞蔽汝敦汝詹聿大其谋暨亮与壺刈敌以刘惟峻惟遐曰各刺史奔走偕来咸顺尔使凡百卿士忠勇奋呼咸拜稽首其行于车马萧萧旆旗猎猎汝弓则张汝矢则接以战以守孰御孰当蓄鋭俟威锋蝟斧蟠天网恢张元恶殒毙逆党凶徒或殄或殪馘首安安执讯连连振旅伐鼓言归言旋帝有明言多士之绩赤芾公圭余岂尔惜咸拜稽首天子圣神以赫厥武以彰厥勲江汉砥平岳渎效职微臣作颂永宣金石

拟晋平苏峻颂

有晋咸和三年逆臣峻犯京师皇帝出居於石头城广州刺史臣陶侃及江州刺史臣温峤护军将军臣庾亮会於寻阳抗表请曰苏峻凭恃威灵肆为狂逆称兵向阙震动六飞毁裂冠冕睥睨神器忘天地之恩负丘山之罪春秋无将汉法不道揆之古义峻岂胜诛臣某等受寄方岳义不与峻等共戴天敢率西方诸侯暨三吴吏士练甲治兵奉扬天子之明威显命谨昧死以请遂趋建康督水军向石头斩峻裔割之焚其骨余衆悉溃京师平皇帝还宫大赉赐酺以侃为侍中太尉封长沙郡公都督交广宁州诸军事鑒为侍中南昌县公峤为散骑常侍骠骑将军开府仪同三司散骑常侍始安郡公自余爵赏有差谨按颂者宗庙之乐歌所以美盛德之形容而告於神明者故挹彼殷武深入其阻此诗人所以颂高宗也鲁侯戾止在泮猷囚此诗人所以颂僖公也伏惟陛下天造神断福威惟辟三军用命元恶授首而颂声不作其何以绍前王之休貽百代之则乎臣官为博士词业浅陋不足以形容圣德之万一然当反行饮至之时命爵策勲之日其可使一代之盛事无闻谨百拜稽首献颂曰

我晋中兴六龙时乘川岳奠灵圣神继之垂拱无为太和雍熙蠢彼逆臣恃其旧勲披猖不君提兵阙廷三垂震惊羣生靡宁甲兵翬云宫室荡焚六龙蒙尘桓桓虎貔如霆如雷（叶力之）奋扬天威我师既东秣马厉戎咸奏尔功师不时淹如火斯炎凶渠以殲伐鼓渊渊俘丑连连皇车言旋太常威仪凤盖龙旗皇心以怡天语都俞汝功汝谟万家之图兹矢彤弓服尔宠隆往即汝邦（毕工叶）长江汤汤武功洸洸咏歌莫忘

○箴

东园庄箴

人孰无居尔居斯陋适焉安焉何病何疚天地其庐万物一初日居月诸思与道俱东园茫茫爰即尔所以瓜以蔬以粳以稌尔勤尔劳亦曰有年贡税既登盍适尔天尔隣尔亲来萃来止酒既多旨式燕且喜相在几席有书有琴勿愧屋漏肃尔容襟凡物无常乐不可极母曰既艾怠肆是即流俗同污轆轤轮云盍完尔节盍固尔身稼穡艰难诏尔孙子崇本去华慎厥终始古之明哲曰卫武公抑诗作诫式鑒于衷言行枢机宜敬宜惧毗人司箴敢告仆御

巢居箴为周克复先生作克复左丞雪坡翁子也

眄彼巢居翹然林麓言息言归迴谢流俗维尔来止川谷其賒谋猷云劳式完厥家绸繆拮据
斯牖斯户蒙密静幽混沌太古相厥尔躬貊其德音令问孔昭如玉如金时焉抒毫以篆以隸
造物与游一枝焉寄维昔先公冠带立朝矫矫词林翔飞九霄燕翼貽谋堂构在尔盍谨其承
勿懈以弛如凤在梧朝阳斯鸣如鹤在松秋空迅征风雨时来飘摇是惧患难之虞式固尔御
冰雪光晶玩心虚明无安厥栖及兹欹倾粤若缙绅山陰氏陆以书为巢圣贤是最千间非广
一榻非卑景行先哲斯其庶几粉饰妍华纵奢长傲善终令图司箴敢告

荥阳外史集卷五十一

卷五十二

●钦定四库全书

荥阳外史集卷五十二

（明）郑真 撰

○骚

讼魃

一叶落兮蓐收行秋云雷屯兮解泽不流巫咸啓筮兮告我以由维兹之旱兮繫魃之尤骄阳
熯熯兮滌滌山川草木赭兮土石生烟涧不波兮井不泉载饥载渴兮心悁悁嗟尔魃兮兹何
愆苍天高兮无云赤地邈兮扬尘虫虫蘊隆兮如惓如焚土能蜥蜴兮匪灵匪神嗟尔魃兮何
不仁原隰昫昫兮我菑我畜杭稊槁兮黍稷枯朝无食兮晚无餽乏官税兮亏私逋嗟尔魃兮
斯何辜上帝好生兮鑑观下方敷衽陈辞兮维以永伤海滨广斥兮民流亡害民之天兮尔罚
有常星弧斯张兮河鼓其镗集鎔鄡兮招干将剥膏涂血兮衅大荒丰隆輶其震霆兮冽缺爓
其辉光决沧溟兮倾银潢驱长蛟兮舞商羊云蒸雨降兮纵陰闲阳岁其有以兮奏丰穰千秋
万禩兮奉圣皇

采药翁歌

慈溪紫阳先生徐君业儒而医以采药翁自号於是同郡郑真为之作歌曰

若有人兮青云兮锵琳琅兮斑其陆离服神浆兮饮上池妙造化兮刀圭慨羲农兮远而和缓
不作兮将安归欲登陆兮上天台跳梁叫啸兮多虎豺欲涉海兮访蓬莱虚无恍惚兮匪吾所
怀越山青兮冥冥越溪碧兮泠泠百草兮菁菁扬烨烨兮先荣独遑遑而求索兮历云烟而遐
征恐白日之云暮兮鷦■〈圭鸟〉忽其先鸣缤厥美兮充帟芬郁郁兮难窥相厥民兮是诒
俾壽域兮同跻邈予生兮駸駸嗜芎苓兮术参步徙倚兮云林灵彪吠兮孤根深迟予思兮愔
愔欲往从兮紫岩之陰矢吾辞兮穆如清风嗟若人兮其慰尔心

日晚歌

日落兮山之西云冥冥兮霭霏霏牛羊驱兮下来鸟雀翮兮欲栖松林寂兮烟火稀樵牧散兮
屋荆扉零露漙兮草萋萋望若人兮海之涯威仪孔秩兮德音弗违杜若为佩兮芰荷为衣架
赤虬兮骖苍鷖临清流兮陟翠微日之夕兮澹忘归椒堂深兮蕙帐低白鹤啸兮玄猿悲松桂
团团兮兰芷猗猗有琴在牀兮有书在帷若人归兮不迟彼世昏昏兮其如之奚

溪中吟

青云岵兮北山翠壁杳兮难攀渺双溪兮如带潏经纬兮其间潺潺兮漱玉扬扬兮皱縠荫纖草兮留青挺长松兮覆緑桂棹兮兰舟謇将行兮少休风澹荡兮睖予放予歌兮中流中流兮不远天苍苍兮欲晚四顾兮寂寥乐优游兮忘返擷苹蘩兮青青采芹藻兮幽馨悄空林兮无人谁与予兮目成濯纓兮洗耳循往迹兮遐轨潏世故兮相仍巢由不作兮吁其已矣弛予机兮丝与纶鸥泛泛兮鱼粼粼抗尘俗兮谢氛祲时荏苒兮秋复春白石兮齿齿波泠泠兮清泚澄予心兮空明咏考盘兮乐只

山中吟

山苍苍兮其高石洞■〈含牙〉衍兮风壑怒号豺虎啸兮熊黑咆沆寥惨凄兮谁为游遨山中人兮松乔其俦乘赤豹兮驷苍虬来歌兮来游相彼下土兮曾焉足以少留仰视兮青天俯听兮悲泉謇容与兮周旋却尘俗兮洗繁悃间关兮鸣琴雄飞呼雌兮啸以吟幽思兮悒悒伐木兮泝泝其音下土茫茫兮垢氛潏天地兮不分表独立兮秋云渺千里兮孔怀斯人怀人兮谓何哀乱丧兮实多挟秦弓兮操其戈纷行役兮孰恤其他圭组兮浮云怅胡为兮劳神曷不归来兮保尔真与猿鹤兮主宾结屋兮山椒月皎皎兮风萧萧归来兮逍遥千忧释兮万虑消

山中人

若有人兮山中居白云为佩兮明月为琚瓮牖兮桑枢清不挠兮皎不污孤竹之君兮清而癯赤松之子兮有虬其须姣独立兮檐除岁寒之交兮金石匪渝石磊砢兮径崎岖灵籁杂遝兮如笙如竽熊黑兮猿狙声惨惨兮悲呼山中人兮何如乐偃息兮踟蹰有诗兮有书深笔耒兮耕畬皎皎兮白驹不驰兮不驱时行兮时趋或卷兮或舒不求荣於爵禄兮不显着其声誉异炎附而寒弃兮匪朝满而夕除岁晏兮愁予风云惨淡兮原野萧疎兰芷秽而不芳兮荃蕙化而为刍盍韬光而袭素兮毋衒宝以求沽抚万类兮万殊登山临水兮於斯乐胥山之田兮可畦可疏山之泉兮可钓可渔酿秬黍兮为醪采笋蕨兮为菹醉擊缶兮歌呜呜乐浮生兮须臾仁义兮为庐道德兮为涂日居兮月诸怀千古兮一物与圣贤兮同徒矢吾行兮勿渝

祀田祖

琼靡兮椒糈蹇将祀兮田之祖折瑶草兮玉芝缤灵巫兮式歌且舞伊容仪兮孔庄精神兮以聚神不来兮我心忧神既来兮澹容与鸣竽兮吹笙铿钟兮伐鼓啐予酒兮樽罍荐予肉兮鼎俎皇穆穆兮以怡飒帷幕兮如语祥风兮甘雨长我稻秔兮介我禾黍螟螣兮去鼯鼠岁其有兮穀汝介景福兮纯嘏云旌兮以扬霞旆兮斯举明神兮不留心搔劳兮思凝伫千秋兮万古我有民事兮惟神之怙

祀蚕神

彼佳人兮淑慎其仪珠玉烂兮冠佩陆离肃步趋兮委蛇被僮僮兮烨乎珈笄洁石硕牲兮明
齐蜜为餌兮琼为糜香既升兮酒既醲酺神之来兮云旌雾旗纷进拜兮庭帷跪敷衽兮陈辞
春阳兮熙熙采繁兮祁祁万亩缤兮日滋蛭蛭蠕蠕兮蠢蠢蚩蚩载含载育兮妙造化之元机
匪神是赖兮於吾曷绥雪茧兮冰丝濯皎皎兮涟漪或玄或黄兮光采交辉为裘为裳兮卒岁
是宜匪神之惠兮吾将畴伊依斋予心兮是只奠予物兮莫违我民服事兮神其听之风扬扬
兮云飞神欣欣兮格思锡祉福兮繁禧乐千龄兮为期

凤湖辞

湖之水兮琼瑶明月皎兮清风萧萧若有客兮吹洞箫怅鸣凤兮九苞紫庭丹穴兮路远遥阿
阁圯毁兮岐山寂寥乌鸢吓腐兮非其曹殢■〈矢敦〉在下兮翔千仞以为高饮瑶岛兮鸣
赤霄千秋万岁兮谁能招圣人作兮文明灵池拓兮黄河清受图玺兮万国来庭中宫服斋兮
圣心晏宁伶伦正律兮萧韶九成湖之水兮瑶琼味如醴兮深且澄高冈兮峻嶒琼枝玉树兮
梧竹交青凤兮凤兮曷不覽德而来鸣符气运之重熙兮瑞王国之太平

望伏龙山

山蜿蜒兮委蛇孱颜崖■〈山上罌下〉兮天与齐崖嘘气兮云渺渺林蒸润兮雨霏霏水淙
淙兮涧底若流沫兮淋灔天地变化兮景光蔽亏云霞灭没兮烟雾低垂螭螭鼓舞兮蛇虬奋
飞嗟尔龙兮胡为乎涂泥望豹关兮岌岌怅踌躇兮有立枯蔓森兮垂髯老树撑兮奋鬣惨兮
冽震兮惛波涛春撞兮沧海急豺虎啸兮魑魅泣心沧茫兮欲归忽神雷兮破蛰

骑牛歌为史璜叟先生作八行太师

牛之色兮惟騂惟犁有妥其尾兮有莹其蹄尔力孔武兮尔肉甚肥匪以伏辕兮匪以负犁犁
牧野兮萋萋水洋洋兮有绿其漪饮尔渴兮饲尔饥有美王孙兮欲如之奚及春日兮光辉以
遨兮以嬉白霓裳兮青云衣佩铿锵兮缤其陆离行道兮迟迟王孙乐兮心孔夷岁云迈兮风
雨凄其唐虞世远兮将安归商歌扣角兮声正悲齐桓不作兮闻者伊谁白石兮斑斑碧溪兮
潺潺王孙兮清且闲驾尔牛兮往而还月皎皎兮夜未阑声剥啄兮扣关饌尔酒兮怡尔颜聊
优游兮南山

寓辞

予近得花乳石笔架形制颇异馆寓必与之俱盖八九年於兹矣至正庚子十月二十有五
日羽化而去意甚惜之既而叹曰物之灵者岂肯久与羈穷之士处哉因作辞以自解且招之云
呜呼汝其全真返朴於赤城之阳乎其甘心混杂於瓦石之场乎其没身沈渊以自晦藏乎且
登金门上玉堂以发挥尧章乎将涉江浮海泛沅逾湘与骚人墨客以翱翔乎将与贪官败吏
玩法舞文伤国俗而隳朝纲乎抑将与豪商大贾计微利於毫芒乎抑将与白面书生汲汲遑
遑钻风研雪以自激昂乎呜呼嘻哉兮我知其由山窗旦夕兮不尔休羈縻旅泊兮貽厥羞舍

我去兮恣尔游世路兮险巖贫贱肆兮富贵危悄彼老秃兮廓无依吁嗟汝兮盍来归

松亭乐隐辞上史金宪季衡相公

有美兮贞松舞青鸾兮屹苍龙栖浮岚兮晦霭洒飞翠兮涇蒙氛埃轶兮白日虚绩飒兮清风
繁至人之无我兮恒服和於令躬抗云霄之志节兮挺霜雪之昌丰孤亭矢其如棘兮谢琬琢
之精工美冠履以逍遥兮乐琴书之从容境与物以默会兮心与道其俱融昔彭泽之解组兮
乐天命以保终彼神武之挂冠兮求厥志之所从逸千载之遥遥兮矢精诚以遐通抚遗编而
想像兮切有契於深衷爰摅辞以达志兮振洪声之颯颯浩荡兮廓充会万理兮适厥中优哉
游哉兮培令德於无穷客有为招隐之辞者举酒以和之曰屹屹兮岩廊萃羣材兮树明堂吁
嗟乎公曷不归来兮扶国纪正朝纲淮海兮汤汤戈甲兮抢攘吁嗟乎公曷不出兮荡荧惑扫
欃枪赤舄兮朱裳执圭兮捧璋迪前人兮辉光千秋万岁兮奉圣皇

梅雪轩辞

懿彼哲人清而洁兮有植斯轩扁梅雪兮八牕玲珑夜未央兮琼枝玉树斓交光兮寂然晏坐
秩冠裳兮左右图书维有章兮纖累不容心纯白兮万理毕会默观察兮尚友古人思愔愔兮
乐天委命契其心兮维梅其馨雪则清兮二美合并保令名兮岁寒之交矢弗渝兮悠哉游哉
圣贤之徒兮

孤鴈辞

鴈飞兮南征茆独兮无情天惨惨兮霜露零日雝雝兮悲鸣悲鸣兮不歇彼矰■〈矢敦〉兮
中发跼云霄兮翅双折洒平芜兮毛与血故关邈兮峩峩北风萧萧兮寒水波彼羣侶兮孔多
悄哀思兮其如之何

紫霞洞歌十章

深林兰畹

悄穹林兮无人幽葩晬兮青春远游尘兮芳洁播清风兮芬冽幽思兮愔愔湘山杏兮湘水深
望夫人兮逾远怅荒芜兮九畹

方沼美渠

凿方渠兮成沼幻丹霞兮瑶岛绿衣兮绛裳来羣仙兮窈窕娱光渺兮目曾波朱明昼酣兮容
顏酡临风兮浩歌欢乐极兮奈何

晴峦修竹

层峦兮穹窿苍雪洒兮晴空望帝子兮云中拂翠羽兮涇蒙缥缈兮天风鸣玉鸾兮噤噤

雪巘长松

蹇长松兮山中连蜷夭矫兮如虬如龙白漫漫兮天雨雪凜高枝兮欲压嗟岁寒兮独禁春风
繁华兮吾何心

岩前古桂

桂树团团兮岩之幽西风萧萧兮天地秋黄金兮为粟沃清香兮万斛望天上兮广寒杂仙佩
兮珊珊深林悄兮尘迴挹芳妍兮乐清隐隐君出兮莫攀赋淮南兮小山

松下寒梅

苍髯掀兮古色玉顔澹兮的皪岁暮兮天寒列下上兮相看老偃蹇兮匪傲顾娇妍兮一笑冰
雪兮棱棱吾与尔兮忘形

南渡仙岩

苍山岿兮孱顔俯流水兮潺潺花草春兮斓斑穷千仞兮跻攀望佳期兮三山鸿飞冥冥兮不
可攀天风兮珊珊飒云深兮佩环

监如歌为胡仲章作

若有人兮词林之宗学海之雄彦自河朔兮止於瀛东默天地之运兮契造化之工吸河汉於
肺腑兮罗星斗於心胷合水火以为炉兮磨日月以为铜匪铅粉之敷拭兮不沙石之磨礲洞
晃朗兮湛虚空独幽隐兮开蔽蒙导融显兮发明聪擊愚昧兮啓盲聵澄一气之孔神兮耿一
心之与通四时五行兮循环无穷尽古今於一瞬兮备物理於厥躬彼林林之有生兮秉常性
之由衷贤愚壽夭兮贵贱吉凶生稟有偏兮物莫能同维兹监之昭昭兮爍精光之融融諒纖
芥之不隐兮孰有逃於形容羌无待於龟灼兮亦何假於蓍筒世溷浊而不清兮曾莫辨於珉
玕宝是监以自照兮审进退其焉从俯江水之如带兮聊逍遥於其中弹长铗以自歌兮托遗
响於悲风歌曰模范兮陶熔迴秋水兮双瞳镌班白兮成翁时不逢兮奚庸吁嗟乎监其如人
兮惧终蚀於昏蒙客有饮酒江上倚歌而和之曰天开兮九重圣人御兮六龙来多士兮肃容
昭至正兮廓大公吁嗟乎其人如监兮吾将致汝於天子之宫

白云祠

望碧山兮嶙峋慨松楸兮白云泉石閼兮吾亲惨音容兮弗见弗闻心郁结兮同白云之氤氲
灵相兮岩谷羌春秋兮蠲卜儿登朝兮得禄养弗终兮怅云深之埋玉精神交兮默默有感则

通兮匪褻匪瀆荐穀羞兮芳馨挹醴齐兮清泠灵之来兮云陰陰灵之驾兮云冥冥跪陈词兮
拜俯思罔极兮泪如雨锡遐福兮纯嘏（叶古）恍耳闻兮目覩碧山兮凤凰屹飞舞兮高冈
云荡荡兮天茫茫覩佳气之灵淑兮瞻山川之耿光

又

山气兮寵嵒蔼白云兮青空昔吾亲兮山中乐林泉兮从容孤儿兮膝下（叶户）华彩衣兮
拜舞别尊顏兮登帝所邈宦途兮西江之浒望沧溟兮极浦心搔劳兮思凝伫浮云兮天开安
车迎兮远来咏白华兮南陔匡庐揽结兮悠哉乐哉青春谢兮流年改叹人生兮不长在化鹤
归兮云海盼故山兮霭霭千里兮驰驱墨綬經兮返灵輿妥真宅兮遂厥初白衣苍狗兮变幻
虚无神游恍惚兮朝夕与俱攀松柏兮踟蹰扰驯鹿兮啼慈乌纷俎豆兮樽壶奉孝享兮清娛
荐予辞兮灵巫渺白云兮仙都

荥阳外史集卷五十二

卷五十三

●钦定四库全书

荥阳外史集卷五十三

（明）郑真 撰

○赋

安分斋赋

四明郑君本忠居闾闾中以安分名其读书之室淞江大府都事曹南吴主一题其扁淞江儒学提举胡公世佐为之记赐同进士出身慈溪陈公为之铭不揆瓦石辄为之赋曰

夫何美人之好修兮大厥身之所居顺天命之自然兮安性分於厥初朝发轫於仁宅兮夕弭节於义涂资羣材於文囿兮来哲匠於经郭定中正而植基兮敞寛博而成区洞高明而啓户兮通晃朗而为疏上戴象於乾文兮下履迹於坤舆动不虞於震惊兮静屹止於艮隅委巽顺而从容兮守兑说而踟蹰丽离明而烛照兮审坎险而进趋焕巨扁之高悬兮屹栋宇之渠渠曰吾分之所宜兮昭名实而非诬时藏修而游息兮纵一心之所如结白云而为佩兮曳明月而为裾邀清风以自涤兮吸沆瀣而充虚抗浮尘以为洁兮矫流俗而不污白日倏其西匿兮歛岁年之云徂恐修名之不立兮深笔耒於菑畲緇帙浩其渊海兮眇罔象之求珠探往古於千载兮遂厥初於三余擷清芬於博带兮保遗材於散樗佩衿森其林立兮来几席之于于藹和气於绦帷兮隸占毕於奇觚情悠悠而有适兮志黽黽而忘劬意欣欣而自美兮心澹澹而长娱夜漫漫而戒旦兮耿白光於虚无存一气之孔神兮邈品类之万殊圣贤慨其云远兮盍徵信於册书顔箴瓢而陋巷兮宪瓮牖而绳枢爰乐道而忘贫兮矢予心其弗渝使青紫之可拾兮宁能俯首於欺谀使轩车之可乘兮宁能诡获而驰驱时嘉橘之多枳兮兰蕙化而为刍泯规矩之员方兮曾何有於嘉谟彼枉尺而直寻兮不速戾於厥躬彼昏夜之乞哀兮不羞泣於其家衆皆竞进以贪婪兮繫利禄之图也纷侥幸而行险兮忘祸乱之虞也盍韬光而袭素兮不显着其名誉岂怀珠而欲献兮宁待价而求沽匪炎附而寒弃兮不朝满而夕除匪疾兮匪徐或卷兮或舒日居月诸兮於斯乐胥身世两忘兮前哲为徒諄曰彼美君子味道腴兮衣锦尚絅怀瑾握瑜兮乐天知命保康娱兮细故芥蒂曾何拘兮我微斯人谁与俱兮

希古斋赋

永嘉孔希直士清先圣五十七代孙精於篆隸扁所居斋曰希古其诸兄子昇先生尝为之记不揆瓦石辄复为赋之云

謗予後古人而生兮窃有志於好修岁月忽其不淹兮伤予心之优优世既降而日媮兮孰尚友於千載往者不可复续兮发来今之一嘅圣尼山之苗裔兮绍麟紱之正传簪笏纷其委积兮渺探颐於遗编岿齐居其藏修兮揭巨扁曰希古湛月镜之涵虚兮彻冰壶之清贮帙编笥为户牖兮罗翰墨为藩维披云於一扫兮五采斑其陆离繫人文之肇宣兮妙苍颉之体制造蝌蚪之有书兮揭日星而昭晰惨嬴政之遗祸兮灰竹帛於坑墟岂天弗丧斯文兮仅壁藏其遗余暨斯文之间出兮辨二体於篆隸符造化之自然兮曰象形与会意或钟鼎之峙立兮或柳薤之纷披或虫鱼之菌蠢兮或鸟隼之奋飞何峰山之野兮怅失真於枣木续浮云之变化兮徒惊骇於流俗披周宣之石鼓兮伟神物之撝诃蒐封禪之典故兮抚秦刻而摩挲懿中郎之名世兮刊石经於京国浹流传於远迹兮错咸阳之车毂嗟世变之狂澜兮迄篡汉之当途碑禪代与九锡兮犹夸诩於邳都右军兴於典午兮具波磔於八法阳冰托根於蟠李兮冠当时而称絶纷总总其异同兮爰昭揭於座陰彼扣门而求售兮曾何吝於百金俨面命而心传兮宛先烈之如见惟艺游之精能兮庶声华之独擅恣厥意之所极兮藹百世之翩翩划金错之剪裁兮森玉筍之垂悬树鉄门以为闕域兮求无弗与也瘞秃锥而成塚兮缤莫之数也纷偏旁与点画兮羌订正其是非也彼六书之於说文兮吾亦得究竟其指归也彼家鷄而野鷺兮於人情其何语绾蛇蚓之春秋兮曾何足以寤语抚衾席而指画兮謗弗寐而旁求拾柿叶以为题兮何黽勉而弗休心悠悠而自得兮溘尘氛而蟬蛻要鸿蒙太始以为隣兮聊优游以卒岁諱曰美若而人鏘琼琚兮毫濡素染乐自如兮白水东流矢勿渝兮希圣希贤遂古初兮

东园庄赋

航一苇之西风兮溘予至於长淮览鍾离之故疆兮煦晴旭之清佳凤城屹乎万雉兮耸帝乡之宫阙山川错以相繆兮俨屏障之四列美东园之幽胜兮控川陆之委蛇原田错其栉比兮藹林囿之参差伟儒绅之来居兮叶琼茅之吉卜夏屋屹其渠渠兮咏考盘之在谷松竹挺其修直兮植花柳之芬菲寄遨遊於上下兮豁乾坤之端倪冠切云之迢嶢兮纫佩兰之■〈彳 𠂔〉■〈彳 𠂔〉制荷芰以为冠裳兮烨衆芳之藹藹时杖屨以周折兮謗容与而踟躕仰高穹而俯幽深兮寄游兴於樵渔坐白石而枕清流兮辄漱心以洗耳眇逝者之如斯兮妙忘言於至理良田■〈禾 罢〉稭兮黄云秋璇宇清兮纖尘不留咏丰年兮黍稷默中心兮悠悠红鲜兮玉粒屹京坻兮斯积躬耒耜兮殫尔力充饗飧兮昕夕红霞艷兮白雪香银匙翻兮金盃凉燕语兮乐康自天锡福兮简简穰穰豢肥腴而烹飪兮云作苦於伏腊顾同乡而逆旅兮共相忘於迁谪纷子衿之青青兮扣函丈以相从倾珠玑之肺腑兮豁锦綺之心胷编简浩其栋充兮手校讐而纂辑嗣子恪其敬恭兮肃衣冠而趋席羌面命而心传兮有四圣之周经合象占而妙契兮发精义於考亭顾壽考与富贵兮诚吾生之定分年既登乎希有兮庶克归乎厥正邈古人之既远兮緬流风而庶几援彭泽五柳以自况兮委天命其奚疑日忽忽其既逝兮慨人事之错迕盼鸿鴈之回翔兮宁恋恋於兹土霰雪零乎交至兮北风其凉也闻华亭之鹤唳兮忽乎怀故乡也乱曰淮山峩峩兮淮水波东园茫茫兮其如之何筑室兮涧阿矢厥心兮匪他麦秀兮嘉禾乐吾生兮来游来歌乌兔兮飞梭彼君子兮不那

易安斋赋

尝读晋陶处士归去来辞有曰倚南窗以寄傲审容膝之易安噫是其随所寓而得不愿乎其外者欤身之安者心之安也心之安其与道相忘矣若处士者庶几於道哉予友会稽王文祥由胄监生为徐州萧县儒学训导扁其所寓曰易安所谓审其所安而尚志古人者也徐州博士嘉禾王先生执笔着记不揆鄙陋辄为之赋曰阙

昔典午之云微兮挺夫人之姱节耻五斗之折腰兮望柴桑而返辙抚菊松而盘桓兮用以适夫中心审容膝之易安兮曾何慕夫高深慨斯人之莫继兮歟流光之奔电想衣冠之神游兮俨风流而如见氏琅琊之苗裔兮夸阀阅於会稽学省騫其飞翔兮仰廷阙之光辉朝徙倚於文林兮夕翱翔於艺苑会万里以同归兮索话言於幽显芳菲菲其弥章兮声籍籍乎有闻闾萧庠之教席兮藹衿佩之纷纷愧独处此一室兮寤前修於往昔面牖户而坐忘兮聊从容而偃息谢纷华而不即兮漠虚静而怡然邈造化之端倪兮浩风月其无边岭峥嵘其在列兮河奔流其如带旷平原之千里兮览兴亡之大槩岿横宫之密迹兮瞻圣冕而巍巍苟修名之不立兮睠斯文之谓何保正气之清澄兮形穆穆以宁一悄尘氛之弗入兮离人羣而自逸湛灵台之如镜兮谅何虑而何疑若止水之不波兮屹山岳而镇之夜漫漫其待旦兮寄梦寐於衽席恐内慾之易萌兮终不忘於警惕怅险履之或经兮渺不知其所归倘患难之数膺兮愁坎壈而凄其纷利禄之遑遑兮羌蹈危而逢殆黯昏夜以乞哀兮曾不免於一慨彼广厦而细旃兮非予心之所希也彼金马而玉堂兮羌命分而莫为期也肆中情而笑傲兮信吾之安易也与日月而周旋兮謦予心之弗替也诤曰安汝居兮仁义其庐兮安汝止兮道德其履兮身孔安兮吾何艰兮安斯乐兮何媿何忤兮

延晖阁赋

天台李（阙）老成文献士也年几八十构阁以居有二子长（阙）次（阙）备礼奉养克尽其欢因取扬子孝子爱日之义命其阁曰延晖豫章揭平仲既为着记因演其义而为之赋曰

夫何仙都之双阙兮渺沧海之涇蒙岿层构之壮观兮眩丹碧而穹窿拂若木而增华兮耀扶桑之曈曨浩云衢之荡荡兮皎轮驭以行空配阳德之浩浩兮溢流光之冲融晃栏檻以洞射兮纷漾漾以融融孰居处而登临兮伟八袞之仙翁白皤皤其鬢霜兮丹渥若其顏童藹至和之煦煦兮庸偃息乎其中谢尘寰而不即兮爰内毓於贞中纷善庆之世积兮貽令誉於厥躬翩翩兮佳儿舞斓斑兮彩衣奉滃瀼兮怡怡介福祿兮维祺仰碧落兮青云梯夸父何追兮鲁阳何挥羲和揽辔而按节兮謦万里其焉归曰朝吾阳谷兮夕予至於蒙汜羌昼夜之晦明兮运循环而终始邈天地之无穷兮彼人生之能几信往者之莫回兮怅来者之莫继（叶上声）肃予听兮邈予音情窅窅兮思悵悵抚大椿之遗荫兮致寸草之芳心时矫首而遐观兮迫西山之駸駸繫长绳之百尺兮信予力而不任求大丹而莫致兮愁坎壈而增深念喜惧之交并兮能不为之先虑也谅神明之可告兮愿曜之少驻也毋径往而直奔兮盍躊躇而延竚也倘命分之永延兮庶表予之衷悵也金乌兮飞梭白驹隙兮奈何登高明兮望嵯峨舞鸾鹤兮婆娑协笙管兮阳阿揽余晖兮笑歌彼天鑑之孔昭兮斯精诚之所召光回转於檐隅兮留桑榆之末照望春台之熙熙兮詫晚节之荣曜睨不死之旧乡兮拥佳期之来到攸芋兮攸跻载

色兮载笑咏如冈而如陵兮探周雅之精妙与百岁以为期兮信夫人之为孝诔曰高阁兮苍
茫杳蓬岛兮相望伟期颐兮冠裳招暮景兮徜徉贞吉兮乐康春秋不老兮凋三光

双芋图赋

予教广信郡之明年上饶县学教导欧阳先生君赞出双芋图以示予语之曰物植之见於图
牒多矣若木之连理麦之两岐禾之同颖暨夫蓂莢屈軼华平之属盖所以示天地化育之盛
明国家休应之多有如此者彼芋载於本草虽曰性温味和特山穀野簌之一尔春秋之法常
事不志双芋之於翰墨何辱焉君赞曰浅矣哉子之为言也夫君子之於物取其意之适焉尔
初不计其精粗贵贱高下厚薄也郁蓂葵枣咏诸幽风先公风化所由也豆粥麦饭纪诸汉史
光武仓卒所赖也苹蘩蒹藻供祭祀之诚芝栴菱棋奉膳羞之敬彼岂非微物者乎而用之重
之也况芋之为物足以助五穀济万民者哉吾家涧谷中力作而归值天日卓午或风雪黄昏
饥苦顿踣之余视鼎釜则双芋熟矣家人以进属履焉以为天下之味举不足以易之也宋苏
公易简对太宗以为物无定味适口者珍臣止知薑汁为美欲作冰壶先生传而未果也太宗
笑而然之吾之於芋犹易简之於薑也作图以示不忘庸何伤哉予乃喟然叹曰呜呼先生其
有道君子者乎亚圣邹国尝曰饱乎仁义不愿人之膏粱其先生之谓乎遂为之赋曰

氏欧阳之名裔兮蘊美质之真醇若锦里之先生兮羌未底於全贫宅岩崖之险巖兮力硤确
於旦暮相厥时而培植兮肇嘉名而曰芋番土壤以如酥兮藹生意其敷荣如巨扇之在掌兮
奋茎叶之青青歛盆涌而坟起兮沃雨露之膏泽种一斗之累累兮纷连城而有获时霜降而
木落兮缤万宝之告成斲巨凿之鑱利兮謦硕大而充盈俘厥魁以奉献兮曰可食而可茹一
与两以配合兮妙先天之成数状磅礴而崑仑兮羌壅肿而轮囷外皴皴而隐鳞兮中洁素而
可珍类蹲鴟之可呼（叶去声）兮比龙涎而堪赋发妙思於词林兮艷芳葩於衷襟爨下急
夫薪蒸兮沸汤鼎之波涛气勃郁而上浮兮异灰熟之煨燠与柿栗而并列兮於以侑酒也屑
玉糝以为羹兮於以适夫口也释陇亩而来归兮曰吾道之艰难觥饥肠之雷吼兮庸厌饫於
一餐信朝夕以为助兮讵敢擬夫谷粟凉储蓄之所宜兮庶以资夫弗足充一饱以无求兮老
吾乐夫天年日淡薄以自适兮曾何慕於醲鲜爰哢喁於道真兮探至微於不味彼一筋而万
钱兮眄流俗而兴喟昔鲁直之山居兮指蕨汤为琼糜燃楮烛以拨炉兮问长夜之何其邈空
门之禪衲兮延长源而悟对语从容而啖食兮期秉钧而必贵安吾分而乐天兮緬前哲之遗
风畦一区而备预兮夫何患於岁凶徵画史以为图兮匪丹青之眩也托诗人以比兴兮用以
适夫游燕也即物以明理兮词弗夸也辑巨编以成轴兮士林之华也诔曰地不爱宝美产畜
兮硕大以充如璞玉兮以釜以鬻荐庖厨兮至理之存淡而腴兮维彼骄奢恣懽剧兮燂宰烹
炰玉脂泣兮彼乐以淫疾疾深兮芋兮芋兮适吾心兮

卷五十四

●钦定四库全书

荥阳外史集卷五十四

（明）郑真 撰

○哀辞

杨时敏拟招词

予年十余岁时受业郡庠时乡先生仲如杨公以经明行修受郡首聘训导弟子员其子名敏字时敏者侍侧颇长於予予以兄事之先生坐堂上上日进诸生取经史训迪之予懵若无闻时敏辄先解泐东部使者释奠於先圣庙下时敏升堂为讲曾子一贯之旨部使者称之会先生分教永嘉时敏从游湖海十余年间归出其文章议论予深媿弗及也越数年先生以恩命复起为温州教授陞泐东宪掾以守御衢州功进为照磨架阁文字时敏奉侍左右不懈益处江行省参知政事述律萧公闻其才行以便宜擢为都事驻兵处州参赞裁决为多时朝廷遣大臣经略江南时敏上事宜数十余不见省而退乃日取古人用兵之法穷画夜肄习之凡死於王事者有所见闻必列传以纪其事虽微贱无所间兵陷衢州时敏仓皇赴难道阻不得入东归於鄞遣一力至衢谗知照磨公以不屈病卒奉遗殖以归明年时敏遂以毁疾死时敏之死人笑之曰天之佑善人何尔子之不以壽终也耶呜呼悲哉古者人死有招魂之礼若所谓臯某复者是也盖仁人君子之用心以为不忍其死而犹冀其复生者以时敏学行根乎天性名声着於人人宜为大官耆老以显荣其身者乃今年不强仕志不及竟而死及之是犹大鹏之生南海人皆知其志在霄汉而终不见其搏扶摇九万里而上征也则於留连眷恋之意凄怆悲惋之情其能已乎予与君相知为深於是采宋玉大招及嵩里遗意作文以招之其词曰夫何美人之好修兮怀贞慤之芳心朝驰鹜於艺苑兮夕憩息於书林撝草木之芳葩兮谐律吕之清音孰非善而弗为兮孰非义而弗任履足迹於山川兮起天人之慕钦值气运之不淑兮促归驾之駸駸奄积岵之兴衰兮惨悲裂而莫禁致壽命之早夭兮伤予心之钦钦魂恍惘而莫适兮悬长夜之陰陰乃命神巫载縱秉旄注精高明冥而下招曰茫茫堪輿气鸿荒只六合上下广莫量只冥昭曹暗行恍惚只魂兮归来毋流亡只江海漫漫涛浪擊只鱼龙泳游变化不测只蛟鲤两足惟人是食只魂兮归来毋坠溺只山川阻深惨无日只陰气严凝冰雪积只虎豹磨牙恣所啖只魂兮归来往恐自贼只上下冥迷杂鬼怪只狂狴陰冥鉄关闭只兽首人身执器械只魂兮归来以远害只俗尚浇漓势莫御只缩志腆顏植声誉只贪婪索求纷疾妬只魂兮归来正矩度只丑状丽词失厥中只抽黄对白巧为工只浑朴斲丧谄媚为容只魂兮归来返古风只赤水丹山遶故居只琪树琼柯粲纷敷只朋来盍簪锵佩琚只挹彼注兹两樽壶只风马云车毋踟蹰只魂兮归来幽愤摅只汗简漆书遂研钻只二典三谟尚虞唐只明礼兴乐威仪彰只魂兮归来乐不可当只八卦设位人道立只探玄蹟微昭日月只麟史有经

赏罚明只褒善贬恶絜有程只雅颂颯颯叶正声只擷英吐华娱性情只史笔纵横撮要纲只大书备录发幽光只魂兮来归斯所望只乱曰邈人生之几何兮日月晷其迅征慨所思之不见兮沈寂寥其无声夜漫漫而靡旦兮宵泉壤之冥冥荐椒楸之芬冽兮播琼靡之芳馨思踟躇其凝伫兮蹶有感於精灵慈亲兮在堂渺诸孤兮煌煌明月皎兮悄空房秋风萧萧兮啸孤凰天惨惨兮路茫茫云归来兮毋我忘

胡子奇哀挽辞

予少时诵诗书颇能以文章自喜受春秋习举子业私擬数十题以应场屋一日之敌然学不得硕师徒守传注杂以讹言臆说虽穷日夜敝精神卒不能得旨意所在故战艺载北心志不通名闻不彰无有振而作之者同郡胡君子奇以是经有名湖海间近归自吴中往来予家因以所业示之子奇授以治经之要凡会盟征伐朝聘往来与夫君臣夷夏之间三纲九法所系有以发予所阖者予然後知学者用力之难而向之不获售於有司者岂不幸哉今兵革渐息科举复行将与子奇讲明是经庶几有冀焉者而子奇乃以亲老家贫求商贾之利以为养遇盗溺水以死呜呼岂将使予者终不得夫圣人之蕴奥耶谨按柳宗元着招海古文盖为崎岖嗜利远而不复者言之若子奇则志於养亲而非蹈险以为利者不幸而歿岂不重可悲哉於是采其意酌酒江海上而矢之以词曰

呜呼子奇泛滥汨没於九仞之渊乎其泝波沿澜穷万里以周旋乎其登蓬萊入玄圃以侶羣仙乎将叩龙伯之宫以容与逍遥乎将泣渊客之珠以织蛟人之绡乎抑将骑鲸挟鵬与江妃水若以周流八极乎抑将剖分血肉以葬羣鱼之腹乎沧溟浊浪高拍天下深不测广无边盲风怪雨飞腥膻鯨鰐奋鬣口流涎夺攘满眼森戈鋌子行不返胡为然云烟惨淡霾日辉蜃楼横空凌险巖椒崖銛銳藏危机怪罔出没邀以嬉性命倏忽成乖睽子行不返将安之金城岿兮东隅界九域兮限方区大中为路兮至正为途仁义为户兮道德为庐安汝行兮徐徐廓尔居兮蘧蘧朋酒兮樽壺孝养兮欢娱左图兮右书朋精粹兮为徒呜呼哀哉江海不可以托些盍归来兮宁尔軀

叶夫人哀挽辞

繫夫人之孔淑兮躬内则而精修室家夙其有归兮懿君子之好逑何壽夭之靡齐兮志偕老而弗酬怅鸳凤之失侶兮涕泣纷其交流悬明镜以自照兮吊只影於房幽纷华却而弗服兮永终始以为谋援古义以证今兮矢厥词於柏舟白髮兮尊姑顏承欢兮愉愉怅岁年兮云徂慎厥终兮靡渝惇惇兮诸孤笃教诲兮诗书求志业之有成兮斯不坠於遗余胡郤支之告变兮心坎■〈土稟〉而愁予谅天命之已然兮抚嫠幼而勤渠嗣续姁其好修兮务垦播於菑畲庶地下之无慚兮弛予心之舒舒时荏苒其不留兮迫暮景於桑榆忽息寂其无声兮惨不闻於呱呱呜呼惟义足以秉节兮贞足以固志宜壽介於耆颐兮一始终而勿贰纷锡类於人人兮守芳洁而自誓佳城岿兮崇冈藹松柏兮苍苍篆碣石兮琳琅发潜德兮幽光山杳杳兮水茫茫怀贞节兮不可忘荐吾悲於九原兮飒天风之悲凉

东隐处士哀挽辞

东隐处士（阙）君卒葬於东吴华山之南天台陈公（阙）言尝为文志其墓君卒後（阙）年当至正辛丑春予瞻覩君遗像乃追为哀挽词曰

云溶溶兮东山山中人兮皓髮而苍顏抗尘俗兮离市寰高风凜凜兮不可攀彼圭组与轩冕兮曾何心於其间慨一去而不返兮耿长夜之漫漫闻省想而靡得兮洒情泪之班班时荏苒兮春复秋郁佳城兮松楸生若浮兮死若休邈泉壤兮夷犹烟云兮繆悠岩谷兮萧飈风怒号兮水奔流嘯虎豹兮舞龙蚪沆寥惨凄兮谁与俦盍归来乎山中兮不可以久留岿东城兮蘧庐蕉堂深兮蕙帐虚夜鹤怨兮明月孤芝兰兮庭除荐琼浆兮冰壶奉孝享兮慰清娱风马兮云车思凝伫兮踟躕盍归来兮宁尔軀呜呼嘻哉兮山中兮不可以久居

舒自谦生挽辞

嗟若人兮山泽之癯道德为宅兮仁义为途通古今兮一瞬察周流兮六虚合幽明兮旦夜视生息兮斯须滋兰树蕙兮怀瑾握瑜老冉冉其已至兮履终岁而弗渝日出而作兮日入而居生优游兮遂厥初慨暮景兮桑榆大命近止兮吾踟躕其焉如先兆岿兮苍苍屹飞舞兮凤凰泉壤兮茫茫将永宁兮崇冈攀松柏兮依依生若寄兮死若归唐虞兮远而乐天委命兮夫何为矢吾辞兮孔悲激天籁兮凄其

王叔远先生拟挽辞

四明文献家称王氏为首自观察使三传至尚书公益大以着故山叔远先生为公幼孙公着书千余卷先生昼习夜诵旁通曲畅学既有成与其兄邵武教授并有声庠序礼乐之事多赖以取正至於人之美恶高下事之曲直当否品量疏列靡不克中世以此重之亦以此得谤先生处之裕如也予先教授府君与世寡谐与先生昆季相好为至六十余年不啻亲戚至於攻励之正规戒之严则各不少置人固以为非苟同者自予兄弟为儿时视先生如季父先生爱予兄弟如己子趋隅侍坐所以开啓其心志者非一日矣至正二十三年秋九月重九日先君与先生会饮於家因论及书檄露布之体与唐正衙内殿之制先生慨然谓予曰今世学者自科目外一切典故漫不屑子亦有志於是乎尚勗之哉予佩服斯言而未尝须臾少置於怀也越明年三月先君卒先生来护丧事吾兄弟恸哭之余以为先君往矣先生存焉以事先君之礼事之声音咳唾之间庶几如见吾先君者孰谓先君既歿而先生复相继以死耶自今小子其何所依归以为求教诲之地乎呜呼悲哉初先生得疾予时往问之曰吾死无日矣行与子诀既而以承祀属其侄以治丧付其甥其纲纪之者实惟其兄教授先生且命以啖赵春秋歛则於归全之际可谓从容於义命之正而无所憾矣而予所以拳拳致其爱厚之辞者盖死生大变人情天理於是至有不能自己者耳彼之生而致死之独何心哉昔尚书公卒袁文清公为述广招以致师友之义夫世有古今人有贵贱而道义则出於人心所同然者得其所同然古人之遗意且不在兹也耶先生将葬予以契家子义非他比诚不敢以服丧未除而故为默默也於是仿其制而为之辞其辞曰

悲夫人之奄忽兮溘埃壙而遐征视杳杳其弗见兮听邈邈其无声哀余衷之弗置兮潸不知其故排阊阖而告帝兮跪敷衽而历诉皇揆予之中情兮赫天光之下垂撫湘累之故实兮命巫阳其招之巫阳再拜稽首佝偻恭受挿竹垂綬藉茅荐酒乃下招曰大钧茫茫气化氤氲些雷霆硃礚阳火焚些固陰沍寒霰雪零些九关橐钥虎豹啄人些魂兮魂兮母上天些重泉閼深陰冥霾溟些敦肱血拇跳梁如獠些剑狱刀山汤火沸些苦海无航险莫济些魂兮魂兮母入地些沧溟万里广无边些椒崖凌波剡戈鋌些鯨鰐磨牙噓腥涎些空腹待飡恣所便些魂兮魂兮母危颠些山高谷深豺狼噬啗些虺蟒当道遗毒蛰些爰居驱风轰巨石些魑魅独足往来白日些魂兮魂兮远害贼些方丈蓬莱隔杳茫些瑶草琪葩露滋芳些羨门偃佺杂璚珩些矫首企足以远望些魂兮魂兮往尚羊些黄宇陵夷礼让息些羣飞刺天孰止抑些睥睨泚颡若讎敌些嗟此范模有典则些魂兮魂兮曷避昵些金昆玉季一气同些棣萼荆花烨春红些鴈鸿齐飞挟云风些中道弃捐心摧恫些魂兮魂兮友于雍容些家学青箱珍袭什些考释见闻殫撰述些曷分品列粲编帙些其大如海贵若玉些魂兮魂兮守先泽些宸画奎文烂龙光些鸾凰绫花云锦香些两制六题焕文章些赐笏颁鱼尘满牀些朋来盍簪罗饌席些瑶爵琼尊荐芳醪些魂兮魂兮乐不可极些重曰窃独悲此典刑兮天不慙以百齡佩儒服以终身兮祿弗承於宠荣凌逍遙兮空青驹皎皎兮鸿冥帘栊静兮帷榻清閨寂寥其无人兮惨猿鹤之交鸣洞恍惚而想像兮飒飈飈之泠泠瞻陇上之白云兮藹松柏之菁菁慨九原之不作兮将永固於深局业有传兮嗣有承百岁千秋兮尚文献之足徵奠芳椒兮有苾其馨归来归来千忧释兮万虑平

郭母严氏节妇哀辞

始予为儿时受业郡庠同舍生後至者兄弟二人皆恂恂雅饬进退唯诺蹈规矩如成人询之为郭子通先生之子先生治尚书才行闻一时由郡学训导分教处州青田县复署上虞县教谕未上而卒殆将十年独其母严氏节妇在焉尔间尝从其子升堂拜之指以示曰吾未亡人所望以亢郭氏者其在兹乎朋友人伦之一切磋之益子其尚有始终者哉自予父先处州教授府君与郭先生为同志尝以文字相激昂以是节妇视予为通家子弟因得与其子昆季相好为至退而聆诸先生长者之言则知节妇之行表表在人耳目者初先生既死节妇年甫三十即以死自誓时郭氏家日匮遂鬻畝田粧具养其姑舅教子若女又推其余以嫁夫之姊及舅姑先後以死则殡葬祭祀一如礼制他如夫族之尊而长者死无斂具复为之尽心焉是可以见孝慈之兼至仁惠之交尽矣呜呼贤矣哉盖尝以为世道决裂而守身立节多出於妇女之流彼岂有所授受哉良心善性理为之纲而利欲不得以入焉尔以节妇之行观之岂非天质之美而从容於义命之正乎世有伟然一丈夫慷慨自许至於困穷患难之际见利自私失身不耻者多矣闻节妇之风不有所媿哉予不逮事先生幸因其子以识节妇今节妇亦不可得而见矣不亦悲夫於是矢词以重其哀辞曰

嗟嗟节妇赫儒宗兮兰心蕙质善由衷兮婉婉淑修姆训从兮色丝纂组习女工兮嗟嗟节妇天立配兮相彼令居汾阳裔兮室家顺正职中饋兮胡为夫子溘于逝兮嗟嗟节妇涕涟洳兮膏沐谁容镜鸾孤兮吊影凄其吾何辜兮妇无二天之死莫测兮嗟嗟节妇笃贞孝兮白髮在堂壽而耄兮滫瀡肥甘承笑貌兮起居昏昕躬允蹈兮嗟嗟节妇内教修兮训子穷经道是求

兮夜窗继晷焚膏油兮长而有成心休休兮嗟嗟节妇家日匱兮货我土田鬻簪珥兮丧车连连
连尽始终兮百礼具宜锡尔类兮嗟嗟节妇至行全兮鼎养欲娱盍永年兮赋命短修孰非天
兮瞑目正终神游仙兮嗟嗟节妇音容杳兮晨霜摧萱北堂悄兮寸草春晖情莫报兮展也二
孤心永悼兮嗟嗟节妇窀穸藏兮我思古人卫共姜兮柏舟之诗吁莫忘兮趾美匹休日月其
光兮乱曰山杳杳兮雪冥冥嗟嗟节妇兮昭我令名溪泠泠石齿齿嗟嗟节妇兮百世其祀攀
松柏兮踟蹰慈乌反哺兮声毕逋幽局闲兮永固邈九关兮不可以诉些吾文兮孔哀北风吹
雪兮天上来

清静居士章（阙）哀挽词

（阙）若有人瀛洲玉铉鸣兮琳球江风飒飒兮空山秋吹参差兮悠悠参差兮絕响跨鸾凤
兮长往不返心默默兮遐想蹉道义兮靡忘勒苍珉兮发幽光松柏兮翠苍荐予悲兮浪浪

亡友王以文哀辞

吾乡异时衣冠之家角立雄峙盖自宋社驻蹕临安次翁王公以扈从自汴徙明遂占籍为明
人公後仕登两府参大政号中兴名臣故绍兴间四明甲第首称社坛王氏云王氏以文为参
政公後吾不知去公几世矣以文之父亨甫习吏事为会府史君独以儒业自奋尝曰吾不读
书取科第以世其家不名为人年几冠闻乡先生孙正甫训导郡庠扶丹从游遂通朱子诗经
先生既谢去归闭门卒業别取诸经传子侄皆天人废兴之奥典章文物之详会粹蒐辑学以
大成为诗义多至百余篇往往断以己意不蹈袭沛然无穷间为古人歌诗亦赡富清丽可诵
时寇盗繁兴朝廷日事往讨不暇右文稽古士大夫焚弃笔砚荒落不自振独以文日夜飭厉
矜喜见顔色或谓之曰子业殆精矣其如时何以文应之曰昔者周衰不复取士孔孟不以其
不取而不教也当时门人高弟亦不以不取而不学也吾志於学而已宁计时或利或不利也
耶讫无少懈意家素贫中更艰厄旧庐尽弃僦一室以居隘不能展步时受大家聘币教授其
子弟得俸以养其老母暨其妻子或时告不给则曰吾道盖如是也不为戚岁在戊申其妻桂
氏与次子及少子某相继以死以文拮据丧事辛苦交并复去之李氏馆得疾七日以死李氏
奔讣其母及其长子且具棺衾以歛李氏故儒家有礼教待君有加以文死卒赖其力云夫士
患不能植志志立矣幸而有成焉身可荣道可行也以文之存若是宜其掇科取名上以推荣
其亲下以荫休其子若孙可也乃竟生不遇辰死非其所老者不克养以终少而仅存焉者不
克抚以成其志果何如耶呜呼悲哉予既召其友会哭复略序其槩而系之以辞以文长子名
某母年六十余矣

世泽兮蟬聯嗟甘棠兮孰细弗传耿耿兮遗编朝斯夕斯兮于以永年栒篱棘兮战艺謇吾植
兮初志望君门兮长喟时弗利兮名弗遂名弗遂兮奈何悲秋风兮薤歌

凤凰兮双飞斑五采兮陆离凤翩翩兮失其凰空惆怅兮或在或亡矫千仞兮孤征双翮鍛兮
歔噤抑其无声高冈梧桐兮实弗食露溥溥兮夜虫泣

萱草兮北堂祝白髮兮壽康奉清欢兮菽水曰吾亲兮有子别慈顏兮去閭里瞻白云兮不远
伊迺朝倚門兮夕倚閭望不见兮心踌躇泪涓滴兮眼欲枯百年之望兮将何如

嗟若人兮空山息视听兮朱顏悲秋风兮萧飒惨流水兮呜咽蕙帐空兮青毡寒孤灯灭兮夜
欲阑尘编积兮满几寂无人兮孰呼起起青青兮佩衿情眇眇兮思冥冥魂逾佚兮弗返猿鹤
(阙)

前乡贡进士江漣儒学提举刘公挽歌辞

世称春秋之学四明为盛自宋侍郎宪敏息斋高公与其弟端叔甫各为论著有集注义宗二
书子孙以是经科第累世历官至内翰及法从者迨至太师郡王清敏存畊赵公辑为奏议而
其次子太社令山心氏复着法律编以辅明之赵氏传诸程时叔氏程氏复有本义或问辨疑
行世缙绅长者咸以为四明春秋学代不乏人前乡贡进士江漣儒学提举仲愚先生刘公居
甬东早与程先生相发明继又得闻前朝诸老渊懿故於春秋恪以三传为宗而折衷以文定
胡氏凡而会盟征伐之事朝聘祭祀之礼与夫宫室之兴革城邑之增筑器用之得失予夺山
川日星禽鱼之乖错变异指事立言阐微显幽其於正彝伦明分义辨几微慎终始盖深有契
於数千百载之上者用心可谓密矣故两名荐书三主教席东州学者皆曰非刘先生不可师
呜呼先生其得所受之正者哉予年十四五时游郡庠教授大名赵左承太守命以书币踵门
请先生主诸生文衡窃闻先生论议服膺久矣一二年来尝以书自通於先生之门先生目以
通家子弟嚶咻周渥将尽畀以平生所着会世事方殷忧恐不暇竟不得其一二噫先生今死
矣圣人经世之大典无从而取正悲夫(阙) 臯某复者(阙) 有不能自己者如此以先生
之学有以大吾乡文献之传後之人欲见先生而不得其声嗟气概如恋如慕虽不能起夫幽
冥閭寂亦庶几於没世不忘者矣予虽不及朝夕承事先生所谓私淑焉者乃考古者薤露蒿
里遗意为挽歌词三章且叙儒先经术之所自冠诸篇端冀同志之士复得以继先生之学云

经训专门学科名巨榜题恩私沾雨露光焰吐虹蜺词署声华接儒台步武跻百年成一梦江
海思凄凄

讲罢三籟席文成五凤楼流年尧甲子遗秩鲁春秋砂水全真秘尘凡谢俗流新铭前进士巨
笔待杨欧

两世通家契论该接绪余扫门期授业折简许投书云擲青藜杖风生玉佩裾仙游终弗返恻
哭意何如

送无服殇子如昇辞

夭殇六岁子郑如昇以至正二十八年八月十四日卒於鄞县甬东清江里故宋八行太师史
公六世孙运干文林菊屏先生故第始如昇之父某为史氏赘婿其外祖延叟父厚重朴素有
故家风甥舅之好不以门第自高相得甚欢居三岁生二子如昇其次也如昇之生头高而潤

额广而平耳大鼻长眉清目秀腹皤然以充足■〈月邕〉然以隆性聪慧善记尝授以古絶句及玉皇宝经辄成诵其在襁褓时我先教授府君尝抚摩之曰是子异日其有成乎先君既卒如昇之母归郑氏事其姑留如昇侍其外祖父母外祖父母年老逾耆壽且贫困无嗣族姓未有来继者故爱如昇不啻如己子如昇视外祖父母亦不啻如其所生颐指承顺为谨遇器若物必斂藏之曰是平日用者可斂为人所得耶伯祖父尝戒之曰吾将适城市盍与俱则拱对曰不敢离外祖母左右侍立不去稍倦则请从羣儿戏亦不他适也外祖父归出迎入报喜见顔色以他事被斥责则伫立门屏间待怒解至前笑奉如故或时恐惧不自禁则枕外祖母膝上相顾涕泣不止外祖父母益怜之盖庶几相依以慰其朝夕也八月一日患滞下疾医者用疏导法继进灵砂附子痛腹去痼者如四又惊惧疾益甚闻哭声曰是吾外祖母哭耶其母方归宁自抚视其子垂涕谓之曰以汝弗肯服药啜粥故尔曰儿岂不欲食饮但逆气上攻不下咽耳愿吾母无戚母曰汝欲弃吾耶曰儿不敢逮夜则曰儿首颈若无所属幸为一正之以双手入母怀曰寒矣儿手不知所措矣觉烦闷起坐辄卧饮汤而卒呜呼是其命之不辰也耶痛矣哉

按文公朱子制为家礼男女殯服为上中下三等未八岁为无服之殯哭之以日易月是所谓约古制而为节文非以其孩幼而直为简且略也昔延陵季子适齐葬其子於赢博之间还封三号而孔子取之此其礼之不敢过者也潘岳至新安瘞赤子於千秋亭为赋自广且以惨戚子慈为言此其情所不能忘者也夫礼出於定制情发於本心非礼无以达其诚非诚不能致其力於是二者而取其中庶几有以全骨肉之恩而不失古人之遗意者矣乃为辞以哭之且叙其槩如昇生於至正壬寅夏五月初四日亥时其卒也亦以亥时云词曰

尔生如寄尔夭如弃孰其主之外家不得以为甥予不得以为子呜呼哀哉曷维其已

松江倪处士哀辞

故倪处士家於松江之上生六十有六年杜门求志不事华好有子名衷字士恒处士使执经从明师受业既有成矣因去习吏事人鲜有知之者适（阙）亲非其时也耶以所业自献试文数篇缙绅大臣奏为工部主事士恒既归报且分禄以养人皆谓处士有子矣未几处士即世士恒闻讣而归祭葬尽礼既逾年奉旨来京师适某以乡贡待选相遇旅次出示乡人挽诗而同郡前进士樊先生文渊序其首谓处士以朴厚培基子以文章起家可谓知处士者矣按古有招魂之礼盖不忍其死而或冀其复生者汉晋而下於是有薤露蒿里挽诗之名有以见其悲惻爱慕深得夫古人之遗意者风俗於是而不薄矣以处士之生荣爵不及其身而亲见其子遭际盛时与名官簿固为积善之报矣然以士恒幸遂荣养遽抱终天之憾孝子之心思报罔极此乡人所为深悲之而挽歌辞之所由作也某虽不识处士然世言有是父者必有是子故观士恒之为子则知处士之为父矣而况樊先生之言又有可徵者乎乃歌辞三章以矢其哀云

松江湛兮碧波乐幽人兮盘阿集芙蓉兮制芰荷藹芳馨兮实多流光倏兮羲娥白萧萧兮双鬓皤仙游兮佩飒西风兮薤歌

凤雏兮翩翩冲飞兮九天华五采兮春妍望白云兮言旋白云兮故居惨庭椿兮霜风枯啼声兮呱呱嗟中情兮焉如

望北源兮苍树澹夕阳兮欲暮华表屹兮新阡安神灵兮九泉传家兮有子步青云兮尺咫隧典兮疏莹迟光耀兮林扃

洪进士哀辞

洪武壬子秋八月濶江省奉上旨以明经试士某忝以非才冠四十人之首而天台洪基伯均亦与在选列明年计偕春官过濶省入谢知贡举官始识伯均自是日得与论同年之契谒选吏部大臣奉旨以中立府国家兴王之地学校之职宜使诸进士为之於是真教谕临淮而伯均教谕定远定远去府九十余里兵革之余学校未遑兴复伯均到官僦草屋以居来学者皆新复之家樵牧童竖冥顽弗灵伯均昼夜训迪之困惫不少休间以事至府怅然谓真曰学校之法三年有成吾所教所学虽十年何济尸禄罔功吾其弗免於戾乎真应之曰某於临淮亦如是矣何啻定远哉夫学校开创之初岂可与规模素定平昔者比耶往见江南士子读书缀文习之已久一旦升之於学以之登巍科跻膴仕直易易尔自江以北谪籍之民视简册为何物哉教之可一蹴而就耶吾侪但当尽其力之所当为意外之事非所虑也伯均亦以为然然伯均家在二千里外父年八十继母亦且七十余矣家贫产薄妻子盼盼然而所得之禄不及以养竟以忧得疾因谓从者曰吾殆死矣乎以岁甲寅三月七日卒定远县丞王某以斯文之雅来主丧事剖其囊敝衣故书而已棺斂葬之南门外逾月而其仆来讣呜呼某尚忍闻伯均之死也耶悲夫昔昌黎韩公论欧阳生詹以为詹舍父母之爱而来京师其心盖将归为父母荣也虽其父母之心亦皆然夫詹以科第至四门助教固足为其父母荣矣然当时犹以仕弗通显为憾若伯均皓首穷经预名荐书仅仅焉为百里师至不及见诸用以死其父母舛望焉士君子之於痛惜果何如也始定远邑父老见学宫草莽中旧碑石成鳞甲头角状相谓曰意者学官其来乎未几伯均至咸叹异以为言之信今伯均不幸而死此其邑父老所甚惜者也呜呼悲夫真与伯均义同出处既为恸哭复论次如左而申之以辞曰

悲夫人兮好修锵玉佩兮琳球西风缥缈兮蟾宫秋凌丹梯兮以遨以游嫦娥兮广寒皖一笑兮相看桂树香兮飘丹赠一枝兮垂华榜於不刊工歌兮鹿鸣偕计吏兮玉京纷韦布兮金紫其荣胡命之不淑兮郁尔令名中京兮九天藹多士兮周旋奉华檄兮翩翩祀宣尼兮豆笾座席兮无彊纷衿佩兮执编寂寞兮谁怜奄伏枕兮忧纏神游兮忽仙胡命之不淑兮曾不以永年故乡兮天台菊松三径兮荒尘埃君不肯兮归来惨猿鹤兮啸哀双亲兮老矣曰旨甘兮有子望不见矣涕泪如水君溘逝兮孰呼起起凄凄兮洞房泣镜粧兮孤凰雏悲鸣兮欲飞翔睨云程兮孰将冷风凄兮中帷魂杳杳兮来归归尔国兮南山之陲庶斯文之不没兮犹髣髴而见之

故严陵晦岩居士王君挽歌辞

香炉之峰兮青摩空桂树团团兮山气籠嵒纷冠盖兮九重君胡为乎山中漭世尘兮緼緼澹

富贵兮浮云山葩开兮青春乐徜徉兮猿鹤主宾奉慈颜兮纯孝笃彝伦兮以心匪貌萱草北堂兮金蕤发耀疾其瘳兮延暮龄之榆照天降灾兮匪时我仓我庾兮饫尔饥白日兮乌飞老冉冉兮将焉之驾赤驷兮骖苍鹭歛仙游兮忘归羣雏兮悲慕仰天阍兮邈不可以诉巫阳兮载招飒佩环兮怅余音之嘹嘹

金鱼兮高冈郁奇槩兮相望砂水蜿蜒兮神工发秘竈其深兮妥灵百世猿狖啸兮岩壑秋攀援松柏兮聊淹留山泉为醕兮山花为羞荐悲些兮激天风之飏飏桐庐之山兮桐川之水夜漫漫兮孰呼起起堂构兮有子徵名文兮太史

荅阳外史集卷五十四

卷五十五

●钦定四库全书

荥阳外史集卷五十五

(明) 郑真 撰

○诔辞

故四明遂初老人王先生诔辞

按诔者哀死述其行之辞周官小史掌之鲁哀公诔孔子曰旻天不吊不憖遗一老俾予一人以在位其辞简古深切非圣人莫能当之汉制国有大丧则大鸿胪奏诔後世公侯士大夫家兼用之若唐柳宗元诔衡州刺史吕温化先前进士虞鸣鹤九臯是也宋叠山谢公以节死虞文靖公诔词实足以发之士君子称述言行公论所在岂诬也哉四明王氏为故宋东南衣冠家遂初老人叔载先生尚书厚斋公之孙承奉静学公之子自幼颖悟治诗经得舒文静公之传而尤熟於性理治道礼乐法制及台阁典故世胄谱谍先朝遗硕若王金判叔龢赵太社孟何戴教授表元夙表异之缙绅儒宗若侍讲袁文清公黄文宪公以世契深加器重宪副曾公某金宪李公綱孙公揖帅闽都司曹公愚牟公应复则先後荐引惟挽者也郡守王公元恭

公则修书致币亲诣门屈诸郡庠者也乡达君子若畏斋程先生习斋郑先生孙先生正父董先生秉彝蒋先生敬之及先教授求我先生则以斯文契谊讨论往复者也平生忠信质直尤清苦俭约奉祭祀守坟墓保有先泽凛如弗胜而於学至老弗倦论金宋旧事极言奉化陈桎续通监会稽杨维禎正统辨之失早尝造濶閤不售用词科十二体笃意古文而精於诗歌三为训导两为学官学者多出其门值朝廷遣大臣李国凤经略江南署教授衢州而中书用荐者除邵武路教授福建分省又陞为儒学提举皆不就於是先生以老无意於世矣以今洪武九年三月二日卒於家四月十四日葬於鄞县同巽先莹之次真客居闻讣为位哭吊为之言曰文献老成其复有如先生者乎夫富贵壽天命也立身行已言可师法君子不谓命也若先生者庶几不泯矣哉真在幼时师事先生今年已四十余矣过不自揆於两制学诚有志焉先生固深许之出尚书公玉堂掖垣二藁以传盖尝服习而得其一二值圣代文明叨首荐书持所业以示同进人固知其有所自矣计偕京师着遂初老人传拜牀言别先生有青云黄壤之说及过中都手书慰劳至於再三呜呼先生今死矣凭棺临穴弗及致其私矣千里相望九原莫作浮云白日之悲可终已耶因为之诔诚不敢擬古作者用以伸死生不忘之情云

嗟嗟王氏始自琅琊由汴徙明式完厥家肇自廉车旌耀功閤郎曹嗣承率履勿越逮至尚书扬於帝廷华盖文昌有赫厥声嗟嗟先生世胄嗣嫡强记博学浹洽充积发为英华聯翩匪夸五采交翬绚兮云霞惟承奉公尚志弗仕耆艾登门衣冠有伟挹趋座隅周旋敬恭交口推誉

声问以隆如黄如袁忘情臚仕致登世好辨问经史宣阍宪部荐剡交章後学者师于校于庠
同袍盍簪声应气合佩衿如林下学上达教养抡材钱谷是司沙田海渚懽言来归周官仪礼
曰有多饮损益取中考核精审列郡取法献酬主宾冠带周旋文物彬彬明郡有史凛焉笔削
藏之有司以究沿革玉海诸书手泽具存篇目畧分摭拾吐吞訛者以正失者以复抽芳啓秀
昭示简旧诰论言牒瑶轴其编宸章御画绍乃世传早志名科闾棘有椿梧悔得失中止勿践
宏博古学衍为六题典重温厚规行矩随唐宋大家各有师法泝流穷源不尚求合名闻縉绅
咸曰宜哉黼黻谋猷馆阁奇才命与时违老兮教职象山海邦廩祿有秩浦江改命遽云归遯
同谷之阳乐只林泉时维明廷经略遣使便宜改署曰郡博士相臣中书邵武是除言陟儒台
浮云何居六龙垂乾岿然故老大带深衣冰霜皜皜七十余年奉身归全曰遂其初宁不在天
嗣续曾孙亦云无憾当代典刑失其一监呜呼哀哉音容斯邈礼制匪愆结驂灵輶彻奠素筵
崇崇玄堂冥冥幽窆马鬣其封龟兆兹吉淮山地远瀛海云深至行有述忧思难任呜呼哀哉

故同知梧州府事刘君哀挽辞

人莫不有死兮嗟处死之为难苟忍耻而含垢兮寧没身之为安美夫人之姱节兮纷危机之
交会慨莫为之谁何兮矢九死而不悔驷苍鷖而上征兮历虎豹之九关跪敷衽以陈词兮近
咫尺之威顏帝賜哀而垂怜兮俾归导夫先路妥神栖於淮山兮藹松楸之雨露乃命巫阳本
其出处而些之以辞曰

世绪蝉联（阙）金些定家暨扬肇前修些嗟公之生尚气节些强记博学精厥艺些葩藻联
翩叶声诗些笔翰如流衆誉归些歛英袭华守宁一些世途险巇而不即些桓桓使相节制雄
些掾幕招延祭礼容些将骄卒梗正以律些暮夜金来利宁誡些参军醉李折奸顽些健讼斯
息公庭闲些燕贾以偿直民粟兮义让适均感伯侄些哟哟原隰发隐欺些贡赋以登用所资
些序声序音焕丹碧些圣冕巍峩俊髦集些善教熙熙着厥功些幕府钱唐歛登崇些羽檄星
流时孔棘些案牒山决立斯决些熙运天开覲明廷些倅郡惟三赫宠荣些百粤之强穷陟历
些椎髻卉裳咸率服些老扶幼携宾来迎些王化旬宣恪奉承些邈彼苍梧夙强復些以文以
武悦以惕些飞语陆危谁其惩些萋兮贝锦职背憎些目瞑汴哀泪若霰些衬輿东还吊以唁
些翩翩羣雏声呱呱些泝江入淮安厥居些像设中堂奠帷席些青乌发秘卜窆窆些兰膏明
烛艳容煌些烹羊炰羔荐馐芳些神栖孔安祀无瀆些泽流子孙绵嗣续些乱曰西风萧萧兮
万籁秋深林杳兮悲泉流思纏兮隐忧九死不悔兮欣受身其殒兮令名不朽些斯文兮与山
川其永久攀松柏兮虬枝白鹤嘯兮玄猿悲飒霜露兮凄其藹音容兮如将见之

故四川道提刑按察司佾事广信游公原敏哀些辞

溘飈风而南征兮望灵山之嵯峨泝玉溪以回旋兮埽入长林之坡陀枉予策以攀援兮澁磴
道之扞萝渺浮游以兴怀兮蹇踣蹢於岩阿曰冠豸之遗直兮惨魂游於寥廓结重华之深恋
兮慨斯今之莫作憎长夜之漫漫兮悲空亭之猿鹤纷遑遑而索求兮恍神交於冥漠於是俎
列羣羞壶倾四酬巫阳广招楚歌悲奏其辞曰懿彼美人皇降衷些玉色頿顏皎双瞳些周折
矩规步璚琤些怀瑾握瑜粹美充些衣冠蝉联阅阅崇些芸编满家杂琮玉些啓秀披芳欣履

饫些问道宗儒粲华烛些经史便便饱储蓄些八行世科踵芳躅些大明当天人文宣些荐鹗
横秋歟高騫些豹关九重礼兴贤些拜命为丞佩绶连些三年上考覲九筵些尧言都俞增品
秩些执法煌煌森典则些尔功尔言昭宠锡些柱後惠文枰以击些勿諂以邪拱而默些臣拜
稽首恪对扬些柏府潭潭凜霜雪些羣邪震惊飒锋铓些风采焕扬振朝纲些驄马避止肃周
行些逆批龙鳞勿怖惧些骨鯁称忠藹朝着些委身结纓荣际遇些矢心弗渝天付畀些揽轡
埋轮吾所慕些井络参虚斗一隅些劒阁峩眉险多虞些氏羌僚蛮岩壑居些使者祥刑王化
敷些宪节皇华驰驱咨諏些治政（叶）报闻年及半些犴户桁杨法律断些桴鼓不鸣安井
爨些尔游尔休乐伴免些翰墨风行於笑粲些帝恩召还德音颁些馆次云阳忧思艰些乘虬
上征杳难攀些蓬莱瀛洲厕仙班些笮焚遗民涕泪潜些埋玉故山賻车错轨些反躬归全克
修素履些有封若堂列屏扆些嗟嗟後人精享祀些魂兮永宁绥福祉些谔曰世泽兮绳绳洽
远近兮泯泯厥声学有承兮仕则荣胡造物之若戏兮曾不畀以百龄煌煌兮圣明功斯录兮
善斯旌邃密兮龙廷贵幽爽兮泉局

荥阳外史集卷五十五

卷五十六

●钦定四库全书

荥阳外史集卷五十六

（明）郑真 撰

○祭文

代祭先墓

惟我考妣要安幽宅岁月不留音容如昔明发寤怀德报罔极雨露既濡嘉木春郁事亡如存曷敢不力惟灵顾歆永锡祉福

祭土地

惟神正直聪明下土是职先陇安宁繄神之力祀报之礼岁时敢忒尚令百世永以为式

祭山灵

惟神天地精英山川灵气言念先茔实勤佑庇祀报有严敢稽礼制尚令後來永无失坠

龙王堂祈雨祝文

惟神灵化周流风云倏忽泽遍下土以生以育惟时孟夏三农播植膏雨不时瞻望饥渴禱於祠下敢忘厥职愿施甘澍润及原隰俾此禾黍其兴如淳是种是获繄神之德祈

雨祭龙王文

惟神宅是名山神化周洽民以旱告应不踰夕维时不雨有妨农业仰惟灵鉴普遍膏泽俾我
■〈亩犬〉亩以种以获国有常报敢坠厥职

又

惟神变化不测膏泽流传维时孟夏天乃不雨仰惟昭鉴悯此悠然沛然长此稷黍

代祭陈太丞文

呜呼医学之传代不乏人圣道湮微孰识其真惟公之学具有源委手泽所存实究乎理早年颖脱自儒而医当世所望学者有归起死回生有叩辄应其施无穷其功孰并孝慈乐和化行於家乔梓之贤棠棣之华上公荐扬暂主教席养素韬光靡就微辟暮景桑榆希有之年左图右书燕乐林泉维明有学肇祀三圣岁久日深庠陋弗称惟公实德之纪之纲百废具兴宫墙有光嗣续之贤严训是式教隳从容成此三益旋升於堂音吐琅琅忽焉闻讣宁不盡伤老我典刑实深仰止死生长别何嗟及矣壽祿在天考终非亡蛰蛰绳绳子孙其昌

为人作山头祭文

呜呼生事葬祭人子始终之礼也我父生六十有九年温清甘旨不获自尽奉襄归里尤以弗克终事是惧今从先志以柩车暂殡於九峯僧舍惟是窀穸之事尚俟蠲吉罪逆不天无所自贷谨以牲饌之奠用伸哀告

代祭越国夫人文

繫惟夫人令仪令德佐我相君忠辅王室淝河以东民以宁谧大国之封宠承纶綍子姓多贤位列承弼金紫一门荣耀赫奕咸曰耆颐永享天秩薨背奄闻万家雨泣某等一介微贱无能为役幸托门下遂膺厥职结草之恩欲报罔极奠祭达诚庶几昭格

祭先教授文

呜呼我父之生笃实内充德行文章蔚为儒宗垂志乡饮考礼兴乐教道有年兴起後学老於乡闾名闻缙绅檄书荐敷锡命明廷嗟我三子尝侍左右奉命承训匪敢失後岁行在辰六十五年谓我将死命其在天邁疾云革气聚神会遗言琅琅伦理所系扣地呼天罔若有闻死生永诀酸苦悲辛岁月云徂倏及半载安厝失时罪不可贷先陇之侧遗命所营奉柩返葬永奠神灵亲长在前义当永别矢词告哀涕泣呜咽呜呼痛哉伏惟尚飨

山中祭文

呜呼昔我父在日尝欲於六世祖三九府君之侧为归葬地未及营建而逝追念斯言岂胜殒絕以兹吉辰奉柩车返葬遵遗命也仰惟我父之灵流通昭着百世之下永安窀穸俾我子孙勿替引之

代祭赠参政文

惟公高年耆德华表之门实生忠贤作屏大藩煌煌天朝推恩有自显亲扬名既尊而贵位参政柄锡命自天紫诰金花宠及九泉某忝在戚姻实深赞庆一奠之礼曷敢不敬松楸之日桑梓之风百世之下永愿无穷

代祭母文

呜呼我母之丧岁已五朞属时多艰返葬失期顾瞻庵居遗植斯在不孝之罪无所自贷维兹吉日宅兆是营后只发秘砂水阡灵爰奉明神俯就筵几矢词告诫以奉终始

下葬祝文

南城之阳有原有隰衆水环趋嘉木葱郁爰卜宅兆龟筮合吉仰惟尊灵永奠窀穸遗泽荫休百世一日俾我子孙承祀无斁

造寿藏山神祝文

惟神宅是名山显灵下土兹建壽藏先茔是祔后土之功具有成绪神其相之永锡是祐

告先庙

兹以地媪效灵壽藏肇建百世之下是祔是依仰惟先灵大敷荫助土石告成山川改观

祠后土

惟神道化流行威灵昭着山川上下是司是主盛举之阳肇建壽藏百世祔依松楸有光以兹吉辰将甃土石惟神相之俾有成绩

越国夫人祭文

恭惟夫人盛德慈仁佐辅相国民物同春大国之封宠承帝所紫诰金花鸾翔凤舞厌世僊游逍遥上天我民之思有泪如泉俯伏告诫稍酬涓滴惟恩惟德百世罔极

九月三日报先君墓铭副本祭告祝文

比以甬东程氏归自南京附致临川云林先生危公所着先君墓铭一通仰惟先君临终之言夙夜不敢有忘阅六载而始得之其纪事详实观者谓无愧词实足以垂示不朽危公入覲新朝拜翰林直学士出处大节具有公论惟先君之灵有以识之兹因愍忌之辰敬录副本焚告书篆入石谨当为之尚享

辞考妣墓祝文

真忝以先训中今岁淞江省秋试乡贡进士第一名兹将计偕京师谨用告辞墓下若以先考妣之灵获保其身归守丘陇则不肖孤荣幸大矣惟考妣实绥佑之

告先圣祝文

真等忝以诸生获与乡选兹将计偕京师上膺宠命异日倘不负吾圣君斯不负吾圣人矣尚享

告府主祝文

真忝以乡选与名计偕有司敦劝戒行有日山川道途风雨露霜跋履之艰惟神实绥佑之

告城隍祝文

惟神神化流行阖郡是司凡在编隸实承绥佑真等忝与计偕戒途有日倘遂言归敢忘神赐

风师祝文

惟神职司巽位功参化枢播荡周旋四方八区生物之功礼严祀报牲肥酒香敢以诚告

雷师祝文

惟神位司震动德参乾健威声所加生物有美岁时祀报有礼有仪神斯降止福祉其绥

云师祝文

惟神功涵变化浮游太虚为雨为霖生物之功岁时祀报敢不以礼明灵顾美锡兹福祉

雨师祝文

惟神功参造化泽及寰宇生物四时洋洋流传祀报之礼酺酒有奠仰惟明灵诞锡神佑

境内山川神祝文

惟神造化精英山川灵气宅是畿甸实勤佑庇以祀以报倬有常制酒醴非馨尚鉴诚意

城隍祝文

惟神位正京畿功涵城社祀报之礼以樽以簋风马云车神其来下永为民生锡此纯嘏

祭无祀鬼神告城隍祝文

钦惟圣朝承古之制厉祀有严恩涵泉隧赫赫神灵管辖之司符摄以来九州罔遗其来于于同享饮食俾尔幽冥无有饥渴

中都行大都督府祭旗纛神文

惟神威灵赫赫职司向道肃冠军容敢忘祀报某等忝分督阃实重本兵礼仪有秩敢布厥诚

又

惟神灵旗直指壮我威武三军所向战胜攻取某等钦承帝命叨司督府祀享惟诚爰洁牲俎尚享

二月戊日社坛祝文

大社之神

惟神职司坤载泽被黎庶生物之功以稷以黍东作将兴酺酒有冀仰惟神灵锡此福祉

大稷之神

惟神德契乾心功施坤厚春日载阳俶载南亩有事而祈爰洁牲酒惟神之灵俾岁其有

后稷

惟神职司耕稼功及万世於赫圣朝肇新典制以祀以祈有严坛壝黍稷非馨尚鉴诚意

勾龙

惟神职司下土生物所宜仲春之月有事而祈黍稷牲醴品列多仪普为生民永锡蕃禧

风云雷雨师祝文

惟神功着两间泽及万物飞扬鼓动变化充溢祀事虔恭嘉牲孔硕佑此民生永世无斁

山川神祝文

惟神一气所鍾高下奠域以峙以流功着生植典祀有常坛壝其秩神之格思福佑是锡

祭无祀鬼神告城隍文

於皇天朝仁及幽壤厥类惟多咸使格享仰惟明神实司九邑符摄罔遗来饮来食无有渴饥沐浴恩赐各生人天魂爽罔滞

中京行大都督府祭旗纛文

惟神气肃辕门雄武勇烈前军啓行往无不捷祀报维时牲酒芳洁仰惟神明庶几享格

又

钦惟圣朝禡牙有祭於昭灵神雄武强毅中京督阃实隆委寄祀报有严式遵礼制

又

惟神威武勇烈职司前导三军克捷荐着功效朝命有严以祀以报牲肥酒香敢以诚告

又

惟神威武导扬懋着勲力先声所向罔不告捷某等忝职中都统兵督府春祀有严仰祈福佑

祭韩唯传文

嗟嗟唯传而至然耶人之生世有短有修令终归全吾其何由唯生年二十合卺甫毕未有嗣息而遽云夭折其命耶抑人耶吾不重为痛惜耶生之家世善庆累积气禀之清姿貌岐嶷幼而知学不事华靡侍坐当隅克循辙轨吾在乡党颇以学名生祖若父延礼於庭训汝经书劝告丁宁更八九年期底於成圣运肇开吾忝进士奉命典教淮山楚水寄生诗篇情莫之既讞告之词忽其在耳年少健强殒絶乃尔而吾薄宦羁旅去坟墓远亲戚间里忧病交至安能与造物者周旋终始耶生之父母惟生是恃死当复生宁忍终弃师友诀别义须执手凭棺临穴媿吾何有念生平时似梦非梦千里緘辞痛当作恸呜呼唯传其知也耶

邓大夫卫国公祭文为凤阳府作

呜呼天之生才必以其时际遇圣君龙兴开基惟公之生如汉三杰提兵四方丰功盛烈冠豸台端禄厚报隆肇开公社金劵锡封奉命外廷始终体貌遄归入覲遽以讞告某等承乏京郡佩仰容仪开国名勲寿考是期今闻丧归痛伤何极恸哭酬辞灵神昭格

凤阳府学礼殿上梁告先圣文

兹以礼殿有严聿新壮观斯文万代妥安神栖某忝司郡府职在作兴爰举修梁用申虔告

告城隍土地文

惟神职司郡府土功陰庇斯文巍巍校庠载新礼殿修梁蠲吉庀役羣工华构告成神其相之

上梁告城隍祝文

某以不才叨承掌教蒙贤令作成之赐赖诸生补助之私梁栋以兴桷榱悉具用致馨香之荐敢言福禄之祈伏愿学校兴隆室家清吉菁莪乐育愿言黽勉以交修采藻咏歌庶几观感而兴起敢忘居处或负神灵尚享

祭陇西李恭显王文为凤阳卫作

惟王帝室懿亲王廷硕辅上佐圣明混一海宇奇勲殊绩书於旗常带砺疏封珪组煌煌善庆善积以有贤嗣出将入相功效尤伟荣养鼎鍾壽期百年从容夷犹令终归全某等忝卫凤阳闻讣惊惶朝聘瞻恋怆失先达池河之阳岵兹佳城冠佩之藏灵神妥宁牲酒微仪敢申享荐音容俨存锡福有美呜呼痛哉伏惟尚享

同前为临淮父老作

恭惟圣明为天下主必得材杰以为佐辅惟王之生河岳所鍾龙虎风云千载奇逢任比股肱亲同肺腑嗣续象贤将相文武帝眷日深国有老成福祿康宁与享太平讣告忽闻圣心悯恻美諡王封赠賻宠锡池河之原有华新阡淮山拱秀永慰九泉某等忝同乡社尝奉顔面壽考百年莫致所愿灵旒戾止匍匐以来奠醴饌牲以写其哀惟王有灵用绥福履卫国庇民百代其祀呜呼痛哉伏惟尚享

同前为刘指挥仲海作

惟王社稷重臣宫闈近戚辅翼谋猷殊勲异绩将相一门金紫赫奕从容归全盛典宠锡某本以微贱伏蒙存恤比由罪戾以工以役圣恩寬洪幸赐免释门下之故敢忘盛德既想音容感深以泣薄奠致诚灵神昭格

先兄义乌教授先生祭文

维洪武十有二年岁次己未三月戊辰朔越十有五日壬午寓临淮弟郑真谨附书次男复昇於五月朔日丁卯以清酌庶羞之奠敢昭告於亡兄金华府义乌县教谕先生郑公之灵呜呼昔我先公实生三子而兄居其长文章行义惟先哲是则是傲縉紳君子以先公为有子矣五十余年遭家孔艰而传经讲道自任斯文值圣运肇兴网罗才俊乡闾敦迫力辞再三训导郡学实不得已里閭从容亦或庶几而以倾险小人杨侃所荐遂至於此道不及行年不上壽山颠水涯幽冥永隔人之不幸有如是耶某忝同母弟先公之教誓同周旋虽贫无以为家而文

献之绪庶几不坠洪武壬子以乡贡计偕京师涕泪为别门户宗祀将兄是望兄在义乌某在临淮每贻书谓曰吾老不得家居而留滞微禄斯命也夫念汝久客淮海五弟又官塞上兄弟天各一方恐溘先朝露终无相见之期矣真时读之以为此不祥之言以吾兄之美才懿德天将厚其福禄以遗其祚胤宁遽如是也呜呼兄之言今果然矣不得相守以老相诀以别矣死生昼夜理耶数耶兄固有以知之而真不及知之矣痛矣哉窀穸之事义当任职而教职羈縻告归弗遂手足之情不能一息忘也尝恸哭执笔录兄文行之可传者凡千六百余言将告诸当代君子异日遄归幸得勒铭墓上庶见区区之心矣兹以小祥远致薄奠并録行状焚白俾儿子告诸灵筵永念乖睽荼毒如割灵神不昧尚绥佑之呜呼痛哉伏惟尚享

先兄大祥祭文

维洪武十有三年岁次庚申三月壬辰朔越二十一日壬子寓临淮弟郑真谨附书次男复昇於五月朔日辛卯以清酌庶羞之奠敢昭告於亡兄金华府义乌县教谕先生郑公之灵呜呼吾兄问学行谊拟诸古人肥遯丘园永保贞吉而以儉壬率挽勉强一出学官微禄年及耄老不得在家以死九原之下或见杨侃岂不当重唾其面然修短有数生死何常正命归全其可以无憾矣日月不留大祥云届教职所羈不得告归尽手足之谊矢词一奠远致诚悃异日幸得告遄尚当图其不朽焉呜呼哀哉伏惟尚享

恭撰大行皇后祭文

伏以位并至尊为天下母如月之照比日同明灵輶仙游万方仰慕致敬致礼臣子微诚

皇陵灵星门祝文

惟神上纪天文下司闔辟壮观山陵灵旂出入改创命工仰祈神力幸相其成敢忘盛德

皇陵祭告土地祝文

惟神职司后土正直聪明神功伟绩拱卫山陵奉命改观载经载营惟神之灵盍相其成

为广信千户所祭徐太傅文

惟公文武全材生际熙运出将入相上辅明圣开国名勲亲王至姻所期壽考百岁其春天不憖遗遽尔薨背褫典煌煌恩礼兼至可谓生荣死哀也已某等忝守山郡闻讣盡伤牲酒致诚涕泗其滂呜呼哀哉

祭葛知县文

昔先参政太师在宋为中兴名臣文献閎闕东南莫尚焉而公在孙玄之列可谓克世其家矣

际兹盛明奉饷宝精币讲论治道天顔对越礼隆宠渥遂有百里之命人皆谓老成重望晚节之荣公侯其复始矣逾年入覲随班上万年之壽宴赐以还称庆未几而遽以疾讦呜呼痛哉夫正命考终公之福也民之不淑其若之何枢车旅葬致斯文之一恊惟公其鉴之尚享

祭广信知府谢公文

呜呼郡守五马为荣人不易致公一出而得之可谓速矣两月之间阖郡望治而入覲以还闻有玉楼之召何遽弃人间世也耶士民於是舛望矣返葬建阳永安幽宅送终之礼在夫人所自尽也瓣香一奠以心感心其庶几乎呜呼痛哉尚享

同前代本府史经历作

惟公德尊行高一麾出守两月之间莅政未久忝以司幕来相後先谋谟画诺从容周旋岁旦入朝天威咫尺拜命以还公遽得疾次於桐庐遂云仙游存亡迴隔涕泗横流返葬闽关洁牲以祭生顺死安公其无媿呜呼哀哉伏惟尚享

祭府李经历文

呜呼昔永嘉诸贤与建安伊洛大儒先後相望文章道德扶持世教流风余范传至於今而公以世家名阀际今圣运典司郡幕甫及二年而罹於非辜辗转艰难挤於死地彼妄诉构祸者亦独何心哉某等忝在斯文实同交谊英迈俊爽有不能忘灵魂些招礼当一奠惟公其鉴之

祈晴文为金太守作

雨阳时若此人情所共欲而天道所难必也迺者霖雨过多肃陈忱吁不逾日而霁何天心之克慰夫人也是皆吾神仁爱所及有以成夫化育之功尔谨具牲俎为谢尚赖曰雨曰阳俯顺以致大有年之庆果如洪范所谓休徵焉者则神之赐不其大乎尚享

祈雨文

上天泽物曰雨曰阳雨阳时若为国禎祥比在五月淫雨陰暄吁辞告情天为晴霁爰及初秋六月闰余天复不雨仰望来苏早田颇登晚禾未及农心惶惶忧思悵悵天之降灾由吏不才民实无罪亦可怜哉造化诚难人岂屡瀆一雨滂沱庶几生育伸请於天曰大有年祀报嘉牲敢不洁虔神司吾民责任亦至一念感通俯鉴诚意

谢雨祭文

六月置闰亢阳不雨田畴龟坼悯此禾黍衆心惶惶瞻仰吁哀慨思明神实与雨偕爰啓灵坛诚祈肃祷民命有关凭依大造皇穹至仁一念感孚密云四郊飞洒沾濡化工斡旋实难非易

暮夜倾盆沛然生意早苗既获忧在晚禾膏泽始终实愿滂沱以谢以祈再三有瀆保合太和仁慈化育惟神有灵於昭于天爰锡之福曰大有年民以不饥神不乏祀用致诚心奠此牲醴尚享

祈晴文

雨阳时若惟天之赐一或有愆为时之戾乃者六月旱魃为灾一忱有请甘澍大来及兹有秋早禾云获霖雨及旬陰霾冥漠黍稷栗栗言茁其芽蠢蠢并兴忧在晚禾恭请吾神以祈以谢酒香牲肥灵旂是迓阳乌发舒烂兮晴暎化化生成成为惠实蕃

石神庙祭文

惟神雄踞灵峯矗屭魁杰有灵有神雨阳时若一郡之望俯慰饥渴国家崇敬用表英烈某钦承上命率礼不越秋成祀报肸鬯昭格谨以牲醴币帛粢盛庶品式陈明荐尚享

广信府祈雨告谕诸庙祭文

比以六月上天不雨旱气熒焚俯怜焦土早稻半收或有或无晚禾未花殆成荒芜向启衆诚山川遍祷神若不闻长望穹昊岂吾有司罪戾是多饥饉荐臻民命奈何赫赫神灵鸾车戾止俯伏请命倾心洗耳虽尝洒洒未及滂沱仰望神功挹彼江河天已云秋风日如火膏泽不流忧实在我牲肥酒香再拜告虔尚使歉岁化为有年

祭陈指挥文

呜呼凤阳为帝乡戚里而定远藕塘为其属邑山川灵异实生英杰而公幸际云龙之盛奋於行伍征讨南北以千夫长守郡广信军民安堵从定云南以一当百出奇制胜肤公上奏使节光华而壽命有期遽膺大故有识之士皆为出涕呜呼哀哉某等学校之士辱公礼遇文武壮猷言犹在耳灵魂些招公其宁只

广信府谢雨祭文

天久不雨亢阳两月今始滂然普遍膏泽海■〈𣎵禹〉含生民心胥悦井汲万家源泉清洁晚稼有成庶无饥渴神明盛赐诚孚飨答割牲报祀嘉礼周洽拱送神归灵旂寥沆

荥阳外史集卷五十六

卷五十七

●钦定四库全书

荥阳外史集卷五十七

（明）郑真 撰

○檄

拟唐顏杲卿谕河北诸郡檄

天宝十四载（某）月（某）日常山太守顏杲卿檄告诸郡等盖闻建邦设屏实惟有道之长秉律成师合正无将之戮守臣当为君而效死义士不与贼以俱生盍济奇谋共成伟绩我国家德跻仁壽道合希夷万年敬休寝兵戎而不试四时生育与草木以皆春蠢兹狂贼之微敢昧圣恩之大安祿山丑凶遗孽败将俘囚轻巧事人公行贿赂奸邪罔上杂出诙谐入宫禁而无嫌睥皇储而不拜宠兼仆射位极真王向尝指腹以为赤心今敢率衆而操白刃范阳数千里莽为蛇豕之区河关几十州尽作豺狼之藪涂炭我黔庶腥秽我冠裳指斥将相之臣凌轹王侯之贵吠尧之犬谓秦无人圣上涣号旁行乾纲独断听鼓鼙而思猛士式靖四方提斧钺以授元戎用昭九伐凡居率土不共戴天称尔干比尔戈从公於迈言秣车言秣马与子偕行大收执讯之威用致献囚之盛幕府职居守土命寄专城泣血剖心爰勒军师之衆卧薪尝胆忍忘君父之讐方异类之鲸诛幸羣心之颺起郭元帅整朔方之甲李兵使兴马邑之师张睢阳保鄣江淮哥潼关控临畿甸止戈为武当锋者摧将除河洛之腥膻载见乾坤之日月凡兹有民有社实惟同德同心不食哭秦廷期尽包胥之义左袒为刘氏共推周勃之忠勿为守窟之谋当作辅车之势警捷边烽之报传声严羽檄之驰俾鼠窃而狗偷若兽蒐而禽猕至於京洛义士赵代奇才见无礼於其君盍昌言於尔衆审其逆顺以为从违或斩首以迎降或据城而来献事功苟就富贵可图怒岂止於冲冠勇俟闻於投袂獬豸孔炽我是急拟成敌忾之功匈奴不灭何家为各效委身之智机不可失时岂再来用胥告於同盟俾咸知於此意急如律令拱听指挥

按唐顏师古注汉黄门令史游急就篇檄以木为之长尺二寸有急加鸟羽古所谓文告之辞是也战国张仪为檄以告楚相厥後司长相如作檄喻蜀陈琳为袁绍檄豫州其名特着然未有四六之文至隋唐始有之宋置宏词科散立俚语不拘定制故周益公拟汉河西大将军谕隗嚣倪正父拟晋奋威将军谕中原豪杰皆用四六盖取其声韵谐叶便读而易听故也其词贵乎奋发使三军怀忠勇之心寇盗有丧亡之虑始为得之不然抽黄对白将焉用哉予读唐书安祿山反何千秋劝顏杲卿传檄赵魏断燕蓟要膺杲卿从之河北诸郡响应者凡十七郡得兵二十余万是岂非人心感应之机乎岂当时文告之及有以动之耶使幸而成功明皇岂至於幸蜀乎常山之败顏氏死者三十余人其得祸亦不细矣然河朔诸郡所以决逆顺曲直

之理而为去就从违之计者实皆杲卿有以发之是岂可以成败论哉唐之所以为唐者实兆於是矣因拟顏杲卿告河北诸郡檄一篇虽不足以发明忠臣之心亦足以见公论之有在云露布

拟梁王僧辨平侯景露布

尚书令大都督臣王僧辨等臣某闻成周大法聿严九伐之诛汉室龙兴爰正三臣之戮方嗣圣绍无疆之历而逆凶当极恶之刑肆告成功聿章大孝恭惟皇帝陛下慈爱恭俭果毅仁强有经文纬武之资慨遗大投艰之会当馈兴叹副四海戴日之心尝胆卧薪当二圣在天之愤睠兹凶逆宁後诛夷侯景刍狗微生犬羊遗孽托身高氏尽忘羽翼之恩逃命宇文复作叛亡之计我高祖武皇帝仁同一视道合三无谓其慕义而来归或可革心而易面猕猴出穴未膺狙使之劳飞鸟依人遽有鹰扬之志假息壽阳之境簸扬江上之波烽火接於秦淮戈刃交於畿甸涂炭黔庶腥秽冠裳围逼台城屡动宵衣之警震惊宫阙俄成晏驾之悲简文皇帝事重宅忧亲遭降割志每殷於靖难恩尤切於好生隆爵重封用广包容之量穷凶极恶曾无悛改之心废置等於奕碁弁髦视如土梗卜齷挟刃本诸庆父之谋成季抽戈直指马昭之罪是宜为君而效死可能与贼以俱生某等受寄斋坛谬膺将职始留巴陵之戍任约就擒荐扬汉口之威化仁请缚子仙弃郢城而身为俘馘于广弃郭默而功在遁逃役不厌时仕有余力舳舻数百里骇动鲸鲵鼓鼙亿万兵威棱虎豹爰振浔阳之旅荐成姑孰之勲顾死灰之复然虑困兽之犹鬪石头城列栅命霸先往扼其冲招提寺进师俾王琳独当其銳应机而溃奋臂大呼倾城无匹马之还僨轍汙双轮之返元恶窜身而入海党与稽首而来庭肆发命以穷追不渝期而克获食彭越之醢顷刻无余燃董卓之脐光明达旦载复三吴之旧遂驱九轨之尘江汉朝宗山河改色兹盖仁圣不杀威武布昭运奇堂上之兵制胜目中之虏赫怒而安天下谁其御之遄归以正故都惟其时矣臣某等恭承庙筭忝与行间乘六龙以驭天愿返翠华之仗卫掩七戎而得骏敢忘铁汗之驱驰臣某等不胜庆快之至谨差某官姓某露布以闻军资器械别列条上

（某）年（某）月（某）日（某）具官（某）上

按露布之名始於汉史称露布天下露布上书上下皆通用之不专於将帅也後魏攻战克捷欲天下闻知乃书布帛建於漆竿上名为露布後世因之故王肃获贼二三皆为露布宋制词学科露布为十二体之一军兴则以命题就试之士以所业二篇并其余上之中书後省考其能者然後召试中者授以馆职俗谓选定两制其法顾不严而重乎世运代更趋舍异向学士大夫习之者少矣夫一物不知儒者所耻今军务烦兴捷书交奏文学之士将执笔於戎旃之中以传檄四方如有用我则何以哉予读王元之小畜集有拟李靖平突厥露布实为拟题之始其词雄壮奋发心窃慕之及阅通监纪事载侯景之乱而知元帝之在湘邸所以命将出师以复讐雪耻者厥功大矣乃以王僧辨平侯景露布为题非敢以为文也所以自别於饱食无所用心者云内制

拟赐四川省臣腊药口宣

勅某等朕惟井络之墟擅藩翰之固虎符龙节式昭辅相之光翠管银罍爰辍上方之御欽予德意咻尔寒饥

拟赐和林帅臣腊药口宣

勅某等任职西邮驰心北阙念采薇之行役式谨秋防獎行苇之忠勤敷时腊赐咨尔连营之旅变为挟纊之和

拟赐上都帅臣腊药口宣

勅某等职分朔漠名着封疆雪窖冰天想岁寒之欲暮宝匳珍剂敷阳泽以如春俾尔连营有如挟纊

拟赐淮南省臣腊药口宣

勅某卿高相业任寄戎昭积雪坚冰慨三冬之凜冽长江广汉想万里以安流实上剂於珍奩布阳和於玉帐

拟抚问总兵官兼赐腊药口宣

勅某卿位隆上相望重元戎江汤汤武洸洸已集安流之绩阵堂堂旗正正大收克捷之功瞻言腊序之临凜有风寒之警珍剂布阳和之泽言锡予之金戈奏雪夜之勲维其时矣

腊药之赐肇自唐制少陵杜氏所谓口脂面药是也宋时品剂岁各不同俟修合稟议大抵冬用温夏用凉适於烹调服用而不失其宜者也其赐予之词则以付之词臣轮直者文武臣僚既受赐各上表称谢故近世有咏翰林故事者有曰因念边庭风雪苦口宣腊药布皇威然则君臣上下之间恩礼之隆可见矣腊日将临有怀旧制拟口宣数篇诚不敢仿古人之万一姑以见古学之所当务云

拟抚问省臣及赐夏药口宣

勅时惟六月用抚三军我心憚暑忧如熏永言蒸郁王事多艰维其棘深念勤劳赐颁药品之良用迪师中之吉泛威声而除氛沴国底丕平扇暑暍以为清凉民跻仁寿

拟抚问漣东分省臣僚及赐银合服药口宣

勅赤日被海东土深軫炎歊凉风在殿西头诞施恩赐肆出上池之剂有嘉靖海之功扇为清凉跻彼仁壽

拟抚问湖南总兵省臣及赐银合夏药口宣

朕观虞廷阜财之诗诵唐殿微凉之咏恩私所及与往古以同心炎暑有行慨多艰之维棘爰锡卫生之剂用臻在道之安

拟抚问云南省臣及赐银合夏药口宣

六月维时三庚云伏念宫宇邃严之地有若憺焚居山徼炎瘴之乡曷胜蒸郁爰赐实匭之剂永怀留钥之英

古天子锡命诸侯有命物有命词有命物命词者若後世以玺书赏功臣增秩赐金是也止有命词者若後世赐手诏褒美是也然则抚问臣僚及药餌之赐其亦古天子锡命之遗意欤夫药剂所以卫生者也人主之於下以时而锡予之所以使之尽调护之宜以尽性命之正者无所不至矣当时之臣或不能尽忠以报上者何哉呜呼此君臣之分所以益不明欤予观宋内相辞命之作常欲一摹仿之伏日斯临以旧制拟赐夏药口宣录之於此用见志之所在在古学云

拟赐江淞省龙衣御酒勅书

勅某等卿乃心王室服劳藩宣眷言海表之勲爰锡上方之御龙光有耀式昭袞黼之荣蚁味其馨乐岂樽罍之晏不惟其物曷树乃勲

拟赐江淞省臣名马勅书

勅某等卿职任藩宣功成驾馭龙韬豹略永言靖难之功雾鬣风驤爰锡调良之乘虽非千金之贵庶资万骑之多尚策奇勲益昭大赉

拟赐淞东宪臣御酒勅书

勅某等卿肃临宪部慎守王纲眷言劳瘁之多宜有醇醴之赐樽垒多旨盍思湛露之恩綉斧光华尚广沛霄之渥懋勤耳目用寄腹心

古之王者锡予羣臣必有其辞若所谓勅书口宣者是也予观唐宋以来词臣内制之作不啻千百其词温厚和平惻怛慈爱殆与三代诰命相为表里国家有道之长实系於此学者可不之务乎近世士大夫尝以馆阁之文非山林士所克为噫何其识量之浅浅哉夫士之为学将行道济时立言垂世也代言典诰特文章一技之施尔果足以尽士之用哉若夫运之穷达时之用舍固有幸不幸者尔岁暮天寒怀不能已因摭今事为勅书三篇用贻同志云

拟故宋太师徽国公朱熹改封齐国公制

皇天开太极诞生不世之贤圣代昌斯文丕展非常之礼焕扬典册式慰明灵故宋太师徽国公朱某渊密而精微光明而雄伟正心诚意之学经邦纬国之才道统集大成契帝王心传之要名教非小补会圣贤旨趣之归慨彼何人斥其为伪虽乃身不容朝廷之上而大名终垂宇宙之间朕绍嗣丕基寤怀前哲惟家传人诵具有成书而目注心存凜焉遗范念阙里既称於殊号何邦爵未及於更封乃睠青齐密聯洙泗龙章辉壁焕纶綍以维新袞冕植圭肃容襟之如在祀列十人之配諡仍一字之尊呜呼巨儒想南渡之英实惟气运上公胙东表之略非示恩荣尚惟道德之光克相熙雍之治

真在至正间朝廷改封晦庵先生为齐国公私拟赞书一通置诸尘笥有年矣际今盛朝而公之五世孙名忻字明仲谪居颍上县长礼致诸学训导弟子员真未及识面而以诗见教大贤子孙所以待人者如此其厚耶因次韵以复且录赞书旧藁以求正云

明仲得此文甚为称美作诗以寄比之静轩阁公且求着光禄公墓铭真惧不敢当也後明仲来濠梁言此文恨不得之於馆阁上盖请封时词头云林危公执笔以为词意不备心尝歉然异日归闽当传之家牒以壽不朽明仲卒於颍上真所书遂归之徐景顏景顏太末人为颍上教谕真同年进士也

拟起复江澍参知政事制

帷幄之筹千里允属全材縑墨之服三年宁从终制盖君子有断恩之义在先王存变礼之文睠我辅臣奄违慈养丕俟修攘之绩用昭起复之仪某料敌精明临机英果兵书明四种应变无穷将略尽五材当锋必克粤从早岁已冠前军斩凶逆如枯菅履险危若平地是父必有是子曰武曰文事亲而及事君以忠以孝荐属肤公之奏晋登近弼之聯楼舡百万艘悉资运棹貔虎三千士咸听指挥肆令疆土之安屹若丘山之重凡省闕折冲之略皆家庭教诲之余期贊协於钧衡忽传悲於风木朕念艰难之会孰寬忧顾之怀今北道未通南风犹竞谍报赭巾之聚邮传白羽之驰草熟马肥天寒地凜内患未遑於靖辑外攘曷底於乂宁念将同社稷之忧其可久闺门之戚是用载参政柄申督戎昭澍左四明谨腹心之备御海东万里连唇齿之相依申城守之扞防登京畿之漕运任当一面式固中权呜呼想高桥青野之师盍从形胜振菑亩中乡之旅宜大家声仁闻执讯获丑之功以大兴赏褒封之典朕言不再汝往钦哉

拟加封梓潼帝君制

文明以化天下亶惟辅佐之功诚敬可格神灵盍举疏封之典涣扬宠号益阐恩光蜀七曲山文昌宫梓潼帝君并络精英山川间气云车风马每为人间世之游瑶宇琳宫遂阐道家流之秘肆我家之事造藹多士之思皇科目诞颁有赫陰灵之佑馨香旁达居然胖蠶之通预定名於计偕用作成於善类休声有烈治道是裨睠惟天极之尊允铄文昌之座增加贵饰式表隆称冠裳睟穆於仪容鍾鼓具严於格享呜呼礼乐千龄之运相我斯文人民百世之依锡兹纯嘏可加封辅元开化文昌司禄宏仁帝君

予年弱冠时用意两制学唐宋诸名家赞书多能成诵及阅乡先生内翰厚斋王公词学指南及掖垣玉堂类藁益能深究制作之体忝以科名主中都教职为阁笔久之人有以元延佑三年加封梓潼帝君制书见示者词意温雅得代言体因细录如左别拟一通不敢比古作者姑以见志之所存云按神祠封制在唐宋时中书舍人行元时中书舍人不置书赞皆入翰林学古之士必能深辨之

制曰维明有礼乐维幽有鬼神妙显微之一贯在天为星辰在地为河岳形功用於两间矧能陰隲於大猷必有对扬之懋典具神光分张宿发咏周诗相予泰运则以忠孝而左右斯民柄我坤文则以科名而选造多士每御揀於菑患彰感应於劝惩贡举之令再颁考察之籍先定贲饰虽加於涣汗徽称未究於朕心呜呼予欲人才辈出尔丕炳江汉之灵予欲文治宣昭尔濬发奎壁之府庶臻嘉祝以答宠光

此习宋唐旧制但以长联当短句恐於声律不协姑附於此与识者评之文不着姓氏当考

拟追封伯夷叔齐制

昆季是谓至亲德高义让国家缅思先哲礼重尊崇睠惟二子之贤实起百王之慕伯夷叔齐具清者之量有仁人之心上从父命之尊次及天伦之重弃国而辞冠冕敝屣孤竹之封叩马以谏干戈没齿首阳之节叹神农虞夏之盛与泰伯吴雍并称遗庙岿然空山精英藹如元气彼义不食粟荣名何累於生前虽諡以易名好爵宁縻於死後朕纂承大业深沐休风用敷贲於云章俾有光於岩谷天理人心之正日笃不忘朝廷祀典之宜庶几克享尚期激劝不昧钦承可追封伯夷为昭义清惠公叔齐为崇让仁惠公

予近读元姚文公燧着伯夷叔齐制爱其命意高古遣辞精当足为不朽之传辄仿其体而为辞云洪武十八年六月一日也

荥阳外史集卷五十七

卷五十八

●钦定四库全书

荜阳外史集卷五十八

(明) 郑真 撰

(阙)

荜阳外史集卷五十八

卷五十九

●钦定四库全书

荜阳外史集卷五十九

（明）郑真 撰

（阙）

荜阳外史集卷五十九

卷六十

●钦定四库全书

荥阳外史集卷六十

（明）郑真 撰

○表

高祖武德元年万年县法曹孙伏珈谢除治书侍御史表

伏以显贤任能诞着圣明之治瞽言狂直曷膺忠荇之求恩纶上过於尧言束帛有加于周賚循墙莫避伏地知慙（中谢）窃惟自古之用人惟待净臣而加礼盖於举繆绳愆之任责以论思献纳之才匪具股肱何宜耳目如臣某者性资鄙贱学术荒疎后非贤不义训戒敢违於天子邦有道如矢幽独常凛乎圣明敬当真主之龙飞欣幸清时之燕喜每怀愚虑更切周咨爰陈经久之规永示将来之矩京畿分牧已依日月之光台合高升普徧云天之泽何以有裨於圣治将期永固於基图俯仰怀慙周章就列恭惟皇帝陛下圣姿神武天性聪明历数有归禅授实同於有夏民心乐戴政刑尽革於亡隋尚为邪佞之防用审忠贤之得言思逆耳事在利行臣某敢不思报隆知勉肩所职惟忠可以事上敢接武於夔龙非道不敢陈前愿致君於尧舜

同前题

伏以治隆圣运诞昭宸极之光任重宪纲增贲台端之秩抚躬不称拜手知荣（中谢）窃惟人才之盛衰尝系世道之轻重非有明目张胆俾山岳之动摇何以弭患消奸致邦家之平治允念股肱之任咸惟耳目之臣若稽猷猷夙闻往昔乌台柏府声凛凛以生风驄马铁冠止行行而避路故得敢言之士庶为司宪之官伏念臣某才不逮人学非闻道自分簿书之末不离刀笔之中幸蒙真主之勃兴普与斯民而更始奋心自厉克志有为爰陈三事之败亡以为今来之劝戒冕旒清穆方瞻北阙之华冠豸巍戢遽拜南床之擢循墙莫避临谷惟兢恭惟皇帝陛下纬武经文拨乱返正天戈所指广扬震动之威日御时乘大啓离明之运致兹孱琐服此休嘉龙凤交章宠及便蕃之命鹄鸾筵羽荣随侍从之班用来謇謇之忠期尽惓惓之益辉光分荷报称至难臣某敢不思厉忠规焕杨风采以商周为鉴愿益宏社稷之基非尧舜不陈其敢後人臣之义谨奉表称谢以闻

武德四年秦王谢除天策上将军表

伏以爱始家邦诞厚亲亲之义礼登策府备隆将将之权拜命惟荣抚躬以惕（中谢）臣某

恩隆慈育教服义方性靡习于温文才不全於韬略早逢圣运躬履戎行仰承睿算之无遗上稟庙谟之全定正正之旗堂堂之阵则莫敢承赫赫厥声濯濯厥灵有征无战一洗关河之壮观尽除宗庙之妖氛皆圣武之布昭岂臣微之能致敢冀非常之赏以须希有之荣苴土分茅既侈裂封之盛斋坛建阙又加崇拜之荣位长王侯宠深君父有倬龙飞之造於昭燕翼之谋恭惟皇帝陛下笃叙彝伦任隆肺腑绵本支于百世衍祚嗣于万年纬武经文建邦树屏念周封同姓务崇列国之名谓晋爵诸王亦冠督军之任肆加时礼式表隆名左右旄旌总万屯之森卫出入帟幄收四海之俊髦密联玉阙之华辉映金枝之秀遭逢侈矣报称谓何某敢不诞承明威绍膺景命刑赏■〈樊，心代大〉明於天道修攘期布於王灵夙夜基宥殚厥心用赞协恭之妙国家闲暇明其政预严思患之防

太宗贞观十七年魏徵谢赐殿材素屏风素褥几杖表

伏以内廷锡宠诞昭三接之荣秘殿赐材爰及多仪之备感恩以惕拜命惟荣（中谢）念某昏耄余生卑栖无用志业恐隳於堂构行藏每慎於兴居取规矩以为方圆匪有成物之智彻桑土而葺户牖夙无备患之材属当四海以为家欣幸一人之有庆天开云母会同日近於清光坐列黻黼宴赐俯同於前席匪有藉依凭之宠庶几防倾跌之虞惟桑榆渐迫於衰颓而绳瓮不忘於贫贱报扬莫称寝食靡遑指事详陈囊一封而晋奏拜恩舄奕萃衆美以鼎来松出徂徕栢来新甫刀踞靡辞于斲削文寻纷就於谋为屏褥烂皓素之光辉几杖妙曲蠲之形制于以栖尘而郭日于焉扶老以养和植其庭觉其楹言居言处瞻尔前顾尔後以翼以扶宠冠簪绅辉生门户恭惟皇帝陛下明明天日之表巍巍龙凤之姿从谏如转圜用人犹不及处身以俭极土阶茅茨之心养老以诚盛广厦细旃之奉致兹衰朽亦与恩光臣某敢不思尽谋为恪遵程度物其多矣适居寝动静之宜厚莫重焉尽骨肉死生之报

贞观四年张蕴古献大宝箴表

伏以圣人大宝曰位治乱实系於怠勤臣子责难为恭职业敢忘於箴儆俯殚悃悃仰彻宸聪某窃闻成汤君临万方式谨盘铭之戒卫公年逾九袞不忘抑戒之辞盖人君居四海之尊以天下奉一己之欲自非动观默省保厥祚之惟艰何以持盈守成垂洪猷於久远恭惟上圣远冠前王方九重垂御之初实万方临照之始虽盛德不忘於兢业而嘉猷必致其忠规用殚闻见之愚上瀆高明之听恭惟皇帝陛下明明天日之表巍巍龙凤之姿乃圣乃神恢汉高之大度有严有翼用文王之小心瞻後虑前慎终惟始凡而德业皆本生知永惟日月之明尚采葛藟之论声为律身为度式礼无愆天之经地之宁与民同庆旦以复旦新以致新臣某幸服下僚亲逢嘉运常厥德保厥位益恢王业之隆竭其力致其身务尽臣隣之益

贞观十三年房玄龄请解机务表

伏以尊居廊庙岂胜告老之心望动山林愿遂投闲之想谨裁觚牋仰瀆宸旒（中谢）窃以天生不世出之兴王时则有非常之哲辅伊尹咸有一德心腹同孚传说命总百官精神夙契兹所谓风云之遇用能成霖雨之功岂此謏材久持魁柄伏念臣某夙由下士获际明君选除

遍历于高华侥幸夙膺於拣擢爰由吏部遂总中书位居冢宰之尊任处天下之重体陰阳造化有愧和调锡山川土田屡叨恩数自虑股肱之堕乃承体貌之隆既忝国姻复居储傅惟素餐之益甚思洪造之难酬愿解繁机少安愚分恭惟皇帝陛下天姿勤俭圣度恢弘乘云气而御飞龙官天下而府寰海举相十六幸观熙载之能有臣三千咸得和衷之助兹惟庸菲久处弼谐每怀陈力之言敢负知止之义伏望俯加垂照曲赐保全别援真贤俾独当於钧轴庶几晚节愿终老于桑榆

贞观七年魏徵谢赐金瓮表

伏以金马高严宠承谏访瓮鷄微贱谬极恩荣拜首承休扞心增惕（中谢）伏念某钝顽之质陶冶之姿久负孤忠匪坚刚之百鍊蚤承锡用属器使於羣工上陪日月之光下献葛藟之议但思粉骨岂敢爱身不图天陞之优容复拜内廷之宠赐光华璀璨堪承玉露之瀼瀼形质空虚似映器车之烨烨岂远来於异国抑近出於诸山度彼瓶罍姿非瓴甃是将广开於言路故兹特发於宸衷兹盖伏遇皇帝陛下天性聪明圣度豁达谓言辞蹇直可为有国之裨故诏旨都俞爰辍尚方之御辉生牖户铭彻肺肝臣某敢不祇诵尧言服膺周賚中正不倚非但如周官醢醢之供恢廓有容其敢为汉陰抱灌之具

贞观七年十二月帝奉太上皇置酒未央宫羣臣贺上表

伏以尧父舜子赫焉日月之重辉文德武功盛矣樽罍之展庆事隆宗社荣被缙绅（中谢）窃以人伦无过於尊亲君德莫隆於授受故有周文而为子恒修寝问之恭有汉祖以作君必展躬朝之礼致敷天之养洽率土之心欣幸昌朝光辉前古恭惟皇帝陛下小心寅畏大孝率由爰笃顺于亲心以为法于天下礼勤侍奉顾岂以四海九州而自居壽祝康寧将底於万有千岁而未艾躬循至行面奉严顏鼎新内殿之隆萃列绮筵之侈蛮夷舞蹈朝野謹呼臣某等荣与造庭宠慚锡类亲其亲而为大遙观孝治之恢崇老吾老以及人式见民彝之棐迪

太宗贞观六年上宴近臣於丹霄殿羣臣谢表

伏以锵金曳玉躡升内殿之华设几肆筵叨侍天厨之美荣加口体恩彻肺肝（中谢）窃观虞夏以来莫过姬周之盛鹿鸣鱼丽传播声诗天保露斯光华简册久仰前朝之盛适逢昭代之隆顾为何人亦与斯礼窃念臣某等学非闻道用不适时曩因龙虎之从遂见鲸鲵之殄天戈所指尝奉命以周旋日馭时临每承顏而啓迪自分草茅之陋曷承座席之懽鼓瑟吹笙盛矣钧天之奏重茵列鼎灿兮御府之珍深愧素餐莫酬洪造恭惟皇帝陛下明明天日之表巍巍龙凤之姿达天道顺人情功茂成于化育偃武功修文德效丕着於隆平台衡推心腹之同台阁叶股肱之契宠加晏賚事絕嫌疑荡荡无名欣欣喜色快睹仪容之盛各沾雨露之恩念已属賚尚图报称醉以酒饱以德福祿永期于万年竭其力致其身恩数敢忘於他日

贞观十七年魏徵谢赐殿材表

伏以圣德寛容诞布云天之泽臣心仰戴旋成风雨之居宠自龙庭光生蜗室（中谢）臣某桑绳鄙贱草芥寒微取规矩以为方员匪有成物之智彻桑土而葺牖户曾无备患之才属当四海以为家深仰一人之有庆上庙堂而建议用终凝於栋梁立殿陛以扬言功有慙於柱石顷负采薪之疾已承予告之恩僭上囊封喜垂渊听且辍（阙）知之厚共夸工用之全恭惟皇帝陛下道过唐虞功高汤武守身以俭极土堦茅屋之心待士以诚盛广厦细蘊之养致兹衰朽获与光荣臣某惭已非宜感恩曲被勉就经营之力思为嗣续之基大为桷小为桷举不违於程度矢斯棘鸟斯翼当永遂於居安

贞观七年李淳风上黄道仪表

伏以治历明时式谨玉衡之度法天成象肇新黄道之仪俯竭愚衷仰干宸听（中谢）窃惟陰阳之动静实由形气之附依二曜流行谨进退亏盈之异四时迭运明分至啓闭之殊惟造化之无穷妙机緘之不测自非制器尚象何以考顺求违恭际昌辰聿新盛观乃眷浑天之创俾殫薄技之陈布罄足以为维表嵩高而作準明两道与六合挈三辰与四游星辨纬经合重环而表里极分南北贯二道以横纵刻雕不弃於毫厘占步靡违於顷刻共上清台之邃用昭盛代之传恭惟皇帝陛下德茂生成道隆高厚诚心昭格按星土以辨方和气薰蒸时雨阳而利物肇成乾象以正坤隅用能三百六十度之中高视万亿百千年之上惟帝其训与时偕行臣某生属熙朝职专太史密测璿玑之运辅成玉烛之和钦天道而迓祲祥愿致雍熙之治察人为而明事应敢言职掌之功

贞观十四年李淳风议戊寅历表

伏以圣主握乾符诞着体元之治太史占天象庸修治历之功俯竭愚忱仰干宸听（中谢）窃以容成之总六术上元起辛邓平之造太初南至在朔盖顺时而作事宜以人而合天苟或差殊岂胜繆戾既无以成作讹成易之序亦安能遂陰阳寒暑之宜当重熙累洽之辰致长治久安之效宜谨穗书之课以昭莫历之传睠兹贞观之颁行肇自戊寅之撰述传承久矣得失昭然盖月应於黄鍾而灰飞于玉琯实在甲子之朔是为日至之辰何定法之微差由减余之或过以癸亥为朔既成三刻之乖则时月表年何为万世之法肆令考定永示遵承岁改度以维新时致和而叶应恭惟皇帝陛下神游泰运德并乾元齐七政以厘百工密应玑衡之运建皇极而锡五福茂调玉烛之和惟兹晷刻之违将致天正之舛睿谟夙定永式庸陈改宪三百年惟帝其训登化亿万禩与时并行妙合生成恩施化育臣某繆持蠡测识愧管窥由损益进退之方契转运流行之妙官不失日导迎滋至之休民用厚生共迓重熙之运

贞观十三年林邑进火珠表

伏以圣神临御合璧交辉山海储精名珠献宝式谨拾怀之义庸修贄奉之勤（中谢）窃惟大德之难名斯致奇珍之间出故轩辕出世符罔象赤水之求少昊应期致丹凤白云之异允矣休祲之象昭哉图讖之传幸值昌期迴超前古洋洋声教不遗穷陋之区赫赫文明远被要荒之服致天地之美宝合国家以同麻磊落晶荧上应北极之座浑融莹洁秘夺太阳之精岂

同螺蚌之怀实出骊龙之颌当曜灵之洞照感气类以旁通渐扬就燥之光式谨燎原之义固无资于烜氏亦何待于燧人诚不偶然厥有致者恭惟皇帝陛下德符乾健运合离明念微螾之然或有裨于至化而夜光所照曾何掩於羣情肆令径寸之珍亦产遐方之远函封以致于以用之剖身而藏非所愿也仰止尧阶之邃恪修禹贡之常臣某佩德惟深衔恩莫报论人间之价敢擬连城依天上之光愿言照乘

贞观十四年吏部侍郎高季辅谢赐金背镜表

伏以天光下烛诞昭宝监之明圣泽旁流宠锡珍奩之御辉生门户铭彻肺肝（中谢）窃念臣某质本钝顽性尤昏蔽幸致功名之会遂叨法从之华监於水当于人义素闻于周诰瞻尔前虑尔後言有取于丹箴上承北极之尊下重南宫之寄思皇多士实司综核之权莅事惟能宜重铨衡之任示无私于黜陟用有别于正邪匪着功勲乃承獎賚丽水有资于人造容成夙擬於侯封皎洁清寒不数方诸之荐荧煌■〈火旬〉烂何殊火齐之珍稀首拜嘉抚躬知媿兹盖伏遇皇帝陛下法天成象因物赋形谓秦镜徒明莫照李斯之恶而殷监不远可惩夏后之衰俯怜孤陋之资申锡圆明之器龙盘凤舞於惟百链之精英日晶月华可烛千年之幽隐縉绅动色罔象潜踪臣某敢不拂拭尘蒙磨礪职业监形俱在永为模范之资镊鬓未斑终赖化钧之造

贞观二十一年太子左庶子于志寧谢赐金帛表

伏以辅翼参陪无补青宫之毓德陶熔衣被猥承丹陛之流恩聿开忠諫之途益广元良之辅自天拜命俯地知惭（中谢）窃以丽水所生必资炉冶蛟人所织尤藉茧丝粤若古先视为珍贵燕台待士尝来乐毅之雄汉室徵贤曾屈申公之重夫何近侍亦忝恩荣伏念某顽钝微姿轻纖弱质贞心自守每媿莫夜之四知隐德无闻敢冀丘园之一束幸属风云之会获依日月之光储禁肇开使输忠于左右宸严宠贍佩服於光华既躡三品之良且倍百縑之数若为报称但切凌兢兹盖伏遇皇帝陛下德迈汤文道高尧舜分金以赎饥人之子允矣慈仁散帛以收亡卒之骸渊乎忠厚念储副国本之所在必正人端士之与居致此寒微优加崇宠臣敢不力为负重思展所长底商家作砺之功敬祇休命体周雅承筐之咏思啓周行

贞观十四年祭酒孔穎达上五经正义表

伏以万国文明久仰缉熙之学五经简奥曷彰训诂之功用辑前言敬陈睿览（中谢）窃以易言卜筮纪卦爻辞象之文书载典谟尽政事谋猷之要礼总言乎大小诗遍采於歌謠至若鲁史之春秋实出圣人之笔削尊王抑伯允着纲常内夏外夷具严界限浩矣文辞之盛渊乎旨趣之深睠此羣书实为大训盖非但人君致治之本抑且为下学立心之基更秦氏乱亡以来不胜灰烬迨汉儒补綴之後仅免遗亡且论说之纷然于指归之何在百家裒集宜明去取之公万理同归当着是非之正用有殫於缁素期不朽於汗青恭惟皇帝陛下羲画心传禹谟天授北辰示极藹声歌典制之华南面居尊褒贬赏罚之正询谋而宏教化制作以阐人文念师说之多端恐经传之益舛遂令微藐获在讨论臣某俯愧非才仰叨成命用进冕流之侧

敢修铅槩之功愿乞清闲微加省览俾圣贤可法遂明道统之传以帝王为师诞着治功之盛

贞观三年以房玄龄为左仆射杜如晦为右仆射魏徵为秘书监参预朝政房玄龄等谢表

伏以台司奎府务得真材紫诰泥封忽叨威命加贲三臣之宠亶为千载之逢（中谢）窃观隆古以来唯以得人为盛舜咨四岳聿观熙载之能武有十人举得同心之助乃如今日有光前猷念某等生遇明时行跻膺仕乃辅乃弼有非尧舜之道则不敢以陈斯谋斯猷将使帝王之法坦然可举既使显膺于近密复令偏历于清华燮理化权丕验上阶之象参闻政体粲为东壁之光咸愧非才冒叨恩数有负乾坤之造莫裨日月之明恭惟皇帝陛下龙凤之姿天日之表求贤若不及从谏如转圜五百余年生圣人诞膺帝命二十大功为天子用普王明念治效惟在于同寅而揆职匪堪于独任故兹臣等简自上心臣某等敢不祇奉明谟力图成效赞襄出纳当有补于钧衡啓迪谋为岂徒专于图籍

贞观十一年隋秘书监晋陵刘子翼辞徵表

伏以皇华入里忽承王命之临白首在堂将就亲年之养俯殫惓惓仰瀆威严（中谢）窃念臣某朴■〈木敕〉微材草茅贱迹上观尧典心远慕於夔龙仰止孔门行欲期于曾闵早由穷巷逮仕亡隋躡升冠冕之班猥入图书之府恪共所职惟炳焉丹烱烱之心谢事而归叹老矣白萧萧之髮自分甘于肥遯宁有事於徵求四牡光生于原隰束帛宠贲于丘园揆此疎慵若为报称固宜朝夕就道少寛稽缓之诛亦使风雨在途尚遂焦劳之想奈此旨甘之奉方当喜惧之年苟使睽离必疎定省念事母之日短岂胜菽水之供于报国之时长何憾桑榆之晚所愿永终于色养遂兹上瀆於威顔恭惟皇帝陛下龙凤之姿天日之表御至尊而制六合野无遗贤褒有德而怀万方朝多君子顾兹草芥亦辱蒲轮臣某半世顛愚余生假息类作栖鸟低飞之态长怀慈乌反哺之情敢乞圣恩少从臣欲邦有道不废既幸遇于明时臣以孝作忠敢自期于他日

贞观二十年李道裕谢除刑部侍郎表

伏以刑曹剧部貳职匪轻法从真除参陪甚宠出紆靡回于成涣循墙莫避於忱辞（中谢）伏念某才不逮人学非闻道子路片言折狱尝闻孔子之言伯夷折民惟刑深仰帝尧之世固尝志前贤之学庶以希往古之踪既此志之未酬幸孤忠之自信九重天近获依日月之光六位时乘幸属风云之会既宠承於荣耀复玷辱于清华尝因少见之明粗尽不欺之义敢希简擢复被迁除秩次秋卿又拜恩纶之渥名符司臬遂叨曳履之荣近陪常伯之联上缀文昌之座感恩特甚慙已非宜恭惟皇帝陛下尧舜寛仁禹汤勤俭赦彼有罪悉为复业之民期於无刑丕致可封之俗恩实深于厚下德茂洽于好生特俾臣微与司政柄臣某敢不勉供所职思报隆知奉法令之严敢司轻重体仁慈之意务在平和

贞观六年秘书少监虞世南上圣德表

伏以圣德如天诞着形容之寔臣心就日用扬治化之休仰荷情深披殚语短敬陈冕旒之邃敢言词翰之勤窃观隆古之君必得文章之士声歌扬厉用观有道之长简册敷陈允着无穷之载洋洋盈耳炳炳如丹上考典谟史臣赞唐虞之盛德旁观雅颂诗人歌文武之成功於赫皇明丕昭景命北辰示极尊受万国之朝南面垂衣统正亿年之绪非纪见闻之着曷扬议论之公念大吕黄钟固无庸於瓦缶然九重丹陛宜有取於葛藟冒贡穹窿切慙骴骴恭惟皇帝陛下明明天日之表巍巍龙凤之姿修文德偃武功光赫阳明而烛物赦囚徒出怨女沛仁泽以如天礼笃尊亲恩深逮下分金以赎饥人之子散帛以收亡卒之骸尊礼大臣有汉高之度保全勲旧有光武之仁丕致隆平扩充大道且检身如不及复从谏以如流田野无失业之民间里多可封之俗盖将四三王而同盛六五帝以匹休盛矣勲名昭哉德业爰极铺张之妙不胜仰戴之心臣某亲迪盛明躬逢熙洽汗青竹以绚华藻敢殚纪录之勤镂白玉以告名山倍切流传之望

贞观十二年太常少卿祖孝孙进乐表

伏以作乐应天诞着声容之盛审音正律庸求雅颂之遗敬叶歌章仰干睿览（中谢）窃以古之于乐也专尚其实後之于乐也仅取其名故德似唐虞始有咸韶之奏功如汤武斯成濮武之传夫何刘汉之兴但袭嬴秦之旧高祖制房中之乐始於妇人武帝创协律之名制由阉竖何有声名文物徒成鼓舞铿锵且名号之云多遂典章之益舛正声辽邈永世滋烦周齐间以胡夷梁陈杂于吴楚欲反古而复始当损过以就中爰酌时宜复参古制度诸金石固泯泯乎有声奏之管弦亦洋洋而盈耳上进法宫之御拱观斯谱之颁恭惟皇帝陛下天地同心陰阳合德玉帛万国干羽已格于七旬箫韶九成肉味曾忘于三月爰着一时之典永为百代之规匪但奉宗庙而礼神祇且将待臣隣而和上下肆令微藐获在讨论臣某厥志惟殚视成有媿云龙际会幸逢极治之音鸾凤飞翔行叶至和之应谨撰唐雅乐八十四调三十一曲十二和随表进呈

张蕴古除大理寺丞及赐束帛表

伏以圣治法天诞广忠规之益宸恩逮下遂兼名物之荣恩宠有加战兢交集（中谢）窃念臣某学非师古才不逮人自惟弩蹇之踪亲际龙飞之运中书入直每思黼黻于谋猷内殿联班所愿备殚於忠荃念责难在于陈善而居安尤切于虑危爰陈大宝之规箴以寓至尊之训戒虽爝火无裨于日月而冕旒或取於葛藟何期献纳之余即拜便蕃之命刑司进秩既趋棘寺之严内笥传珍更被枫廷之渥是将广通于言路故知特发於圣衷恭惟皇帝陛下清明在躬睿哲稽古玩周公之无逸艰难夙着于忧勤览尚父之丹书敬怠每存于警省肆令狂斐亦见褒嘉职司犴户之班光赅蛟绡之盛慎刑慎法当推爱物之仁为衣为裳载锡周身之宠涓埃无补衣被有光臣某敢不恪守故常誓殚绵薄刑期无犯务持尺法之公朝相与言益励素丝之节

房玄龄等上高祖今上实录表

伏以圣帝重光丕着百王之法大君垂式聿新二典之书俯沥微诚仰干睿览（中谢）窃以尚书坟典订訃谏训诰之文鲁史春秋示褒贬赏罚之法若今述作视古光华高祖皇帝敕武图功拨乱反正奋自晋阳之旅遂驱关洛之尘六位时乘万邦率服倦烦机而将授於昭与子之明审神器之有归式叙传宗之正皇帝陛下乾元配健离两继明五百余年生圣人肇开皇极二十大功为天子允协人心於惟载籍之传懿铄邦家之美道德风烈勿替历年制度典章可垂万世宜有特书之实以昭後嗣之传载惟武德之初爰及贞观之盛事系时时系月式昭纪传之华正次王王次春茂着编年之法肃登宸御以介皇休某久服殊恩叨承明命记丰功伟烈慙无太史之文职纪事纂言愿继董狐之直

皇太子谢赐帝范表

伏以圣心仁爱诞推君父之恩宸训昭明备举帝王之要佩绅知敬执简思勤（中谢）自古有道之长实重因心之教故大禹貽厥之则着在夏书武王燕翼之谋播于周雅钦逢华旦宏绍前休伏念某德媿温文性慙岐嶷出师入保早齿於虞庠侍膳问安恪趋於周寝仰被义方之教曲垂乐育之仁虑汨没於膏粱肆甄陶於翰墨用假名篇之目永为幼学之规即往古以鉴今举宏纲而撮要谓为君莫先於正体而厚族务在於建亲求贤审官则政事修纳谏去谗则忠说集戒盈所以惩慾崇俭所以去奢赏罚必明务农宜力崇文则终始典于学閱武则干戈省厥躬展也明谟昭哉懿范尧章舜典焕乎琬琰之辉文烈武谟粲尔璧奎之映窥文有耀拜德祇兢恭惟皇帝陛下德茂本支庆深嗣续受祉施于子爰笃叙於彝伦立爰始於家用昭明於训戒克昌厥後载锡之光粲尔十二篇之传永矣亿万年之裕臣某敢不写诸简册佩若韦弦朝夕不忘益着心胸之戒春秋匪懈敢言肺腑之私

荥阳外史集卷六十

卷六十一

●钦定四库全书

荥阳外史集卷六十一

（明）郑真 撰

○表

高宗麟德二年李淳风上麟德历表

伏以舜政协和式谨玕衡之度夏时谨始用殚铅槩之功俯竭微忱仰干睿览（中谢）窃惟人情之动固可以言知天道之行惟当以数测粵若古昔眇矣源流闰定四时命钦尧帝策推已酉纪叶有熊允惟历象之颁实利民生之用自非知来察往明疾徐亏朒之分何以趋事赴功致作讹成易之效庸少殚于薄技以仰答于盛明远求亿载之前使合上元之会陰阳二气循环不失於常经日月五星流转靡差于密度析旦夜晨昏之异明分至啓闭之殊幹运不忒於仁均增损用遵於刘焯于斯为盛可举而行恭惟皇帝陛下盛德昭明至仁溥博仰观俯察导迎天地之和内修外攘一正华夷之统乘乾首物顺革从时载新寰宇之传肇谨清台之课宜诏执事以介昌期臣某承命无庸视成有媿职匪忘於占步事宜慎於布宣跨万里以同文亿年永命顺四时而成岁庶绩凝休

玄宗开元中一行上黄道游仪表

伏以圣治宪天诞正玉衡之密度臣工率职肇新黄道之游仪俯竭愚诚仰干睿览（中谢）窃惟制器尚象圣人所以用心治历明时民生因之取信是故周髀宣夜之学浑天盖象之云虽得失之匪同固讨论之有据粵惟上圣克绍前闻包地统天妙堪輿之造化激轮注水明昼夜之运行睠取义之已精尚旋仪之有缺爰求植木以贯旋枢使交奎轸之间用测陰阳之运两仪六合咸归经纬之中二曜五行不出循环之外明远近以推分至审邪正以验亏盈休咎往来占候不忘於警省寒暑代谢事功宜就於谋为用昭寰宇之传寅上清台之御恭惟皇帝陛下功成极治道本生知华夏车书一统咸周於正朔北南声教大政尤谨于授时睠兹九道之交实系周天之运肇体元而立制庸考顺以求违爰命微臣载询远制妙应机缄之运粲然钧轴之华臣某敢不寄迹空门承恩内阙乾文炳焕愿勤乙夜之瞻抬运开明永介万年之壽

玄宗开元十五年张说等谢置集贤殿学士表

伏以内殿易名丕阐尚文之治近臣召直宠加新命之荣於感荷以维深思报称其曷已俯摅蚁悃仰对龙顏（中谢）窃惟一代之兴王必有非常之制作阁崇天禄藹冠带之名儒馆置

弘文萃瀛洲之多士盖将发挥于经术庶几开广于圣明昭哉治化之隆允矣论思之选乃如今日益广前规讲学尊贤诞布维新之号设官分职允为求旧之图揭日月以行天鼓风雷而泽物显加爵位登进臣工使于言语侍从之余即见润色讨论之效自非鸿硕曷承燕间某等学匪多闻才不适用生逢尧舜夙谐辅弼之心迹拟夔龙深仰訏谟之盛属身陪於燕席获面侍于恩颜申命周行俾升严邃加珍盛饌不胜华藻之怀广厦细旃岂称草茅之陋遭逢侈矣媿赧谓何恭惟皇帝陛下尧性聪明禹姿勤俭勤政务本周知黎庶之艰花萼相辉推广宗亲之爱履兹大道躬致丕平谓仙者清虚之谈于今何取顾贤者致治之要在古皆然遂致下材获膺清问臣某敢不勉肩所职思报隆知荐引人材助皇猷之密勿考求经籍彰圣学之缉熙

开元十七年丞相源乾曜张说以帝生日为千秋节贺表

伏以流虹遶渚丕逢八月之良飞龙在天诞啓千龄之庆人神喜洽华夏懽同（中贺）窃以王者受图於昭景命民人聳听必得隆名粤若前朝懿哉盛典诞弥厥月周诗彰震动之符长发其祥商颂纪隆生之瑞二仪明察亿载绵延恭惟皇帝陛下乃圣乃神允文允武励精治理彰勤政务本之名笃叙彝伦蔼华萼相辉之盛闡河图而毓瑞承祖烈以重光壽考且宁益茂延洪之祉侯邦来贺曷胜归美之诚臣某等谨以八月五日为千秋节伏愿俯顺輿情式颁徽典金声叶应清商入奏於歌弦玉气调和湛露普沾於华度着之令甲副在有司

开元二十年萧嵩上开元礼表

伏以治本百王诞着仪容之盛法垂万世丕昭典籍之华详篇目以肅分晋宸严而露奏（中谢）窃惟礼以节性制任宜人度数节文允矣规模之大恭敬慈让本乎性分之全於穆前朝率时丕范上而虞帝守官申命於伯夷下若姬周制作聿成于公旦尽揖让周旋之则极等夷隆杀之严降至汉兴尽忘周旧叔孙通於制草创安免讥慙河间王得之民间宁无遗失惟大修於仪典必有待於文明恭惟皇帝陛下大圣生知小心克畏率履不越莫非天理之节文精一执中寔为人事之仪则祖烈既明於纘述邦仪犹重於讨论念贞观制於玄龄纲条已正谓显庆成於无忌令式何多俾明增损之宜不失经常之正惟帝其训与时偕行臣某幸际昌时谬膺重寄上行下效载观宗伯之典章世变俗移愿效关雎之风化

天宝十三载扬州守臣某进水心龙镜表

伏以百鍊精金合乾坤之造化万年明鑑揭日月之光辉肅致愚衷恪供宸御（中谢）窃以物生有象明照无穷故司烜掌方诸恪守服官之典渠国进火齐丕昭任土之诚允铄熙朝同符前古矧日应天中之候正风行水上之时离坎相资神灵助顺遂致圆明之端实惟熔冶之功有蛰龙形於昭骏造势若鼓风雷而盘辟殆将乘云雾以飞腾香敷铅粉之华气浥膏脂之润江山表里示不隱於纖毫人物低昂谅莫遗于妍丑用表圣顔之悦怿以昭清燕之鑑观翼翼不回式表威仪之正赫赫在上何容尘垢之昏新以又新旦兮复旦恭惟皇帝陛下法天成知随物付形念治在无为奚罄名言之妙谓人难自见必资模范之工兹克畏以难明爰考图以敷贡臣某仰瞻黼座俯奉珍函君德匪私既普同於烛照臣职匪懈尤有待于磨礪

玄宗开元六年郡国谢颁乡饮酒礼表

伏以寰宇同文诞着声容之盛乡党齿让肇新典礼之行千载有光四方作式（中谢）窃以达邦立国贵乎兴礼导民故天府献书式见贤能之盛乡人饮酒用知齿德之尊粤周室之兴隆盛姬公之制作正位乎主宾僎介法象乎天地陰阳三让以升百拜斯饮澹玄酒而责质熟羹馘以存诚粢壶樽爵洗之多列几俎豆笾之盛锵锵雅乐鼓座席之春风济济衣冠蔼族间之和气尊卑有序少长咸宜司正扬觶以致辞衆工间和而告备奠酬导饮洽宴乐以从容酬酢送迎笃敬恭而匪懈于斯盛矣何以加焉恭惟皇帝陛下一视同仁笃近举远率履不越莫非天理之节文精一执中实为人事之仪则肇颁邦秩防范人心比屋可封丕变天下之俗安燕不乱载新庠序之光仰圣德之巍巍知王道之易易惟帝其训与时并行臣某仰佩纶音申严筵秩年当大比陈地官司徒之威仪运应重熙被麟趾关雎之风化

玄宗开元（阙）年特进张说进大衍历表

伏以治洽同文诞辰展车书之庆数推大衍肇新历象之传俯沥愚忱仰干睿览（中谢）窃以事系时时系日政有常经正次王王次春谨之在始粤惟古往敬授人时虞舜康庶事勅命惟几唐尧厘百工定时以閏洪惟上圣克绍前闻肆求着易之微以考穗书之课起自五十俾用无穷散为亿千其归有本分二挂一揲四归奇日月有经合陰阳之磅礴乾坤定位妙造化之生成置闰以别盈虚定朔而明亏朏分至啓闭循环不失于毫厘寒暑朝昏迟速靡愆于晷刻默应玉衡之度辅成玉烛之和恭惟皇帝陛下德体乾元道交泰始功参化育导迎天地之休祥象着昭明遂致璧奎之异彩爰重清台之制以昭寰宇之传与物为春俾民观象臣某职司佐政任寄调元夷隩析因敢致民生之序作讹成易俾知帝力之深

肃宗至德某年元结进大唐中兴颂表

伏以天威讨伐诞成戡定之勲圣德形容庸慎声歌之体俯凭笔体仰渎冕旒（中贺）窃以夏禹勒岣嵝之碑治水式彰于伟绩汉将纪燕然之刻攘夷丕着于成功允铄熙朝聿隆前古蠢彼胡夷之扰肆勤王旅之征尽驱九庙之氛祲重复两京之日月蜀天万里迎上皇以来归禹贡九州合诸侯之朝覲用昭明于史氏宜仿像于诗人据事直书式纪修文之盛托物取义不忘归美之诚茂对宏休庶传不朽恭惟皇帝陛下功成纘述志笃修攘履国步之艰难膺人心之翼戴栉风沐雨六飞爰备于师虞旋乾转坤四海毕归于离照孝养蔼九重之喜气谟谋绵百世之基图乃诏臣工用贻铭刻穹崖峭立俯浯水之奔流緑字淋漓与湘山而永久居惭骖馱丕冒威严臣某亲际中兴躬承明命周诗纪德敢言吉甫之休声舜殿扬言窃拟臯陶之致治

德宗兴元元年司徒李晟贺平朱泚表

伏以河山有誓大圣垂恩天地不容逆臣授首快覩京华之复观欣瞻车驾之言旋日月中天风云万里（中贺）窃以王师利用寅奉天威人臣无将敢干人纪睠兹凶悖本出寒微始蒙

尧日之耿光旋奉周天之惠泽职居戎帅地兼极镇之崇爵至鼎台宠冠三孤之贵金帛子女充牣其庭山川土田畎章尔宇曾无尺寸之数以酬莫大之恩乃尔无厌竟为不轨起阙庭之氛祲惊寝庙之神灵万姓靡依六飞近狩既人心之共怒于国法以奚诛王旅嘽嘽敢肃将于大命戎容暨暨行殄灭於渠魁迄告成功咸出睿算致此云龙之庆曾何汗马之劳恭惟皇帝陛下默运神机於昭圣武沛然雨露流通发育之恩如彼江湖广大包容之量顾兹顽梗自致刑威臣某受寄戎麾欢迎御辇受明堂之朝贺将远过于周宣刻浯水之文章诚有期于臣结

贞元五年中书侍郎同平章事李泌乞更命相表

伏以明王立政惟人职匪专于独任宰相代天理物效惟着於同寅俯沥微忱仰干渊听（中谢）窃以庙堂为至重之地宰辅非常调之官必前疑後丞乃胜鼎铉之重非左辅右弼曷成社稷之功丕若熙朝间生名哲房杜致贞观之盛治姚宋成开元之太平盖皆一德以一心斯能立政而立事仰廷绅之往矣顾机务以纷然岂此栝材独持魁柄窃念某性资鄙野学术荒疎每期终老于渔樵顾乃躡升于台阁引公卿而求民瘼既无作霖之功核材艺以叙官宜徒殚待旦之虑顾宠恩之既侈念謏材其弗堪盍选班行俾升揆席分任事权之重上承明命之隆恭惟皇帝陛下尧性聪明禹姿勤俭藩臣梗化茂陶含养之恩百辟趋风深仰财成之德而臣生逢盛际亲荷隆知然以衰老之姿恐负圣明之治伏望大明委照圣度垂怜幸别采于师言使简求於元辅奋庸熙帝载尚令心腹之同于时亮天功允叶股肱之美

建中四年翰林学士祠部郎中陆贽辞考功郎中表

伏以北门倬直已叨掌礼之荣东铨附班又辱考功之选俯惊忝冒寧不恳辞（中谢）臣某识不该明器非宏远惟学是务夙膺孔孟之言非道不陈期助唐虞之治适天开於文运遂名玷于词科职更县治之劳任处台端之重迨蒙圣作亲覩诏除既躡长于翰林复联华於祠部论思献纳日侍清光衣被服乘岁蒙异数顷属巡行之际获联扈从之中王事多艰匪有忠谋之益帝德广运曾无佐辅之勲虽备历于艰难乃当然之职分使其赏先于禁近殆恐体解于勲臣愿返恩言涣还成命恭惟皇帝陛下舜聪旁達尧哲周知申命隆儒上进宸严之直爰徵哲士聿升侍从之班肆令驽钝之姿有玷圣明之治既使摛文于禁苑复令厕列于天官深骇误恩且慙非称伏望无嫌反汗俯赐转圜上性命道德之言愿殚初志掌功过善恶之法乞赐俞音

泽州刺史上庆云图表

伏以圣德动天丕应轮囷之象臣心捧日寧忘舒卷之怀用新图绘之华上瀆冕旒之邃（中谢）窃以福有象类诚能感通惟圣人臻极治之符则上帝协至和之应轩皇受命式彰纪号之休祲汉武循行聿起封中之异彩乃如今日允介昌期既非雾以非烟亦在天而在野光华遍覩神造难名爰摹写于形容辄晋陈于清燕恭惟皇帝陛下躬膺百顺运协重熙嗣位配乾广大妙参于神化沛恩作解流通普慰於民生爰臻纷郁之祥益见悠扬之妙兹惟有象岂曰无心臣某叨领郡符恭逢天瑞九重仰戴每勤舜泽之施千里承宣敢弛商霖之念

宪宗元和四年李绹谢除翰林学士表

伏以南面尊居诞啓兴文之运北门宠置遽叨擢直之荣逊避莫从惊惶无措（中谢）窃以禁林密署实为多士希逢盖于侍从语言之余责以论思献纳之效才如蹇浅莫逃阁笔之讥思匪淹该虚辱调羹之宠当得瓌杰来承燕闲伏念某灯火穷研草茅贱处讨论润色既非郑国之才号令文章莫究汉家之制幸身逢於盛际遂名玷於词科初登秘省之严旋领宪台之寄瞻玉堂於天上如隔尘凡覩华盖於日边忽蒙光耀任寄丝纶之重宠观草藁之能幸侍清光曷酬恩命恭惟皇帝陛下道包天地功光祖宗四夷伸向化之诚列镇有归朝之请月将日就彰圣学之缉熙春育海涵赫皇王之维辟念人才当随其小大于问学无间其精粗遂俾颛愚叨居清要臣某敢不勉肩职业思尽忠规以济时道行为心不违其素变絺章绘句之习窃媿非才

元和二年司徒杜佑乞致仕表

伏以竭其力致其身亲受君恩之大进以礼退以义愿全臣节之恭俯沥愚衷仰干宸听（中谢）窃念某早缘门廕遂忝仕流始应郡县之除旋奉省台之寄三居剧郡甚乖经理之方屡镇雄藩尤缪靖绥之略思赞襄而上报终玩愒以中惭敢望眷求复加超擢摄居冢宰既使正位于百官贵极司徒尚令敷教於羣士老冉冉其已至心摇摇其若何每虞簪笔於甘泉有妨贤路所愿挂冠於神武远为逸民辄敢上渎於威严庶可少休於闲散恭惟皇帝陛下明昭圣武勤俭天姿尊礼大臣有汉高之度保全勲旧有光武之仁顾惟老臣尚縻天禄倘遂山林之想敢忘天地之恩伏望圣度包荒大明委照舍庙廊而处散地俾安投老之心在江湖不忘其君敢弛平生之志

元和四年魏稠谢赎故第表

伏以先基弗绍岂胜传舍之慙圣泽旁流终获有家之庆深荷生成之赐大蒙覆载之恩（中谢）臣某草莽微踪绳枢贱迹简编为乐莫寻扬氏之一区饘粥居贫何有相如之四壁有负箕裘之责遂隳堂构之承上雨旁风曷焉止息历年易岁将就沉沦敢图上圣之洪恩申念忠臣之遗裔下内廷之诏责令所司出外藏之金俾全其旧问菊松而无恙阅户牖以依然负此恩私曷胜荷戴恭惟皇帝陛下禹汤勤俭尧舜寛仁虽九重黄屋之居不遑寧处使四海苍生之业咸有依归肆令白屋之余民亦复青毡之旧物臣某敢不上告祖祢下及子孙时语时言俾输忠於世世爰居爰处使知本於尊尊

元和二年李吉甫上元和国计簿表

伏以圣人德洽民生深念版图之重臣子恪恭厥职（原阙）

玄宗开元某年姚崇帅百官贺太阳当亏不亏表

伏以天象示人历数兆成於变异圣心享帝曜灵无损於光辉明着观瞻欢腾率溥伏以天之高也史历可致於千年日有食之经传谓失於再闰允念四时之代谢实由七政之推移於铄阳明有符君位六合俱照式昭管子之言十月之交恐起周诗之刺方清台谨盈朒之则而当宁严修省之心日新又新鉴汤铭之在器当食不食皎羲驭以行空离两继明乾元同运恭惟皇帝陛下璿玑齐政玉烛扬光谓东门之朝王者当严於旧典而西谷之饯臣子盍务於攸司上下交修君臣相戒遂使赫赫煌煌之象允符巍巍荡荡之功輶路清夷云衢肃穆臣某等慨当驹隙幸际龙飞虽迫暮于桑榆每倾心于葵藿羣陰尽退竦瞻一轮五色之华万国同明将致合璧连珠之应

贺野蚕成茧表

伏以帝功成化乐羣动之含生野茧呈祥昭二仪之美贶封章輶奏率土腾欢（中贺）窃以妇功之勤蚕事为重姬周勤俭后妃躬就于三盆刘汉兴隆嫔御亦亲于六舘未有化由天造成匪为人纷以滋繁不假柔桑之育自然动息奚烦燠室之居澜雪茧之纷纷灿素丝之濯濯如瓮如盎厥筐厥包为公子之衣裳章身有耀荐圣人之黼黻景命维新共知和气之致祥孰谓太平之无象恭惟皇帝陛下缉熙圣学润色先猷省禹贡織纀之文令四方无来献同汉帝締紵之好於万年其永观远穷日月之照临允叶天人之精禋亨嘉所会福庆大来肆令蛭蝻蠢蠢之微用为赫赫明明之应亘古所鲜惟圣为然臣某等幸服迓僚亲逢休美载书史册昭治袞於昌辰爰咏豳风比足衣于乐岁

武宗会昌中李德裕上丹宸六箴表

伏以圣度如天诞辟忠嘉之路臣心就日庸修箴敬之辞俯沥微忱仰干睿览（中谢）窃以周公无逸陈王业之艰难尚父丹书谨君心之敬怠粤惟古圣克监昌言故国家有道之长为万世不刊之法臣何为者心切慕之用昭丹表之陈寅上金屏之御宵衣警怠正服禁奢罢献则珍好无所容纳海则嘉言罔攸伏辨邪杜佞壬之惑防微絶游幸之虞朝夕于斯出入庶资於观省春秋匪懈政治有介於昭明敢因翰墨之勤上渎冕旒之邃恭惟皇帝陛下命膺传序运履重熙诵武公抑戒之诗谨成汤盘铭之戒念兹皇祖谟谋绵万代之基迪惟前人嗣续厚亿年之裕凡其圣哲实稟生知亦何待於微言始克明於俊德徒以拳拳之志庸申恋恋之忠进冒威严退怀兢灼臣某心倾葵藿识媿刍蕘接乎目警乎心愿纪日新之盛致其身竭其力敢忘辰告之诚

文宗开成三年百官贺驹虞表

伏以昊穹眷命丕昭圣作之符瑞兽应期实表君临之德事传图籙庆浹寰区（中贺）窃以龙马负图妙庖羲之画卦麒麟在囿彰黄帝之垂衣盖当有道之时必有非常之应乃如今日信合昌辰貌首虎身允矣羽仪之盛墨文白质粲焉文采之新外猛以威内仁而信出逢兴运品族曷比其形模德着好生刍食匪同於优畜用着君心之厚以昭王道之成恭惟皇帝陛下祗遹先猷茂膺神策流行化育导迎天地之和造化生成大集山川之祉遂令灵物产彼藩邦

掩千载之前闻明诸福之毕至宜荐郊庙以纪简书臣某等幸服迹僚亲逢休应愿同周国叶二南以咏歌将见虞廷闻九韶而率舞

儼江潮省奏奉化州麦瓜并瑞表

伏以治格天休祥开地宝生虽异种咸归造化之功出若相符并荐国家之祉俯陈图谍仰进宸旒（中贺）窃以生物至多非常者异两岐秀麦咏歌曾见於张堪并蒂生瓜事实聿彰於王濬眷此长汀之壤实当巨海之冲自西自东乃疆乃理方夏畎黄云之候及秋风白露之期萃二美以踵来掩前闻而特着民生有乐庸陈懞懞之歌国本无疆载着绵绵之咏允念甸人之献誓殫野老之辞恭惟皇帝陛下大德难名至仁广被调四时之玉烛齐七政之璿玑克配彼天帝命已成於率育献诸皇祖庙祧遂格於精禋敷锡庶民本支百世兴怀古往南宫怜冯异之情寤寐贤人东陵起邵平之隐精诚夙契福履其绥肆令下邑偏州有此嘉祥美瑞臣某恪居藩服恭望阙廷永惟至气之和足应太平之象执豆筮而左右莫陪荐鮓之诚罗饌实以後先欲表巾絺之敬

天壽节贺表

伏以飞龙在天诞啓乾元之运流虹遶渚丕昭震夙之符宇宙均欢神人共庆（中贺）恭惟皇帝陛下聪明文武濬哲寬仁持盈守成四海仰舜裳之治考图数贡万方修禹甸之诚圣壽无疆邦基有永臣某亲逢华旦阻守偏州北阙推恩普仰皇明之盛南山献祝敢忘臣职之恭

皇后笺

伏以圣人履极於昭泰运之开文母思齐式厚坤元之助俯申壽祝仰对昌期（中贺）恭惟皇后殿下和顺柔徽康寧贵富中宫正位益新■〈㐁 俞〉翟之华万国承恩丕相袞龙之治与天齐壽如月之恒臣某职守偏州心驰上国效华封之祝颂愿竭忠诚想长乐之威仪尤深拚舞

皇太子笺

伏以天开上圣诞昭曼壽之期位正元储丕覩重光之运三宫喜庆四海颂声恭惟皇太子殿下仁惠慈和温恭谨恪问学得三善之要本支绵百世之传奉命总戎光辅清平之治承顏问寝钦成孝养之娱谋叶燕贻宠绥鸿祉臣某职縻下邑心属清朝想内殿之鐸仪实深鼓舞占前星之瑞采尤切欢娱

儼佛郎国进天马表

伏以龙在天而啓运诞开亨泰之基马行地以应图丕闡承乾之用仰承教育俯效驱驰（中谢）窃惟王者受命以中兴必有神物负祥而特出故神龟呈洛大禹因之以叙畴鸣凤在岐

文王因之而演易矧骐驎为有德之比而駉牝配秉心之诚背负奇文远浥荣河之润眼腾异彩上储房宿之精可万里以横行实千金之骏骨宜备十二闲之选以陪九五位之临邈迹遐方效兹上国允铄邦家之瑞於昭图牒之光恭惟皇帝陛下道合生成功侔覆载长辔以馭率皆四海之良所宝惟贤何但万人之杰肆致权奇之产实惟僻远之区骋步武于云衢冀须一顾应銮和于輶路宜在斯时礼重来王贡通重译臣某效牽羣牧敬表微忱备立仗於九廷愿同率舞荐乐歌於七庙式覩声容

荊阳外史集卷六十一

卷六十二

●钦定四库全书

荥阳外史集卷六十二

（明）郑真 撰

○表

晋王之国谢表

钦蒙圣恩于洪武十一年某月某日就凤阳府起程某月某日至国者伏以君父尊亲恩深子育价藩是辅拜命惟荣方当建国之初敢後明廷之礼臣闻圣皇啓运必封建子弟亲属盖欲同心协力以屏扞帝室也维兹太原地方数千余里控制西北蕃部表里山河古今胜要自非抚驭得人何以辑宁夷夏伏念臣某生长宫闱习知富贵幸以义方之教粗知事理之宜乃今宠膺金册位列亲王备车辂之盛仪树一方之臣屏修程善达幸遂平安父老祇迎具宣德意皆圣神之所致岂稚弱之能为（中谢）钦惟父皇陛下德盛君临谄谋燕翼谓周封同姓所以强本支汉列诸侯亦以厚宗族遂令弱息出镇大藩臣某敢不敬遵成训期永基图练军政以抚边隅严教令以靖民俗上以答天地之造下以伸臣子之心谨奉表称谢以闻

臣某不才忝中都临淮县教职洪武十一年二月初六日奉晋王殿下令旨召入讲说春秋大义王从容问曰表文体制若何臣谨对曰表系人臣告君之辞词贵谨恭意贵畅达不在雕巧自汉历唐及宋体各不同今朝令去骈俪旧习最为得之王曰亲王之国表若何臣谨对曰臣於宋南渡时尝见史丞相浩撰建王谢恩表汪内翰藻撰嘉王谢赐及第表至于亲王之国表臣未之见也王曰尔试撰一通臣谨对曰臣疎贱之才于大手笔撰述岂敢轻擬且王府长史纪善以下皆以文章鸣臣不敢逾越因进讲春秋左传曰既中罢讲王复申命之臣谨对如初王曰尔为之臣退具藁初八日啓呈王命臣读一过王为称善且曰表信难为臣谨对曰於今日体制尤难臣所撰言词浅陋惟殿下裁择王曰然因进讲春秋胡氏传既罢谓臣曰尔可於国学谕旨令助教刘子显孙大雅各撰一通以来臣既敬领旨意因録表藁并识问答语以修荣遇云二月初九日臣真谨识

三月初一日晋王府纪善括苍季璵纯夫以书报曰前日所撰之文上见甚说特赐见用彤廷且请再撰笺文真复书再三辞之并録以纪一时文之用不用不论也

代留守司金指挥事张胜升除留守指挥使谢表（洪武十一年戊午）

钦惟圣恩授臣留守指挥司指挥使已於某月某日上任者伏以留守之司军民重任使名显

授拜奉恩荣於荷戴以维深思报称其曷已伏念臣某生自畎亩初无艺能上遇圣明列在行伍喜际飞龙之会殊无汗马之劳衣被服乘岁承赐与武阶显爵日致超除今自留守金司升华使节建牙视篆长於同僚顾譔材之匪堪欲控辞而莫敢（中谢）钦惟皇帝陛下文德武功奉天承运混华夷之一统受玉帛以覲朝乃睠中都视汉丰沛宸居之美观扈卫之攸同遂致臣微就膺宠擢臣某敢不仰遵成命俯致微躯修武备以卫邦畿永祝万代太平之业用以伸臣子之心焉

濠梁卫指挥使周俊李某谢赐田表

伏以良田广亩衣食所资上圣垂恩均承宠赐鞠躬拜命喜惧交至伏念某等本出贱微初无技业伏遇陛下龙兴荷戈执戟备列行伍今者荣膺使职服劳环卫衣冠佩绶荣耀乡里兹又显奉玉音赐中都府所属定远田土各四十顷余常俸重禄之外复使耕稼取足顾惟臣微何以得此钦惟皇帝陛下戡难定乱宥过録功怜臣等布衣旧人粗効绵力故锡膏腴之壤俾享有秋温饱遍於阖门祀祭及於先代臣之此心无以为报臣某等誓当坚所职业兼尽农功歌豳风载良耜日与斯民同乐太平以尽余龄则区区之至愿也

凤阳卫指挥使司权佥事杜福实授谢恩表（洪武十二年五月内准牒文修撰後同）

伏蒙恩授臣福凤阳卫指挥使司佥事者伏以凤阳重镇扈卫京几进摄金司宠承真擢念庸材之弗称於荷戴以惟深（中谢）钦惟皇帝陛下圣神天运刚健日新广延辅弼之英普致昇平之治万年其永庶绩用成遂令行伍之微忝贰建牙之重华阶全禄祇奉殊荣下及所司恩命同日臣某敢不益勤职业务致忠忱愿成藩翰之功以报生成之德

怀远卫亲军指挥使司权佥事赵彬蒋和谢彬实授谢恩表

伏以圣恩实授臣彬臣和臣彬怀远卫亲军指挥使司佥事者伏以使佥进摄已荷殊荣诏旨真除拜恩廷陞伏念臣彬等行伍贱微非有将略云龙际会尝奉命以驱驰而献凯上功莫知报効今自千夫之长权贰怀远使司未及满岁赐之实授兼以全禄宠及三臣之厚允为仕选之华自揆匪材岂胜荷戴（中谢）钦惟皇帝陛下盛德如天功成混一制作传於万代文教洽于四方犹致材贤用为佐辅遂令譔薄亦忝升华臣某等敢不夙夜同心力思报称视军民为一体奉法令之公平京畿靖谧海宇永寧则区区之至愿也

长淮卫亲军指挥使司权佥事钱聚王立实授谢恩表

伏蒙圣恩实授臣贵长淮卫指挥佥事者伏以建牙列镇宜得殊材佥摄何能乃承具擢既厚赐之全禄复宠锡以华阶喜幸惟深抚躬弗称（中谢）钦惟皇帝陛下文武圣神上受天命大啓升平之运遂成永久之基任贤授能小大并用遂令行伍之微参佐使名之重下及所属共荷明恩臣某等敢不恭致忠忱協同心力愿保长淮之盛观永为畿甸之藩维

凤阳左卫指挥权佥事李广辅曹某实授谢表

伏蒙圣恩实授臣广辅臣某凤阳左卫佥事者伏以任列使佥幸承进摄圣心宠眷遂拜真除伏念臣某等生自陇亩忝入行间而长於千夫隸于列卫自惟弩钝下材敢望官聯之重兹者权贰使司已为弗称未云满岁而实授全禄下及将佐所属同拜恩命念謏薄其匪堪思报称其曷已（中谢）钦惟皇帝陛下圣资英武天性聪明合玉帛以会朝成车书之一统太平政治广任材贤何期草芥之微亦在升华之选臣某等敢不务致忠诚服勤所职愿护京畿之固上答天地之恩

凤阳右卫指挥使司权佥事高贵崔雄实授谢恩表

伏蒙圣恩授臣贵臣雄凤阳右军指挥使司佥事者伏以圣明在上任重军民摄职使佥遂承实授宠以武阶之重兼之俸赐之全仰德惟深抚躬不称（中谢）钦惟皇帝陛下文武圣神受天眷命广弼亮谋谟之助成久安长治之基遂致庸愚亦蒙宠擢臣某等敢不恭承明命务致忠忱用摅心膂之勤永保藩维之固

凤阳中卫指挥使司权佥事董暹许富谢实授表

伏蒙圣恩实授臣暹臣富凤阳中卫指挥使司佥事者伏以使佥弁摄曾未逾时武爵通阶复蒙实授祇奉丝纶之命仰承天地之恩伏念臣某等生逢圣运辱在行间固尝奉命以周旋自谓非功而授禄惟列卫军民之重当得智勇果毅之材岂此庸愚俱膺升擢俾贰使名之选兼之俸赐之全荷戴惟深莫能报称（中谢）钦惟皇帝陛下上圣生知武功文治重股肱心膂之任成万代宏久之基遂使臣微亦承恩命臣某等敢不勉忠所职益务同心永言扈卫之勤以报宠荣之盛

留守指挥使司权佥事李徵高成谢实授表

伏蒙圣恩实授臣徵臣成留守指挥使司佥事者伏以京畿守卫任重留司仰廷陛之洪恩由权佥而实授抚躬不称顿首知荣窃念臣某等生自■〈亩犬〉亩列在行伍委身致力尝効驱驰长於千夫授以勇爵自揆非材已为踰分兹又进摄留钥参佐军政未云满岁遂使为真既忝官联之盛复承俸赐之全下至所属将佐拜恩同日其为宠幸拜舞惟均（中谢）钦惟皇帝陛下文武圣神万方一统与天地同其大并日月以为明任贤使能録功取善内外大小之臣各务所职遂令草芥之微亦贰使名之重臣某敢不勉思报効益励忠勤协僚佐以同心率军民而安业邦家永寧惟深祝颂

徐州卫权千户姓某谢实授表

伏蒙圣恩实授臣某等徐州卫某所千户者伏以盛德如天昇平致治武阶实授深荷宠荣（中谢）钦惟皇帝陛下濬哲文明混一海宇登庸辅弼眷念功勲遂令行伍之微亦忝锡賚之

重爰及五所受命同时俾摄为真授以全禄允惟天地之大普同覆育之恩臣某等敢不务致忠勤共怀补报仰丹墀而称谢伸臣子之至情

广信千户所谢赏赐表笺二道

上位表

上言圣明在上式广仁慈彩绮华缣普同恩赐抚躬弗称拜手知荣（中谢）钦惟皇帝陛下文武生知应时抚运粲黼黻以成文垂衣裳而致治是以眷念功勲赏同中外笥颁之盛春育而海涵矣臣某荷承宠命祇受奚胜用成制度之宜期致忠忱之报

东宫笺

上言内府文缣式华宠赐仰瞻青禁拜命惟荣（中谢）敬惟皇太子殿下讲学崇儒记功録善辅尧舜衣裳之治宏博施济衆之仁雨露恩覃同于中外实为盛矣臣某等守御山城莫趋廷谢恒思补报以颂重晖

广信千户所贺蒙古部衆来降表笺二道

上位表

上言命将行师式严天讨远人效顺用奏成功肃清朔漠之区盛展内朝之贺（中谢）钦惟皇帝陛下圣神啓运一视同仁普令声教之同大正车书之统惟兹外域每示柔怀遂使旃裘之民悉为冠带之俗恩均乐育德遂生成而歌颂承平惟其时矣臣某职司守御幸际休明愿陈王会之图恭上万年之壽

东宫笺

上言圣训尊严王师利用日月普同於临照远人悦慕以归诚瞻仰东宫四方来贺（中贺）敬惟皇太子殿下德崇主器位应前星辅成一统之功大啓千龄之运遂令漠北拚舞趋朝■〈日卷〉将帅之効勤闻凯歌之屡奏王庭万里雨露春融海■〈宀禹〉其永宁矣臣某等承恩守御莫效忠忱愿从亿兆之心敬上清平之颂

广信府千户所谢增俸表笺二道

上位表

上言命官以贤式资文武品秩由大小而定俸禄以整数而增拜命自天抚躬何称（中贺）钦惟皇帝陛下至圣至神应期抚运德并天地之大春涵雨露之濡念及臣工益其禄养斗斛

之量不用其余温饱及乎闾门仁厚同乎海■〈一禹〉臣某忝司守御允赖生成深荷仰承
俯育之恩当效竭力委身之报

东宫笺

上言朝廷养贤德如天覆文武内外之职俸禄以类而增瞻仰青宫惟深拊舞（中谢）钦惟
皇太子殿下温恭敏哲宽厚慈仁侍膳问安辅成政治遂致公储之富每臻乐岁之丰■〈日
卷〉念臣工岁支月给斗斛俱登整数升合不论其余俯拜鸿恩何能为报臣某等幸及同僚
均涵盛赐饱食不忘於字育委身当致其忠勤

荥阳外史集卷六十二

卷六十三

●钦定四库全书

荥阳外史集卷六十三

（明）郑真 撰

○表

怀远卫亲军指挥使司贺正旦表笺三道（洪武六年闰十一月三日承本县牒丈）

皇帝表

上言三阳之月天地开泰上圣在御万方来贺（中贺）钦惟皇帝陛下盛德难名仁恩广被普天率土罔不臣服肇协寅正之序永臻万寿之期伏念臣某等奋自行伍职居列卫嘉与三军同深祝颂欣拚之私倍万伦品

中宫笺

上言月谨寅正天地合德礼正东朝万邦展贺（中贺）敬惟皇后殿下中宫正位圣哲同尊肃雝之德助成内治履端谨始海■〈宀禹〉咸春臣某等忝荷深恩职列环卫报効之心未及万一惟与僚属上祝亿万齐年为宗社之福

东宫笺

上言行夏之时万代常法东宫展礼福履攸宜（中贺）敬惟皇太子殿下温文肃恭仁慈敏哲谨三朝之问礼参九重之政治宗社基本海宇属心而臣某等忝荷深恩职司环列不能效重晖之颂惟与军士同增鼓舞

留守指挥司正旦表笺三道（洪武六年闰十一月三日本县牒文）

上位表

上言献岁发春王正谨始圣人南面朝贡会同凡在宇内莫不称颂（中贺）钦惟皇帝陛下道本生知性由天纵沛江海之量合天地之德自北自南无思不服而臣某等遭逢盛代与司留钥不能报効万一惟与僚属仰祝明圣万寿与天地海岳相为永久

中宫笺

上言月谨王正天开一统博厚配地万壽齐年（中贺）敬惟皇后殿下表正柔仪辅成内治玉册金相增辉椒殿翬衣■〈衤 俞〉翟介祉萝图际此履端之月用展宫闈之礼某等忝荷盛恩职掌留钥谬承靖绥之略实深祝颂之诚瞻恋廷阶喜倍常品

东宫笺

上言泰来集吉震长是宜瑶历增华青宫展贺（中贺）敬惟皇太子殿下贤居储嫡望崇主器温文恭敬本自天成礼乐诗书日敏于学际此三阳之月永增福履之新而臣某等自愧非才忝司留钥瞻仰前星讴歌祝颂为宗社生民之福

濠梁洪塘湖屯田千户所正旦表笺三道（洪武六年闰月廿四日）

上位表

上言春王正月麟经谨始三朝嘉会万福来同凡在宇内莫不称贺（中贺）钦惟皇帝陛下尧仁天纵汤德日新敷治象於多方播仁声於庶类宇宙两间嘉应备至所谓先天而天弗违者矣臣某等忝戍屯田不能布宣德意惟与耕稼之民载歌豳风以祝亿万年之壽

中宫笺

上言月在三阳道随泰长宫闈展礼福履攸宜（中贺）敬惟皇后殿下性稟俭慈躬行柔顺体家人之正位成关雎之美化肇临盛旦修列多仪臣某等忝戍屯田慙无寸效惟与亩亩之民及时耕稼上祝亿万齐年之壽

东宫笺

上言月谨天正履端维始东宫展礼万邦来贺（中贺）敬惟皇太子殿下贤居嫡长望崇主鬯鹤驾抚军畅威声於远迩龙栖问寝谨孝敬於朝夕肇临吉旦倍膺多福而臣某忝戍屯田不及躬诸廷阶惟与耕农瞻仰前星为储闈之喜

濠梁左卫指挥使司正旦表笺三道（洪武六年十二月临淮县牒文）

上位表

伏以月正上日凤历颂春四海一家会同展贺（中贺）钦惟皇帝陛下治定功成礼兴乐作宇宙之内咸囿泰和是以上受天命基盛业於万年也臣某等忝戍中都备员左卫茂际明时敬傲嵩呼之三祝

中宫笺

上言三阳交泰厚德承乾礼正宫闈万方来贺（中贺）敬惟皇后殿下恭俭慈仁齐庄柔淑施政教於闺门肃母仪於天下肇临正旦品物皆春臣某等忝居左卫茂际熙辰敢竭微诚祝亿万年之壽

东宫笺

止言天开泰运夏正建寅礼正东宫履端展贺（中贺）敬惟皇太子殿下温文肃恭仁慈勤俭谨三朝之盛礼系四海之欢心届此熙辰永膺多福臣某叨职左卫无补涓埃惟与僚属同深祝颂

凤阳左卫亲军指挥使司正旦表笺三道（洪武七年六年冬十一月承临淮县牒文预撰）

上位表

上言王正书春肇新治象圣神左御臣庶同懽（中贺）钦惟皇帝陛下啓运法天生知盛德文教武功高冠前古际此三阳之月茂膺吉履之绥宇宙泰开诸福毕至臣等备员左卫莫缀班联壽考万年维深祝颂

中宫笺

上言天开泰运历象维新椒殿正仪万年齐壽（中贺）敬惟皇后殿下性全徽懿德茂俭慈中壺母仪助成内化际此三阳永膺福履臣某等备员左卫莫补事功瞻仰宫闈实深祝颂

东宫笺

上言春正王月敬授人时位正储宫万邦同贺（中贺）敬惟皇太子殿下温文肃恭礼成主鬯问安侍膳敬谨惟时好道崇儒日新讲学亿兆衆庶歌颂攸归旦告三朝茂膺福履臣某等忝居左卫莫任抚绥瞻仰前星千秋祝颂

留守指挥使司正旦表笺三道

上位表

上言春秋书春王正月孔圣论行夏之时皆所以正一统之义也（中贺）钦惟皇帝陛下受天明命抚御华夏敷治象於内廷播仁声於广■〈宀禹〉际此三阳茂膺福祿臣某等忝司留钥莫缀班聯万壽维祺实深祝颂

中宫笺

上言历象维新九■〈ㄣ禹〉一统内廷受贺嘉礼攸宜（中贺）敬惟皇后殿下淑德徽慈中宫正位表万邦之淑仪助亿年之至治际兹盛旦福履其绥臣某忝司留钥莫补事功仰瞻广内上祝齐年之壽

东宫笺

上言宇宙春开璿玑示历储宫受贺嘉礼攸宜（中贺）敬惟皇太子殿下温文肃恭礼成主鬯左右辅翼莫匪正人故能衍本支於万禩永福祿於千秋某备员留钥茂对重晖瞻仰前星惟深祝颂

洪塘湖屯田千户所正旦进贺表笺三道

上位表

上言献位发春肇新治象万方来贺臣子之至情（中贺）钦惟皇帝陛下文武圣神抚膺景运天之所覆莫不臣服盛德鸿业与天地永久际兹盛旦福履咸绥臣某等忝职屯田莫补寸功仰廷陛下九重祝万年之眉壽

中宫笺

上言正月上日治象维新厚德承乾万邦来贺（中贺）敬惟皇后殿下正位宫闱母仪天下辅九重之盛治成亿载之弘基际此三朝茂膺福祿臣某等忝职屯田莫联班缀升瞻椒殿壽祝齐年

东宫笺

上言四海■〈ㄣ禹〉同万年景运青宫正位福履维宜（中贺）敬惟皇太子殿下德盛温文位崇震器人心允叶歌颂攸宜际此三阳茂膺吉履某忝职屯田仰瞻鹤禁千秋祝颂用表寸忱

怀远卫亲军指挥使司正旦进贺表笺三道

上位表

上言圣人法天道以授人时所以正一统之义也献岁敷春万方来贺（中贺）钦惟皇帝陛下天统生知圣神文武际天所覆罔不臣服制礼作乐高冠前古际此三阳开泰茂膺福祿之宜臣某等备员列卫莫补事功惟与僚属上祝亿万年之壽

中宫笺

伏以春回椒掖厚德承乾礼谨三朝内廷受贺（中贺）敬惟皇后殿下正位宫闈助成内治
万方四海咸仰母仪际此三阳万福具臻臣某等忝职中都莫陪班缀仰天阙之九重祝齐年
之万壽

东宫牋

上言正月上日敬授人时礼正储宫万方赞颂（中贺）敬惟皇太子殿下恭敬温文以贤以
长庶务参决深知治体燕翼延裕衍本支於万禩某忝职中都欣逢盛旦瞻仰前星上千秋之
祝

怀远卫亲军指挥使司正旦进贺表笺三道（洪武九年正月 洪武八年冬准临淮县公文）

上位表

上言正月所加同乎远迩龙墀受贺圣壽万年（中贺）钦惟皇帝陛下圣知武文君临海■
〈ㄅ禹〉法尧舜之盛治广阳德以如春届此王正永膺福祿臣某忝荷殊恩职司列位瞻仰
九重之邃共陈祝颂之诚

中宫笺

上言正月上日凤历授时椒殿受朝懽同海■〈ㄅ禹〉（中贺）敬惟皇后殿下德盛齐家
助成内治懽着二南之教盛陈广内之仪臣某等忝司列卫何能报効惟与僚属祝万年之齐
壽

东宫牋

上言夏正建寅四时合序春宫盛礼中外均懽（中贺）敬惟皇太子殿下天稟英姿以贤以
长谋貽燕翼祚衍本支礼谨问朝德新讲学际此会同盛旦肇开鹤籞之华某忝司列卫莫报
忠勤敬歌汉颂之重晖永祝千秋之福祿

留守指挥使司正旦表笺三道

上位表

上言治历明时圣人所以敬天勤民也阳日维春万方来贺（中贺）钦惟皇帝陛下受天明
命德盛君临武功告成文教广被制礼作乐永为後代法唐虞三代何以加焉臣某等忝司留
钥深荷鸿恩祝圣壽之万年与天地其永久

中宫笺

上言正月朔旦泰运天开椒殿受朝万年齐壽（中贺）钦惟皇后殿下正位中宫母仪天下关雎葛覃之诗见诸咏歌届此三阳永膺吉履臣某等留钥所司实承重寄敬瞻广内致臣子祝颂之诚焉

东宫笺

上言圣门论治行夏之时万国会同青宫献壽（中贺）钦惟皇太子殿下位崇主器盛德日新视膳备尊亲之礼问学得治平之要三阳开泰吉履其绥某忝司留钥何补事功仰日月之重晖祝千秋之福祿

凤阳左卫正旦表笺三道

上位表

上言璿玑示历寰宇皆春万邦皆贺臣子之礼也（中贺）钦惟皇帝陛下上圣生知华夏一统际天蟠地海涵春育届此三阳万福其臻矣臣某等忝居左卫莫効抚绥惟与军民同祝万年之壽

中宫笺

上言三阳之月道长泰亨椒殿受朝共陈祝颂（中贺）敬惟皇后殿下仁厚淑慈与天合德葛覃美教及乎万方届此正旦福祿同臻臣某忝居左卫食祿靡功嘉与军民同祝齐年之壽

东宫笺

上言正月履端维新治政东宫受贺福履攸宜（中贺）敬惟皇太子殿下位尊主鬯以贤以长人心所系歌颂攸同际此春正星晖海润嘉贶备至海■〈宀禹〉臣子咸愿致其诚悃某备员左卫何补寸功千秋之壽共伸美祝

长淮卫指挥使司正旦表笺三道

上位表

上言尧典敬授人时孔子书春王正月所以示一统之义也海■〈宀禹〉咸春万邦来贺（中贺）钦惟皇帝陛下文武圣神治教广被制礼作乐为後代法唐虞之盛於今见之际此青阳万年眉壽臣某等忝司列卫仰荷殊荣拚舞之诚倍万伦品

中宫笺

上言天开月吉历象维新盛会同之礼仪仰中宫而献颂（中贺）敬惟皇后殿下慈懿淑柔助成内治懋着葛覃之教用貽燕翼之谋际此春阳永膺福履臣某等忝司列卫重任曷胜祝万壽之齐年与邦家而同永

东宫笺

上言凤历授时春开万象青宫受贺主器同尊（中贺）敬惟皇太子殿下英稟天成贤居嫡长侍从辅翼实惟正人礼乐诗书日新讲学共际会同之旦永膺吉履之成某等忝荷殊荣职司列卫仰前星之美彩祝福壽之千秋

洪塘湖屯田千户所正旦表笺三道上位表

上言春王正月圣壽万年玉帛会同邦家之盛礼臣子之至诚也（中贺）钦惟皇帝陛下法天啓运君临万方广鸿恩於海宇咏安乐於太平献岁发春倍膺福祿臣某等忝职屯田曷勤报効嘉与兵农同陈祝颂

中宫笺

上言天正授历万象维新内殿受朝万年齐壽（中贺）敬惟皇后殿下德盛淑慈中宫正位辅成治政与日月而同辉届此三阳懋膺百福臣某忝寄屯田兵农事重共伸祝颂实倍至诚

东宫笺

上言献岁发春青宫受贺邦家盛礼主器同尊（中贺）敬惟皇太子殿下恭敬温文日新讲学臣民颂美海内属心际此三阳倍膺吉履某屯田忝职事重兵农祝福祿於千秋与前星而齐壽

长淮卫指挥使司正旦进贺表笺三道（洪武十年正月上进洪武九年冬十一月准临淮县牒文）

上位表

上言天开盛旦万象咸春请祝圣人万年福壽（中贺）钦惟皇帝陛下神圣文武应运龙兴正天下之常经立百王之大法衣冠礼乐海■〈宀禹〉同懽臣某等忝卫长淮莫思报効瞻仰九重之上实深拚舞之诚

中宫笺

上言青阳献岁天地皆春肇新内殿之华永集邦家之福（中贺）钦惟皇后殿下正位中宫母仪天下周南美教咏关雎之歌际兹泰长之辰永介齐年之壽臣某等忝司列卫莫报恩荣拚舞之诚倍万伦品中贺中贺

东宫笺

上言春开泰运历象新颁礼正青宫輿情咸悦（中贺）敬惟皇太子殿下温恭端厚主器攸尊侍膳问安尊师重传祇承圣训问学维勤际兹献岁之初爰受自天之佑某等忝司列卫莫効忠诚祝福壽之千秋上重晖之美颂

凤阳左卫指挥使司正旦进贺表牋三道

上位表

上言玉衡示历海宇皆春礼乐会朝万方一统之日也（中贺）钦惟皇帝陛下文治武功法天啓运恩波遍乎远迩谋猷协乎臣工唐虞三代之盛於今见之臣某等忝居列卫莫効忠勤祝万壽以维祺与军民而忭舞

中宫笺

上言天开泰运岁纪肇新仰瞻椒殿之华盛展会朝之礼（中贺）敬惟皇后殿下徽柔恭俭正位中宫内教允修裨宏圣治葛覃之诗见诸咏歌届青阳之令辰集邦家中之福祿臣某等忝司列卫莫効忠勤祝万壽之齐年致履端之善颂

东宫笺

上言王正肇建岁序维新礼盛东宫臣民懽忭（中贺）敬惟皇太子殿下天稟英姿位尊主鬯凡而修齐治平之要得诸问安侍膳之余履端令辰重晖善颂某忝司左卫莫綴班联仰瞻鹤籙之华共祝千秋之壽

留守司正旦进贺表牋三道

上位表

上言凤历新颁春为岁首华夏咸同於一统臣民共祝於万年（中贺）钦惟皇帝陛下濬哲温文应期抚运武功以成洪业文治以开太平宇宙涵生永成乐育际春阳之泽物协海内之懽心臣某忝司留守何补事功嘉与军民惟深赞颂

中宫笺

上言青阳献岁宇宙春和陈内殿之盛仪祝齐年之上壽（中贺）敬惟皇后殿下位合乾纲母仪天下周南关雎之美教密赞谋猷际此春正倍膺福祿臣某等忝司留钥莫效忠勤幸同海宇之懽愿与天地同永

东宫笺

上言阳和布令物象皆春嘉礼重於东宫懽贺周乎寰海（中贺）敬惟皇太子殿下日新盛德主器攸尊侍膳问安敬恭惟谨尊师重傅问学尤勤当凤历之授时介千秋之福祿某忝司留钥何补事功仰鹤籙於九重陈重晖之美颂

洪塘千户所正旦进贺表牋三道

上位表

上言青阳应候物象咸春仰殿陛之九重祝圣人之上壽（中贺）钦惟皇帝陛下受天成命抚育万方伟礼乐之成功混车书之一统梯山航海莫不来宾属兹泰长之辰永集邦家之福臣某忝司屯所事重农功盛衣冠之会朝致华嵩之永祝

中宫笺

上言凤历肇颁春开万象中宫盛礼福履攸宜（中贺）敬惟皇后殿下位并至尊柔嘉维则示母仪於天下成美教於宫闈密赞皇猷裨辅圣治有永怡愉之燕肇新内殿之华臣某忝职屯田莫思报効上齐年之美颂尽臣子之至诚

东宫笺

上言天开黄道凤历授时盛衣冠之会朝仰东宫之献壽（中贺）敬惟皇太子殿下礼尊主鬯位正前星龙楼庶务之参闻深知政体人心允协大本尊崇式观福履之成永介千秋之壽某忝司屯所农事维勤协丰年之雅歌致重晖之美颂

怀远卫指挥使司正旦进贺表笺三道

上位表

上言宇宙春开人时敬授圣壽万年臣子祝颂之诚也（中贺）钦惟皇帝陛下武功文治混一车书协虞夏之谋猷合殷周之制作恩波远洽咏歌太平际兹令旦之华茂时对阳之盛臣某等忝司列卫守御中都敢效华嵩之呼愿与天地共大

中宫笺

上言天有四时春为岁首盛衣冠之朝会祝多福之中宫（中贺）敬惟皇后殿下温柔肃恭母仪天下成周南之美教嗣太姒之徽音际此履端维深赞颂臣某等忝司列卫莫致忠勤敢陈向日之诚共祝齐天之寿

东宫牋

上言宇宙回春肇开壽域华夏混同於一统人臣共祝於千秋（中贺）敬惟皇太子殿下恭敬温文位尊主鬯允协燕谋之永肇新鹤籙之华问寝承颜尊儒讲学人心所属歌诵允谐际此令辰倍膺多福某等忝居列卫莫致忠勤效汉颂之重晖与军民而舞忭

六安州守御千户所正旦表牋三道

上位表

上言月正上日泰象天开盛礼会朝臣子之至情钦（中贺）惟皇帝陛下上圣生知聪明睿哲武功文治辑宁海宇礼乐制度垂法万代二帝三王何以过之届此春阳倍膺福祿臣某等忝守州邑深荷鸿恩嘉与军民同祝万年之寿

中宫表

上言春王正月礼盛中宫万壽齐年懽同海■〈宀禹〉（中贺）敬惟皇后殿下温恭徽柔母仪天下肃雝美教关雎葛覃何以及之际此青阳永安吉履臣某等忝司行伍莫报宠恩仰内殿之尊严与军民而祝颂

东宫牋上

言三阳开泰万方一统青宫受贺方今之盛典（中贺）敬惟皇太子殿下天稟英姿温恭敏哲德尊主鬯位映前星四海讴歌人心仰戴际兹盛旦而福祿其臻矣某等忝司守御任寄军民献壽千秋喜踰常品

皇陵卫正旦进贺表笺三道

上位表

上言天开黄道凤历颁春四海会同万年祝壽（中贺）钦惟皇帝陛下应乾承运大阐皇猷礼制乐兴远人宾服是以百谷用成四时顺序嘉祥咸至率普均懽际兹盛旦之华永集泰亨之告臣某等职卫皇陵莫联班缀敢同葵藿之诚上致华封之祝

中宫笺

上言正月书春青阳布政万方玉帛内殿受朝（中贺）敬惟皇后殿下徽柔懿恭齐庄中正教本关雎式同周妣示母仪於天下辅王道於宫闱际此令辰齐天介壽臣某荷承恩宠忝卫皇陵敢伸祝颂之忱用致履端之贺

东宫笺

上言青阳布令万物皆春肇开鹤籞之华上祝千龄之壽（中贺）敬惟皇太子殿下聪明天稟位正前星问道尊师契修齐治平之要人心允协大本攸尊适兹泰长之辰永集邦家之福某等忝荷洪恩何由补报瞻山陵之松柏与日月以常新嘉与军民重晖祝颂

凤阳卫指挥使司正旦进贺表笺三道

上位表

上言天开泰运凤历颁春民物阜安庶民咸贺（中贺）钦惟皇帝陛下武功既定文教广敷修法度正纪纲所以肇建宏规而衍亿万年之盛业也兹逢令旦茂介洪禧臣某等忝司列卫莫缀班联瞻望九重恭祝万壽

中宫表

上言家人正始王业所基春满宫闱中外同贺（中贺）敬惟皇后殿下柔顺承天恭勤治内助成洪业母仪天下衍宗社万年之永久兹逢正旦福祿是臻臣某等祇奉慈恩忝司列卫惟瞻望九重祝齐天之壽

东宫笺

上言春颁凤历喜溢青宫宗社安寧臣民相悦（中贺）钦惟皇太子殿下天纵英姿帝命是式承顏实謹於敬恭亲傳益勤於问学是以德业日新令闻日广而万方所瞻仰也兹逢泰运福祿攸宜某等忝居列卫职守维勤莫勤趋贺之班仰祝千龄之壽

荥阳外史集卷六十三

卷六十四

●钦定四库全书

荥阳外史集卷六十四

（明）郑真 撰

○表

凤阳卫正旦进贺表笺三道（洪武十一年正月上进洪武十年冬十一月内承临淮县牒文修撰）

上位表

上言春王正月车书一统仰会同之盛旦肇历象之新颁海宇同懽廷墀受贺（中贺）钦惟皇帝陛下至圣至神奉天啓运日月并同於临照草木咸遂於生成是以万方燕宁四时顺序嘉祥日至咏歌太平当献岁发春衣冠礼乐诚为盛矣臣某等忝卫凤阳莫能补报上祝万年之壽永期福履之成

中宫笺

上言三阳泰运海宇清平仰瞻广内之华式展会同之礼（中贺）敬惟皇后殿下淑质天成柔嘉有则肃临中壺佐庶政以祇勤用能成万年太平之基协麟趾关雎之咏青阳布令福祿咸臻臣某等忝卫凤阳莫联班缀上祝齐年之壽以尽臣子之诚

东宫笺

上言阳春发育治象惟新正朔会同青宫献壽（中贺）敬惟皇太子殿下濬哲在躬位尊主鬯崇儒问道讲学祇勤於问安侍膳之余得修齐治平之要金枝衍裕鹤禁增华当宇宙之春开效重暉之美颂某忝卫凤阳日思报称共上千秋之祝普同四海之懽

凤阳左卫正旦进贺表笺三道

上位表

上言圣人法天而啓运在乎治历以明时当献岁发春之初合万方会同之盛颂声有作中外同懽（中贺）钦惟皇帝陛下至圣至神君临海■〈宀禹〉华黼黻以成文垂衣裳而致治

梯山航海莫不贡琛允宜祚嗣之安求保基图之固际兹泰长福祿攸宜臣等祇荷鴻恩職司左衛仰盛代百王之禮樂祝萬年天子之春秋

中宮牋

上言春陽應律治象維新仰日月以同升奉椒宮而獻頌（中賀）恭惟皇后殿下慈儉柔嘉六宮懿則衍金枝之奕葉盛玉冊之穠華麟趾關雎助成王道俾兆民之樂業成億載之治平際此泰亨倍膺吉履臣某等祇奉慈恩職司左衛共上齊天之壽敬伸善頌之誠

東宮箋

上言正朔天開會朝上日盛東宮之禮樂同華夏之懽心（中賀）敬惟皇太子殿下天稟英姿日新講學龍樓庶務深知治體虎闥三善允契師傳立萬年宗社之本系四海民庶之心際此春陽永膺福祿某忝司左衛何補事功祝重潤與重暉祝千秋而作頌

長淮衛正旦進賀表箋三道

上位表

上言文明之運肇紀春正萬年系序之傳百王禮樂之盛謳歌壽域臣子敬恭（中賀）欽惟皇帝陛下神聖武文受天景命号令之行海涵春育億兆民庶咸曰大哉王言一哉王心太平樂業皞皞然唐虞三代之治矣臣某等忝司長淮鴻恩莫報恭仰堯階之邃用伸祝壽之誠

中宮牋

上言正月上日禮樂會朝備中壺之柔儀仰內廷而稱頌敬惟皇后殿下并乾稱大助日為明用成一統之基式正六宮之位教行海宇關雎詠歌際泰運之肇新宜倍膺於多福臣某等仰荷慈恩忝居列衛祝齊年之萬壽與天地以同尊

東宮箋

上言堯歷授時青宮盛禮上千秋之祝頌仰鶴籙之清華四海謳歌萬方玉帛（中賀）敬惟皇太子殿下溫文恭謹濬哲誠明問道崇師日新聖學百代本支之永萬年宗社之傳屆此令辰倍膺吉履某忝居列衛職守中都惟深就日之誠莫致重暉之頌

懷遠衛正旦表箋三道

上位表

上言春秋之纪王正舜典之称上日示明一统之正永为万载之传礼盛廷墀万方来贺（中贺）钦惟皇帝陛下文德武功混一海宇勲贤大臣之佐辅真儒硕士之讨论礼乐诗书允为盛治亿兆人庶安乐太平际此阳春福履其成矣臣忝居怀远守御中都効臣子之忠勤祝天地而并壽

中宫箋

上言海■〈宀禹〉青阳维新治象万方礼乐中壺攸尊（中贺）钦惟皇后殿下比德乾纲相时至治易象着顺承之美周南成佐辅之功日月同明天地并位际新阳之献岁宜福祿之骈臻臣某等忝居列卫勉效忠勤仰惟泰运之升平敢倣齐年之祝颂

东宫箋

上言月正上日道长泰亨盛礼乐於春宫祝千秋而献壽（中贺）敬惟皇太子殿下英姿纯美盛德深冲问学兼三善之名嗣续系万年之运左右前後罔匪正人於问安侍膳之中得立政为治之要阳春协应福履攸宜某忝居列卫莫报鸿恩仰广殿之崇严占前星之明润千秋祝颂喜倍常情

留守指挥使司正旦表箋三道

上位表

上言圣人在御凤历维新盛玉帛之会朝仰衣裳之至治四海之内歌颂所同（中贺）钦惟皇帝陛下神圣文武受命自天子养兆民匪问远近是以百谷用成嘉祥协应诗书礼乐与三王五帝同其盛焉臣某等忝司留钥适际阳春岁有万而呼三效华嵩之颂祝

中宫箋

上言王正纪月敬授人时登万壽之齐年介中宫之福祿礼行内殿喜对慈顏（中贺）敬惟皇后殿下家人正位敷教六宫有顺天助日之功致家齐治平之效葛覃卷耳四海咏歌故当献岁之初恭上万方之贺臣某忝司留钥效职中都敢陈祝颂之诚用继思齐之雅

东宫箋

上言治历明时春为岁首恭仰龙楼之邃式瞻鹤籞之华玉帛会同万方来贺敬惟皇太子殿下恭敬温文礼成主鬯於侍膳问安之余得问学崇儒之实英声懋着海宇归心故当泰运之开永介千秋之寿某忝司留钥心恋班行瞻仰前星喜踰常品

洪塘千户所正旦表箋三道

上位表

上言正月令辰俾民观象混车书之一统盛玉帛以来同受贺大廷中外胥悦（中贺）钦惟皇帝陛下文德武功肇新景运同日月之临照合天地之生成海■〈宀禹〉清平适逢今日际阳春之育物宜福履之骈臻臣某等忝膺武职尤习农功谨陇亩之三时呼华嵩之万岁忻颂之至实倍常情

中宫笺

上言四海一家教行中壺盛礼乐於上日同中外之懽心（中贺）敬惟皇后殿下专静懿恭柔嘉有则爰着关雎之咏允为内则之贤位正六宫功成一统际此青阳献岁茂辅礼乐盛平之治歌关雎葛覃之诗介福维祺貽谋有永臣某等忝卫凤阳每思补报共上齐天之壽普同亿兆之心

东宫牋

上言人时授历泰运春开盛礼乐之仪容仰青宫而献壽（中贺）敬惟皇太子殿下德温玉裕福盛金枝宫闱敬备於承顏宗祀礼成於主鬯属兹泰运歌咏清平某忝卫中都仰瞻鹤籙上千秋之美颂与海宇以同欢

凤阳左卫正旦表牋三道

上位表

伏以上圣君临车书一统寅正授历海宇春开集万国之会同奉玉帛而称贺（中贺）钦惟皇帝陛下文武圣神应天啓运盛典辑百王之制宏基延万代之传文物声华於今为盛臣某等忝司左卫祇奉明恩岁有万而呼三敢傲华嵩之祝

中宫笺

上言龙廷赐历治象惟新礼盛中宫懽同率普（中贺）钦惟皇后殿下柔嘉维则助日为明辅圣人治教之成居天下母仪之盛燕谋貽永家邦以宁适岁旦之云初集太平之景福某等忝居左卫愿効忠勤用伸就日之诚同上齐天之祝

东宫笺

上言正月上日敬授人时天近龙楼春开鹤籙喜际会同之盛共瞻礼乐之华（中贺）敬惟皇太子殿下位应前星礼成主鬯问安视膳敬尤谨於承顏是以盛德日新圣心娱悦大本尊崇而万方咸宁矣某仰荷洪恩职司左卫上重晖之美颂祝福壽于千秋

凤阳中卫亲军指挥使司表笺三道

上位表

上言历颁大统万象咸春福壽维祺万年祝颂礼乐声名之盛天开玉笋之班（中贺）钦惟皇帝陛下盛德神功聪明文武应期抚运上顺天心制作永百代之传政治致太平之盛适临华旦允集鸿禧某摄司中卫祇奉宠恩仰九奏之钧韶祝万年之圣壽

中宫笺

上言正朔会同礼成宫壺共乐太平之盛同伸祝颂之诚（中贺）敬惟皇后殿下恭敬柔嘉母仪天下着易象顺承之义协周诗勤俭之功俪日为明辅成圣治允致洪禧之集适临献岁之初臣某等祇荷宠恩摄司中卫祝齐年之上壽致向日之忠忱

东宫笺

上言春阳盛旦鹤籞天开仰重晖主鬯之尊合礼乐衣冠之会（中贺）钦惟皇太子殿下温文恭敬以长以贤於问安侍膳之勤得用人致治之要是以大本尊安民心乐育歌咏太平矣某摄司中卫祇奉明恩致千秋善颂之诚集邦家福祿之盛

凤阳右卫指挥使司表笺三道

上位表

上言尧典称敬授人时孔圣书春王正月所以明天道之正示人事之宜也玉帛会同万方来贺（中贺）钦惟皇帝陛下天地合德日月同明典诰缉黼黻之纯礼乐着人文之盛延求儒雅辅成治功是以海宇安宁普跻仁壽届兹盛旦福祿其臻矣臣某系职中都忝司右卫用重军民之寄维兹建立之初圣壽万年诚深祝颂

中宫笺

上言寅正纪历物象维新仰日月之同明覲内廷而献颂（中贺）钦惟皇后殿下聪明齐圣正位中宫辅唐虞之治功比任似之盛德本支万代母道尊安适当献岁之初茂集邦家之福臣某忝司右卫蒞事云初効就日之微忱祝齐天之上壽

东宫笺

上言青阳应律海宇春开仰鹤籞之承华覲龙楼而献寿（中贺）敬惟皇太子殿下毓德温文承顏敬谨凡立政致治之要在宫廷唯诺之间致敬崇儒日新圣学茂衍本支之盛永臻福

履之成某祇荷宠恩忝司右卫祝前星之齐寿效歌颂于重晖

青州护卫指挥使司表笺三道

上位表

上言凤历授时万方正朔仰龙廷之礼乐祝万壽之维祺（中贺）钦惟皇帝陛下睿哲聪明受天成命武功致一统之盛文治永亿载之传山海梯航咸奉玉帛际此会同之旦倍膺福祿之臻臣某忝司护卫祇荷明恩永歌圣德之尊愿巩亲藩之辅

中宫笺

上言钦若昊天寅为岁首盛万方之来贺介多福於中宫（中贺）敬惟皇后殿下恭敬俭勤助成内治衍本支於百代传歌颂於关雎盛旦肇新永安吉履臣某等幸司护卫祇奉洪恩瞻慈顏於内廷祝齐天之万壽

东宫笺

上言天开盛旦万象皆春式瞻主鬯之尊敬上重晖之颂（中贺）敬惟皇太子殿下天性温柔遵承圣训谨侍膳安之礼盛尊儒讲学之功是以大本尊安宏基永久属当岁序之新倍集邦家之福某忝司护卫愿効忠勤仰鹤籥之承顏祝前星之齐壽

燕山护卫指挥使司表笺三道

上位表

上言尧廷授历岁序维新际车书之混同奉玉帛而来贺太平景运率普同懽（中贺）钦惟皇帝陛下上圣生知武功文治定天下之大本成百代之宏基海宇咸宁民人以乂届会同之盛旦宜福祿之骈臻臣忝护亲藩祇承宠命祝圣人之万壽与天地以长春

中宫笺

上言圣神临御海宇清平仰内殿之尊严祝齐天之上壽（中贺）敬惟皇后殿下柔顺俭勤中宫正位衍金枝之奕叶扬玉册之穠华内治以成关雎歌咏际兹盛旦福履其成矣臣某等幸荷洪恩职司护卫愿壮亲藩之辅共伸善颂之诚

东宫笺

上言凤历维新天开盛旦青宫受贺福祿来同（中贺）恭惟皇太子殿下天性温恭位尊主

鬯侍膳谨承顏之礼尊儒亲问道之勤重润重晖咏歌盛德适际会同之旦盛陈礼乐之仪臣某祇奉明恩忝司护卫祝千秋之福祿効臣子之至情

留守指挥使司正旦表笺三道

上位表

上言春王正月行夏之时盛礼会同家邦同贺钦惟皇帝陛下恭承天命肇建宏基文治武功太平乐育际会朝之盛旦同率普之懽心民物春台咸跻仁壽臣某忝司留钥効职中都祝圣君之万壽与军民而忭舞

中宫笺

上言泰运清平内廷受贺仰天地之合德同日月以为明万寿齐年情深祝颂（中贺）敬惟皇后殿下德盛俭慈功参博厚中宫正位内教肃恭致家邦之永宁衍本支而益盛际兹吉旦福履其成臣某等祇荷恩荣职司留钥愿上关雎之颂永同亿兆之诚

东宫笺

上言正月上日敬授人时礼盛东宫万方同贺（中贺）敬惟皇太子殿下德茂重晖位尊主鬯鷄鸣问寝敬谨维时问道崇师功勤讲学际此春阳吉旦倍膺福祿之臻某职忝留司愿勤报効敬上千秋之颂永同率普之心

怀远卫指挥使司正旦表笺三道

上位表

上言天开正朔圣治维新集万方之会同盛龙墀之礼乐用勤祝颂敬致微忱（中贺）钦惟皇帝陛下运啓文明日新盛德致太平之政治定天下之大经百谷用成民人乐育茂集安宁之福属当岁序之新臣某等効职中都忝卫怀远敢陈春秋一统之义永歌天子万年之诗

中宫笺

上言正月上日治象咸新盛衣冠之会同仰内廷而称壽（中贺）敬惟皇后殿下辅成内治表正母仪金枝茂奕叶之华玉册着礼文之盛适临正旦多福其臻臣某幸荷鸿恩忝卫怀远敬上齐天之颂普观仁壽之同

东宫笺

上言天开盛旦海宇清平玉帛觐朝青宫献颂（中贺）敬惟皇太子殿下尊居嫡长望重宗承于起居侍奉之余得修齐治平之要日新讲学茂衍本支届兹正旦福履其成矣某忝卫怀远何补事功仰鹤籙之重晖与前星而齐壽

长淮卫指挥使司正旦表笺三道

上位表

上言春王正月泰象天开仰圣德之君临盛衣冠而来贺（中贺）钦惟皇帝陛下上膺天命运啓文明同九■〈ㄣ禹〉之车书统百王之礼乐太平盛治四海咏歌是以天地报贐福祥之物莫不毕至际阳明之令序与生物以咸新臣某等忝卫长淮祇承恩宠恭上万年之壽少陈葵藿之诚

中宫笺

上言历象授时寅为岁首玉帛衣冠之盛肇新内殿之仪（中贺）敬惟皇后殿下柔顺俭慈天生圣德示母仪於天下肃内训於六宫关雎葛覃传诸歌咏臣某等忝司列卫上奉洪恩盛礼乐於九重祝齐年之万壽

东宫笺

上言献岁春阳肇新治象青宫盛礼玉帛觐朝（中贺）敬惟皇太子殿下性稟生知温文恭敬日覲龙顏之喜天开鹤籙之华问学崇儒辅成政治茂衍本支之盛倍膺福祿之臻某荷承恩宠忝卫长淮少陈报効之诚同上千秋之祝

洪塘千户所正旦表笺三道

上位表

上言天开泰象一统车书盛玉帛之会同覲龙廷而献颂（中贺）钦惟皇帝陛下刚健中正应运龙兴成永久之宏基合百王之礼乐唐虞盛际安乐太平肇令序之阳明宜倍膺於福祿臣某荷承宠命忝职屯田及时愿督於农功圣壽共称於万岁

中宫笺

上言历颁大统景运维新仰瞻椒殿之华敬上齐天之壽（中贺）敬惟皇后殿下柔嘉维则正位中宫示天下之母仪衍本支之奕叶太平盛治与日同明属当献岁之初永集邦家之福臣某忝职屯田兵农任重同上丰年之颂愿伸向日之诚

东宫笺

上言天开泰运历象授时玉帛会同青宫受贺（中贺）敬惟皇太子殿下盛德温恭位尊主鬯问安侍膳礼谨承颜是以大本尊安而邦家永宁矣某屯田忝职事重农功歌重润与重晖祝千秋之福祿

荥阳外史集卷六十四

卷六十五

●钦定四库全书

荥阳外史集卷六十五

（明）郑真 撰

○表

凤阳卫正旦进贺表笺三道（洪武十三年正月上进洪武十二年十一月内准临淮县牒丈修撰後同）

上位表

上言春始岁时寅为人统仰廷陛之天开集万方而同贺（中贺）钦惟皇帝陛下受天眷命允武允文车书成一统之功礼乐致升平之治生物用成嘉祥骈集际阳春之盛旦治民庶之懽心臣荷承宠命忝卫凤阳祝颂愿效於华封福壽永同於天地

中宫牋

上言夏时授历礼盛宫闈内教所尊会朝称颂（中贺）敬惟皇后殿下柔嘉维则俪日同明遂成黼黻之文永辅衣裳之治燕谋以永同乐太平肇当正旦之临式衍邦家之福臣某等忝职凤阳莫勤报効上关雝之美颂祝万壽以齐天

东宫笺

上言盛旦天开寅正赐历仰前星之着象祝多福於东宫（中贺）敬惟皇太子殿下英姿天锡盛德日新尊师重傅益懋多闻侍膳问安恭承圣训永协重晖之颂欣逢盛旦之华臣某忝卫凤阳荷承宠禄恭上千秋之壽普同九■〈宀禹〉之欢

凤阳左卫正旦进贺表笺三道

上位表

上言观象治民成周盛典万年祝颂臣子至情适兹献岁之初喜际升平之运（中贺）钦惟皇帝陛下上圣生知聪明文武集车书之一统定天下之常经乐岁丰登兆民春育恭仰会同之旦倍膺多福之臻臣某等祇荷宠恩忝司左卫与军民而称壽同海宇之懽心

中宫笺

上言海宇盛平王正肇序集玉帛之会同覲中宫而称壽（中贺）敬惟皇后殿下位正柔仪助成内治玉册辑礼文之盛翬衣明象服之崇介此令辰永膺福履臣某等职司左卫莫缀班联效歌颂於关雎祝齐年之万壽

东宫笺

上言前星示象鹤籙天开际令序之阳明祝千秋之上壽（中贺）敬惟皇太子殿下性姿温厚讲学高明位成主鬯之尊日谨问朝之礼燕谋垂裕永介洪禧某忝司左卫祇奉恩荣协重润之颂歌与军民而忭舞

凤阳右卫正旦进贺表笺三道

上位表

上言海宇之内正朔所同集玉帛於大廷覲圣顔而称壽（中贺）钦惟皇帝陛下文武生知上承景运资治盛丝纶之训问心明性稟之良礼乐大成贻谋万代际兹盛旦多福骈臻臣某等忝职中都实司右卫敬效华嵩之祝永同亿兆之懽

中宫笺

上言正月上日礼正内廷盛乐舞之钧韶覲慈顔而献颂（中贺）敬惟皇后殿下德盛柔嘉躬行慈俭辅圣谟於廷陛着母教於宫闱歌咏关雎贻谋燕翼肇会朝之盛旦协海宇之欢心臣某忝司右卫莫効忠勤祝福壽之齐年与天地其永久

东宫笺

上言治平景运鹤籙春开集万方之会同盛明廷之礼乐（中贺）敬惟皇太子殿下天性温恭礼成主鬯近正人以正学歌重润以重晖际此令辰倍膺多福某忝司右卫任重军民瞻玉宇之前星祝千秋之上壽

凤阳中卫正旦进贺表笺三道

上位表

上言圣君致治上谨天时肇献岁之云初示王春之一统（中贺）钦惟皇帝陛下上圣生知受天景命武功以一海宇文治以开太平辅弼谋谟广延耆硕集百王之制作衍亿代之本支际此阳春永成吉履臣某等忝司中卫祇受鸿恩效嵩岳之三呼祝箕畴之五福

中宫笺

上言历象授时肇颁大统内教着乎宫廷玉帛同乎海宇凡在临照莫不懽忻（中贺）敬惟皇后殿下位正柔仪与天同大式着修齐之效辅成混一之功福履其成燕谋以永臣某钦逢盛旦拱对慈颜祝万寿以齐天上南山之美颂

东宫笺

上言钦若昊天圣皇盛治万方玉帛鹤夔同尊肇迎献岁之祥式着重晖之颂（中贺）钦惟皇太子殿下天稟英姿以贤以长凡育下裕民之意得诸问安侍膳之时是以问学高明日新盛德天人允协物象咸春臣忝司中卫莫报洪恩祝福禄之千秋觐龙楼而忭舞

留守中卫正旦进贺表笺三道

上位表

上言海宇升平共逢景运阳春盛旦玉帛会朝（中贺）钦惟皇帝陛下上圣生知君临盛德政教同乎华夏恩泽浹乎民庶纶音所及咸曰大哉言一哉心远近乐育如唐虞之时矣臣某等忝司中卫任重留司敬歌南山之诗上祝万年之寿

中宫笺

上言正朔恩颁钦逢岁旦盛中宫之礼乐歌福祿之攸宜（中贺）敬惟皇后殿下徽柔懿恭助成内治母训着於天下内教及乎宫廷乐育太平玉帛来贺臣某职司留卫祇荷恩荣祝福寿以齐年上关雎之善颂

东宫笺

上言春开鹤夔治象维新盛玉帛之会同上千秋之美祝（中贺）敬惟皇太子殿下天稟英姿金冲玉润侍膳问安之敬崇儒讲学之勤是以大本尊安人心悦豫届兹盛旦福履其成矣某忝司留钥莫报忠勤愿澄少海之辉永比前星之寿

留守左卫正旦表笺三道

上位表

上言历颁大统物象皆春上天子万年之诗仰龙廷礼乐之盛（中贺）钦惟皇帝陛下应天啓运文武生知谋谟粲黼黻之文训勅着丝纶之盛太平景运海宇懽心肇令序之维新衍邦家之福祿臣某忝司左卫列职中都属当署置之初莫报恩荣之厚华嵩祝颂恭効微诚

中宫笺

上言龙廷赐历式谨人时礼盛宫廷玉帛同贺上齐天之福寿伸臣子之至情（中贺）钦惟皇后殿下恭敬徽柔母教天下着易象顺承之义协周诗福履之成辅佐圣猷太平盛治臣某祇承宠命任寄留司肇当视篆之时式际会朝之盛拱瞻内殿祝颂维深

东宫笺

上言海宇春开前星示象集玉帛会朝之盛协重晖重润之歌（中贺）敬惟皇太子殿下以贤以长位正东宫於问安侍膳之余富日就月将之学遵承圣训辅助皇猷是以邦家用安燕谋以永际兹献岁福祿来同矣某仰荷恩荣忝司留卫式谨建牙之始恭逢盛旦之临嘉与军民千秋祝颂

怀远卫正旦进贺表笺三道

上位表

上言春王正月圣经所书天子万年周诗善颂恭仰会同之盛敬伸臣子之诚（中贺）钦惟皇帝陛下文武生知膺天眷命集车书之一统致天下於文明生物用成海涵春育际此履端之盛倍膺福履之新臣某等忝卫怀远莫报忠勤仰玉笋之班联与军民而忭舞

中宫笺

上言玉历授时寅正肇序覲宫廷而献寿颂周雅之南山（中贺）敬惟皇后殿下位正中宫柔嘉维则懋着修齐之效辅成平治之功俪日同明履端协吉某忝位中都军民重寄恭上齐天之颂永言福履之成

东宫笺

上言正月上日圣治阳明仰鹤籙之天开覲龙楼而称贺（中贺）敬惟皇太子殿下礼成主鬯位正前星禀金明玉润之姿富修齐治平之学燕谋以永海宇安宁际此阳明履端协吉某忝卫中都莫联班缀祝千秋之上寿効汉颂之重晖

长淮卫正旦进贺表笺三道

上位表

上言天开海■〈宀禹〉治象维新盛玉笋之班联覲大廷而同贺（中贺）钦惟皇帝陛下濬哲文明刚健中正集百王之礼乐同九■〈宀禹〉之车书是以上协天心祯祥骈集会同

盛旦吉履其成矣臣某忝卫长淮荷承宠命祝万年之福壽衍亿代之本支忭舞之情倍踰常品

中宫笺

上言明廷赐历上谨天时玉帛会同中宫受贺（中贺）敬惟皇后殿下教行慈俭德盛柔恭嗣任姒之徽音辅唐虞之盛治海■〈宀禹〉之内关雎咏歌届兹献岁福履其同矣臣某忝卫长淮钦逢盛旦恭上齐天之寿共伸就日之诚

东宫笺

上言天近龙楼春开鹤籞上千秋之美颂协乐舞之钧韶（中贺）敬惟皇太子殿下天稟英姿日新讲学凡修身齐家之要在宫廷诺唯之间是以天人悦豫中外同懽福履攸宜肇兹献岁某忝卫长淮每思报効恭际会朝之盛敬伸善颂之诚

燕山护卫正旦进贺表笺三道

上位表

上言春开海宇圣治维新仰瞻殿陛之华礼乐会同之盛凡在覆育莫不欢心（中贺）钦惟皇帝陛下君临万方生知盛德致衣裳之盛治辑黼黻以成文与物为春肇临正旦臣某忝司扈卫实重藩维祝万壽之维祺与天长而地久

中宫笺

上言泰治维新宫廷盛礼履端受贺海宇同懽（中贺）敬惟皇后殿下与日同明比天共大皇猷资辅助之功内教致关雎之盛肇当盛旦与物咸亨臣某忝司扈卫愿効忠勤永歌福履之成同上齐天之壽

东宫笺

上言正月上日治象阳明礼乐觀朝东宫受贺（中贺）敬惟皇太子殿下盛德温恭位尊主鬯谨视膳问朝之礼成尊儒讲学之功是以上协天心燕谋以永际兹盛旦生物同春某忝司扈卫莫报恩荣愿少海之澄辉祝千秋之上壽

青州护卫正旦进贺表笺三道

上位表

上言历颁大统海宇春开当车书混一之时盛玉帛衣冠之会（中贺）钦惟皇帝陛下濬哲生知文明应运与天地同其大共日月以为明广致耆英谋谟辅弼遂致太平之治普同亿兆之心臣某等忝司扈卫莫効忠勤共仰九奏之钧韶敬祝万年之上壽

中宫箋

上言凤历授时肇颁正朔觀宫廷而献壽集盛代之衣冠（中贺）敬惟皇后殿下德着柔恭教行勤俭辅衣裳之盛治衍百代之本支盛旦肇临齐天介壽臣某効职藩维荷承宠禄共上思齐之雅永歌福履之成

东宫箋

上言钦若昊天肇新治象式谨会同之礼仰瞻鹤籙之华（中贺）敬惟皇太子殿下美质天成尊居嫡长前星联玉宇之辉少海映金波之润燕谋以永家邦用宁际盛旦之春开介箕畴之福祿某幸际明时职司扈卫祝千秋之上壽协重润之乐歌

洪塘千户所正旦进贺表箋三道

上位表

上言治历明时肇新泰象仰九重之礼乐祝万壽以维祺（中贺）钦惟皇帝陛下上圣生知文明啓运混华夷之一统立天下之常经玉帛梯航会同海宇际兹献岁福履其成矣臣某等荷承恩宠事重农功愿同嵩岳之呼敬上豳诗之颂

中宫箋

上言圣皇啓运在正天时海宇清平实由内治恭承会同之旦肇当献岁之初（中贺）敬惟皇后殿下德懋俭勤与天同大允着徽音之雅遂成母教之尊正旦天开倍膺多福臣某等忝膺宠禄茂对盛明治田用重於农功歌颂愿登於齐壽

东宫箋

上言大统承天生春肇序会同玉帛鹤籙同尊（中贺）敬惟皇太子殿下性禀天成温文恭敬传经讲学礼重名儒侍膳问安恭承圣训际阳明之盛旦同海宇之欢心某忝职屯田荷承宠命上重晖之善颂祝多福於千秋

皇陵卫指挥司使正旦进贺表箋三道（洪武十四年正月上进十三年十一月内承准临淮县牒文）

上位表

上言尧典定时成岁姬周观象治民所以明正朔於天下也阳德维新玉帛来贺（中贺）钦惟皇帝陛下受天明命君临兆民治致升平恩覃乐育是以盛德宏业如天地之大日月之明矣臣某等忝卫皇陵祇承上命敬效华封之祝普同海宇之懽

中宫笺

上言治历明时朝廷盛典中宫受贺海宇同心（中贺）敬惟皇后殿下德盛柔恭恩推慈惠示母仪于天下辅圣治之文明福履其成际兹吉旦臣某等忝卫皇陵洪恩莫报祝万年之齐壽与天地以久长

东宫笺

上言恩颁玉历万象春开盛礼乐之会朝介青宫之多福（中贺）敬惟皇太子殿下毓德温恭承顏敬谨允契修齐之要辅成平治之功是以燕谋貽永天人协吉肇兹泰象邦家永宁某祇承上命忝卫皇陵祝壽千秋实深舞忭

凤阳卫指挥使司正旦进贺表笺三道

上位表

上言寅正授历万方一统集礼乐於大廷奉玉帛而来贺（中贺）钦惟皇帝陛下奉天承运君临兆民刚健中正恭已而治文教以育贤材武功以安海宇届兹谷旦福履骈臻臣某等忝卫凤阳荷承恩命恭上万年之壽颂用伸臣子之诚心

中宫笺

上言历颁大统万象维新礼正宫廷家邦同贺（中贺）敬惟皇后殿下内教所尊母仪维则黼黻助衣裳之治文明盛典册之华景颺来臻履兹献岁臣某等上承恩命职卫凤阳同九宇之欢心祝齐年之福祿

东宫笺

上言景运维新王正示历东宫受贺景福千秋（中贺）敬惟皇太子殿下恭敬温文位尊主鬯谨视膳问安之礼盛崇儒讲学之功是以上契天心允协人望际兹盛旦福履攸宜某祇荷洪恩忝居列卫瞻仰前星之正实深祝颂之诚

凤阳左卫指挥使司正旦表笺三道

上位表

上言海宇春开青阳肇序圣人在位品物咸亨用申祝颂之诚恭际会同之旦（中贺）钦惟皇帝陛下应运龙兴与天合德用广贤良之助遂成平治之功恩波所及海涵春育适王正之令序辑福祿以维新臣某等仰荷洪恩职司左卫上万年之歌颂与亿兆以同懽

中宫笺

上言历颁大统岁序维新礼盛内廷家邦同贺（中贺）敬惟皇后殿下位正宫廷柔嘉维则示天下之母仪辅清平之盛治肇当盛典福履攸宜臣某等忝司右卫莫遘班联齐壽万年实深祝颂

东宫笺

上言阳春盛旦万物维新礼正东宫臣民同悦（中贺）敬惟皇太子殿下天性聪明日新讲学视膳问安遵承圣训建大本以尊崇辑邦家之福祿肇当献岁共乐清平某祇奉恩纶职司左卫瞻前星之示象祝上壽於千秋

凤阳右卫指挥使司正旦表笺三道

上位表

上言圣人临御海宇咸寧适献岁之发春与邦家而同贺（中贺）钦惟皇帝陛下生知圣武应运文明德为亿兆之师富有万方之盛太平致治福履攸宜臣某等自揆庸材祇承新命万寿同伸於祝颂微忱愿効於忠勤

中宫笺

上言时临盛旦正朔所同盛礼乐於内廷奉慈顏而称寿（中贺）敬惟皇后殿下徽柔恭俭位正中宫示易象顺承之义成周南内治之功献岁云初茂臻福祿臣某等忝司右卫新命祇承瞻日月之同明与邦家而永久

东宫笺

上言玉历肇新前星示象祝东宫之多福致臣子之微忱（中贺）敬惟皇太子殿下天稟英姿温文恭敬礼式谨於君亲学躬承於师傅上遵圣训辅成治功适献岁之云初协家邦而同悦某祇承新命効职凤阳际一统之明时祝千秋之上壽

凤阳中卫指挥使司正旦表笺三道

上位表

上言天时正则岁功以成当海宇混同之时礼乐之盛用以一天下之懽心焉（中贺）钦惟皇帝陛下应期抚运敬天勤民成久安长治之基广辅弼贤良之佐恩涵覆载与物为春臣某等忝司列卫式际明时歌万寿之维祺与军民而祝颂

中宫笺

上言历颁大统万象维新献寿中宫懽同海宇（中贺）敬惟皇后殿下徽柔恭俭辅佐皇猷成身修家齐之功协周诗关雎之咏届兹盛旦福祿来同臣某祇荷洪恩忝司列卫履端适际於盛时齐寿愿伸於善颂

东宫笺

上言王春肇建岁序维新玉帛会同青宫介福（中贺）敬惟皇太子殿下姿禀天成前星正位政治参闻敬遵圣训传经讲学广致贤英大本攸尊诒谋以永某恭际明时忝司列卫效重润与重晖为千秋之善颂

凤阳留守中卫指挥使司正旦表笺三道

上位表

上言易言治历明时春秋书春王正月所以示正朔於天下也盛旦会朝万方来贺（中贺）钦惟皇帝陛下武功文德上协天心制礼作乐遂成平治是以福履维新万年圣寿与天地同其大也臣某等忝职中都实司留卫莫侍班联之盛惟深忭舞之诚

中宫笺

上言泰运维新中宫盛礼圣寿齐年实深祝颂（中贺）敬惟皇后殿下肃恭慈俭助日为明身修家齐之功佐辅圣明之治是以教成於内而及於天下也臣某等忝司留卫何补事功永歌福履之成敬效周诗之雅

东宫笺

上言日近龙楼前星示象三阳开泰礼盛会朝（中贺）敬惟皇太子殿下天禀英姿位崇主鬯辅以正人讲明圣学是以本支贻永协四海民人之心矣某忝职屯田祇承恩命效重晖之美颂祝福祿於千秋

凤阳留守左卫指挥使司正旦表笺三道

上位表

上言圣人奉天时而正人事所以明正朔也玉陛春开万方同（中贺）贺钦惟皇帝陛下文武圣神君临华夏正学示问心之要皇猷资辅弼之良海宇昇平梯航来贡际兹盛旦中外懽心臣某等上承恩命忝任留司仰九奏之钧韶祝万年之福壽

中宫笺

上言恩颁历象海宇昇平盛礼乐之会朝集内廷而献颂（中贺）敬惟皇后殿下中宫正位与日同明肃恭以辅皇猷慈俭以成内治际兹泰象福履其成臣某等任重军民忝司留卫祝齐年之上壽乐盛代之延洪

东宫笺

上言天近龙楼前星示象千秋福祿与日为春肇当泰长之辰同致履端之贺（中贺）敬惟皇太子殿下生禀英姿日新盛德凡修齐治平之要在问安视膳之时万代本支燕谋以永某忝司留卫共际明辰恩荣莫报於忠勤忤舞愿伸于善颂

长淮卫亲军指挥使司正旦进贺表三道

上位表

上言圣人颁政教於天下必治历明时者所以示一统之正也盛旦春开万方玉帛（中贺）钦惟皇帝陛下文武圣神刚健中正同九宇之车书集百王之礼乐而犹广徠贤士以成至治肇王正之令序宜万寿以维祺臣某等忝卫长淮俯思报効恭际太平之运实深忤舞之诚

中宫笺

上言万方一统礼重内廷献岁云初玉帛同贺（中贺）钦惟皇后殿下肃恭慈俭位正中宫遂成内助之功用辅圣明之治适兹正旦万壽齐年臣某等幸际明时共伸祝颂维天地日月同德同明愿邦家民人永安永久

东宫笺

上言玉历授时太平景运青宫祝颂海宇同懽（中贺）钦惟皇太子殿下毓德温文承顏敬谨位应前星之象德为主鬯之尊讲学崇儒辅成圣治适兹泰运之开允着燕贻之永某荷承恩命职卫长淮效重润之乐歌祝千秋之福壽

怀远卫亲军指挥使司正旦进贺表笺三道

上位表

上言历象授时所以明政教于天下也仰盛旦之会同奉圣顔而称贺（中贺）钦惟皇帝陛下德盛君临允文允武集百王之礼乐同四海之车书广致贤良昇平治理际阳明之献岁协天地之殊祥臣某等忝受洪恩忝卫怀远万壽愿同於福祿秉心用効於忠勤

中宫笺

上言海宇一家寅正肇建奉内廷而献壽与日月以同明（中贺）敬惟皇后殿下正位六宫肃恭慈俭玉册礼文之盛金枝奕叶之华上辅圣明唐虞盛治际兹盛旦福履其成臣某等忝司列卫愿効忠勤太平恭际於明时忭舞愿称於齐壽

东宫笺

上言明廷玉历敬授人时鹤籞天开万方来贺（中贺）敬惟皇太子殿下天性温恭礼成主鬯讲学得修齐之要侍朝躬敬谨之诚大本尊崇燕谋诒永际阳春之盛旦介景福以维新某忝卫淮远莫报明恩祝福壽之千秋瞻前星之有象

洪塘湖屯田千户所正旦进贺表笺三道

上位表

上言春开海■〈宀禹〉岁历维新盛礼乐之会同协民人而共贺（中贺）钦惟皇帝陛下圣神天纵膺运文明典谟资黼黻之功诏旨协丝纶之训际兹献岁普乐昇平臣某荷承明命忝职屯田共歌万壽之诗敬上丰年之颂

中宫笺

上言大统新颁岁功肇序履端受贺吉协内廷（中贺）敬惟皇后殿下恭敬柔嘉六宫正位辅佐衣裳之治助成黼黻之华福履其成际兹献岁臣某恭承上命事重农功愿乐丰岁之丰登祝齐年之上壽

东宫笺

伏以正月之吉献岁发春玉帛会同东宫受贺（中贺）敬惟皇太子殿下稟质天成金相玉润富日就月将之学盛待士崇儒之礼是以大本尊安天人允协际兹盛旦福祿千秋某忝职农屯洪恩莫报上重晖之歌颂愿陇亩之丰登

荥阳外史集卷六十五

卷六十六

●钦定四库全书

荥阳外史集卷六十六

（明）郑真 撰

○表

凤阳卫指挥使司九月十八日天壽圣节贺表（洪武十四年）

上言圣主当阳祥开虹渚集廷墀之玉帛会海宇之衣冠嘉与民生懽同忭舞（中贺）钦惟皇帝陛下恩涵率普德盛君临创业传统之功制礼兴乐之治仰逢华旦福履其成矣臣某等荷承明命忝卫凤阳报効莫致於忠勤祝颂愿致於上壽

凤阳右卫指挥使司天壽圣节贺表

上言天生圣人以君主华夏者所以开盛代之太平也虹渚迎祥玉帛来贺（中贺）钦惟皇帝陛下聪明文武位正乾刚遂成混一之功普致雍熙之治纶言广被春育海涵际兹华旦之临适届秋成之月礼成乐备福履其宜臣某等忝职凤阳实司右卫与军民而忭舞祝圣壽之万年

怀远卫亲军指挥使司天壽圣节贺表

上言天眷皇明圣人在位祥开虹渚月届秋阳盛玉帛之会朝合邦家而同贺（中贺）钦惟皇帝陛下文武英姿应期抚运礼教集才贤之盛治政资辅弼之良生物顺成嘉祥协应际兹华旦万寿维祺臣某等忝卫怀远莫报洪恩共伸周雅之忱敬上尧年之祝

凤阳左卫指挥使司天壽圣节贺表

上圣君临受天眷命玉历届秋成之月彤廷迎虹渚之祥万方来同盛时礼乐钦惟（中贺）皇帝陛下性本生知恩涵广宇啓邦家之景运体天地以同仁华旦恭逢永安福祿臣某等忝司左卫莫报恩荣祝万壽之齐天上周诗之雅颂

凤阳中卫指挥使司天壽圣节贺表

上言祥虹在渚景运天开会礼乐於大廷协秋阳之令月凡居覆载忭舞同懽（中贺）钦惟

皇帝陛下德为圣人尊为天子海宇之内涵育仁恩恭逢华旦之临共覩治平之盛嘉祥协应多福骈臻某忝职凤阳实司中卫效华封之三祝颂圣壽之万年

长淮卫指挥使司天壽圣节贺表

上言华渚祥虹金行协应万年福壽请祝圣人仰玉殿之天开集四方之玉帛（中贺）钦惟皇帝陛下天地共德日月同明抚景运之雍熙致昇平之盛治欣逢吉旦亿兆同懽臣某等忝卫长淮恭承恩命愿效忠勤之报惟深颂美之诚

留守左卫指挥使司天壽圣节贺表

上言圣人临御海宇昇平仰祥虹在渚之辰正生物遂成之日衣冠礼盛廷陛会朝（中贺）钦惟皇帝陛下受命龙兴功成混一定邦家之大本立天下之常经吉旦天开茂膺福祿臣某等恭际盛时忝司留卫共祝万年之壽同伸报上之诚

留守中卫指挥使司天壽圣节贺表

上言祥虹在渚礼盛明廷致颂美之忱辞祝圣人而曰壽海宇之内忭舞同懽（中贺）钦惟皇帝陛下治定功成礼兴乐备合天地生成之德同日月照临之明吉旦天开嵩呼三祝臣某等忝司留卫职効中都愿福祿之来同万斯年而永久

皇陵卫指挥使司天壽圣节贺表

上言圣人受命以君万方所以上契天心下协人心者也当祥虹在渚之辰献圣壽万年之颂（中贺）钦惟皇帝陛下英姿文武治定功成同日月以常明与春秋而俱富斂时百福以锡兆民臣某等忝卫皇陵钦逢华旦仰钧奏之九成同嵩呼之三祝

洪塘湖屯田千户所天壽圣节贺表

上言龙御当阳祥虹在渚恭仰会朝之旦谨伸报上之诚海宇同懽昇平盛典（中贺）钦惟皇帝陛下圣德神功受天眷命定邦家之大典致天下之文明一统车书梯航奉贡维兹华旦福祿其臻矣臣某等荷承委任事重屯田丰登适际於秋成颂美共歌於万寿

凤阳卫指挥使司冬至进贺表笺三道

上位表

上言易卦着复亨之吉圣人所以见天地之心也适际履长之吉盛陈朝会之仪（中贺）钦惟皇帝陛下应运抚期武功文德广礼乐诗书之教辑纪纲法度之传年谷顺成恩涵乐育际

兹长至福祿其臻矣臣某等忝卫凤阳上承明命效周诗之善颂祝万壽之维祺

中宫笺

上言月应黄鍾复亨协吉奉慈顏而献颂与海宇以同懽（中贺）敬惟皇后殿下德盛徽柔教行勤俭辅成天地之功式衍邦家之福肇当至日吉履攸宜臣某忝卫凤阳莫联班缀上履长之善颂致报上之忠忱

东宫笺

上言天近龙楼前星有耀值新阳之来复集衣冠之会朝（中贺）钦惟皇太子殿下位尊主鬯德顺承顏安邦本以系人心辅皇猷而成至治是以海宇之内咸安乐育福祿之盛与物俱春某忝卫凤阳莫伸报効际迎长之景运效歌颂於重晖

凤阳右卫指挥使司冬至进贺表笺三道

上位表

上言阳生於子至日斯临仰玉陛之九重集会朝之玉帛凡居率普忭舞同懽（中贺）钦惟皇帝陛下聪明文武位正乾纲同日月之明协天地之德制礼兴乐致治昇平适亨复之维时介万年之景福臣某等効职凤阳忝司右卫恭上履长之颂用陈祝壽之诚

中宫笺

上言玉历顺时天正纪旦瞻仰宫廷之盛共修臣职之恭玉帛会同履长献颂（中贺）敬惟皇后殿下柔惠仁慈母仪天下助皇猷之黼黻辅圣治之清平至日肇临倍膺福祿臣某等忝司右卫莫缀朝班祝上壽之齐年与军民而忭舞

东宫笺

上言月应黄鍾日书南至敬瞻主鬯之尊同祝千秋之壽（中贺）敬惟皇太子殿下天稟英姿金相玉裕於问安视膳之余契修齐治平之要是以人心允协大本攸尊嘉与含生同其福祿矣某等忝沐洪恩职司右卫对履长之景运上歌颂之重晖

凤阳中卫指挥使司冬至表笺三道

上位表

上言月应黄鍾阳生玉琯献履长之善颂仰盛治之文明凡在照临懽同舞忭（中贺）钦惟

皇帝陛下聪明神武上圣之姿膺天命以顺人心广才贤而成至治恩波所及与日俱春盛福祿以駢臻际书云之吉旦臣某等署事凤阳实为中卫同上万年之壽维深报効之诚

中宫箋

上言至日迎长复亨协吉盛着会朝之典同瞻母教之尊（中贺）敬惟皇后殿下徽柔慈淑正位宫廷式资黼黻之功永辅衣裳之治本支百代燕翼貽谋肇迎长至之祥益衍邦家之福臣某署事凤阳祇承恩命际文明之景运祝圣壽之齐年

东宫箋

上言新阳初复位应前星集万方之会同祝东宫之多福（中贺）敬惟皇太子殿下位尊主鬯德盛承顏成尊贤讲学之功得修己安民之要是以上赞圣明本支百代为宗社久长之福某効职凤阳忝为署事敬上千秋之壽普同海宇之懽

留守中卫指挥使司冬至进贺表箋三道

上位表

上言日书南至治历者所以明天运之常示人时之正也廷陛受朝太平礼乐（中贺）钦惟皇帝陛下至圣至诚允文允武爰啓雍熙之运遂成政教之功四海一家恩涵乐育际此书云令旦永歌福履其成臣某等留司中卫祇荷恩荣祝福壽之万年协周诗之美颂

中宫箋

上言子为天统至日迎长同海宇之懽心介中宫之多福（中贺）敬惟皇后殿下慈惠温恭与天协德式示母仪之正用成内教之尊赞辅皇猷清平致治际兹令旦仁壽其跻臣某等忝卫留司实为中卫恭上齐年之壽共伸向日之忠

东宫箋

上言阳生於子上奉天时集衣冠之会同協重暉而致颂（中贺）敬惟皇太子殿下德冠金枝位尊主鬯为邦家之大本系海宇之人心视膳问安敬遵圣训际此履长令旦倍膺福祿其臻与率普以同懽祝千齡之上壽

留守左卫指挥使司冬至进贺表箋三道

上位表

上言子为天统至日迎长圣人所以谨时也盛礼乐於宸廷集玉帛以来贺（中贺）钦惟皇帝陛下文德武功万方一统成修齐治平之效着礼乐法制之传嘉与民生海涵春育际此新阳来复永膺福履之臻臣某等忝职留司实为中卫效周诗之美颂祝圣壽之万年

中宫笺

上言玉历明时日书南至集衣冠於内殿奉母教之尊严（中贺）敬惟皇后殿下位正宫廷徽柔慈淑示易象顺承之义成周诗勤俭之功上赞圣明本支百代际兹令旦福履攸宜臣某等祇受明恩忝司留卫上履长之善颂致报上之忠忱

东宫笺

上言鹤籙天开前星正位协重晖之善颂仰青殿以覲朝（中贺）敬惟皇太子殿下英姿濬哲稟性温恭得圣学之心传赞文明之盛治问安侍膳礼谨承颜大本尊安人心允协履长之吉亨复维时某忝司留卫莫报洪恩介福壽之千秋与兆民而祝颂

长淮卫指挥使司冬至进贺表笺三道

上位表

上言治历明时圣人所谨天正长至福履维宜集玉帛之会同实朝廷之盛典（中贺）钦惟皇帝陛下上圣生知聪明濬哲武功以开景运文教以淑人心是以四海之内恩涵乐育福祿之盛与天地同大日月同明矣臣某等忝卫长淮莫联班缀嘉与民人上祝圣寿万年以致臣子之情焉

中宫笺

上言玉历顺时日书南至会同玉帛内教同尊（中贺）敬惟皇后殿下德盛徽柔躬行慈俭辅文明之盛治着诗雅之徽音际此迎长普跻仁壽臣某等忝卫长淮祇承恩命祝齐年之福壽歌景运之雍熙

东宫笺

上言月正仲冬阳生于子龙楼天近位正前星致勤报効之诚仰际会同之旦（中贺）敬惟皇太子殿下恭敬温文日新盛德富日就月将之学谨问安侍膳之诚上協宸心遂成至治际此复亨之吉倍膺福履之臻某幸生盛时职司列卫效重晖而献颂衍福祿之千秋

六安州冬至进贺表笺三道

上位表

上言春秋传书日南至所以谨天运之常也仰盛代之昇平合会朝之礼乐凡居海宇莫不懽心（中贺）钦惟皇帝陛下上圣生知聪明神武抚有华夷之盛遂成平治之功际此新阳万年福祿臣某忝职州司祇承明命愿上履长之壽頌同伸祝壽之诚心

中宫笺

上言月应黄鍾天正纪旦盛宫廷之礼乐际圣代之文明凡在照临玉帛来贺（中贺）敬惟皇后殿下位正柔仪辅成至治式着修齐之效永歌福履之成吉旦适临恩涵海■〈一禹〉臣某等职列州司莫联班缀敬上齐年之壽同伸就日之诚

东宫笺

上言天开於子阳复维时集四海之会同盛龙楼之礼乐（中贺）敬惟皇太子殿下尊居嫡长性稟生知於问安侍膳之时得修齐治平之要履兹长至茂集繁禧某荷承恩命任寄州司愿同亿兆之懽心敬上重暉之善頌

六安州守御千户所冬至进贺表笺三道

上位表

上言日书南至礼盛会朝仰圣治之文明集四方之玉帛凡居率普忭舞同懽（中贺）钦惟皇帝陛下文武聪明应期抚运车书成一统之功礼乐合百王之制洪恩所被春育海涵适兹阳复之临永介履长之吉臣某等职司守御喜际明时祝圣壽之维祺万斯年而永久

中宫笺

上言子为天统月正仲冬集内殿之衣冠上履长之善頌（中贺）敬惟皇后殿下盛德恭勤圣心慈惠示母教以居尊辅皇猷而致治届兹吉旦福祿来同臣某等祇奉明恩职司守御祝齐年之上壽効臣子之忠勤

东宫笺

上言月应新阳复亨協吉祝东宫之上壽际圣代之昇平（中贺）敬惟皇太子殿下德茂重暉礼崇主鬯式广儒宗之辅上遵宸训之严是以大本尊安天人协顺际会同之盛旦宜多福之骈臻某茂对良辰莫联班缀瞻龙楼之日近歌重润以重暉

皇陵指挥使司正旦进贺表笺三道（洪武十五年正月初一日）

上位表

上言历象授时圣人所以敬天而勤民也当阳明之令旦协海■〈宀禹〉之懽心丹陛会朝玉帛来贺（中贺）钦惟皇帝陛下文德武功应期啓运着修齐治平之效明纪纲法度之传海宇安宁恩涵生育际兹献岁与物俱春臣某等忝卫皇陵恭承宠命敬祝万年之壽同伸报上之诚

中宫笺

上言历颁大统治教维新仰日月之同明盛宫廷之礼乐（中贺）敬惟皇后殿下内教居尊母仪天下示易象顺承之义成周诗勤俭之功赞辅圣明太平盛治际此会朝令旦永歌福履其成臣某等祇承慈命忝卫皇陵同伸就日之诚恭上齐年之壽

东宫笺

上言月正上日治象阳明仰龙楼於九重盛会朝之玉帛（中贺）敬惟皇太子殿下位崇主鬯德茂重华侍膳问安参闻政治崇儒讲学允协人心是宜大本尊安与宗社同其长久矣某忝卫山陵愿勤报効上千秋之善颂祝福壽之维祺

怀远卫亲军指挥使司正旦进贺表笺三道

上位表

上言春王正月物象维新圣壽万年诚深祝颂仰九重之廷陛集玉帛以覲朝（中贺）钦惟皇帝陛下允文允武上圣生知膺天眷以顺人心抚四方而成一统恩覃化育德合生成适正旦之云初宜倍膺於福祿臣某等忝卫怀远莫致忠勤效三祝之微忱与军民而忭舞

中宫笺

上言景运文明王正肇序盛中宫之礼乐伸祝颂之忠忱（中贺）敬惟皇后殿下位正柔仪恩覃慈惠辅圣明而致治着母教以居尊燕翼诒谋本支百代际兹献岁福履其成臣某忝卫怀远何补事功祝上壽之齐年同家邦之永久

东宫笺

上言阳德维新春为岁首盛会同之令典仰主鬯以同尊（中贺）敬惟皇太子殿下英姿天稟玉裕金冲侍膳问安集邦家之景福际兹吉旦乐育清平某忝司守御莫缀班行上福壽之千秋效履端之善颂

长淮卫指挥使司正旦进贺表笺三道

上位表

上言天时正则岁功以成肇当献岁之初吉協亨嘉之会凡在海宇莫不懽心（中贺）敬惟皇帝陛下居位至尊聪明圣武正纪纲而政治制礼乐以兴文航海梯山万方玉帛际兹正旦共乐清平臣某等祇承恩命忝卫长淮愿福禄之来同万斯年而永久

中宫笺

上言玉历之颁肇当献岁衣冠玉帛内教同尊敢陈祝颂之诚欣际会朝之旦（中贺）钦惟皇后殿下正位宫廷母仪天下式着肃雍之德用成勤俭之功赞辅皇猷本支百代对时育物吉履其宜臣某等幸逢景运职寄长淮祝圣壽之齐年协徽音而献颂

东宫笺

上言圣运天开前星示象际一统车书之盛合衣冠礼乐之朝福集东宫懽同海宇（中贺）敬惟皇太子殿下英姿天稟盛德日新安邦本以系人心辅皇猷而遵圣训太平盛治与物为春某等忝卫长淮幸逢吉旦祝千秋之上壽歌汉颂之重晖

凤阳卫指挥使司正旦进贺表笺三道

上位表

上言春为岁首圣人颁历象於天下所以明政教也玉殿联班万方玉帛（中贺）钦惟皇帝陛下文武圣神抚期应运恭勤修治肇新制作致太平之盛成乐育之功际兹正旦礼乐会朝同亿兆之懽心矣臣某等忝卫凤阳祇承恩命上亿万斯年之壽效周诗祝颂之忱

中宫笺

上言圣人抚运玉历新颁集礼乐於中宫乃朝廷之盛典（中贺）敬惟皇后殿下徽柔慈俭内教宫廷而上赞皇猷致修齐治平之效是以四海之内咸归正朔帛璧奉贡莫不懽心致兹献岁之初共乐雍熙之盛臣某等祇奉恩荣忝司列卫上祝齐年之壽用歌福履之成

东宫笺

上言龙楼天近位正前星欣逢正旦之开恭上履端之颂（中贺）敬惟皇太子殿下礼成主鬯德茂重晖懋明讲学之功式谨躬朝之礼燕谋貽永大本尊崇际阳德之亨嘉宜倍膺於福祿某忝卫凤阳莫伸报効千秋祝颂同海宇之懽心焉

凤阳中卫指挥使司正旦进贺表笺三道

上位表

上言尧典之称上日春秋之纪王正所以示政教于天下也仰景运之雍熙进万方之朝贡（中贺）钦惟皇帝陛下生知上圣位配乾纲天命人心之归武功文德之盛是以海宇之内恩深乐育当春阳发育而福禄之骈集矣臣某等职为署事祇荷明恩仰九奏之钧韶祝万年之上壽

中宫笺

上言岁功之成由乎内治际文明之景运盛祝乐于中宫（中贺）敬惟皇后殿下徽柔懿恭母仪天下式赞衣裳之治遂成黼黻之功是以四海一家咸安乐育太平之象正在今日矣臣某等生逢圣明恭为署事上齐天之万壽与亿兆以同懽

东宫笺

上言玉陛天开前星示象仰青宫而献壽歌福禄以来同（中贺）敬惟皇太子殿下天纵英姿日新圣学式谨问安之礼辅成至治之功海宇同尊邦家大本际兹献岁福复攸宜某効职凤阳署司中卫上千秋之美颂与阳日以同明

凤阳右卫指挥使司正旦表笺三道

上位表

上言历颁大统所以奉若天运而敬授人时也礼盛彤廷玉帛朝贡（中贺）钦惟皇帝陛下生知上圣盛德君临制礼乐以啓文明广才贤而敷政教海宇之内安乐太平倍膺福禄之臻适际会同之旦臣某等忝职凤阳实为右卫恭上万年之颂同陈三祝之诚

中宫笺

上言圣人临御岁序肇新内教同尊中宫盛礼（中贺）敬惟皇后殿下德盛徽柔恩覃慈惠而赞辅皇猷本支百代致宗社之尊安与邦家而同久际兹献岁福壽齐年臣某等祇荷明恩留司右卫欣际会同之旦实深祝颂之诚

东宫笺

上言玉宇春开前星正位幸际清平之运咏歌主鬯之尊（中贺）敬惟皇太子殿下天稟英姿日新盛德式谨躬朝之礼上承治统之传大本尊崇人心欣悦际兹吉旦福履攸宜某祇承

恩命列卫凤阳伸报効之忠忱效履端之善颂

留守中卫指挥使司正旦进贺表笺三道

上位表

上言春王正月景运维新集玉帛之会同乃朝廷之盛典（中贺）钦惟皇帝陛下聪明睿哲上圣之姿成车书一统之功着修齐治平之效是以年谷丰登民安物阜与天地同其长久也臣某等留卫中都欣逢吉旦效周诗之美颂上圣壽之万年

中宫笺

上言大统承天寅正授历盛礼乐於中宫集衣冠而称贺（中贺）敬惟皇后殿下位正宫庭与天同大辅圣明而致治着内教之徽柔是以宗社尊安邦家同永跻斯民於仁壽际献岁之维新臣某等上逢盛时留司中卫莫联内殿之班惟上齐年之壽

东宫笺

上言春生万象鹤籞天开集玉帛以会朝瞻前星而示象（中贺）敬惟皇太子殿下英姿天稟讲学高明懋明治统之传允协人心之要宗社尊安本支以永际兹盛旦福履其宜某忝司中卫何补事功愿同九■〈ㄣ禹〉之懽敬上千秋之颂

留守左卫指挥使司正旦进贺表笺三道

上位表

上言圣人示正朔於天下所以明政教也当阳春献岁之初正车书一统之盛凡居率普忭舞同懽（中贺）钦惟皇帝陛下位正乾纲应时抚运广贤材以资辅佐制礼乐以阐人文福祿来同亨嘉协吉万年之壽与宗社同其永久臣某等生逢盛时留司左卫莫致忠勤之报惟深祝颂之诚

中宫笺

上言圣明盛治上谨天时内壺同尊中宫盛礼集邦家之景福合海■〈ㄣ禹〉之懽心（中贺）敬惟皇后殿下与日月同比天为大着母教之俭勤辅圣猷之黼黻际兹献岁仁寿其跻臣某忝司留卫莫缀班行祝上壽以齐年协周诗之雅颂

东宫笺

上言天开玉陛春满青宫集玉帛以覲朝乃邦家之大典（中贺）钦惟皇太子殿下英姿天稟恭敬温文讲学崇儒上承治统问安侍膳日谨躬朝际献岁之云初集邦家之福祿某忝居左卫愿效忠勤际景运之清平颂重晖而献寿

六安州正旦进贺表笺三道

上位表

上言春王正月圣人所以明一统之义玉陛班联四方来贺（中贺）钦惟皇帝陛下至圣之资允文允武而上承景命下悦衆心航海梯山咸归职贡福祥之集与宗社同其永久矣臣某等幸生盛代任列州司共伸三祝之诚敬上万年之壽

中宫笺

上言历颁大统万象维新会玉帛以覲朝盛中宫之礼乐（中贺）钦惟皇后殿下徽柔肃恭与天同大允着修齐之效助成政教之功际此履端永臻多福（以下阙）

东宫笺（原阙）

荥阳外史集卷六十六

卷六十七

●钦定四库全书

荥阳外史集卷六十七

（明）郑真 撰

○策题

月试策题

祭祀之礼尚矣天子禘诸侯祫大夫飨庶人荐上下之杀也鲁诸侯也何以有禘欤或谓鲁以成王所赐故有禘礼而又以诸侯皆有之何欤夫子尝曰禘自既灌而往者吾不欲观之矣至於对或人问禘之说则又曰不知也何欤乃若季氏之八佾三家之雍彻即所谓禘乐欤抑他有其说欤

月试策题

易曰何以聚人曰财大学曰仁者以财发身则财货岂非古今所重乎太公圜府之法尚矣亦有可考者欤自汉以来或以金或以银或以帛或铸铜钱或用楮币或有可行或不可行何欤夫胆水浸铜可以助财而终不行织丝为钞亦可致用而终不用何欤

月试策题

食货民生所重书曰润下作咸则盐者朝夕所不废也禹贡青州厥贡盐絺盐岂出於青州乎自管仲着有海王之篇後世遂有榷法果可得而详之欤昔者圣人有言因民之所利而利之盐为民食所资国用所系而私煎盗贩自古至今有不能革何欤

月试策题

儒与兵非二道也卫灵公问陈夫子以为未学是儒者固未尝知兵至於对子路则曰必也临事而惧好谋而成者也儒者岂不知兵乎秦汉战争多以孙吴兵法角胜负赵成安君号儒者义兵而卒至败张良受圯上一编而卒辅成汉业何欤下至诸葛武侯亦号儒者其出师二表与伊训说命相表里然而天下三分终不能混一岂儒者有不足用欤

月试策题

古之大臣以身任国家之事者若商之伊傅周之周召其功烈不可尚矣汉之萧曹邴魏唐之房杜姚宋可与商周并称欤诸葛孔明佐蜀偏安一隅先儒论其为王者气象其功名事业可与汉唐诸君子比乎

月试策题

科举之设尚矣周有俊士选士造士之目其详可得闻欤汉有孝廉秀才其法备矣然举秀才不知书举孝廉浊如泥何乃有名无实欤隋唐以来有进士有明经而得人之盛终不及如成周何欤且贤书拜受与糊名较艺孰优投牒自进与郡县劝驾孰劣词赋之浮华经术之理致其孰难而孰易孰轻而孰重欤诸君子必有其说

月试策题

孔孟之学尤重於治夫子尝曰道千乘之国敬事而信节用而爱人使民以时说者谓尧舜之治亦不过此然而顏渊问为邦则有夏时殷辂周冕韶乐之说滕文公问为国则有助贡彻及庠序校之说何其言之不一欤

月试策题

马政之法尚矣宣王之伐玁狁则曰四牡有业其狩东都则曰我马既同是马所以资国用也周官六马之法可得闻欤自汉及唐马政益详汉有太仆等官唐则毛仲史万岁之流皆以牧马名世然史称牧马之盛惟北魏至（阙）

月试策题

国家制兵所以为致治保邦之策成周有居卫有行卫其制可得详乎汉有南北军唐有南北衙与汉制同乎且汉唐立国之初委任得人其後多宦官主之遂召亡国之祸其故何欤

月试策题

古者寓兵於农故天子之兵止於六军六军之兵至於六乡其出则为士为卒其入则为农为士兵农固为一矣至汉之兵有分番有常屯有远征唐有府卫有彍骑有禁军其得失详略可得闻乎

月试策题

国家制兵必使内外相维无偏重之患古者六乡之内六军寓焉征徐以鲁伐貊以韩平淮夷以江汉此内外折冲制乱之具汉列郡有都尉典武职甲卒王国则以内史侯国则亦有相与夫材官骑士楼船皆兵也其亦有可考欤然而变故迭兴建置不一而董卓曹操卒以外兵亡

汉其弊何如欤唐之府兵折冲都尉虽多在京师而亦散在诸道其後变为彍骑军籍不补卒召范阳之变异时方镇相望武夫健卒为侯为王朱李之徒相继犯京而唐以亡其孰有以致之欤汉唐往矣今欲内外相维无所偏重用以为守国护民之基以何道而可

月试策题

富国足兵莫重屯田自汉以来有事而此规制始创延及魏晋而极於唐其详可得闻欤今魏晋故地汉唐旧规犹有存者而未尽为修复岂今古异势而有所不能欤省漕运而宽国费此正士君子所宜用心也愿闻其说

月试策题

夫子尝曰以不教民战是谓弃之春秋书大阅又书治兵是兵固贵於练习也然古者以民为兵後世籍农为兵此即不教之民也然昭义步兵雄边子弟有如唐李抱真及李德裕者岂兵之终不可得而用欤

月试策题

兵必有帅号令进退皆禀听焉然有扈之师六事咸在牧野之职三卿同出是兵权不在於专也诗称皇父整师尹氏播令程氏出征则兵权岂在於专与汉之南军以卫尉主之北军以中卫主之唐制十六卫各分左右而复有元从正军之设则兵权又岂不专於一欤

月试策题

刑之为法尚矣书曰象以典刑刑之大者莫过于五然而五服五宅三就三居之法可得而详欤穆王作吕刑制为赎醵之法则有罪者固可以货免也圣人何为而取之乎汉法三章固足以顺民萧何作律九章而犹谓阔疏後增至三百九十五章抑何其多欤夫道德齐礼圣人为政之要也今欲教化流行刑措不用何道而可诸君子必有知之者

月试策题

六经之道同归礼乐之用为急记曰王者功成作乐治定制礼是国家之制礼乐宜也夫子言无位有德无德有位不敢作礼乐焉至於顔渊问为邦则告之以四代之礼乐何欤夫子尝言立礼成乐又言文之以礼乐是礼乐固学者所用心也而又曰礼云礼云玉帛云乎哉乐云乐云钟鼓云乎哉又曰人而不仁如礼何人而不仁如乐何然则其何以用其力欤孟子尝言见其礼而知其政闻其乐而知其德又曰礼之实节文斯二者而已其於礼乐何其有浅深欤今天下文物礼乐粲然大备设官分职古之制也後世试守权行之法何以立乎守官皆序旧阶不食全俸其法固然矣然而满岁称职为真其不称职者何所处置乎

月试策题

学校之法尚矣孟子曰皆所以明人伦也校庠序之法可得闻乎学则三代共之岂校庠序之外别有学欤周之成均汉之太学与校庠序之法同乎唐有七学之制亦云盛矣然而教养之法不能无憾何欤我国家上自京师下至郡州县皆有学矣然生徒犹有不肯力於学者岂父不教而师有未严欤愿闻其说

月试策题

察举孝廉汉制也若鲍宣王吉固为得人矣然在当时有孝廉浊如泥之说其何以为循名责实之道欤夫孝如曾闵廉如伯夷斯谓之称今天下大小要职皆孝廉矣其亦有伯夷曾闵之流欤

月试策题

五帝三王功德之盛後世莫及春秋五伯功罪相半殆必有其故欤汉之七制唐之三宗其於五帝三王或庶几乎愿闻其说

荥阳外史集卷六十七

卷六十八

●钦定四库全书

荜阳外史集卷六十八

（明）郑真撰

（阙）

荜阳外史集卷六十八

卷六十九

●钦定四库全书

荜阳外史集卷六十九

（明）郑真撰

（阙）

荜阳外史集卷六十九

卷七十

●钦定四库全书

荜阳外史集卷七十

（明）郑真 撰

（阙）

荜阳外史集卷七十

卷七十一

●钦定四库全书

荜阳外史集卷七十一

（明）郑真撰

（阙）

荜阳外史集卷七十一

卷七十二

●钦定四库全书

荜阳外史集卷七十二

（明）郑真撰

（阙）

荜阳外史集卷七十二

卷七十三

●钦定四库全书

荜阳外史集卷七十三

（明）郑真撰

（阙）

荜阳外史集卷七十三

卷七十四

●钦定四库全书

荜阳外史集卷七十四

（明）郑真 撰

（阙）

荜阳外史集卷七十四

卷七十五

●钦定四库全书

荜阳外史集卷七十五

（明）郑真撰

（阙）

荜阳外史集卷七十五

卷七十六

●钦定四库全书

荜阳外史集卷七十六

（明）郑真撰

（阙）

荜阳外史集卷七十六

卷七十七

●钦定四库全书

荜阳外史集卷七十七

（明）郑真撰

（阙）

荜阳外史集卷七十七

卷七十八

●钦定四库全书

荜阳外史集卷七十八

（明）郑真撰

（阙）

荜阳外史集卷七十八

卷七十九

●钦定四库全书

荜阳外史集卷七十九

（明）郑真撰

（阙）

荜阳外史集卷七十九

卷八十

●钦定四库全书

荜阳外史集卷八十

（明）郑真撰

（阙）

荜阳外史集卷八十

卷八十一

●钦定四库全书

荜阳外史集卷八十一

（明）郑真撰

（阙）

荜阳外史集卷八十一

卷八十二

●钦定四库全书

荜阳外史集卷八十二

（明）郑真撰

（阙）

荜阳外史集卷八十二

卷八十三

●钦定四库全书

荜阳外史集卷八十三

（明）郑真撰

（阙）

荜阳外史集卷八十三

卷八十四

●钦定四库全书

荜阳外史集卷八十四

（明）郑真撰

（阙）

荜阳外史集卷八十四

卷八十五

●钦定四库全书

荜阳外史集卷八十五

（明）郑真撰

（阙）

荜阳外史集卷八十五

卷八十六

●钦定四库全书

荜阳外史集卷八十六

（明）郑真撰

（阙）

荜阳外史集卷八十六

卷八十七

●钦定四库全书

荥阳外史集卷八十七

（明）郑真 撰

○五言长律

刘金事诗二十韵

中夏文明地由来说定（阙）门（阙）世美间气挺（阙）莹冰雪节义（阙）烂翻（阙）
望韬清华（阙）闾阖近步（阙）府仗贤劳（阙）强镇谋仍（阙）擢兼承（阙）沃
膏林（阙）还旧观（阙）梦遶蒲

（题阙）

令族辉门（阙）荐参庭步（阙）愿睽泪流纷（阙）荼毒甚於（阙）羞粉黛解佩斥珠
犀月鴈明孤影风鸕耿独（阙）雨思凄凄织杼秋窗暗篝灯夜榻低昨筵苹在茗（阙）姑
老仍多病儿孤不住啼有天当闵恤匪母孰提携蒸曝香供剂烹调肉进饔飧菑终待获经训
幸祛迷往事随流水余龄絶撮提萱花春院北榆景暮亭西节孝登青史光华待紫泥行看双
表植巨扁焕新题

和李廷铉皇城长律一首

西土周基壮南阳汉制新台街通禁密甲第起嶙峋（阙）将貂蝉伟旧臣旅獒来远贡鸣鹿
宴嘉宾露洗金茎（阙）烛春梦求符版筑猎卜应垂纶经济归文武都俞（阙）司教席宁
复妮沈沦

咏雪用沈文举教道二十（阙）

大雪海天遥千门犬吠骄刻葩涵（阙）甲园封翠失条粧猊惊突兀掘马（阙）绦绡宁从
东郭履敢受（阙）森万象嘉应叶重霄山（阙）讶白云朝岛屿宁攢壁（阙）火热红方
炽醪香绿漫（阙）压昏花日屡摇袁门声淅沥汉节（阙）鹤飘蓝关愁杳杳剡水兴迢迢
饭（阙）围妾妓梁苑肃宾僚甲第纡鸾辂（阙）客可能邀喜制阳春曲慙听下里谣广文
（阙）

附录文举咏雪诗

春候转无聊寒芒气愈骄乍来惊急霰忽下就（阙）沾萼纵横柳缀条羞明朝未积入夜暖
疑销旅邸凌（阙）窗映苇绡清吟差可拟坚卧不烦招欲土平於掌颡垣（阙）雕百盘来
一羽万甲堕层霄已向冬前应何烦岁首饶（阙）俄顷刻不住已崇朝尽报丰年玉争夸厥
贡瑶筑台怜妬舞无屋贮轻娇诗向冥搜得盃从磊砢浇也愁厨束桂长恐坐分瓢老眼生眇
眇中心觉旆摇试听还簌簌暂静复萧萧人迹行将断茶烟湿更飘白漫天近咫尺碧盖岭迷迢
迢有客惟黄卷于时尚黑貂匿瑕方比德乔木久同寮诘我惟能（阙）可拟韶阳春新渐布泥
路莫为邀那得文刀利（阙）哄堂期一笑传咏到葛尧连雪不止客况无聊读李商隐（阙）

寄陈虚中沈文举

造化心纯白春候弗僭（阙）润粧梅晓正妍串珠（阙）着绵元正方纪月大有（阙）招
素月跨鹤望飞仙好（阙）里忆燕然

又

洒洒纷随霰轻轻不动尘把锄夸得玉投火（阙）客忠怜谪宦人骑驴桥遶灞策马岭登秦
兔魄（阙）妬春窗虚迷化蝶池冻蛰修鳞老觉千峰改光融万境（阙）虚幌久搔首画楼
频歌咏音同调经书事有因谁修滕六传（阙）学踵成均

闻庄舍弟自庄浪除广西桂林府修仁县主簿作长律四十韵以寄

薄宦怜吾弟人来说调除有怀终契阔长望独踟蹰宗伯公清选朝家叶衆誉宛驹夸腰褭鲁
宝识璠璣栖凤名仍忝攀龙步匪纡信传沧水使恩捧紫泥书蹀躞关西马驱驰陕右车身辞
沙塞远目送海天虚驻驿频抄饭充厨只问蔬蚶烟晴拂曙瘴雨暮填淤水闸山成斗溪桥市
趁墟金沙横蟠螭蛛窟映蟾蜍晓色催行李清风送佩裾山翁招竹所野老迓蓬庐客路殷忧
际公庭上任初簿书明法律耕稼抚田间问俗来耆硕分曹察吏胥嘉生函化育和气蔼吹嘘
桂岭秋声外灵川晚照余林深蟠宿蟒树杪聚羣狙慷慨羈心集登临野兴摅诗应夸子美赋
或拟相如谩说生猺聚由来百货储翠毛笼孔雀白璧间车渠香蜡纷成困椒糖重载輿兽皮
堪作褥织贝可为裾味觉贪泉爽亲承化日舒珍奇空土苴经训乃菑畲崖茗团成饼溪毛足
当蔬日须崇简俭时过惜居诸勉力忠勤报母容礼法疎鹯书催入覲凤阙凝听臚久绊频嗟
我斯文独起予每欣樽有酒不美食多鱼旧业隳堂构非材愧木樗饭牛歌浩浩化蝶梦蘧蘧
老觉归无计愁怜病莫祛故园花自发先陇草谁锄恬漠丹衷守飘萧白髮梳彝伦今古重百
岁保同居

和黄仲瑱先生郊祀庆成长律二十韵时先生徵入除翰林检讨

礼乐郊丘祀衣冠海岳同合祛严飨报陟配备尊隆涣号扬星幄羣工仰法宫镇圭华藻藉重璧间黄琮角茧牲牢赤膏明火炬红羽林森铁輦骑路驾苍龙端冕存清穆承袍笃敬恭玄穹三殿辟（阙）九门通允铄清光近於昭俭质崇炉薰团霭翠金奏曳冷风角宿忙催旦曦轮赫馭空追陪商皓列观感舜瞳重福禄绵邦祚精神肃圣躬乾心垂眷顾解泽沛冲融仙佩空蒙上灵游化育中汉祠增立時尧典记禋宗履运逢开泰祈年儼奏丰馨香符至治熙绩告成功昨拜鸾刀赐恩加凤诰封御前谁献颂藻绘近华虫

雪诗

洪武十九年丙寅正月一日广信府经历李相公招饮二更时还急雪漫空自是三日雪不止闭门不出清思无聊赋长律四十韵録上郡府相公及教谕广文训导诸先生自媿芜拙不足陈长者之前怜其意而略其词可也

江海元正夜乾坤四望迷燕娱传跋烛归步怯扶藜妙造归天巧神功挟气机六霁劳翦刻万象豁端倪奔迸星流急娉婷羽舞低飘飘虫扑纸飒飒蟹循堤掠面真疑絮沾衣错认梨串珠纷度隙急响密通闺高塔撑孤笋长桥偃素蛭曲阿团作阵深隄不成蹊战罢龙飞甲朝迴马印蹄门深频吠犬巷狭强堆貌似飭冰悬瓦如绅瀑下溪月鸾随渺渺霜鹄共凄凄锦鲤深宜蛰玄猿禁莫啼余蝗应入地倦鸟不成栖路滑愁穿屐烟消怪湿雉猎围劳镇将樵担讶山妻花褪梅留片茅抽麦遍畦丰年云已兆宝牒若为舛焦寝清酣熟袁门矮屋凄王猷归剡水李愬捷淮西宠幸皇輿出悲凉使节携谪伶韩刺史乐问党家姬郢曲宫商叶吴讴律吕齐敢因梁苑赋欲擬杜陵题宝瓮羔为酒珍庖鹿进饔醉乡穷缅邈仙界许攀跻炉冷频然炭衾孤急索终三山穷海岛百尺上云梯鹤擎身如画鱼篮手自提阻程空望远闭柴扉闻饥骨透清初爽神融老未黧化银须秘术斲玉恨深泥阳德羣瞻日文明拱候奎赐钱覃府库挟纊慰军黎占奏闻丹陛恩流浹近畿周诗歌霖霖万亩及耕犁

往年予客濠梁中都国学助教嘉禾贝公廷臣咏雪五言二十韵先後属和者应奉姑苏金先生德俊前参政天台方文敏词格律调俱称予时为之阁笔後此数年予来广信乡友胡仲厚作雪景见寄佩服雅意装潢成轴追次贝公韵笔诸其上以志不忘时大雨雪万山皜素如在画中洪武二十一年龙集戊辰冬十二月十五日也

大化归神造天葩巧更纤重欺云母石白胜水晶盐东郭催归履西窗唤上帘地融销玉马砚冻阁铜蟾酒熟螺杯泛炉存兽炭炎书声轻可喜米价重仍嫌富有金貂拥贫无短褐添朔天持节重淮海将兵严驷驾宁留辙邮程失报籤瑶台纷共倚银界耸羣瞻曲坞花成阵孤峯笋露尖瀑泉停远涧水飭落空檐猎兽林丛伏窥鱼沼沚潜浮游宜访戴图写欲呼阎齿噤身犹缩皮皴手莫拈宣尼书特笔太史叶官占暗听窗虫扑轻夸席絮沾松杉擎糝糝牟麦露蘄蘄野烧僵眠独桥行逸兴兼怀人那得去千里奈恹恹

挽故参政彭城郡公二十韵

气禀天台秀丰神委羽仙养颐全静素止息味重玄书饱三千牋身尊九十年瀛洲夸故老廊
庙数名贤茅土恩封重圭璋宠赐专清时华族望盛德绍儒先空阔波澄海虚明月在天藜灯
分瑞采鸿宝发真詮火热烧丹竈云深种玉田文声金掷地诗律锦盈笺画鷁频飞檝青骢稳
着鞭衣冠倾洛社花石胜平泉初度流光速长生宝籙延老莱新舞彩卫武秩宾筵杳杳青空
舄飘飘白日旃委形随去鹤真骨蜕轻蝉饰礼崇周婺归藏卜楚筮诸公嗟絶笔太史购遗编
仿佛仪容接悲凉涕泗浚大招吾岂敢行见表双阡

郭氏挽诗

女壺仪容正儒家问望隆相攸谐匹配主馈恪亲躬渊漠精思密冲和内行充誓言昭皎日警
戒穆清风奉上欢娱备承祧享荐丰庖羹和滫瀡樽醴泛冲融御从恩私洽姻联语笑同佩兰
香纂纂采藻咏颯颯织杼丝缣叠纫针组制工竹练敦朴素帷幔革鲜红浮俗艰难际平居淡
薄中遐龄期（阙）夭丧罹贤胤哀伤切令衷孙谋贻嗣续孩长赖帡幪家训论先系师传督
懋功精金成跃冶美石就磨礲荏苒流年度荒凉往事空神游骖紫凤悲些托玄鸿画像光辉
覩灵车影响通金花崇隧典矫首大明宫

荥阳外史集卷八十七

卷八十八

●钦定四库全书

荥阳外史集卷八十八

（明）郑真 撰

○六言

题画

彩云影动丹崖皓月光寒珠树待君载我扁舟万里瀛洲归去

题山水画

叠嶂密云深树前溪流水长桥天外鸟飞斜日蹇驴归兴逍遥

重重石迳云林洒洒竹窗松屋隐君试问何如高咏考盘在谷

便面

缥缈云山薄暮微茫野水清秋为问读书千卷何如把钓扁舟

题东坡墨竹

湘水遥怜帝子彭城恍遇坡翁看画不求形似笔端自有清风

飒飒凉声欲暮萧萧劲气先秋笑问黄茅冈上谁知太守风流

蕃邦进象二首

名应周诗五辂耳闻舜韶八音共向瑶阶率舞九重喜动天心

广鼻深通两窍长牙白耸双尖沐浴天家雨露贡来南海蕃暹

山水画

远嶂白云天半断桥流水村孤高树门前成列人来试问吾庐

题画

六月炎州如火祗思林下清风千里湘江帝子夜来遗佩玲珑

题卓民吉画扇面贻叶太守

天外云霞欲曙山中楼阁先秋借问蹇驴双去何如舴艋同游

题画

万仞苍崖壁立双溪碧水环流过眼浮尘滚滚山中好度春秋

荥阳外史集卷八十八

卷八十九

●钦定四库全书

荥阳外史集卷八十九

（明）郑真 撰

○七言絕句

咏薛涛笺

粉白朱红点点描
蛮笺认得女娼妖
巴山蜀水花如海
杜宇春风恨未消

题庾岭图

夹道凉生涧壑秋
曲江祠下思悠悠
倚栏人在空中语
南去东南可自休
两崖天倚画图开
万里风高猿啸哀
闻道万年崔相国
白头也复赐归来

题苏武握节图

啮雪餐毡使节孤
老来不肯困穷途
如何娶妇为姬妾
教得生儿也姓苏
草冻沙乾又乳羝
天寒大窖雪成围
节毛落尽空头白
忍死边廷未得归

题蔡琰归汉图

玉颜没入左贤王
万里天高恨雪霜
名父不应儿失节
九泉羞杀蔡中郎
呜咽胡笳曲未终
秋风马上路匆匆
梦回暗忆恩情重
毡帐寒深雪满空
銮车处处看春花
又过陈留董祀家
不是戎王荒塞夜
夜深何事咽悲笳
历历风沙貌得真
两雏牵挽意逡巡
不知野店黄昏後
谁画当年断臂人

题秋江举网图

西风波浪刮鱼腥何处幽人独下簪
百岁想甘清节守桐江不必问严陵

题季璋梅花

三年为客海东涯万里罗浮一梦賒
霜月夜寒天地合开门曾忆看梅花

答任彦舜送香橙

皇都传说上元春罗帕包封赐近臣
海角未沾天宠洽却怜霜颗特分珍

红盘擎到碧窗纱三寸黄柑擘永嘉
亲老正思甜舌本蜡封谁为寄吾家

题渔樵问答图

百年生计近如何霜雪萧萧鬓未皤
我志在山君在水负薪何似得鱼多

山中应许暂逍遥滚滚尘埃远市朝
见说朝廷正招隐吾侬未必老渔樵

谢丁相公惠牡丹

青春正绽洛阳花千里东风一梦賒
多谢公侯珍重意甌瓶分到碧窗纱

几年作客向蓬莱一捻胭脂笑口开
想见故园春满眼淡粧浓抹待归来

题画竹

轩居曾种碧琅玕满目秋声白昼寒
旧日林泉今总废画图空向醉中看

长江落雁图

聯翩羽翼映秋波芦荻飘萧已厌多
长笛一声归棹晚江天目断奈渠何

题蛟川赠别图

蛟门海濶蜃楼低仙子乘空一鹤飞
想见故园春正好归来乔梓映清辉

彭泽归来尚有田莺花三月醉琼筵
故人矫首沧江上万里东风浪拍天

题马图

天廐骅骝汗血身沙堤滚滚不惊尘春深谁奉明廷对许赐当头第一人

寄汴韩豫斋

往岁曾看艮岳图还夸形胜帝王都风流有客今三载千里相望夜月孤

秋风悄悄动荒埃篱下黄花菊又开试问城头双过雁中原何日定归来

腊月夜读袁文清公集口占二絕

万年倾泻似悬河传出人间不厌多奎阁春明天语笑词臣喜得似东坡

夜月分明在树杪西川故老许神交文章可是传衣钵风雪寒窗记手抄

题瘦马图

万里沙场踏雪还凌然病骨箭痕斑内官有意勤刍牧置在春风十二闲

题孔雀图

石根苍竹净晖晖暖翠翻花遍羽衣见说上林春似海乘风好与凤凰飞

送蒋仲原官府谷

长城万里控延安饮马泉腥夜月寒山县休衙人事少旧时经略许谁看

云屯万竈玉骢嘶斜日青山听鼓鼙落木秋高边地远却怜枳棘凤鸾栖

送王以宁官神木

同乡相遇说瀛洲海濶天高白鴈秋老我不禁霜雪苦俸余应为买貂裘

霜风吹晓过潼关万叠青青塞上山淮海有人西望远故园时许附书还

得家书忆儿复昇

小儿遗毒痛难胜苦道爹爹唤不膺我实怜渠那得去淮山深夜对孤灯

题水仙

湘江仙子佩珊珊罗袜凌波翠袖寒目断楚云归未得岁阑冰雪两相看

题菜图

绿畦雨过润如酥瓮有新醢市有酤三月已应忘肉味先生近欲传冰壶

七月望宿府学口占一絕呈梁先生伯益是夜月既蚀濠梁卫随班行礼

庭阶数问夜如何谁继卢仝月蚀歌尚喜吾侪风致别当筵呼酒问嫦娥

题瀛洲夜宴图

天风杂遝送鸣珂樽俎纷纭乐事多明日有人陈奏疏当筵数问夜如何

题钱舜举山水卷

海国青山旧隐居望乡千里客心孤西风落照频看画仿佛楼船过太湖

山外有山深复深苍松红叶暮云陰繁华滚滚尘迷眼不负林泉百岁心

题韩允传所藏钱舜举山居图

烟雨春深拥翠螺山人独赋考盘阿柴门有客频相问泉石生涯奈汝何

翩翩鞍马过桥西荒崦人家竹树低见说草堂春似海杜陵不数浣花溪

竹窗松阁翠重重点染应归造化功水镜涵空秋一色置身如在广寒宫

飘然湖海逐浮沤风雨淮山两度秋野色微茫舟似叶令人归兴眇瀛洲

白云相望海天遥桂树山中不受招故国百年遗老尽画图披玩似琼瑶

按图绘宝监舜举号玉潭宋景定间乡贡进士画青绿山水师赵千里意度气韵妙入神品乡友韩允传志尚幽雅购得是图深宝玩之予客居凤阳附致求题赋诗五首允传读之其有以契予意否耶

题秋江送别图

忆上西江贡士船故人把酒意茫然今年却送南归客红树秋山怅远天

烟雨秋深紫翠浓仙人楼阁暮重重故园松菊西风外笑指天台第一峯

秋江独钓图

轻舟摇漾钓丝风野水如天一镜空盛世明廷正招隐渭川当复梦非熊

桐江东望水滔滔千古风流梦寐劳汉室中兴功莫比云台未似钓台高

白月黄昏听唱歌沙头人问得鱼多纷纷世事尘迷眼烟水生涯可奈何

家近瀛洲海上滩渔灯共语夜阑珊三年远作淮山客祇欲归来把钓竿

题春江送别图

画船江水漾晴空叠叠云山锦绣中冠佩入朝宫阙近莺花三月正春风

寄题宣和重楼合喜图

乌雀春喧喜事重天香国色倚东风宫车北望溱阳去锦绣繁华一梦中

艮岳当年御辇游花神有意结重楼谁知天上春风乐翻作青城一段愁

题敬义斋卷

肃襟清坐自惺惺玩易焚香倚石屏一片灵台明似镜天光云影对空青

青青编简炫春晖表里工夫世所希妙悟不烦频出户满街尘土污人衣

别来久不见山陰想像高秋玉雪襟大手文章劳撰述百年复见圣贤心

金华吴宗昭氏以敬义扁其斋山陰王先生好问为之着记江湖士大夫复为箴铭诗歌以劝厉之予读之数过若羣玉之府琅玕璆琳层见叠出而砢砢瓦砾何足厕其间哉赋诗三首絶句以归之用志予媿云

二月望日潘太守劝农赋絶句用韵

拍拍清樽绿蚁酣珍分列鼎饫肥甘太平共此春风乐笑指天香满翠篮

题欧阳率更九成宫碑赠南昌万玉麟先生来淮海以诗名有子名孟雅知临淮县以实封论

事陞知泗州云

洪都仙客佩玲玲淮海归来双眼青笑指囊中无长物逢人许看醴泉铭

送永嘉支师中分教入京

千里长淮共驿船碧空如水水如天即今又送还京去五色龙光近御前

盛时多士出成均芸屋青灯教席分自有文章成锦绣殿头释褐奉明君

洪（阙）贾（阙）许索芭蕉作四絶以致意贾府通判尊翁洪府同知尊翁也

故园曾忆种芭蕉长日薰风一扇摇爱向淮南分别种夜深凉雨听潇潇

江南欲寄一缄书想像清秋午梦余千里客乡风雨候清清还看绮窗虚

天浆滴滴似凝脂曾看芳葩启瓣时璇宇星稀天欲曙一杯凝送玉琉璃

浅浅晴泥手欲栽悬知生意是生芟青旗半卷丹心吐有待山翁跨鹿来

题画梅

来看南枝与北枝溪头立雪思离离逢人若问调羹事须待青青着子时

寒夜二絶句简徒县丞

竹屋寒烧楮桮烟先生高卧腹便便淮南为问江南客何似山中夜雪天

淮海风高鴈鹭呼客窗夜半拨寒炉小儿试向灯前问曾有先朝鸽炭无

宋思陵驻蹕临安郡国贡炭非鹁鸽色者不以进外臣以为言思陵曰宫中用炭但取和煖安用鹁鸽色者耶立命罢之可谓俭德之君矣

题画送陈驿丞

锦绮云霞盼九重故人来到且从容大材正要为梁栋笑指桥南百尺松

奎星高照海天涯万里车书正一家黼座云开丹陛近春风顾插御筵花

题梅花

风流不见琼妃面欲寄多情语未工山鹤一声天欲晓寒香浮动月明中

题陈仲良所藏姚（闾）马图

献凯归来汗血流将军万里已封侯长安新置飞龙殿奈汝西风苜蓿秋

用韵答夏威原絕句十首

九重天子正兴文多士趋朝日见亲谩说黄公华胄在商山重认采芝人

堂前衣舞锦成文捧檄由来只为亲督府斋坛森将钺幕中掌记数斯人

锦绣曾夸纸上文西风淮海见情亲京华咫尺云霄近矫首金门献赋人

淮山掌教魏斯文夜榻曾论肺腑亲湖海不知台阁事昇平草颂岂无人

濠上波生五色文纷纷鱼鸟独相亲却怜流俗相嗤黠空作乡闾第一人

天高河汉烛奎文灯火山窗夜独亲谩道翰林华盖逼手裁春帖是何人

笔端挥洒不成文谁道诗看子建亲裘马五陵夸俊少只甘空谷老吾人

欲寄多情愧不文好将忠孝答君亲锦衣若幸归来早便作笙歌席上人

百篇写得旧时文风月何由语笑亲为道老来长作客苍颜愁对镜中人

千金骏马五花文可是南阳帝里亲圣代恩涵溟海阔独怜烛武不如人

八月二十七日早钟梦後在新城闻王府召命说

书以为梦已醒作诗有梦里犹闻殿下宣之句既觉知亦在梦中所谓梦中说梦者殆此也耶
枕上足成絕句五首擬寄府僚纪善季纯夫

华髮相将五十年飘飘劔佩向淮天床头一卷春秋学梦里犹闻殿下宣

梦里犹闻殿下宣春明曾到禁廷前锦床绣褥亲王座听说遗经二百年

梦里犹闻殿下宣内庭曾记秩初筵香梗软饭传恩赐饱德讴歌既醉篇

梦里犹闻殿下宣晓云咫尺晋阳天山河表里藩维壮乐只邦家忆万年

梦里犹闻殿下宣庄生蝴蝶正翩翩词臣识得君王意有作应须进一篇

题萱花图赠胡伯霖

翠筵金萼正重重堂下佳儿舞袖红鹤髮双亲同一笑祇须长日倚熏风

又

淮南千里见萱花一寸芳心未有涯见说北堂人不老归来须作画图夸

题桃花图

路入天台第几重桃花流水煖溶溶洞中如见佳人面好吐平生锦绣胸

一点妖红早着花春风处处看云霞就中欲问千年实笑指瑶池阿母家

题山水图

淮山落木正萧萧梦里瀛洲碧海遥止愿归来茅屋底夜凉明月听吹箫

十一月二十九日夜写怀三首（为周彦高作）

离离星斗满璇霄席上频闻犬吠骄谩道酒盃须一醉胸中磊砢不能浇

志骄气满可怜人乡里痴儿未足嗔钟鼓归来成一笑老梅檐角正含春

悠悠岁月去如梭富贵人生奈汝何过眼已应天夺魄樽前且赋考盘阿

送史奏差济川归永嘉

风雨沧江白鴈飞淮南游子赋将归椿庭笑奉金杯寿香擘黄柑雾湿衣

帅垣使节咏皇华千里家山望永嘉见说北堂成宅兆夕阳枝上有慈鸦

十一月初九日早出南门

狐皮为帽裹头颅造化春融病骨疎濠上独行霜雪晓旁人认得老髯苏
题长淮送别图赠吴兴阮文肃

紫翠重重罨画间东南胜槩似淮山水晶宫里神仙宅看取西风跨鹤还
向来大父宰鄞时满眼春花锦绣帷归取家藏瑶帙看吾翁亦有赠行诗
题秋山图送梁先生

雁门关外万山重天籁萧萧涧壑中作客边廷归未得白云翘首海瀛东
庚辛岁阔斋春帖子

大道为公尊孔冕斯文有喜祝尧天山中要得平安信客底宁夸富贵年
旧家文献三千卷盛代年华五十春多士愿登天上选老生甘作海傍民
辛酉岁春帖子

五十年过犹作客二千里远祗思家春生书带窗前草香蔼椒盘席上花
题便面

落木秋风万壑哀林扃不为俗尘开明廷正欲招贤士奏赋谁如宋玉才
题桃花赠郑良琪

淮天锦绣正缤纷花下传杯赠去人千里若归瀛海上东风好寄故园春
题便面

我家住向蓬莱岛卧看扶桑晓一轮千里客乡归未得江花江草解怜人
题便面赠叶子中先生归慈溪

重重乔木与云参黄鸟啼春画日酣归取山中图画看人生只合住江南
山苑西风落木秋碧天万里海东流分明认得蓬莱岛正拟归来一叶舟

淮南望近八公山玉佩仙人缥缈间丛桂好歌招隐赋轻舟应未许空还

题梅花

岁寒为客楚天涯遥忆西湖处士家千里梦回霜月白起看倒影在窗纱

又

玉皇殿上会羣仙绰约丰肌映雪妍晏罢归寻蓬岛路紫鸾飞入海云边

春风消息问梅花冰雪那禁老岁华有约玉人终不到凭谁覓得画图夸

又

姑射仙妃礼玉宸孤芳占得御园春君恩天上怜才俊赐与螭头第一人

花仙雪里喜相过占得青春有许多见说商岩正招隐调羹事业果如何

孤芳老干雪崖重六出春涵造化工千里西湖魂梦杳紫箫吹断月明中

题沈生鏞所藏山水图

蹇驴千里倦驰驱咫尺青霄近帝都何似山中垂白叟钓舟一叶向江湖

题二乔观书图

粉袖春纖露笋芽瑶编舒卷向窗纱古来女宠存龟鉴国色娉婷莫自夸

云锦衣裳玉雪肤君臣共喜得双姝不如诸葛麤麤妇手挈練裳过草庐

予读四明乡先生许氏山心跋二乔图有曰旌旗簪雪师次江濱怒涛撼空巷无居人咄哉叟两颗洛神珠暗室藏不住竟入蛟龙爪吻化为行云行雨命也遭惊得喜琼琚瑶珥色也三军夺志烈士丧气鄙哉策与瑜沛公一田舍夫萧何一刀笔胥提剑入关仅收图书百宫姝丽纷如溃鱼眼高心麤视之若无尔中岂乏此二女者乎不然胡为是汉胡为是吴命词奇古深得讽意结句尤为警策当时士大夫以为絶唱而以布衣终身世无有知之者其命也夫予客濠梁（阙）庸表而出之使知山林文学之士有如先生而不得一遇者可胜道哉可胜叹哉

题林和靖观梅扇

湖天空濶翠林深洒洒逋仙玉雪襟不是梅花知出处凭谁同守岁寒心

题山水扇面

秋水上溪鱼正肥西风岩谷思依依问渠金紫千锺禄何似山中及早归

题陈仲良所藏高彦敬青山白云图

碧崖浮动白云低山雨晴时水落溪日午醉眠人未起胜如骑马听朝鸡

题山水卷

■ 〈雨上庵下〉 霭云烟涧壑深双松如盖翠陰陰山中近日知音少石上谁弹绿绮琴

题桃花

一曲来听点绛唇暖风花下晏芳春何由种得千年实赠与东家百岁人

题墨菊

秋风窗下月昏时梦逐西园蝶未知帐底寒香人寂寂谁将醉墨洒淋漓

纷纷桃李若为容篱落秋深晚色重山月暗时人不寐墨香何似菊香浓

题红菊

西风有梦过园篱帐底佳人睡起迟应是秋香空淡泊晓粧亦得点胭脂

题王右军书扇面

越山高步碧云梯洗墨池寒落照低仙子已骑鸾鹤去白团如月问谁题

题广信王氏园菊本十种

胜金黄

幽花黄胜褭蹄金唤醒人间富贵心正色本来天造化风霜不怕九秋陰

御爱黄

秋香送喜入天容采采承恩雨露浓愿奉君王千万寿御袍黄映玉袍重
相袍紫

（阙）西风篱落九秋高檀心岂羡公侯贵彭泽归来独慕陶

鹤顶红

折得秋葩鹤顶红丹砂点染幻神功苦心欲寄蓬莱客愿借胎仙两翼风

赛琼华

往事繁华逐水流西风吹梦到扬州花心不与青春竞冰雪萧萧过九秋

万卷书

芳信谁传万卷书花神可是费工夫凭君寄与陶居士香露溥溥泻玉壶

状元红

西风花看状元红芳气纷纷正恼公莫向人间夸折桂当年也到广寒宫

探花白

忆向琼林去探花瑶台玉宇认天家月明彷彿羣仙过素袖娉婷帟岸纱

榜眼黄

榜眼谁夸进士科却怜秋色恼人多双瞳眩转金钱富无酒陶潜奈汝何

金佛莲

潮音洞里现慈颜万朵金莲雪浪间花色近人秋似海恍然身到补陀山

旧岁甲子秋真自淮临入覲九月初七日早朝礼毕与凤阳教官吴烈等侍余尚书入见西宫
上赐之坐与宴席近臣传旨以菊绽西风为题应制云秋葩翦刻见神工风送天香入九重有
勅御园迎风辇上尊玉醴拜恩浓既而续御制首句成章云西风蕊菊绽肥黄缥缈天香入帝
傍见说花神承宠顾画栏深护翠云凉诗成进呈士大夫夸为盛事及来广信闻王氏园亭菊
本之盛赋诗咏之谨录其事如右以志荣遇云

题雪霁图

银界参差百万重太虚清气压鸿蒙旧来行处频观画如在冰崖雪壑中

唐十八学士登瀛洲图

学海波环翠石重长春花木炫丹红神仙祇在人间世何羡沧溟恍惚中

禁漏无声昼刻移天家勅旨出廷墀诸公且尽仙洲乐未到分番上直时

题山水扇面

山翁唤我上饶来坐对南屏叠叠开一片白云长作伴分明认得是蓬莱

题陈生子翼画扇面

悬崖晴瀑泻银河杂遝松风送佩珂世外红尘飞不到山童却报晚凉多

覓竹栽芭蕉简祥符古芳禅师

石上来参玉版师殷勤覓得凤凰枝分明认得如来意坐到林扃月上时

越客南来梦转添移床听雨近虚檐绿蕉分得只园树晓露承来似蜜甜

送王绍泰计偕京师

西江贡士上春闱天上星光近璧奎从此名题龙虎榜殿头释褐赐金泥

盛时多士蔚招徕银钥声寒棘屋开丹杏琼林春宴早红旗先报捷书来

碧溪水解水融融满眼晴山紫翠浓客邸要聆新进士鸿书好寄白云重

题广信李通判梅竹画四轴

山中消息问如何昨夜前村雪更多莫道此君坚节操玉妃还得共婆娑

冰雪天寒不自禁晚风吹动翠陰陰溪光一片清如镜照见佳人铁石心

帝子湘江翠袖寒云深风雪佩珊珊罗浮仙客频相遇牢落水姿不耐看

姑射神人杂佩瑶月明深夜许相招鹤声唤起瑶台梦百尺琅玕雪未消

题红梅

花仙曾到玉皇家有勅春香泛紫霞薄醉着颜红有晕日高含笑近窗纱

梅花

调羹商鼎媿非才孤负百花头上开夜半西湖空有梦月明谁见鹤飞来

题兰

国香散落翠嶠岩晬晬芳丛玉露寒楚佩可怜零落尽春风吹梦过湘南

题红梅

岁寒曾到玉皇家浅浅琼杯醉碧霞睡起不知凡骨换分明素质点丹砂

绰约山中万玉妃冰天有梦到瑶池调羹誓许供珍御却笑春风上玉肌

同通判李德高相公雪中

洒洒春风玉树枝何人吟得灞桥诗画堂卷起珠帘看三白人间正及时

琼葩玉蕊点疎枝吟得刘义五字诗谩道阶前深似尺程门独立有杨时

冰帘高卷看琼枝谁寄回文锦上诗寝笑从容人未起客中何似在家时

轻花洒洒凤凰枝锦绣联篇百韵诗羔酒千金歌吹乐山城正属太平时

折得梅花第一枝雪儿唱得雪中诗扁舟夜半人归去正是王猷访戴时

缟袖娉婷舞柘枝天花飞落锦笺诗山川晃荡真如画要覓当年李伯时

隔屋女郎歌竹枝凄凄祇似少年诗浅斟低唱微微醉如在销金帐里时

阿蛮折得素琼枝舞向华筵索赠诗散乱天花声扑簌向来忆在碧窗时

万树嵯峨重压枝可怜冻吻不成诗天光大窖炉无火正是苏卿握节时

击碎珊瑚五色枝锦笺写就谪仙诗公庭早起人初集正似陶公布屑时
人有为石梁谣者录成十四首

乔木重重惠子窑濠梁水带九洪桥淮西自古夸形胜表里山河拱圣朝
缚竹编芦窗户开晴光晓透土牀来满城要待秋花插汲水遶篱浇菊栽
土塹为家似燕巢秋来风雨怕潇潇马通拾得团成饼晒向墙头待暮烧
种得桃花与李花红红白白几人家卖钱却待花成实沽酒墙头不用賒
帝乡今得免征科汉祖当年未足多父老扶藜频望幸教儿唱得大风歌
土坑边头半镬汤晓寒睡起怯衣裳女郎烧火添牛粪笑指灰中饼饵香
东屯西屯云昼陰上关下关淮水深淮水好从天上去美人不见愁人心
向来翻忆战争时江海茫茫远别离白髮重逢太平日春台化日乐熙熙
义勇祠前酒似池鼓笳吹动赫人威满身插得真刀剑要与皇家作健儿
婚娶家家礼俗谙东隣少妇嫁童男园篱缚架开筵宴借得船头一片帆
斤斧山中日日操求生莫问此生劳草柴卖得钱三百不怕城头米价高
养得儿男学务农布衣褴褛髮蓬松兔园亦有村夫子夜雨残灯教过冬
淮水生鱼不论钱弈坛醉倒唤棊仙百年尽可为生业仰戴皇家日月天
少妇新缝八■〈土答〉鞋可怜两足带尘埃盆中有水不须濯却待人间好日来
别来三月不见郎夜灯明灭淚成行妾身许得单衣愿不怕穷冬有雪霜

荥阳外史集卷八十九

卷九十

●钦定四库全书

荥阳外史集卷九十

（明）郑真 撰

○七言絕句

题吴教授所藏杨长史菜图

雨露春深绿正肥从教百瓮捣金虀梦中要与神明说不许羊蹄踏破畦

长史相烦写画图青青生意遶吾庐文章更爱黄山谷食肉悬知味不如

题庐山瀑布图

香炉峯上梦曾游晴瀑声喧万壑秋要与谪仙长作伴白云深处独相求

题柳公权玄秘■〈土答〉铭

柳公权八法得颜太师之传其在陕右若李西平王神道碑之深古雅健玄秘■〈土答〉铭之遒劲严密皆书法之杰然者予居中都凡十年西平王碑仅一见求之莫致玄秘■〈土答〉铭则往往得之间留一二本论着其後以为家藏今年夏四月诸暨章立可以三泉司征考满入覲用是为赠予感其意题二絕句转寄先生以书法世其家焉用此哉聊为令嗣学古之助云尔

何处浮图葬衲师斯文犹得覩残碑想当放手书丹日正似从容笔谏时

君家书法已三传琬琰文章到处镌闻说贤郎当跨竈银钩爱学柳诚悬

永嘉林（阙）以竹四轴求题曰风晴雨嫩云

浮空颭颭飘苍雪倚石翩翩舞翠涛林下唤醒湘水梦凤凰飞下九天高

晓风浮动隔帘青旭日晴梳翡翠翎想见云中仙子降佩声杂逌散空冥

簫簫谷底記曾游風雨空山夜半秋有約佳人終不到天寒翠袖不勝愁

琅玕百尺舞雲幢風月襟懷共一窗昨夜春雷初震蛰龍孫長得玉成雙

題唐明皇按樂圖

笙笛箏琶按得齊玉人歌舞綉筵低三郎酣醉真妃笑誰信漁陽泣鼓鼙

內家教樂醉春妍夢入巴山萬里天檀板輕敲簫鼓合金盆香煖浴兒錢

沈香亭北晝冥冥一曲霓裳醉里聽樂事不知忘國恨秋風愁絕雨淋鈴

題扇面

挿天峭壁兩門開落木風高萬壑哀酒熟山家煩折柬蹇驢正待過橋來

題觀音像

吾家東近補怛山大士神通海浪間舊日同鄉今作客焚香日日對慈顏

題便面小景

一天如水水如天萬壑春含綠樹烟橋上抱琴人欲過山窗且復罷青編

題竹

山中留得歲寒枝冰雪棱棱不受欺莫道此君無變化春雷喚起箨龍兒

題五花馬圖

五花驄馬錦雲堆蹄高識駿材倦眼奚官休睡去天閑好與共歸來

淮南羣牧慣攻駒八尺真龍萬足余聖代郊丘崇報享只須寶絡駕金車

跋麗水俞元吉所藏高彥敬臨米元章越山圖

按松江夏氏圖繪寶監云米元章山水本出重源而天真發露後二百餘年高公彥敬實得其筆意所臨越山圖凜乎逼真松雪趙氏與高公同官於朝親書論定後有作者無敢異議俞君元吉家於括倉正古勾踐封域浮雲白日展圖玩諷殆如見諸君子於千岩萬壑間也原吉來

淮海出以相示书二小诗以归之

南宫跨鹤九天遥云暗房山怅莫招赖有吴兴书跋在画图珍重似琼瑶

溯江东渡指西陵万叠天开紫翠屏掉得扁舟归旧隐夜凉光动少微星

题扇面

断坡高树昼陰陰行转清溪路更深可是草堂人不见西风萧飒鹤孤吟

题红梅

罗浮仙骨换丹砂百摺飞裙染翠霞酒晕未消寒起早夜来赐宴玉皇家

题墨梅

先春远寄墨淋漓折得寒香第一枝梦遶西湖山月暗漆纱窗外影参差

题墨菊

客路游尘怕上衣纷纷黄白眼都迷归来篱落黄昏後月露秋香暗遶蹊

题瓶梅

百花头上占春开谁向山中折得来碧水铜瓶甘作伴夜深飞梦过瑶台

题梅竹

断崖人立锦皴粼翠袖娉婷不惹尘独有玉姬来索笑岁寒霜雪许为邻

题梅

玉皇宫阙拥羣姬缟素飘飘杂佩垂侍辇恩深频早起不禁霜雪立多时

题画

楼台金碧五云边秋水光涵一镜天山郭蹇驴人去远夕阳应棹渡头船

题梅

秋魁不得占春魁
惭负孤根雪里开
问汝不堪调鼎鼐
岁寒只许赋归来

题吴道延西征卷

万里烟沙惨淡中
西风遥跨锦花骢
囊中自有如椽笔
归上将军第一功

重重土屋翠云腰
羌妇秋衣制黑貂
煤火烧红羊（阙）

题吴道征望云图

关西遥望海东山
心与浮云共往还
白髮慈亲千里远
彩衣愿得奉慈颜

题孤雁衔芦

塞北传书到日边
真州将信到幽燕
我家求得平安报
怪汝衔芦万里天

纪梦

十二月初八日夜梦亡友刘养浩谓之曰久不见足下今安在耶朝廷命府州县学举明经之士为学官足下不得辞矣初不意其已死也养浩以手握拳若欲见捶者且曰经学吾久已荒芜岂宜堪此荐书汝欲害我耶既觉为之惘然作二绝以识云

帛璧求贤涧壑空
萧萧猿鹤恨西风
多君诵得春秋学
生死论交一梦中

老来应不耐尊拳
夜壑悠悠不记年
人事只今如梦寐
忆君空有泪如泉

题春江游玩图

江上舟行不问潮
千金换酒特相邀
莺花正及青春乐
隔岸何人唱大招

桃花渡口水如天
沧海蓬莱问列仙
老我长淮归未得
春风矫首白云边

题春江送别图

江水西流日夜声
櫂郎挝鼓唤登程
滕王阁上神仙客
一曲空歌待月明

满眼青山紫翠重
天风缥缈送孤篷
凭君一吸西江水
洗涤平生锦绣胸

渡头人唱竹枝歌
千里江山奈远何
春水光寒沙渚濶
忘机却爱白鸥多

风流马上为谁来一叶风帆早欲开好向紫金山下过五云深处是三台

题赵仲穆马上挟弹图

王孙骑马过林西何事金莺不住啼高嶂重重云不暗春风吹送一丸泥

题山水图

山树重重散晓岚披图彷彿记江南画船撑近檐前过公子风流酒欲酣

题沈在新便面

红叶飘萧涧壑重遥青矗矗倚浮空山川自古夸形胜不是吴中是越中

青山白云图

忆向山中看白云画图披拂思氤氲仙家远在空中青外一榻何时许见分

题扇面

白云深处树重重碧水光涵一镜空世外红尘飞不到只消挥扇听松风

遥山只在半空中沧海蓬莱有路通双树西风秋洒洒仙游一曲寄丝桐

题便面

淮南催我去朝天矫首蓬莱近日边山树重重秋已近晚凉石上听疎蝉

题五马图

五匹西来汗血驹风沙千里快驰驱青春幸预瑶池驾不数人间八骏图

题山水图

君家高住碧云层木杪啼猿唤得麈作客淮南浑欲去画图遥指是庐陵

金碧楼台晚照红仙人环佩玉玲珑淮南催我朝天去试问前山过几重

题睢履道红碧桃花赠李经历

天台仙子佩珊珊浅碧深红对面看石洞无踪春梦远东风晓起不胜寒

天涯一片武陵霞满眼春光处处花莫道繁华浑似梦周南正好咏宜家

题枯木鸛鵒图

锦绣山林怅寂寥西风落木晚萧萧幽禽却解知人意学得鸾笙叶凤韶

题周千户所藏盛子昭雪中读书图

银界参差百万重春虫乱扑夜窗风谁知千古经纶意只在青青汗简中

隔屋谁歌玉树花飘飘鸾鹤海天涯书中自许论今古金帐何消说党家

袁门深闭路崎嶇焦寝清酣怪铁衾谁似先生冰壑底一编独对圣贤心

题菊花图

御袍黄间状元红翦刻原归造化工陶令归来秋正好可能无酒醉西风

随班曾赋御前题携得秋香满袖归自媿恩光无补报西风篱落思依依

真向以考满朝京与诸搢绅赋菊绽西风絕句以进今二年矣

题广信府李经历仲谋所藏画

海棠画眉

瑶池信杳思氤氲聒聒春声怪汝频问道海棠初睡起风流谁是画眉人

梅花寒雀

谁传春信到人间涧谷神仙玉雪颜冻雀预知生处乐枝栖不似纒千山

抱琴图

紫霞洞客已仙游故国湖山草树秋鸾鹤九霄音信杳欲将哀怨寄清流

折梅图

冰雪天高独鹤飞山中处士薜萝衣岁寒清节凭谁共折得梅花及早归
把菊图

解印归来事已非秋深霜菊锦成围秫田两顷都为酒林下何须候白衣
爱莲图

炎天水面独摇风谁识先生梗槩同不是棹歌明月夜袜罗清浅湿香红
题周自诚所藏兰图

湘水苍茫九畹深美人不见思沈吟幽香暗逐春风过雅操谁弹石上琴
题鱼篮观音图

篮里鱼肥锦吐腮沙头不许价高擡世间谁识端严相瓔络何消露出来
本来只是宰官身肉眼何由认得真俗习可能安淡素随缘去作卖鱼人
题网鱼图

夜来山雨水增波岩壑遥闻欸乃歌笑指两船撑欲近问渠何处得鱼多
题芥坡图

雨歇山青云出溪芥苗初长净无泥夜来插得新篱障不梦羝羊踏破畦
题山水图

扁舟忆昔过嘉禾傍海青山拥髻螺流水画桥深屋底不知谁赋考盘阿
题扇面

烟雨初晴翠树浓梵王楼阁晓重重客行素饱经纶术任汝斋堂饭後钟
题钱同知所藏张天师画

老干连蜷似蛰龙夜来风雨欲腾空玉堂学士今何在谁赋当年十八公

元冯海粟学士着十八公赋极精博

山水图

沧海蓬莱手可招雪深环佩响琼瑶山翁倚杖溪头立野水春来急似潮

竹图二轴

彭城一派

老可簔簞谷里游大苏清梦遶黄楼传神今有真仙笔分得彭城一半秋

横牕

重重晴影覆窗纱彷彿潇湘水上家帝子不来秋已暮飘摇鸣佩渺天涯

贻李经历诞弥之庆

仙真授得金桥籙家庆荣夸绿树枝汤饼尽多珠履客诞弥重见续周诗

奉呈同知钱相公

散花仙侶下瑶天华烛光开锦绣筵闻说公家生贵女月弥要覓洗儿钱

试郡西江化日春笑看满岁即为真奎文早晚来天上五品官阶雨露新

题山水图

白云飞过万山重沧海蓬莱有路通秋水如天天似水轻舟撑入翠林中

题张天师画

飞流千尺泻银河松屋深深碧涧阿雨霁长桥泥尚滑携琴归去意如何

题方壶山水图

花草重重涧壑春卜居祇欲谢嚣尘道逢谷口耕云客莫是当年郑子真

题方壶枯木图

石林苍竹蔼云烟古木萧萧雨露边莫道散材无用处藤萝何事苦相纏

十二月初四日夜三更梦睡觉蛀齿脱落口占一絶今年五十七岁数其齿蛀时则二十有八年矣

当年两齿蛀成空嗜啮翻嫌饌席丰谈笑尚怜唇舌在可应开口不关风

读东方翔传

幸应待诏上金门宠赐煌煌奉至尊谐谑随时成讽谏不知曲学有公孙

射覆悬知与易通可应神妙在蓍筒天家亦有防闲术不认龙蛇认守宫

窈数分明是寄生狎畔空复口相争奇言怪语何须数千户犹能诧俗盲

主家谁敢侍私娱董偃区区一贱夫有罪已闻三可斩霸陵会葬复何如

不儒不老杂逢迎殿上时时被宠荣可是茂陵新好尚燕齐怪诞尽公卿

玉山李道会颜则求着福庆观记以黄谷二十六咏见示用韵以寄

万山深处锦云堆版筑新成玉帝台绛阙诸真同宴喜霓旌双引凤车来

山势飞来似玉龙瞳矐海日上孤峯不须万丈云梯接阊阖天门近九重

路转溪湾山更幽也知天意協人谋仙家賸有沧洲趣画壁须烦顾虎头

世界流年一掷梭月凉踏踏听空歌濠梁往日曾相见认得篮仙唤采和

玄谷长城别有基要知清静妙无为玉房坐守金丹熟记取人间子午时

宝篆丝丝一炷烟早朝曾近御牀前凭君试问黄庭诀愿得长生不记年

夜凉风月爱双清岩谷虚传玉佩声上帝尊居深虎豹青云高拥九重城

洒洒香花供石泉青藜炊出杖头烟上坛传令雷司听星落银河劒倚天

春雨林深笋蕨肥多情把笔咏芳菲生来要使三尸伏老去休论万事非

坐阅文成却老方石牀陰覆紫云凉仙山甲子须臾事不管人间白昼长
插汉松杉观鹤巢琳宫行转碧山坳寄言万里蓬莱客关钥双开不用敲
丹雘煌煌殿阁开画栏高倚碧崔嵬瑶池阿母蟠桃会青鸟衔书海上来
江国归来雪满簑玉虹桥下水生波空阶夜半天如洗听唱阳春第一歌
彪列星光盼斗南正须问道结云庵烧符叱咤风霆合百尺蜿蜒奋碧潭
六合为家乐宴宁山中猿鹤也忘情双成吹彻参差玉沧海东头看月生
面面晴峦锦绣重太虚元气浥空蒙高旂下来神鷄吉锡福从教海宇同
阵阵寒香挂殿秋散花天女玉搔头月中欲乞嫦娥药笑倚西风百尺楼
雪水新烹陆羽茶还看太岁长黄芽扶疎两翼能飞去西海同乘贯月槎
甲煎香残玉宇开步虚词罢舞三台山空水静秋如海报道缙仙跨鹤来
交梨火枣大还丹白日飞昇也不难紫府真君同接引罡风浩炁莫愁寒
隔断青峦一片云仙■〈金 敖〉法鼓半空闻有时酿得松花酒瓮里浓香幸见分
清水生肥荐玉池独将玄液饮玻璃云炉兰麝香飘转坐对风帘窣地垂
烟霞锁却洞门深点过丹砂便是金解榻倘蒙青眼顾枕中鸿宝定传心
物外逍遥静处看扶摇谁似大鹏抃同盟幸有双鸥鹭相与忘机耐岁寒
凌空直上翠微颠巾舄飘飘谢俗缘想见灵台光一点皎如明镜在中天
玄门阐教付机缘况有诗如孟浩然矫首佳期如不到只崇香火祝尧年
题碧桃花画
春风满院碧桃开不见瑶池阿母来一曲吹残双凤管共谁歌笑倚楼台
题松柏图

山中长笑锦红开风雪宁甘万壑衰老我勿堪为柱石般师斤斧不须来
题钓鱼图

钓丝袅袅趁鱼腥坐向沧江白石层一点客星天外远毋烦使者问严陵
题老柏图

风霜摧折凤凰枝岩壑犹存铁石姿老朽何堪为世用丹心只许老天知
题方壶青山白石图

方壶跨鹤上青天供奉先生亦已仙想像风流何处覓云山云水故依然
皋比坐拥画堂春日日青山看白云海岳天高归未得鹓鸪声断思缤纷
上清何伯度为儿子画林塘读书处

林塘浮动水云虚芸草春香满架书愿汝休为原伯鲁只将力学大先庐
题马太守文壁画

蹇驴同过碧云重不是关中是洛中杖履如逢岩穴士好令咫尺上虚空
忆曾跨蹇渡临濠万木云山舞翠涛千古庄周劳梦寐画图时复倚秋高
题傅济民画

千岩万壑翠重重海岛蓬莱有路通古树林深人不见烟波曳网载孤篷
题方壶溪山胜处

万叠溪山万丈溪两舟相逐过林西幽栖不作金銮梦莫遣哀猿夜半啼
题方壶溪山秋兴

文笔峰头晚翠浓风流墨客笑临邛林泉拌得千锺醉挥写平生锦绣胸
题沈先生林塘读书图

古来经训拟菑畲谁似昌黎训阿符笑我林塘风月夜西窗梦里听咿唔

题方壶闲云潭影

点点遥山落影边水光云影两悠然俗尘不到林深处一片灵台万古天

老柏图

山中冰雪惯曾经百岁长存铁石心江海萧萧风雨夜倚窗只听老龙吟

兰

湘山湘水思冥冥欲访三闾问独醒岩谷春芳风日透翩翩杂佩散余馨

题祝洞天云山图

客邸遥闻祝洞天蓬莱岛上友羣仙试求鸾鹤飞昇处云在青山月满川

题枯木图

千章乔木挺苍苍都入天家作栋梁惟有老身无用处岁寒岩壑饱冰霜

用韵王理问琵琶亭夜宿

水流呜咽夜传更梦里如闻弦上声却笑当年白司马青衫泪湿也多情

用前人韵过鄱阳

入云渺渺碧山重流水茫茫万折东白月倒悬星斗湿此身如在广寒中

用前人韵道出鄱阳感兴

蛟门岛外近仙家夜月林深唤煮茶千里宦游江海濶晚香频忆满篱花

荃阳外史集卷九十

卷九十一

●钦定四库全书

荥阳外史集卷九十一

（明）郑真 撰

○七言律诗

用韵答史（阙）先生

丞相精忠贯白虹曾（阙）经日上层空百年独着山河誓三（阙）承社稷功龙凤宸章华
阁表貂蝉画像彩帷中余芳（阙）制作翩翩锦绣工

太白楼高隔（阙）虹楼前流水带长空枕牀不作繁华梦翰墨原归点染功（阙）光寒明
镜里江山春暖画图中悬知囊笠骑牛处（阙）意悠悠合化工

用韵答彦彬

烽火春城正荷戈（阙）清隐奈君何山深兴逐云霞远天涧恩承雨露多尚使斯民跻泰域
未应吾道变颓波百年且向东风里酹酒当筵舞太阿

东风日日候鸣珂为问山中近若何坐对一庭桑梓合笑看三径菊松多前林日暖莺迁木隔
岸云深豕涉波尚想华堂春昼永管弦杂遝间阳阿

用韵与袁希曾

先正诸孙兴未涯东风曾记理征槎关河车骑三千里京阙笙歌百万家红日当天头上近黄
埃满路望中賒十年归住沧江水犹忆金门拥翠华

元宵江上观灯

牙樯锦缆簇华灯上下乾坤破杳冥飞影倒穿千尺水流光远散一天星警传炮石边军肃曲
奏笙歌海若听相国有恩民共乐好将盛事写丹青

岁暮写怀二首

书牀斜傍竹溪虚千古风流梦寐俱汉祖每资萧相国齐人多赖管夷吾林丛月落狐狸啸水国天寒雁鹜呼岁暮故人寥落甚抱琴只欲赋归欤

故国山河战伐雄新亭风景寂寥中菁茅寧复供周祀兰蕙谁能继楚风瀛海边防寒络马辕
门警肃夜橐弓人间总是经纶手彝鼎重刊社稷功

用韵复阎至明

风外游丝着面轻困人天气半陰晴董生早受春秋学许劭新推月旦评闾阖日高天宇濶蓬
莱山近水云明看花看柳青春好莫负东君万古情

和王子璋见贻

玉烛光浮海宇春夹城花柳喜为隣长风早报林莺信旭日寒迷苑骑尘圣主新耕农务急燧
人钻火爨庖新书生不愿繁华乐有待天恩及万民

海上人家叹屢屨海边山壑遍藏尸糠粃岂可供常爨飡粥胡能疗积饥鹄立形骸僵卧久龙
鍾老病却行迟九重正有苍生念清问应须待帝咨（是岁饥饿孳甚衆）

题邀月轩

嫦娥趣驾上青霄公子开轩慰寂寥露洗杯罍光濯濯风生冠佩影飘飘九河垂浪秋情密万
境无尘世虑消斗转参横人未散欲呼秦女更吹箫

题吴季璋松斋

石上高斋倚碧空虚檐面面拂空蒙龙蛟影动三更月猿鹤声传万壑风飞翠雨余浮几席轻
花春暖洒帘栊先生莫自甘岩壑廊庙终归造化功

高明楼

天光云影画图开河汉星辰接上台沧海忽惊龙变化青山常见鹤飞来秋风凉动牙籤架夜
雪声传鷄■堆自笑浮生尘满眼登高作赋媿无才

和贵司丞雨中述怀

聯璧光辉重万金功名未许谢朝簪百年正属风云会一片宁甘铁石心彩凤双飞华阁表征
鸿齐度画楼深坝簾唱和今何似请把周诗雅颂吟

东风环佩动璚琳席上欢陪玳瑁簪报国好酬千里力持家宜共百年心紫荆堂树江山远锦
棣园通濶水深白日看云余兴在客边妙写杜陵吟

送杜元昌除国子学正

丞相家传百岁余日临斋馆看云储绫花尚宝宸章赐袍褐亲看省檄除藻泮晴香琼液动杏
坛春暖锦云舒谁怜樗散空山客一卷青灯夜屋虚

送戴文祥谢官归里

草色花香忆故庐归来戎马厌驰驱久知司隸终兴汉共说夫差昔沼吴天濶三江鲸挟浪云
深双阙凤栖梧相过只欲论时事夜半前溪雪棹孤

元老新辞丞相秩强藩欲覓假王封可怜壮士心全改谁信忠臣髮上冲晋国甲兵千里马吴
人城郭五更钟纷纷世事知何似高卧长台第一峰

送胡万户

沧溟五月锦帆开海上传呼将帅来天近扶桑明白日风行偃草散荒埃金戈万竈屯飞骑铁
鎖千寻伏怪能宴犒从容军事少仙人楼阁望蓬莱

送孟宣使回京

星槎使节斗牛间蚁酒龙衣尚局颁圣主无为开泰治元臣有命复清班云霞海濶三神岛日
月天高万岁山京国归承台阁问定须送喜入龙颜

用韵答王以文见寄

廿里松声宝地凉天仙时与共彷徨秋闱凝上登科记春殿谁传入奏章太白山头开日观朝
元阁上逼奎光翩翩欲遂登临兴何日天风送佩璫

自笑吾生似服虔西窗风雪半牀氈清班未得临丹阙禁炬空怀锡绦莲兵甲年深愁老去文
章官樣许谁传相知最有王徵士胡不归来夜月船

送王子章

南风闽海早归来青眼相逢一笑开彩笔题春云满座银灯照夜月当台枢庭正用萧张杰宾
幕终归管乐才况是故园生意好桃花流水出天台

枢星光带赤城霞山月寒随碧海槎宥府早看宾入幕故乡重喜客还家晓营独跨青丝骑夜屋重吟绛烛花当世正须文与武皇都不日听宣麻

送鍾山长

皋比堂下听谈经人物风流叶地灵甬水东来银树碧菁江西望蜀山青象樽饮福秋倾醴牲俎传餐晓割腥官满三年浑欲（阙）

题咏春亭

绣柱雕阑面面空座间人似杜陵翁画图不用丹青手彩笔争夸锦绮工花柳光辉春雨後山川浩渺夕阳中元戎不负风流约樽俎还看一笑同

王子章以道院迎仙客书堂隐相儒为题以栖字金字为韵

琳宫瑶宇迓佳期弱水蓬莱路不迷宝剑光寒珠斗迳长裾影动彩云低池深碧藻春龙蛰月满苍松夜鹤栖况有笙箫谐律吕好将法酒醉玻瓈

投老星星鬓髮侵经纶事业岂无心半生独对孙康雪万里终为傅说霖碧草窗前空日暮紫薇垣底自春深夜来有客欣相问卖得文章几百金

送春

三月繁华一梦中都将世事问东风荒烟草映王刍绿落日花开谢豹红有酒乍闻瑶笋冽无钱却怪锦囊空相逢莫道青春过好把春心待化工

山农

种得山中数亩田金穰土苴待秋前雍熙正属唐尧世大有宜书太史编稚子踏车筋力倦老妻饁饷鬓云偏不知万里青天上谁奏豳风七月篇

麦秋

天濶黄云望眼遥凄凄陇亩飒风飈炎州四月皆萧爽乐岁千家未寂寥庖爨炊香烟渺渺磬牀传响雪飘飘不须为作清商调自有尧民击壤謠

迎诏

百万王师付总戎翩翩丹诏紫泥封边庭号令雷霆震寰宇恩波雨露浓日近中天翔彩凤春

深巨海奋苍龙江南宰相如周召玉带金鱼觐九重

晚眺

海国逍遥俗累抛夕阳楼上俯南郊天低平野星辰动日落深山紫翠交公子罢筵呼去骑前军列寨急征铙一声杜宇归来远明月光寒屋上茅

送岱山书院陆山长

盛时文治似唐尧庠序煌煌碧海遥藩省故人多荐列瀛洲仙子共招邀沙田如草秋无雨咸地浮花夜上潮讲道从容云榻静闲将风物寄清谣

送吴侍御福建分台

圣皇有命建分台横榻今归济世才天近九重明日月地连十道震风雷边疆警急金戈动江海催程锦缆开社稷功勳终有待南州正喜使旌来

永嘉孔正夫生时父母年五十及登第则九十余矣正夫养志不仕明年父母皆死追念不忘为作此诗

朱颜白髮壽期颐喜看贤郎射策归天上恩除承紫诏堂前欢笑舞斑衣椿萱惨惨星霜变蓼蓼哀哀涕泗挥幸际圣朝新孝理徵书行复下丹扉

寄狄季万户

翬飞层构近中天海上将军爱静便雨歇晴江拖白练云开画幃吐青莲神龙夜吼千金劒仙蚁春浮两玉船笑我日从华阙过东风携袖只青编

送柴教谕

玲玲琚佩飒天风三载宫墙教育功馆阁名高霄汉表山川妙入画图中云生晓席芙蕖动日射春盘苜蓿空书满却看胜荐剡未应皓首叹飞蓬

咏四明山送丘太守

赤水丹山古洞天使君丰致似神仙一编曾草孙公赋百斛宁论孔宅钱夜鹤林峦啼月露春龙窟穴吐云烟凭谁净洗苍崖石写得芳名後代传

秋丁美宋尹分韵得南字

宫墙崇苑集朋簪河汉秋高曙色涵
袞座煌煌瞻粉藻班行济济服朱蓝
笙箫合乐羣鸾舞酒醴浮樽万蚁酣
已见仁侯昭格享咏歌谁得似周南

送吴都督

名勲开国挺人豪督府光华日月高
骑马嘶云严檠戟壶浆夹道迓旌旄
孔明曾布龙蛇阵吕望今传虎豹韬
南海功成归奏凯宫花灼灼映恩袍

送王运同

万里东流鲸海波朝家盐赋有常科
草窝气湿苍烟暗花■〈酉兼〉光寒
白雪多已见神功回造化还闻寛政
蔼声歌煌煌使阆看归骑缥缈天风
响佩珂

绛节辉光海上遥使君政化速风飈
烟低野爨民居复星列牢盆国赋饶
彩笔凝香晨署檄画旗分影晚联镳
明时有待调羹用勲业终看上九霄

赠张德中

翠幕莲花昼日妍星郎风致似蓬仙
衣冠也拜新朝赐翰墨犹存奕世传
海味供懽珍列鼎商声入律锦成编
云霄有路丹梯接行看清光近御前

祷雨

碧山深处祷灵渊漠漠精诚上格天
不问人间呼蜥蜴却看云表起蜿蜒
沙田万亩禾成困井汲千家竈有烟
海角未能忘德泽周诗还许咏丰年

题思孝庵

天外寒峰紫翠重亭亭华表拂空蒙
衣冠蒙漠神游远俎豆缤纷孝享通
宰木含情凄夜雨蓼莪有泪洒秋风
百年遗德辉泉壤行看鸾章宠赠丰

送张宗道

劒佩飘然江海东世家犹得仰遗风
浮生浩渺形骸外往事繁华梦寐中
栗里久闻陶靖节草堂还忆杜陵翁
物情滚滚如流水今古谁论出处同

貽史文可

文采翩翩锦绣胸百年遗事笑谈中
王侯欲纪旗常烈嗣续多传谱牒功
碧沚烟波空夜月沧

洲花鸟自春风诔绶尚玉琼瑶轴却爱词臣制作工

宋故资政殿大学士史公居沧洲十余年尝以书劝其兄忠献王去相位不听食祠禄以卒理宗赐諡忠宣中书舍人吴泳行词有曰在熙宁则不党於熙宁如安国之於安石在元佑则不趋於元佑如大临之於大防当时士大夫公论见於代言者如此则公之平生出处大节从可知矣予生也晚窃好论着前朝典故及乡里人物且於两制之学尤致志焉文可为忠宣正传邂逅荒斋语忠宣遗事亹亹不倦信所谓克世其家者因作诗以识良遇且以志文献之足徵云

赠陈子云

德星高照海天涯来问东州第一家金鼎灵丹初结汞锦林仙杏正开花神农本草分诸品轩帝遗书积满车想见神功应有报辉辉词藻散春霞

白石樵隐

岩壑重重蔼翠萝山人独赋考盘阿斧柯生计宁为拙轩冕浮荣未足多夜月每从樽榼醉春风时听屣屐歌奕棋仙子欢相遇回首尘寰奈我何

罗信言十二月廿三立春後一日进见奉天殿下得除备用库大使有诗寄其家用韵

六琯灰飞万象春故人百拜觐枫宸瑶阶日近恩光接黼座云开喜色新绮采朝衫分笏笏花官诰出丝纶书生正在艰难际莫道茅斋尚隐沦

送连执中

手捧黄封觐玉墀从容海上舞朝衣棠陰幕府欣相慰榕树家山候早归宴笋香分椰酒熟庖烹新擘蛎房肥高堂太母登眉壽孝养晨昏肯暂违

送孟先生子重回台州

皋比久矣罢横经山泽萧条赋独醒未许冯唐头已白却怜阮籍眼频青江关月落悲鸿鴈水国风高堕鹄鵠咫尺天台归路近纷纷黄菊满篱扃

题汤宣使诗卷内有贡院谒赵六先生之作

宾兴诏下五云浮济济衣冠拜冕旒多士正须夸俊造诸公当复羨材猷山风萧飒槐忙日江雨缤纷棘沍秋却笑老生空忝窃两年魁选说明州

送萱上人

飘然湖海一枝藤妙悟如来最上乘萱草堂前称母寿莲花台下续禅灯云深狮象来相迓山近猕猴唤得麈笑我计偕京阙远上方擬叩白云层

赋野航

湖天重屋小於舟日日忘机对白鸥万顷烟波随浩荡百年身世等虚浮画屏影拂红云曙宝监光涵白月秋想见黄冠遗迹在十洲三岛最风流

七月望日黄仲瑱先生计偕録跋语且以近体诗见示因用韵别作一诗以谢

𠵽𠵽书声度碧疏秋风座席草堂居事关名教非无补乐在吾心只自如投老肯为三语掾迂时宁草万言书却怜故里遄归日风水松江食有鱼

潇洒溪居映绦纱夜窗清影落灯花醉听南海秋风鹤梦逐东园夜雨鼃蜜碗凝香凉食蔗水盘剖玉渴思瓜年来定有天恩召讲罢红帷坐赐茶

计偕京阙倦攀跻敢意先生赐品题苏子文名烦永叔董生才行待昌黎百年泰运开天地万丈星光耿壁奎衣鉢有传终为我东城风雨许扶藜

附録黄先生诗

盍簪长恨昔年疏白首过从叹谪居已喜潮人师赵德未须狗监荐相如向来涂抹真成梦老去穷愁好着书郑老襟期更萧散可能添我共观鱼雨涧奔泉决岸沙沈沈破屋听檐花尘编满室空生蠹湿竈无烟只吠鼃三径已荒陶令菊一廛聊种邵平瓜莫云回首西城近何日敲门共试茶

寄方参政文敏

相国东南第一家牀头遗笏积成车翠茵醉卧庄台草锦幃行看董苑花月落西城人倚劒云深东海客浮槎谪居肯作寻常态乐事浮生未有涯

世外繁华蝶梦寒客乡消息问平安龙文倘忆前朝赐鸟篆犹传旧日刊桑落酒成分宝瓮桂花香动驻金鞍贤郎有意承堂构写得新诗纸上看

客边写怀二首

天风杂遯响琳球千里长淮赋远游自愧科名登上国多怜归梦遶瀛洲城笳声撼芸窗暮隣

火光寒草舍秋樗散襟期天所放荒台遗迹认庄周

教官新授得临淮养拙悬知计已谐险历冈峦随地势光看星斗近天街门前上客簪裾集馆下诸生砚席排深愧不才无补报西风矫首一长怀

答颖上训导朱明仲先生

某客居临淮博询先达将图为受教之地兹者先生不以贱子愚鄙特惠诗笺褒拂过情足见古君子之厚矣谨用次韵以答先施异日胥陪必曰见所见而去也

萧然风月紫云旁万选曾夸翰墨场鹿洞师资金就冶考亭先集锦成章衣冠在昔承荣耀人物於今赖激扬淮水相望天咫尺老生愿得近辉光

人间甲子已成编风雨淮山旧谪仙见说大贤传四世从知在野尚多贤谢安自有登山屐季子宁须负郭田莫待老来长作客故乡只在海云边

送胡伯霖归山居

乃翁作教喜多才千里相看一笑开椿树当厅华彩袖菊花照席壽琼盃荒烟故垒庄周墓流水孤村惠子台想见传经深有意春风三月许重来

天台胡先生惟中兴教五河其子名景傅字伯霖远来省覲慈孝之情喜见颜面未几告归过临淮访予旅次论及春秋学深相契合因作诗以赠且期後会云

九月二十七日早祀山川坛风云雷雨师坛随班行礼因过水濂洞而回

衣冠济济肃周旋坛壝天开祀报虔想见神明来惚恍从知肸鬯格幽玄樽罍波湛香浮盎几俎星陈胙割羶忝後陪班同福佑乘风归覓洞中仙

答颖上朱训导明仲先生

考亭风月仰英贤阙里松楸百载传赠典每承丝诰下遗容时向画图看烟深土锉朝炊熟雪拥茅斋夜榻悬相望天涯同是客欲将往事话寒毡

芹沼波深采碧馨横经席上照人清愿同後学瞻仪范敢望先茔托姓名冰雪寒侵衣絮薄星蟾影共烛花明客边谩说还家乐何日参陪杖履行

题严太守云闲卷

浮云空幻锦芙蓉千里宁留去住踪山壑凝秋迷使骑石台拂晓起神龙敢云海内恩波浹时许人间步武重闾阖春开天咫尺闲心安得久从容

忆家中写怀

野色苍茫日欲晡海天东望正愁予谩传杜老怜宗武敢效韩公训亚符门掩秋风荒径菊池深春水近阶芜江南正擬归来早醉倒东风碧酒壶

送蔡复原之京

曾从枢府事先朝淮上移家岁月遥编简每随同志乐弓旌今受大夫招红门晓色开天陞金水春寒控御桥吏部奏名除目定衣冠入覲仰唐尧

送毕文明之寿州

浮空鸾鹤影飘飘肥水青春远见招賸有周诗留翰墨可无杜酒劝琼瑶董生孝行今何在霍叔流风尚未消落日苍茫赋怀古彩毫毋惜寄云轺

元宵中都太守放灯作律诗五首

云霄楼观耸神京蔼蔼笙歌出凤城谯漏声传终百刻将垣禁弛散千兵彩屏有象金城画火树开花玉缀纓甲第公卿聯戚里当筵不数五侯鯖

万境无尘月滿天缤纷物象鬪娇妍画楼映水金莲吐宝■〈土答〉擎霄火齐悬风外花骢来■〈要〉裹云端彩凤下翩跹太平盛观今重见城郭人家夜似年

北极中天正斗杓风流人物共今宵当楼绮彩丹心结隔幔琉璃翠影摇龙驾共瞻宸阙近鳌山慢忆海天遥凭谁记得云中曲来向人间叶凤韶

谯楼门外鼓频挝谁驻春风小小车暗绿笼纱腾马骑深红翦彩戏鱼虾珠玑粧巧繁奢纵脂粉团香笑语譁自媿天涯千里客海瀛何处问吾家

烛花暗结竹窗低星月光寒思欲迷深念老兄居海峽更怜舍弟客青齐云天杳杳王乔鹤草屋栖栖祖逖鸡想见孱然小儿女凄凉慈母共中闺

擬题瀛洲夜宴图

济济衣冠十八人同僚气谊霭相亲莲花漏转铜壶夕竹叶香浮宝瓮春蜡炬摇红风力浅翠帷生白月华新燕娱未许成沈醉有约明朝覲紫宸

用李廷琼寓中都口号韵三首

淮海茫茫春水波夜凉珠树月明多讲帷每讶华筵秩御道曾闻翠辇过天濶九重开玉殿星临万户带金河谪仙自是文章伯听履须应上谏坡

锦绣河山遶帝京南来为客最多情芸编慢忆三千牒桂籍空惭第一名燕寝声传城柝近魀窗凉透水云轻知君正得青春乐有约清樽对月倾

淮南草木两逢秋梦忆蓬莱海上洲云遶觚棱瞻象魏天开坛墠识郊丘儒家冠阀何由报圣代贤科幸见收千里正须归去早野田春水饭耕牛

题五河安淮驿远碧亭

淮山遥送一螺青悄悄云烟入杳冥檐外竹风醒鹤梦座中花雨挟龙腥瑶环杂遶天仙下铁笛呶鸣水若听使者船稀官事少石牀孤坐夜观星

用方同知西山幽居韵

屋下清溪屋上山碧窗深处玉人闲岩花掩映春云里林树参差夕照间诗律要令如李杜画图覓得似荆关平安欲问蓬莱信夜月天空跨鹤还

地辟严陵山上山逢时应不许投闲举头红日层穹上信步青云咫尺间果熟山猿来裊裊花开啼鸟听关关仙家近傍溪清浅频许长生链大还

春山晓思图

沧海蓬莱万里遥画栏人立翠迢峩帘拢影落蛟门岛枕席声喧蟹浦潮花吐千岩攒绮彩鸟鸣双树合韶韶仙家指点空青外酒熟须烦折简招

贻祥符古芳禅师系饶州三洪子孙

梵王楼阁五云重缥缈溪山锦绣中自信庄严非实相谁知妙有即真空莲灯深映禅龕月花雨纷飞讲席风笑我忝为方外客世家应解说三洪

瑞州萧彦良久客宁夏既归省母则其妻已死遂携子以行其妻弟喻孟良求诗以赠

边庭西望李王朝万里晴沙雪未消晓镜孤鸾心悄悄春晖寸草梦迢迢穹庐饭早烧黄鼠古漠衣寒制黑貂应有外家怜宅相离情远逐暮云飘

偕方同知游二郎庙

碧山深处葛琳宫牲俎春秋祀报同鸟雀林深云淦淦龙蛇壁暗雾蒙蒙香飘合殿精灵聚风语中帷肸蚺通见说邦侯催入覲周诗福禄侈歌工

游南岩诗（并序）

洪武乙丑三月初四日上饶文学掾会稽徐仲告教导广信欧阳君謩二先生招予过岩遂与周先生宗文出南门渡浮桥蛇行十五里山径曲折岩崖峭绝诸峯罗列状如覆盂一洞深豁可容千人仰而盼之其势若压唐僧大义建寺已数百年洊经兵难而殿宇旧制尚存岂神明护持力耶宋元丰至景德咸淳及元大德至治间诸公若辛稼轩朱考亭韩无咎暨四明乡先达宦游者赵子深英叟汪（阙）楼（阙）程先生敬叔多刻名石上寤怀先哲有往者莫作之叹县学生徐升应保置酒沾醉而归时日影欲夕禽声争唤穷幽揽胜殆不知登顿之劳也赋律诗三首示斯文同志用以寓留连光景之意登高能赋之士其亦有所感发哉是行也小儿复昇与诸生暨执事者凡三十余人辞疾不屑者训导贵溪傅先生原纲永丰周先生子明游先生用文云

深树冥冥不见天山中我欲谢尘缘逢僧为问三生石对客先尝一滴泉茶竈烧烟冲鹤梦松溪洗鉢觉龙眠磨崖试读题名记先哲风流几百年

七级峯高怅莫登老来只为力难胜溪深鹳鹤飞来近木杪猿猱唤得麝疏凿神功开历劫流传佛说妙三乘近来学得长生诀欲采松花和蜜蒸

树影重重日渐西春风送我上丹梯水深农务催黄犊径曲人声杂画眉面壁孤僧心似铁传觞衆客醉如泥簪裾多幸斯文共石上须将姓字题

和陈推府公长民出郊四首

（阙）

附錄陈推府出郊律诗

雨歇山晴莺乱飞水清沙暖日晖晖竹篱缘路酒帘出野树涨陰梅子肥千里乡心随梦远一春乐事与人违年华过眼慙无补零落青衫尚未归

题文江卷

松窗高倚碧崔嵬滚滚长江天际来春雨半空龙变幻暮云千里鹤飞回神仙入海鸾车驻慈母升堂燕席开宪府从容归未得緑陰清昼赋南陔

西江遥望白云层万里光辉近玉绳地脉聚灵多俊杰天潢演派见孙曾悬崖鸟道秋风杖隔岸渔家夜雨灯山水娱情吾欲去老来双鬓雪鬢髻

松竹庭阶舞袖齐锦萱开傍绣帘低鸾刀缕切鱼成脍翠釜珍烹鹿进麇使节增华催入幕天恩有待赐封泥江花江水春风衷落日遥闻唱大堤

寄弋阳杜知县孔传

名家奕世一经传嗣续今逢百里贤梦草石牀过夜半种花山县及春妍耕桑满野躬亲劝图籍充庭手自编笑我异乡同作客一樽试与话朝天

贻弋阳主簿林敬伯

学省中都接帝庭襟期多幸共谈经可应絶笔伤麟获自许闻韶叶凤鸣绮席笑倾春酒碧云牀忆对夜灯青老来撰述成何用耒德堂深问勒铭

弋阳主簿林敬伯出示会试録而吾临淮学生桂满预焉谗知已登高甲授官随朝喜而成咏

耿耿奎星粲晓光科名淮海破天荒芸编鼓勇三余学棘院雄夸百战场内仗唤朝听舜乐纶音报可拜尧章少年早际文明运好把丹心答圣皇

折桂还夸姓桂人天风听履上星辰凤鸾飞翥金门晓鹄鹭聯翩玉殿春制草封緘颁巨轴宫花拂席耀重茵老来笑忝师传旧客底多烦送喜频

闻方同知入朝还府

玉佩玲玲上玉除天颜咫尺听都俞鹄班同致尧年祝鸾阁亲登禹贡书上冢还家分折俎建牙开府候遄车别时许得新冠带应费囊中月俸余

玉笋班齐肃静鞭笙箫杂遯听钧天云低雉扇开三殿日射龙帷壽万年蜀绮翦花分彩胜闽柑釘果赐琼筵多才竟上椒盘颂匹马归来话日边

玉山柳都勒巡检闻有相知之契作律诗以寄

忆昔同听吏部铨客乡想像夜灯前河汾谩说文中子京洛还夸贾少年云透溪窗青简帙月高岩砦宝刀悬盛时材武需经济来认秋风博士氈

题槐庭

白日高堂正綠陰座中宾客尽华簪
门阑预擬公侯讖嗣续宁忘举子心
碧落晴看双凤下清
风晚听一蝉吟南来千里难为客
胜赏何由杖履临

题梅隐卷

山南山北种梅花何似西湖处士家
铁石誓同坚节操轩车宁复慕荣华
瑶琴曲奏宫商叶画
角声传梦寐賒独鹤归来天万里
笑看疎影上窗纱

荅阳外史集卷九十一

卷九十二

●钦定四库全书

荥阳外史集卷九十二

（明）郑真 撰

○七言律诗

赵通判煮雪窝诗

一铛松火焰初红座席春回造化功每笑词臣慙党尉多烦谏省寄卢仝银葩散彩虫声扑玉液生香蚓窍通身世不随流俗化飘飘清思渺空蒙

用方参政文敏述怀韵五首

涂山禹会帝城深翠辇曾纡御步临玉帛流风传往昔衣冠盛治覩于今直言每羨刘蕡策遣兴多慙杜甫吟矫首城南天尺五大明当宁廓羣陰

云气蓬莱咫尺间太平盛观喜开颜象犀南贡踰银海骐驎西来度玉关多士曾承前席问将军正奏凯歌还才华独美瀛洲客不数淮南大小山

黄道天开曙色浮瀛仙催覩紫云楼未容四皓归深隐宁许三闾赋远游河汉星辰瞻北极风沙海岛望东州传家自有康成学睿览终当彻帝旒

禁城秋水映芙蓉甲第煌煌绮绣重麟趾已闻歌圣化虎头还见儼侯封周南太史怜司马洛下耆英忆邵雍尚有前朝勲伐在云霄不日庆从龙

淮南草木正高秋千里长怀宋玉愁濠水桥梁通广运滁阳关险接清流芸编辟蠹香犹润瑶轴生辉墨尚浮莫道遗珠沧海濶老成仍许占鳌头

再用韵五首

山河萧飒正秋深想像谁将粉墨临形胜万年夸自古风流三杰数斯今甘泉欲奏扬雄赋梁甫新成葛亮吟客底不禁形影只翦灯愁坐月庭陰

雅志由来丘壑间逢人谈笑强形颜江山路远愁千里河汉云深怅九关汉署冯唐宁老去羌

村杜甫定生还故园消息西风暮望断瀛洲海上山

落日沧茫海气浮多情只欲赋登楼陶潜久有归田兴吴札宁忘上国游玉室金堂夸福地丹山赤水记明州同乡漫忆同年友冠佩锵锵侍主旒

晴山空翠削芙蓉迢迢长淮百万重周礼职方烦载牒汉家汤沐趣行封文明广被闻弦诵礼化旁流咏穆雍亦有沧江千里客夜看剑气拂苍龙

编年二百鲁春秋舒卷宁忘楚客愁圣意可能参笔削师承聊复记源流草窗短褐风声透土屋孤灯雨气浮富贵自行天所付珥簪敢望立螭头

用韵夏原威述怀七言六首

雉堞煌煌壮国都移家住近月明湖秋风篱落花长好夜雪庭阶草不枯烟远山庖供晚爨云春野碓急秋租浮生已付形骸外何羡商岩隐者徒

山气窈窕旦夕佳万年形胜览河淮云开画幃尊罍列日近晴窗砚席排吴郡张翰频发兴荆州王粲独伤怀太平久已边声息笑指台疆近泰阶

霜寒碧落晓鸿鸣久客何堪梦底听淮海雪晴拖练白荆山云暖送螺青长卿多病愁仍在阮籍穷途醉不醒何似隐君松竹里焚香阅世了残经

滚滚浮尘上客衣登临只欲赋将归黄钟大吕遗音邈白雪阳春和者稀山木寒声风满壑渚苹晚色水浮矶采芝应念青云客谈舌纷纭总见几

制草须曾儗玉堂乐歌亦复用霓裳马良谩说眉纯白韩子多怜鬓已苍霄汉沾濡欣雨露关河涉历怕风霜相逢青眼谁知已欲吐平生锦绣肠

山川远作子长游风雨难忘宋玉愁旧日封疆夸半楚盛时礼乐覩姬周晓庖每笑尘生甑夜榻空怜月满瓯沧海东头波浪濶依依清梦绕瀛洲

送洪毅夫

佩服翩翩映紫霞东风千里望还家灵丹夜长黄金汞仙杏春开锦绣葩天阙政须依日月云程从此隔尘沙袖中况有青囊秘莫道流年两鬓华

和刘太守纪怀

龙杓光照上元初燕处从容视篆余五马春风晴簇仗九重晓色瑞充闾藜灯高照青云步鸿

宝犹传素篋书自笑孟尝门下客弹歌宁叹食无鱼

送应德中上任

家住天台第几峯年来为（阙）容郭熙每说丹青手李白仍夸锦绣胸晓榻尘编挥玉麈夜
牀宝剑拂苍龙幕官掌故非轻授定有声名动九重

送朱元助上任高唐典史

蓬莱东望海天隅千里淮山赋卜居夜月蚁香芸屋静春风蝶梦竹园虚公车宠赴京都召宾
幕恩承省部除形胜中原夸自古浮云苍野览青徐

学中诸公饮酒分韵得晴字

藻颿波光漾午晴煌煌庠序蔼簪缨樽前未觉刘伶醉席上还推许劭评翠釜传庖夸禁脔银
刀斫鱠胜侯鯖斯文共际千年运凝咏菁莪乐太平

送胡彦通乃常往西京大同府

鴈门西望是云州风雪飘飘万里游蕃汉封疆空旧垒辽金冠盖总荒丘边声暮走龟兹曲日
色寒欺季子裘堂上乃翁如问讯为言衰老盼瀛洲

咏周克复先生三友轩

松竹依依政可怜玉葩况复覩清妍江湖归老成三益泉石相辉共百年黄鸟有声春冉冉翠
禽无语夜娟娟人间正熟繁华梦幽意从今莫浪传

和李推官劝农日咏花篮韵

花神送喜碧云篮华髮萧萧莫浪簪一曲山香垂舞袖双头国色驻飞骖珊瑚网出春波艳锦
绣囊倾午席酣过眼未须夸富贵故园有梦过江南

送陈君祥上任襄阳府照磨

每读南平旧勒碑襄城风物思依依小儿谩唱铜鞮曲贪将曾夸玉带围（吕文德事）水满
檀溪寒月上天低岷首翠云微幕官九载应多暇往事毋令胜赏违

送嘉祥县主簿

麟绂由来纪地灵宣尼絶笔载遗经千年已见河流碧万里遥看岱岳青鸾凤林低栖棘枳鯤
鹏海濶奋空冥春花满县归来日玉佩玲玲月下听

送庐陵郭氏怡怡堂

棠棣花开晓砌空埧簾度曲奏春风绮筵每爱樽罍共绣被多怜寢席同鸾凤聯飞云出洞鴈
鸿相近月当空德星早应贤才聚双璧终看奉帝宫

寄咸阳知县臧九畴

篝灯夜雨共论心鼓角声寒玉漏沈赵国竟全和氏璧不疑宁取舍郎金花绶赐诰龙廷近彩
笔凝香燕署深闻说孔君碑更好人来烦寄客窗陰

送卢文刚

矫首丹丘海上山布衣每欲谢朝班百篇藻翰真无敌万斛牙筹只等闲彭泽传闻陶令去羌
村报道杜陵还林泉未许终萧散有待明廷召赐环

用万玉麟先生端午韵四首先生临淮知县公父也

椿庭孝养舞斑衣玉律蕤宾正及时毛义已应称孝子惠连终不似常儿淮鱼细斫银丝脍闽
果新供锦荔枝海上仙山如可到便从王母醉瑶池

兰汤浴罢试罗衣樽俎风流记一时青眼每怜题柱客白头今见起家儿五声宛转歌桃叶双
袖娉婷舞柘枝淮海从容京阙近置身如在凤凰池

上帝恩荣擬赐衣百年永负太平时政须宝幃开云母从使新声教雪儿竹底行庖烹玉柱花
边聚佩杂琼枝翰林帖子谁供奉香染羣公洗墨池

山中结绶上王畿四十年来不遇时空使庄生迷蝶梦解令杜老忆熊儿客窗影透榴千叶仙
窟香余桂一枝泽畔独醒慙楚屈朱门何处酒成池

见山草堂

满径霜花锦绮斑开门忽复见青山宁知淮海沧茫外如在柴桑远近间白鹤孤飞云出洞苍
鸥相逐水流湾客来欲问悠然趣缥缈天风飒佩环

送何主簿权河北税毕还睢宁

故家文献春秋学盛代贤良甲乙科麟获久闻探鲁狩鹿鸣今许听周歌九重宫阙恩波近千里河淮贡赋多跨马归来公署静木犀香里候鸣珂

送分教戴汝庄奉旨还京

四明戴剡源先生以文行称着在国史其从孙汝庄好学能文为国子生奉旨分教中都徐之萧邑县大夫而下咸敬礼之踰二年天官复召还过临淮以契家之厚作诗赠之

江海名家阅阅重文章多说剡源翁云仍尚喜风流在乡社还怜契谊同讲席三年垂绦帐征途千里跨青骢天光咫尺云霄近献赋终当彻帝聪

送分教陈宗穆奉旨还京四

明奉化多旧家大族陈宗穆氏自其父祖以上女妇以节守者五人缙绅士大夫乐称道之宗穆读书能文克绍先烈由郡府选荐为国学生分教彭城沛中子弟乐从之既二年奉旨还京过濠梁以乡里之契作诗以赠云

璧水衣冠被宠荣沛中分教育羣英客橐不废三余学家阀犹存五节名汗竹光寒秋月白碧芸香暖午风清檄书催入天官选金殿当头覲圣明

用韵答樊孟学

天开泰运廓人文江海风流喜识君千里玄鸿翔碧汉三山彩凤驾红云菊松晚色吟坛共芹藻晴香讲席分百岁襟期承许与前修何必慕崔羣

金汤形胜覩中京宫阙煌煌万雉城司马自为题柱客终军本是弃繻生久闻鸡黍原同约须信盐梅可作羹矫首奕坛仙迹近月明来听步虚声

再用韵简沈文举

夜窗曾忆共论文翰苑声华独许君万里光摇瀛海月半牀气湿楚山云琼醅战蚁清盃泛玉饌行庖翠釜分桥梓一门华晚节旌招当复似陈羣

早向吴淞数俊英移家住近凤阳城蜀中自古称扬子洛下从今重贾生共说相门频吐哺终烦御手为调羹九重步武星辰近好听春风玉佩声

用向知事韵律诗二首

床头旧笏积成车阅阅前朝识故家翠墨香浓廷疏草彩毫光动诰绫花濠梁雁过风生壑归

峡猿啼月印沙将母不忘千里念周诗应擬赋皇华

松桂山中夜月凉碧天西望峡云长帝乡旅泊春秋老使幕宾陪旦夕忙苍镜启匣惊鬓白朱衣引骑迓腰黄幸逢四海文明日霄汉终看彩凤翔

借韵二首奉呈贾通判令尊翁先生

岱岳青齐碧海涯伏生故里有谁家秋风不用倾桑落晓露须烦看菊花賸有声名传历下共称词赋比长沙客乡喜遇忘年契相约云端望翠华

年逾七十鬓成霜甲子从容化日长堂上政须夸福壽人间不必论闲忙霜天稻熟鱼烹鲤雨夜橙香蠨臂黄衣彩已闻成乐养风云有路看飞翔

送洪太守上任淮安

九重诏启紫泥封太守新除马首东从使淮阳尊汲黯解令蜀郡化文翁黄陰堂覆甘棠日皂盖香飘细麦风有待政成书上考佩声催覲大明宫

送陈德俊归天台

前朝冠冕认貂蝉劲正堂深月满天共覩甘棠存旧笏从知汗竹有遗编衣冠幸际千年盛礼乐须徵百代传珍重先公曾撰述殷勤擬寄白云边

天台陈德俊氏白云半间继远父之子故宋詹事献肃公八世孙也献肃逮事孝宗以雄文直道简在帝心手诏獎谕有劲正之褒公取其二字以名所居堂嘉禾闻人阜民实为之铭元至正间真先君子求我先生尝得而读之叹其雄深雅健足以称公之德因繕録着跋语致景仰之思今已二十余年矣载在家集读之慨然际圣运肇兴以乡贡典教临淮与继远相遇问及家世知其以献肃七世孙出後王氏者也继远恍念先绪不可中絶使德俊归复陈姓是所谓知本者也继远居濠梁十年德俊以时来省遂得并交其父子德俊天姿秀整勤敏过人尝读献肃家集有上皇太子书称太尹阁下者窃疑焉真语之曰先宋故事有以皇太子尹京者所以尊国体重民事也宋史乾道七年春二月立恭王惇为皇太子夏四月诏皇太子领临安尹周益公在翰林当制入直夜半承命草诏御墨犹湿诧为荣遇献肃乾道名臣所称太尹即其证也时在座者浚仪赵先生木仲文献老成系出天族深以予言为然呜呼故家子弟有原伯鲁之诮久矣其有德俊之贤克志其家学者乎一日德俊侍继远归言别赋诗为赠并书此以致意云洪武十一年岁在戊午四月既望郑某谨识

寄万玉麟郡公

佳儿作郡树双旌上国遥传月旦评三釜琼羞成乐养九重花诰盼恩荣高风愿下陈蕃榻往

事宁夸李愬兵海寓一家文启运只将歌颂答昇平

淮南千里未还家五十相将鬓欲华夜雨清尊歌伐木春风彩笔梦生花濠梁胜观宸都壮汝水晴辉客路賒矫首天边青鸟使殷勤有待寄云霞

游碁盘石

逍遥何处覓碁仙甲子人间不计年御气夹城通汉阙河流到海亘淮天鹤巢琪树秋应到龙护珠宫夜不眠宝鼎丹砂成九转道人应许共谈玄

送杨德贞

学省煌煌映璧奎诸生冠佩雁行齐桂香秋老蟾蜍窟芸席春深燕子泥已有才名登阙下须将勲业继关西振衣南上京华路矫首青云百尺梯

次姚宗文贻沈文举

太守中都爱育才南风五马散荒埃香分鱼藻宾筵秩诗奏菁莪教席开杜子敢辞安石聘赵生端为退之来清秋有约弦歌暇杖履同登惠子台

华髮相将愧不才客衣时复浣尘埃久怜夜雨寒灯暗重喜秋风马帐开宸阙天高看独步宫庠地近候频来星期好迓缙仙驾一曲鸾笙月满台

王荆公在鄞日尝聘乡先生杜醇入学事见公文集韩文公守潮命赵德为师自是潮人笃於文行文举以今太守命教导弟子员师道之重当以古人期之

再用韵三首贻文举训导

盛世文明教俊才襟期冰雪谢氛埃半窗白月芸编启一榻松风竹洞开跋烛疑酬前席问抱琴且为广文来芹边亦有追随乐笑杀歌楼拥肉台

翩翩云锦属多才洒洒清飈洗俗埃旧典好抽金椀秘玄关政待玉匙开须知佳士经题品莫道诸生劝寿来矫首京华天咫尺梯空看上凤凰台

皋比掌教本非才苜蓿盘空几席埃帝阙仰瞻三殿出仙山遥望五云开多烦上客公车过共迓先生聘币来藻頔生香冠佩集锦篇新凝柏梁台

答黄仲贞老先生见寄

老来未肯负春心风致还如李翰林遣兴每余樽内酒卖文时得案头金杏花坛近红先透杨柳桥低绿未深有约东园须一到不烦折柬特相寻

淮天久客思漫漫风雪那禁二月寒江海愁吟怜杜老林山僵卧隐袁安故园风物烦相问上国光华许共看桃李已传春蓓蕾多情休惜蚁樽乾

送薛同知还颍川

捧檄来司锁钥重纷纷出纳敢论功倅厅久荷君恩重公帑频夸国赋充濠上观鱼波渺渺颍阳归马路匆匆终南旧隐还无恙瑶草春生浅碧丛

寿李太守

煌煌南极耀晴空寿祝中都太守公政化旧歌周召伯才猷咸仰汉文翁绣筵香泛金樽碧华屋光摇画烛红桃李东风春似海衣冠催覲大明宫

寄乌继善先生

红心驿外望家山飒飒西风两鬓斑系雁书成霜满地饭牛歌罢月临关谩传海外苏仙死终许羌村杜老还客底不知强健否何时访我白云间

送凤阳李太守朝京

龙袞煌煌咫尺天侍仪双引簪班联虞廷共仰明君圣汉室频夸大守贤内宴恩承瑶席醴宫袍香染玉炉烟莺花淮海春三月五马东风候早还

寄汝宁万太守

闾阖门开日月高天顾喜动紫宸朝云随凤辇喧歌吹风静鹄班飒佩瑶华饌割腥传绮席碧香湛露赐金瓢汝宁太守归来日濠上停车听楚谣

公馆春深燕子飞甘棠昼静漾晴晖已成天上羣龙会还羡云边五马归星汉文章承黼黻宸廷礼乐覩雍熙长才正要司钧轴有待回班舞彩衣

寄万玉麟

不见先生又一年聯翩诗句许谁传龙文赐诰春天上蚁酒清樽夜月前花馆声迟苍玉佩芸窗香袭紫茸氍贤郎归自朝京日听取南陔奏管弦

三月廿四日会饮於姚先生宗文家时在座者以斋黄先生文竹夏先生野亭沈先生仲良陈先生列坐以齿行酒侑食仰独山之高俯长淮之深燕笑一日之间有足乐者黄先生起论山川形胜因及曾杨之学赋诗一挥而就老成特达其何可及耶因次韵於後纪胜集云

名家见说十年前冠盖欣同锦绣筵帝里九重瞻汉阙客乡千里乐尧天香浮磁瓮春倾醴火热山庖晓斫鲜醉後谁传砂法秘振衣欲去且留连

题秋林卷

山色满帘空翠飞萧萧篱落傍清溪菊花试把金盃泛柿叶频将彩笔题夜月梦回缢岭鹤晚风吟伴宋窗鸡百年未负林泉志祇恐天书召紫泥

送宿州同知胡仲立升授凤阳府通判致仕还里

彤廷晓日射朝衣喜动天顾得赐归玉饌行庖仙蚁泛金泥赐诰彩鸾飞子陵江海心长恋彭泽田园计弗违耆旧多怜青眼顾恩光还讶近来稀

送刘子机入覲

春风冠佩共周旋为爱文章锦绣妍千里贡输登禹甸九霄步武仰尧天家山久羨神仙宅仕路频夸吏部铨漫说老来双鬓白龙鸾赐诰儼归田

赠马良卿长史朝京

京国翩翩步武重天高河汉挹空蒙山中长望秋云白海上遥看晓日红赐宴恩浓金凿落朝班声侯玉玲珑还家拜捧绫花诰鹤髮萱堂笑语同

听竹轩

苍雪纷飞白昼陰乾坤清气觉萧森秋风环佩湘江杳夜月笙箫嶰谷深欹枕不成蝴蝶梦挥毫长叶凤凰吟老来亦欲依泉石与子同观太古心

赠沈大使茂玄萧副使叔达共三首

蓬莱高阁望沧溟隐约仙家唤即膺鹤骑帖云迷远近蜃楼成市幻空冥扶桑日射珠玑窟沙岛天开紫翠屏想见此时胸次濶别来梦绕夜灯青

海东见说登州砚点点金星缀锦云若使老蟾分一滴便令脱颖扫千军词臣应诏曾携直骚将登坛预策勲要与虚中长作伴山房试问沈休文

名家述律挺贤豪千里濠梁喜见招日月光华瞻帝里风云咫尺上仙桥每夸给事登廷陛却讶征商近市朝何似吴兴山郭夜水晶宫里听吹箫

咏镢鄮山送贾通判

倅厅南对镢鄮山空翠纷飞白昼闲宝气暗埋岩壑底神光直上斗牛间清波淬石存金镢远岫生风响玉环前席如承宣室问为言形胜似商颜

用韵答史济川奏差见贻一首

风雨黄花一径残客乡怀抱且须宽山醅不用玻璃碗叶鬻谁供玛瑙盘蠹简未终怜日暮貂裘已敝怕天寒帅垣使者归来早锦绣囊倾得笑看

赠董士勉归海州并问讯刘贡寓学正

风云浩渺泛灵槎三径归来菊有花疏广宅东天入海龙且城外水囊沙宾筵且复成娱乐帝阙终须拜宠嘉好语黄宫刘博士休将简策问生涯

寄晋原县丞王叔润兼简主簿董仲石

青霞仙子最风流关陕山河纪壮游鳬雁影高山日晓鹤笙声杳塞云秋百篇体制谐金石两考才名动冕旒客底未忘青眼顾欲凭鸿雁寄绸缪

二妙才名识者稀同僚济济赴襟期庭中欲结王生袜讲下谁趋董子帷少妓当筵歌窈窕阿蛮洗盏醉淋漓长淮应有相思客坐对空阶月上时

临泾望望塞城遥土屋人家昼寂寥南土衣冠怜谪宦西征铙鼓讶归朝月明古戍悲玄鴈风落平坡急皂雕想见县官能化俗边头立马听歌谣

马屯山外落疎星千里平凉路杳冥远近封疆夸俗习古今人物慨英灵石煤炙得牲庖熟瓦缶盛来湏酪腥风景须凭诗律写试谐笙管月中听

永思庵

翬飞华构近青山沙水重重罨画间孝感慈乌驯不去神游化鹤杳难攀缩茅誓许精诚彻扳柏那禁涕泗潜岩谷莺花春似海莱衣想像舞斑斑

又

龙穴凭谁阐地灵音容邈邈嘅泉扃象形欲刻丁兰木家教须传长孺经露洗松楸纷溅泪星罗俎豆肃惟馨山川佳气从今始恩诰疏封仰帝廷

遣怀示儿复升

余自九月初至十月末旧疾交作心腹痛楚腰背拘挛日常呕逆老年客居困苦无聊作诗遣怀示儿复升儿年始出幼方务学於人事絶未通晓仅可备朝夕使令饮食起居恃以为命而巩成县主簿郑伯厚荐为习学诗春秋二经及身言书判至烦吏部奉内府勘合起取欺天罔人莫此为甚远乡羁旅父子离别情见乎辞矣诗凡十首

千里南来赋远游寄身天地等浮沤老年不减相如病久客那禁宋玉愁薄酒倩谁沽市井还丹笑我问逢州儿男痴弱难为别长夜灯前涕泗流

世家文献已多年南渡从今又八传大父隐蒙多善庆吾翁求我有遗编麟经早着芸窗学兔窟曾占桂籍先薄宦相随怜别汝谁收老骨向林泉

当年拦道忆牵衣千里长淮恨不归庭下芝兰空雨露山中桥梓自光辉源流幸喜箕裘续孝养何惭菽水违待汝归来成一笑须凭寸草报春晖

荥阳家牒世多闻手足谁知一气分季弟广西仍作县先兄地下已修文故园篱落荒秋雨先陇松楸映夕曛冰雪尚存书带草青春有待续余芬

身言书判唐朝事岩谷蒐罗广用儒若使儿孩膺此荐不知等辈欲何诛龙翔羲驭钧韶奏鹭肃周行佩服趋应有万年长策在臣微亦欲辨奸诬

选士从来鉴别精猖狂敢渎部曹听老生不解通三传小子何能习两经郡守遣符亲劝驾舟师戒道候扬舲虚声无用人传笑何似生来不识丁

五十年来奈老何客中谁复慰沈疴钱慳子母今垂罄药用君臣近较多疏广乞骸归海岛杜陵病肺卧江沱纷纷前烈空千古愁絶青山落日过

山城独卧碧云深把镜频嗟鬓雪侵俸米无余贫亦好丹砂有约病难禁浩歌夜半悲弹铗胜赏年来负盍簪造化小儿真薄相青衫竟老岁寒心

梦里还家梦忽醒山中松桂倍留情长生欲得烟霞术古学宁推月旦评兴热可容诗作祟愁来只仗酒为兵教官亦预斯文寄投老犹能颂太平

故人相望碧天涯淮水汤汤去路赊万叠云霞仙客洞九重宫阙帝皇家鸣珂尚记金张里奏赋谁开屈宋衙鸿雁有书烦寄远晚霜闲付满园花（（余在临淮种菊数百本））

洪武丙寅四月十二日过广信访濶斋郑先生出示几十首诗读之令人凄然盖小雅发乎情止乎礼义之作也遂为书一本以遗其子复昇彦心俾朝夕观之以笃其孝养之志云大雅书

次韵史宪副行可见寄

上国归来月满轩东湖山水万家村极知杜甫心常恋须信张仪舌尚存绣斧从今还使节鼎台当复大名门旧时太白楼前路蝴蝶春风遶故园

往日曾过傍水轩长桥古木蔼云村广文尚觉襟期在丞相多应世泽存灯火论交重解榻松萝托好喜登门老来复作江湖别花竹何如独乐园

寄凤阳府斯文诸君子

胡（阙）教授

中都掌教冠诸儒堂上春风散佩裾未疑识荆慙太白可应慕藺愧相如世家重绍甘棠笏手泽多传漆简书明越同乡天咫尺暮云频倚客窗虚

赵默仲先生

故国王孙老翰林红颐白髮映华簪文明曾际千龄运经济常存百岁心琥珀香浮称寿酒裹蹄价重卖文金同乡久有通家契风雨相思过夜深

沈文举先生

天葩织就锦云机五十年来鬓未丝花馆停骖多好客柏台冠豸有佳儿菊松晚节陶尊泛芹藻春香马帐垂老我尚耽丘壑趣丹青好寄鴈来时

赖思顺先生

盛时美产见真材浩浩长淮教席开帝里辉光依日月禹门变化待风雷尺书每欲从人寄匹马何当访我来闻说今年催满考青云送上凤凰台

洪希羽教谕

委羽仙人老见招中都庠序近云霄圣神有赫瞻龙袞俊选同趋颯佩瑶苜蓿盘空朝日上屐屐歌罢晚香飘客中那得重相见千里空令怅望遥

刘思温

昔年樽俎共论文玉漏迟迟夜欲分
百岁襟期怜郑老万言大对重刘蕡
青藜光动天边月绿绮声随水上云
爱弟旧夸真御史赐环当复覲明君

郭道裕

家本汾阳世胄遥淮南却赴小山招
云垂绦帐书连屋月满纱窗酒泛瓢
富贵只应如昨梦英雄聊复话前朝
别来两见春风换谁与空斋慰寂寥

方参政文敏

健笔雄词李杜间相逢千里即开颜
旧夸富贵雄无敌老觉光阴只等闲
芸草香凝瑶帙润土花暗蚀剑痕斑
盛时文武须经济莫恋淮南大小山

姚宗文

长淮晴涨白鸥波仙客风流可奈何
化蝶蘼蘼占昨梦骑鸾踏踏听空歌
青裁汗简充边笥红染朝衫试越罗
矫首城南天尺五风诗休赋考盘阿

夏士良先生

往事繁华一梦中风流谁识夏黄公
醉倾桑落香浮席步遶梅花月挂空
信笔文章綦北海满船书画米南宫
旧时五里桥边路杖履何由野趣同

吴孟周

延陵季子最风流琴剑飘飘上国游
每把篇章夸李杜时将波磔辨虞欧
诸生讲下齐襟佩具庆堂深肃饐羞
闻说黉宫新币聘西风遥想菊花秋

姜叔信

飞熊家閼素多儒手泽流传积庆余
海■〈宀〉禹共夸医国手仙人曾授活人书
菊泉满尺香仍冽杏苑仙葩画不如
老病无缘重会面神丹谁寄锦囊储

陈仲良

翠竹离离一径分石牀清思渺秋云
写成唐宋新图障识得商周古篆文
金缕词工春欸乃宝炉香热昼氤氲
旧时雅致今何似坐对灵山若识君

次韵答姚宗文见寄

浮庵居士号多文织就天机五色云谱族远从虞帝出经传长仰素王尊图南儼奋孤鹏力冀
北须空万马羣尚想淮山风月底也因诗派续江村

荥阳外史集卷九十二

卷九十三

●钦定四库全书

荥阳外史集卷九十三

（明）郑真 撰

○七言律诗

题墨窗卷

盛代文明日丽天墨卿窗户爱穷年未容庄叟谈虚白欲约扬雄草太玄翠琰凝香传宝刻华
牋点漆粲瑶篇研磨自是经纶手只合青云友列仙

书奥

奎星高照屋西隅插架纵横万卷书彩笔梦花孤榻静青藜炊火半窗虚天潢尚谱先朝系官
诰犹存世泽余已有声名登阙下苦心何必注虫鱼

贫乐轩

繁华过眼尽堪怜古木青山自屋椽三韭香沾原上雨一瓢冷泛雪中泉卖文敢儗金成匱问
字何容酒满船风月襟怀天万里青春座暖味重玄

题义儿陈清卷

而翁双鬓早星星膝下儿郎得宁馨长忆杜陵怜骥子不惭周雅赋螟蛉衔哀欲诉心如割舐
血多闻舌尚腥见说宛丘存谱牒还家终不负幽冥

咏菊枕用吴先生韵

幽花包裹御袍黄一枕麝麝卧石牀老觉形神安晚节静通鼻观溢秋香蚁醪醉醒疎篱月鹤
帐寒惊满径霜辨得楮衾如白氎梦中红日上东方

题马知县梦云图

长日思亲慨白云客窗有梦暮緼緼綠衣恍若樽前舞哀角凄然枕上闻千里寸心随缥缈半

牀孤影落缤纷骚坛有客夸能赋不数河阳狄使君

题浮玉山房

削成尖玉涌玻瓈疑似崑仑瀚海西宝气伏藏丹壑暗佩声缥缈彩云低长材自许充瑚琏高爵终期赐璧珪夜月秋深瑶帙启浮光耿耿烛星奎

送医士凌伯川归吴中

浮世生涯药笼中佩声飞渡碧云重沙河水暖龙遗骨山苑风晴鹿有茸九转尽传丹竈诀万言宁待皂囊封吴江归去春如海满眼莺花锦绣浓

送胡廷干归松江

谪居陇亩慰幽栖物外游尘不上衣自有阮生青眼顾也如江总黑头归秋风东海蓴鲈熟晓日西园柿栗肥自此不须谈作客白鸥应许共忘机

分题得芍坡送李太守

疏凿咸夸惠济功使君来守表清风千渠声合雷车迅万顷光开月监空暮雨冥冥腾赤鲤秋云渺渺落玄鸿吾民要覓铭勲处坡上新亭有庆丰

孙叔敖宋封惠济侯诰词石刻在固始期思店

送刘推官可成归长沙

云杳长沙客思孤凉风千里赋归欤五雷曾闻神明秘一卷犹存法律书岳麓天高抟化鹤屈潭水满荐嘉鱼作官何似还家乐仍有丹心恋玉除

用韵答宋推官廷臣见寄

淮南为客已多年长忆山中孟浩然鴈信远随千里月鸾章忽报九重天论文愿借清风榻载酒须同碧水船莫道老虔官独冷吹嘘正待向云边

再用韵三首

苍髮萧萧五十年文章金石慕燕然壮游自擬探蟾窟清梦谁知到木天感兴夜闻江上笛附书晓问海东船广平才子夸能赋诗酒从容共客边

作客从今擬十年瀛洲东望自悠然金堂玉室真仙窟赤水丹山有洞天云谷曾游灵运屐雪溪还访子猷船多情为想归田乐又见君来自日边

客乡千里数流年风雨淮山思渺然水遶奕坛送碧海云开仙洞见青天笙歌漫忆秋风宴书画欣逢夜月船公府昼长官讼少轻车须约到芹边

貽沈茂玄大使索登州砚

登州异产胜端溪即墨封侯品秩跻要使九重分雨露便须五色吐虹霓御前漫说宫妃捧海上频闻使客携莫待人间高着价锦囊好送竹窗西

用韵乌先生留别二首

太古遗音识者稀酒边一曲怅分违池河共说神鱼蛰瀛海还看独鹤飞水濶三江云缥缈凉生六月雨霏微客途争似还家好过眼休嗟旧事非

老来归去世应稀功业宁怜与世违淮甸天遥双鬓改海城家近寸心飞可应骚客伤迟暮料得诗人赋式微乡社斯文如一綫好令後学认公非

同郡乌先生继善蒙恩还里过濠上待舟留二句余予以契家周旋无虚日将行着序为赠先生复留诗以别遂用韵以致惓惓并附先生留别诗於後

十载长愁信息稀异乡相见复相违自惭堕地非千里谁似冲天任一飞解带石边苍树合升仙桥上好风微篋中空有南征稿不为从容较是非

送李伯谨同知归吉安

千里江山似画图天光如洗雨晴初共传游子催归骑还道慈亲正倚闾野水耕畬收黍稌芸窗俎席荐殽蔬中都旧日留遗爱好属周南太史书

王汉章以博学授英山知县予以其能绳祖武作诗贺之盖汉章曾伯祖内翰公曾祖常博公兄弟相继登博学宏词科有名咸淳间者也

咸淳博学有名儒先泽犹存五世余晓日枫廷催入覲春风花县听恩除山中好着青箱録淮上谁传玉海书老我天涯曾作客欲因相见定何如

寄林允原同知

闻君匹马过邳州不得相从说旧游枫陛仰瞻京国晓棘闈同试淞江秋看云好着圯桥履对

月须乘泗水舟肯过临淮松竹底定将诗酒诧风流

送叶主簿伯兴归慈谿

同乡千里盼瀛洲风雪淮山赋远游云暗松厅翻锦帙香倾枣酿醉琼舟上新桥外沧波暮大着坟前绿树秋归语同宗贤弟侄青灯还忆夜窗幽

送卢大使归潮阳

潮阳久矣望归来淮水风帆一日开深荷九天滂德泽不辞五岭冒炎埃山中剑气龙吟匣海上珠光蚌拆胎想见故园风物旧题诗正好寄多才

寄乌先生

田园归去好从容故旧相看梦寐中把镜尚怜愁鬓白持盃休惜醉颜红歌弹长铗风生席曲奏瑶琴月满空应念淮山千里客寄诗须是杜陵翁

寄蒋古岩知县

外家金紫见英髦谱牒相传尚未遥蝶梦正酣沧海月鸾章忽拜紫宸朝留城落日双鸿杳汲冢西风万叶飘车骑东来须一见山窗翦烛话清宵

秋兴用宋推府韵

日月光开万岁山蓬莱云气渺茫间封疆自古夸幽俗玉帛从今入汉关驯象驾车踰海徼真龙立仗育天闲帝乡万代称汤沐共喜恩波浹宇寰

风生濠上碧流湍日照金鸡五色翰枫岸晴看霜锦烂菊篱香挹露珠寒附书每欲随玄鴈绾诰何因识紫鸾沧海东归怜骥子吴江应已过淮安

玉宇天高对广寒清辉照见酒肠宽神踪要覓三生石仙药须凭九转丹宋璟多应趋宰辅郑虔只合老儒官山川万里秋空濶好趁西风挟羽翰

锦鞯花马抹青刍天上承恩喜赐租出塞将军闻奏凯还朝使者迓先驱露凉松径悲玄鹤水濶莲塘浴锦鳧狂户秋清公牒少远游作赋托三闾

同乡旧日访山居插架纵横万卷书郡府贤良催剡荐皇家爵禄庆宣除斯文每逐仪容接公道何嫌职守拘樗散由来天所放厅阶日觉往来疎

此身甘似鲁诸生汗简悠悠万古情试艺声传秋院锁论文光动夜窗檠春秋圣笔终麟获雅颂工歌宴鹿鸣先泽有传当不媿朝恩何敢望盘纓

客里黄花九日杯凭谁织得锦文回非关使者徵求急可是诸生劝得来老觉丹心终不改愁怜白髮苦相催夜深却作还家梦城郭秋声画角哀

望乡远在海瀛边茅屋苍苔问石田夜月上时探兔窟寒潮落处抖鱼筌踏歌遥听青云外射策长怀玉殿前千里只今怜作客焚香再拜祝尧天

次韵答冯道常谢羶袜之惠

书来袜寄紫茸羶霜雪应怜老服虔暄暖自须回晚节冻皴浑不怕残年感君高义何能报媿我虚名莫浪传为覓靴材如近样着随野鹤破苍烟

附道常所寄诗

临淮谁坐广文羶乃是吾乡老郑虔桂籍题名知第一棘闈分手记多年文夸班马中都盛诗擬陰何四海传醉後更能敦宿好镜铭落纸扫云烟

送贾惟敬

彩凤双飞远到家北风满道正尘沙十年客况随迁谪一日君恩拜宠嘉林壑生寒霜落果海途晒日鱣浮花乡中故旧多青眼醉倒金樽不用賒

题桂林图

爱看丹桂倚林皋花下仙人白紵袍应为名家多积德不因招隐赋离骚鹤巢声出青云表蟾窟香传玉宇高忆向西风曾折取待君初度醉挥毫

题梅桧图

春梦繁华正可怜山深岁暮爱清妍疎枝落落初开萼老树亭亭远际天飞瀑听从干涧底悬崖望近片云边沧溟咫尺蓬莱岛笑我归来要学仙

赋南山別墅

笑指南山第一峯山中无事得从容金银气合云霄上紫翠光开涧壑重太傅多才传洛下相如有赋忆临邛岁寒正有松梅约腊酒香浮琥珀鍾

竹村

竹村深处问仙家石洞琅玕长碧芽鸾鹤秋高横铁笛鸡豚社近漉乌纱山陰越上人相讶渭水淇园客漫夸唤取陵州文太守簪笏谷底问年华

为吴孟舟赠医士盛元礼

堂前慈母正呻吟三圣谁传太古心袖有神鍼投寸铁囊余宝药售千金杏山香蔼红云烂橘井寒生碧水深盛德在人须补报欲求丹诀问云林

送潘学正

猴山讲道拥皋比五夜星光耿璧奎帝里恩承红日近仙梯步逐彩云低不慙徐乐登金马有待王褒颂碧鸡笑我同袍华髮早只须归老故园栖

送罗副使丁母忧还乡

纈麻换却老莱衣千里西江赋独归可忍丛萱摧夜雨多怜寸草报春晖瑶池信逐青鸾杳琼岛仙游白鹤飞媿我无能将赠賻客边相别泪重挥

和孙大年留别韵

东风花县几经春夜度秦关月似银陶谢诗名夸得僞欧虞碑帖认来真客边敢复留冠盖天上应须列搢绅跨马又成淮海别云霄步武莫逡巡

题春萱堂

双亲鹤髮画堂中生意森森合化工夜月天高垂翠黛午风日暖艳金红舞衣笑奉仪容接仙籙欣夸福壽同百岁一门歌具庆恩封早赐大明宫

寄王汉章

春来见说两朝天禄宦多蒙圣主怜病足敢骑沙苑马归心忍听蜀山鹃水亭修禊招贤士月馆吹箫候列仙尚有掖垣遗稿在手抄应许寄芹边

予在临淮手植杏一株越五年而作花赋诗寄郡庠诸先生

当年手植近窗纱正待春风早看花绛雪生寒迎晓日香绡透暖绚晴霞敢云相国裴公宅不比仙人董奉家寄语琼林新进士朝来载酒好将车

和韵寄开城县丞孙大年先生

宫锦红翻御赐衣风流文物近来稀
山中共讶前驱过天上同夸入覲归
烽火台词谐玉律古长城调叶清徽
幽州购得昭仁帖好寄濠梁水竹西

先生有烽火台古长城二乐府故及之

録大年留别诗

斯文骨肉情均有尚友襟怀眼独稀
秫酒每邀多士饮俸钱曾寄一文归
幽花细草披缃卷明月清风拂素徽
记得淮山相别处殷勤饯送水门西

用五河县孙驿丞行简秋凉感怀诗韵

远碧亭前翠竹幽多情谁为数诗筹
云霄指点无多路淮海从容一半秋
客骑鸣鸾行复止官船挝鼓去如流
登高好寄孙公赋消得吾生万斛愁

琪树西风枕簟幽邮程百里报船筹
声传哀角孤城夜梦断浮槎瀚海秋
弹铗不禁歌激烈操觚聊复寄风流
河头见说鱼还贱好寄樽前洗客愁

汗简孤灯夜榻幽老来无计借前筹
丹枫影睇龙廷晓玉桂香探兔窟秋
河汉天高星北拱瀛洲海濶水东流
客怀浩荡凭谁写清唱应须唤莫愁

呼酒邻家隔竹幽盃行到手不论筹
蒹葭水濶汀洲暗苜蓿凉生苑囿秋
解佩正须归旧隐濯缨还许向中流
相思坐对濠梁月千里难禁宋玉愁

芹边自足寄清幽机巧人间不用筹
蓂莢周回尧甲子简编笔削鲁春秋
月凉濠水清如靛雨洗淮山翠欲流
为问五河明博士病中应恐不胜愁

水郭人家处处幽太平久已息边筹
箜篌曲奏虹桥月刁斗声传雉堞秋
展席恍惊珠露滴据牀遥指玉绳流
封书欲寄南飞雁翠竹窗西人正愁

次黄以斋韵寿吴方斋博士

日照扶桑海宇开五云多处望三台
且陪坐席春风乐相约林泉晚节回
雅调谁歌青玉案碧香同捧紫霞杯
百年好为斯文壽只恐天边使命催

题松存斋

君家种德自先公存得山中几树松仙籟满林搏化鹤翠涛滚壑舞羣龙九重路与云霄接百
岁恩承雨露浓见说明堂求柱石荣华何止大夫封

次韵王文祥见寄

作客彭城又几春煌煌庠序正兴文光躔奎宿空中现曲奏霓裳月里闻胥井水枯怜宿草萧
关路杳盼行云遨游如过欧阳墓拓得残碑幸见分

送王敏文自宁夏还四明

同乡久矣识多才淮海相逢一笑开世味真能甘淡泊客情且复慰招徕官槽正熟葡萄酿塞
曲新传鸚鵡堆千里烦将家信寄山中松竹问谁栽

双亲两地思悵悵万里难为一寸心於越山川春树远李王城郭暮云深饌馐要待双鱼出彩
袖行随独鹤吟至孝往来应不憚为传作赋擬词林

用沈茂玄大使録示令亲所寄诗韵就寄

风流人物奈君何淮海从容客兴多夜月光开云母帐春筵曲唤雪儿歌日穿林壑啼黄鸟雨
洗庭阶湿翠罗正欲扣门同一笑归来星斗看天河

三月春深问若何看花应怪落红多骚坛屡扫堂堂阵仙馆频听踏踏歌已见良材成杞梓更
闻嘉好叶松萝天涯谁念瀛洲客梦逐扁舟过浙河

陟望轩

一片浮云伴落晖望乡千里意多违天高淮甸冥鸿度海濶蓬莱独鹤飞使幕敢辞毛义檄亲
庭谁舞老莱衣百年已注长生籙白髮萧萧待汝归

谢五河孙驿丞鱼酒之惠

买得河鱼不论钱寄来羊续底须悬烹鲜自可供朝饭斫脍须当献午筵家醪生香传宝瓮声
诗托兴写金笺感君厚赐何能报问讯云鸿若个边

和萧叔达副使韵兼简沈大使妙玄沈先生文举

风雨愁连上下关客窗易老镜中颜独怀沧海瀛洲远谁念连天蜀道难仙路不闻歌踏踏溪
桥只许听潺潺休文自有东城约醉後应须借马还

门巷萧骚不闭关诗翁谁与破愁颜
凝寻杜位怕泥滑欲过苏端愁路难
野濶淮天山隔远溪深石罅水流潺
司征总是登瀛客油盖重重马上还

赠刘思恭举秀才入京

生逢盛代庆云龙金帛招延礼意浓
客路秋随牛渚棹朝班晓听凤城钟
淮南鸿宝巾箱秘太乙青藜内阁重
黼黻文章知有待恩除拜舞紫泥封

壽吴教授先生

泮藻晴香水不冰天街晓见老人星
已传多士成髦俊有待佳儿育宁馨
就日正须朝北阙卧云终擬返南溟
百年同为斯文寿醉後题诗上锦屏

百岁襟怀一片冰文光笑指璧奎星
珍庖晓报侯鯖熟宝瓮春浮蜡蚁馨
科甲久闻探兔窟扶摇直擬化鲲溟
同袍尽为先生醉淮水淮山看画屏

次韵答俞明逸先生

仙翁家住海瀛边六十容颜似壮年
夜月梦回苍玉佩秋风吟拥紫茸氊
牙籤插架芸香合鹤骑当轩树影圆
笑我客居淮水濶白云千里思凄然

帝里光华日月边簧宫乐育颂尧年
看花曾买春风骑翦烛频吟夜雪氊
石韞荆山精璞重水高淮海孕珠圆
声歌欲奏清平乐才匪襄阳孟浩然

鴈鸿将信到芹边琴佩飘零又十年
带草荒荒通德里檐花飞洒广文氊
多慚上客琼琚集空待家人宝镜圆
何日归来丘壑底南山有兴赋悠然

中都廷阙五云边乐只邦家祝万年
彭泽只应欣有酒少陵何必叹无氊
篆文已赐铜章重彩绶宁需玉琲圆
乡社斯文谁砥柱须看大手勒燕然

东海扶桑旭日边乡心恋恋已多年
长歌竟老冯驩铗旧物空存子敬氊
雨暗萤窗秋梦远天高兔窟夜光圆
独怀孝子罗江畔松柏泂冈涕泗然

寄宋廷臣

忆昔濠梁赠别时斯文千古付襟期
咿嚶不作人前态慷慨当为天下奇
北客尚令思若水南冠今已释鍾仪
裁书欲寄云边鴈香染西风洒墨池

白髮慈亲正倚闥天涯游子快归途
过门宾客频携酒问字儿童竞挽须
江海多情传翰墨园

篱有兴托樽壶我今亦欲投簪去东望沧溟夜月孤

廷臣上道谓予曰我死公当作传其志亦可悲矣

史行可宪副眷兄过临淮以诗见贻次韵识别

天开圣运粲人文五色词葩吐异芬锦里光重丞相府青山气蔼大卿坟
淝江科第登高甲涿鹿名声迴出羣冠豸又看持宪节封章应彻黠旒闻

附録史宪副诗

每忆临淮郑广文百年书带蔼清芬德尊不在论资品官冷惟知究典坟
春水濠梁鱼乐意秋风庄浪鴈离羣过庭昔日传诗礼深媿陈亢叩异闻

次韵许上舍廷慎见贻

湖海交游遇服虔中都分得广文毡孔门冠佩三千士鲁史春秋二百年
怀庆风流今复覩瀛洲谱牒古来传白云试问山中信只欲同归贺老船

附録许上舍诗

拓落深悲老郑虔白头依旧坐寒毡修名自昔夸三絶薄宦于今又十年
杨子玄成人未识左思赋出世争传文章得失千秋事监水何时共酒船

次韵许廷慎立春诗

东风吹散土牛尘彩胜花重绮席春羽士书符传遁甲侯门奏乐宴同寅
天垂广野星杓近地濶长淮雨泽新为爱襄陵千里客菜丝盘玉慰亲情

禁柳迎春舞万条东风彩燕迓新朝乾坤块圪洪钧转江海昇平玉烛调
郊祀献歌传汉武寅宾分职仰唐尧凤城预有看花约须待扬鞭过画桥

题赖思顺云林读书深处

爱向云林缥缈间何如李白在匡山每令童子移书帙时许仙人飒佩环
讲罢风生幽壑底梦回月到碧溪湾劳生正厌尘遮眼杖履何由共往还

潞州陈节判叔铭过临淮惠紫团参一本作诗贻吴教授

上党人参五叶齐紫团山顶碧云西来寻金线重楼草教斲丹厓五色泥具体宛然分手足按方时许入刀圭悬知上药无炮炙解使仙翁寿域跻

题广信府李经历仲谋听松轩

高住松崖最上层玉人琚佩不胜清翠涛汹涌蛟龙舞仙籁萧骚鸛鹤惊笑指钧天谈昨梦
烦乐府变新声山人要识陶弘景风月秋高许结盟

题采芝卷

清歌缥缈遂云行采采芳华涧谷春雪鬓老如商岭客绦衣朝儼汉廷臣疗饥不待香炊玉
酣醉何辞草当茵笑我铜池应有颂愿随步履上星辰

和韵答余德载

春深来访浣花翁座席红翻芍药风樽酒可能如北海瓣香何敢儼南丰鸛鸛声隔千山远
燕子泥香一径融笑我浮生空潦倒斯文多幸付诸公

天涯谁复为情亲樽散襟期莫比伦徐邈尽今夸酒圣鲁褒何苦着钱神月宫有桂曾通籍
溟海无槎可问津把镜却怜双鬓雪多君远访玉溪滨

送渊上人璧潭归弋阳

悟得真如不用参法■〈施，童代也〉华雨落毵毵须知有相原无相莫问前三更後三杖
锡多缘随觉路袈裟宁欲换朝衫山中猿鹤归相迓圆壁天开月在潭

洪武十九年夏五月不雨广信郡太守番禺彭公推府灵台李公率所属及父老民人禱於羣
祠祝词甫毕甘雨随至三日之间四郊沾足赋诗志喜用以见二公精诚所致云

霖雨苍生素有怀天心昭格衆心谐虚檐坐使翻银竹广亩同看长翠茝云暗蛟龙归远海水
高鱼鳖上长街朝来送喜千家遍却道先生语类俳

瑶阙欣闻帝宠嘉滂沱甘雨遍天涯溪流渺渺来千里云气重重冷万家尽使丰年多黍稷也
从七月咏禾麻广文喜作襟期在清夜长吟绦烛花

天泽从今大有年山花野草亦欣然馨香始信神灵格歌咏咸夸郡府贤谷粟豪家须落价鱼
虾近市不论钱若将汗简书奇绩太史文章笔似椽

桑麻精禱思冥冥一片丹衷彻帝听岩瀑高悬河汉白山田深没水云青芸窗浥润通书帙燕

寢生凉透石屏瞻仰昊天覃化育羽人请诵玉皇经

用彭太守喜雨韵

谁奏封章彻帝穹蜿蜒沧海奋神龙陰重兵铁驱云骑队逐旗旌散雨工送喜定容蓬岛客醉
歌欲效杜陵翁文章大手多燕许相业须传济旱功

商羊缥缈舞层空涧谷深深起蛰龙闾阖九重传帝命云霓千里沛神工有年喜续麟经笔乐
事欣传鹤髮翁争似盛明贤太守恩波湛湛不论功

用彭太守述怀韵

府库频支月赐钱青云有路作腰纏拜恩北阙文奎近读律西窗绛烛然自许生来忠贯日何
期身後画凌烟黄堂昼静清如水化育咸归刺史天

云锦囊空不问钱老来宁许百忧纏广文贫似陈无已明府才如孟浩然綠水光寒珠孕月青
山气暖玉生烟南州千里夸形胜仰戴皇家日月天

按公诗首云莫道为官不要钱要钱自可作盘纏人心如此不如此天意不然真不然语虽麤
俗亦可以观其所守矣然不数月而以招贓瘐死悲夫

和同知钱相公登高韵

南屏步入翠云高香拆泥封醉碧醪仙洞声迟苍玉佩宾筵光动紫罗袍幸逢王化歌麟趾正
及朝家聚凤毛何似广文官独冷山斋松竹听萧骚

琅峯晴睨九秋高双榼香携玉色醪歌韵有情须着笔笑谈无事幸同袍山深草木成鳞鬣海
濶云霞落羽毛采得菊花黄满地西风归骑晚飘萧

用钱同知美推官能弓韵

马上弯弓气势豪星流点点破纖毫鴈鸿仰笑当空落猿狖悲怜抱树号罗窰功成蛮寇殄天
山凯奏将材高请看卫武宾筵秩莫问兵家有六韬

声华不数五陵豪目极秋空落兔毫匝匝风生鸣翠駮仆姑月满控乌号一言中戟兵应解百
步穿杨艺絶高要待泽宫观揖让诸生未擬习龙韬

赠繆如璧

灵山佳气逼云霄
宪节当年阅阅高手泽尚传
苍竹简宫恩犹认紫罗袍
考盘诗咏时方泰
束帛荣华运更遭
有约林泉须一到松花细采酿春醪

上饶繆氏世家灵山以姓系地号曰繆原其先名君宝号泉山者仕宋绍陵官至江东提刑持节谏狱名震一时後有字如璧者实其三世孙云如璧古朴慎重奉提刑公貌像简册数十年如一日缙绅君子乐称道之而宜黄涂先生几守约且以慎顾言行为辞是得赠出与处之道矣如璧已老而克从祝规岂非世家贤子孙哉书曰绍闻衣德言其如璧之谓乎予教广信二年如璧修刺礼谒出示此卷因歌二律并识其後以归之时洪武二十年岁在丁卯正月上元日四明郑真谨识

用金太守韵兼上（阙）同知（阙）推府二公

佩襟济济盼秋波
共迓春风五马过海■〈宀禹〉车书今日盛山城
弦诵近来多爱闻召伯棠陰化骤听渔阳麦秀歌
名教不应无乐地广文已老奈公何

东风杂遝听鸣珂
倅守朝归喜见过花压重城春入画
芹香泮沼暖生波玉函捧表天颜近彩笔题诗宦况多
却笑马周贫作客有怀不敢望常何

再用太守金公雪中韵

天葩洒洒遍山城
卷起重帘眼倍明晃荡乾坤春有象
飘萧松竹夜来声何烦走檄催滕六胡不当筵唤麴生
上客梁园谁奏赋好仙争得与同倾

题同心卷

湛湛灵台一镜空
清光照见两情同结盟不用铜盘插
讲学相期铁砚功泮藻来游听夜雨桂宫聯步待秋风
古来管鲍称知己愿汝相望百岁中

用金太守写怀及登天宁寺楼韵

南屏山色近虚檐
公馆年来乐意添香爇沈烟春霭霭醉歌湛露夜厌厌
海棠欲睡红当席萱草忘忧翠隔帘彩笔生花成五色
共传清梦似江淹

曾将乐府擬三台
锦绣胸襟絶点埃帝阙封章须特奏
客厅俎席为谁开纱窗梦醒牀依竹石径行吟履印苔
驹从平安频得报东风落日尚迟徊

梵王楼阁似长干
面面溪山作画看鹤骑影迷千里信
鲸鱼声报五更寒法师笑指灵峯近词客休歌蜀道难
长日登高须有赋分明宝树识琅玕

嘉禾崔彦龄以母在琼州陈词通政司启东宫报可徒步奉迎过广信寓宿数日作诗以赠

岭海驰驱万里天慈亲相对泪如泉状供政府原非妄启入储宫俯见怜旭日锦萱春蔼蔼冷
风玉树月娟娟版舆早候来归日擬补南陔小雅篇

三月廿八日陪府官诣东岳庙行香献寿律诗二首

华构翬飞万叠山黼帷只在殿中间风声飒飒传神语烛影煌煌近帝颜远岫树低云补缺清
溪石碍水流湾残碑认得先朝刻愿道当年二圣还

神旂双引拂空冥鸾鹤蹁跹下翠屏献寿自须通秘祝讴歌还许出优伶花攒绮席盃倾碧火
熬珍庖俎割腥麾导前驱催上马山风吹雨洒清冷

庙中有石刻宋绍兴间故物有伏愿二圣回还之说可见先朝民俗忠厚不忘其君之意读之
慨然

荥阳外史集卷九十三

卷九十四

●钦定四库全书

荥阳外史集卷九十四

（明）郑真 撰

○七言律诗

寄阐仲猷

高住龙山第一层千年永续祖师灯天都入覲恩光重日本归来道价增浪帖补怛瞻宝像云开落石布金绳上方刻得新碑制笑我淮南见未曾

识得真如是佛身焚香上祝圣明君龙王听法来沧海狮子牵车向白云琬琰宸章金作刻袈裟御赐锦成文投簪幸得归来早应愿山中半榻分

赋鹤瓢盃用方参政韵

仙骥云深早蜕胎谁将霜骨镂崔嵬香流玉液风生座影浸金波月上台诗客莫夸椰子榼山翁何羨水晶盃醉来傲睨乾坤濶髣髴瑶池赐宴回

用前题别赋一首

骨相虚涵造化机仙家酒熟许挑携青云誓与归华表白月须同泛碧溪兴托箕山心似石梦随辽海醉如泥倾银注玉人堪笑回首崆峒落日迷

用方文敏新春试笔韵

满堂裾翠织如葱春在淮山锦绣中河汉天高瞻北斗瀛洲人远问东风昇平鼓乐千门合混一车书四海同见说词林供帖子上尊琥珀赐醅红

赠临淮生六人赴京

陆好德

传家远自陆宣公典诰文章卷帙重序列诸生欣造就生当盛代幸遭逢彩云晓署瞻闾阖碧

藻晴香咏辟雍天外公车催上道
莺花三月正春浓

李英

龙蟠虎踞仰王都浩浩风云属壮图
莫使荆人空抱玉肯令越客暗投珠
听莺晓日开丹幃跃马春烟散紫衢
老我只甘淮海上烦君多谢鲁诸儒

孙起

春风上国许游遨济济衣冠总俊髦
天近蓬莱翔紫凤水高淮海奋苍鳌
庆门垂裕年方壮寰宇同文运更遭
寄语成均姜博士老来为客尚临濠

王胜祖

风满长江月满山担书只为叩贤关
杏林春色身先到桂窟秋香手可攀
天拱宸枢瞻汉阙月临朔望换朝班
状元释褐今应见覲省萱堂谒告还

陶德成

我来见汝尚为儿手挟明经日问题
岁月恍然成老大林泉宁复事羁栖
神京赫赫环江海学省煌煌近璧奎
鼓篋早登髦士选竹窗莫厌五更鸡

蒋礼

丰姿梧竹见清修一卷周诗志欲酬
晓日当厨催鼎饌夜蟾照席挂灯篝
铸成铁砚频携手会使朱衣独点头
上舍御前春释褐家声好继■〈口外了内〉亭侯

赠虹县生刘昭贡成均

煌煌学省近青霄淮海诸生喜见招
挿架籤题翻锦绮升堂裾佩听琼瑶
胙分俎豆春秋祀班箴庭墀朔望朝
文教原知今日盛好将歌颂献唐尧

送臧惟表诗（并序）

四明臧氏为文献名族其始祖大丞公宋高宗时扈跸南渡为翰林御药嗣後科第相继珪组蝉联至於元初鲁山公南冠入见世祖持节左宪所着座右铭列诸宪府天下传颂去鲁山数世而惟表际今圣朝试艺中选授临洮府兰县丞三年以称职闻可谓克世其家者矣予客濠上值其考满与论世家之契作诗以赠之

鲁山绣斧旧家声三字犹传座右铭
録宦远经秦树碧壮游遥指蜀天青
牛酥和酒宁辞醉羊腍充庖不怕腥
客底相逢同一笑海云深处思冥冥

送黄彦机

洪武癸丑予以瀾省乡贡计偕春官
莆田黄公彦机亦以闽省进士谒选吏部
因与论同年之好彦机四如先生曾孙理
学文章卓有源委予心敬服之及来典教
中都属邑数年而彦机奉上旨为巩昌府通渭县丞岁时请觐取道濠梁握手论旧兹书满上考彦机谓人生聚散无常不可无一言以别予老矣无能为矣玉京天上夔龙接武非彦机其谁哉遂赋诗以致期望之意云

两省同年进士科斯文契谊果如何
春云濶步公须早夜雨羈愁我独多
边笛频听青玉案山盃不厌紫芝歌
相逢又说朝天去花柳东方散佩珂

答黄仲坝检阅见寄兼简吴伯宗内翰

煌煌华盖近奎文玉宇天高靚庆云
秋露每怜三径菊春风犹忆泮池芹
王言润色毋多让尚食传餐莫浪分
簪绂老逢台阁选好将忠赤报明君

铃索无声玉漏残文渊阁上逼高寒
恩光频对双莲炬寿考何须九转丹
兰殿早朝随唤仗花砖晚步候鸣鸾
斯文说有吴夫子淮海相望欲见难

附黄检阅诗

（阙）

题莆田羽士云所卷

仙家楼阁望三山人在祥云缥缈间
每欲随风归洞府曾因作雨向尘寰
劒光变幻鼉鼉窟丹气氤氲虎豹关
笑我无心从去住蓬莱顶上候瑶环

送表兄范执中复任灵寿县知县

系出文华学士公谁知异姓本同宗
相逢共诧形容老入覲应夸步武重
燕马春郊肥苜蓿淮船秋水映芙蓉
遄归宠赐南宫宴一曲周歌湛露浓

题画二首

曾过坡仙放鹤亭黄茅冈顶思冥冥
相亲有客须拌醉好语逢人不倦听
一水倾翻千涧碧两

厓浮动半天青旧游恍惚浑成梦聊复题诗上画屏

古木藤萝翠雨飘重峦絶壁倚云霄坐随行径秋多露渡唤长江晚有潮机事相忘鸥影只封书欲寄鴈飞遥十年虚负瀛洲约愁听仙家奏玉箫

送鄢陵教谕高思聪辞官归金华之武义

长淮千里放归船记得相逢五载前薄宦不须论教铎醉歌且复共宾筵天官试卷存遗藁词苑菁莪取次编如过金华山下路烦君致意牧羊仙

答姚宗文律诗四首

门掩西风一径苔悬知勿药好怀开不辞上客停云骑何羨佳人当肉台苍鬓不应甘老去青衫只擬早归来向时已悟盃中影莫为多情赋七哀

淮天空濶彩云收坐对青山最上头幽梦只应随化蝶闲心尽可狎来鸥胸中绣锦休停织袖里骊珠莫暗投篱落菊花秋已近浮庵还许唤同游

一曲清歌听采莲夕阳高树正鸣蝉山川风气千余里诗酒襟怀四十年妙药人间夸不死灵符海上诧逢仙几回笑指扬雄宅问字终当造席前

高节多君慕子陵怜予只似出家僧床头相问频能去灯下长怀可自胜嗜酒谁云賒即得卖文独怪价难增客乡愿得身强健要覓山中术与苓

附宗文诗

（阙）

送林生归乐清

萱堂有命过淮西矫首云霄百尺梯彩袖庭阶朝进鲤青编灯火夜听鸡家声擬续梅花咏客兴频将柿叶题最喜乃翁多善政归来历历话中闺

寄徐景颜三首

秋榜名聯进士科轻舟同日泝淮河举头天际云雷迅挥手人间岁月过大府只今辞满牋冀宫仍复听升歌马融绦帐知何似解榻还嫌礼数多

帝乡城郭楚天涯倦客西风两鬓华终许徐君归（阙）岂容贾谊困长沙晓窗独对青铜镜

夜榻虚烧绛烛花淮颖相望云汉接远游只欲趁星槎

郑虔多病更多愁却笑文章死不休泰运重逢尧甲子师传频纂鲁春秋敢云阙下郎官老谁识周南太史留科甲向来叨第一西风竟负广寒游

用韵寄王汉章三首

山中报政两年余卓鲁声华总不如遗蹟向来询汉楚淳风今得问庐舒据鞍自觉丹心壮照镜应怜绿鬓疎楚泽天高鸿鴈远短歌空复赋三闾

花县仙人玉雪清科名词学早蜚声共知簪绂家传久多美弦歌德化成千里山川鲸海岛五云宫阙凤阳城故人相见多青眼狂客谁怜贺四明

年过半百未容闲县宰今跻七品班陇上恩须金诰赠堂前笑待锦衣还蓬莱云近通三岛阊阖天高睇九关海宇会同春正月紫宸行复覲龙颜

送潘伯英

将军幕下羽书稀花柳轻风散马蹄古篆多应题玉筯梵书漫忆写金泥天连河汉恩光近云拥蓬莱步武跻老我白头淮海上烦君问讯故园栖

送庄浪卫千总所王镇抚朝覲领诰而还

虎卫煌煌塞上开将军多仗出羣材湛卢光动星横汉霄籥声残月满台铁马沙场精教阅金城部落藉招徕功成催入龙廷覲彩凤绶花拜赐回

题绿阴深处

萧萧松竹翠交加五里桥南处士家化育尽令饶雨露山游终许载云霞岩花乱发双扉暗涧水潜通一径賒老我已忘尘俗念长生试欲问丹砂

题吴道延书屋

锦轴牙籤插架高座中上客尽英髦双钩妙诀频临晋五字新篇只和陶辟蠹春来教汗竹聚萤夜半代焚膏劝君好富三余学鼓勇词场战必鏖

题梅雪卷

银海光摇六出花晴香一树映窗纱谁陪东郭先生履远访西湖处士家皜素本来同造化清

寒不许炫豪奢卷帘爱索羣姬笑取水春烹雀舌茶

五月初一日太守试闕府县诸生命予为主试初六日揭晓太守有诗次韵

艺战中场甲榜开南州多士慰招来昇平正遇君臣会俊造须期将相材词学尽夸綦北海经
题频问吕东莱明公藻监归公论耿耿中天玉镜台

题碧山诗卷

山翁结屋倚空青猿鹤招呼月里听流水落花春寂寂白云深树昼冥冥久知妙法超三昧仍
许离骚赋独醒老我尚耽丘壑趣篮舆凝欲叩松扃

上金太守府尊一首

携家共覩郡公来五马趋迎一笑开不羨笙簧喧北里却欣歌诵补南陔九重恩凝丝纶诰百
岁香倾琥珀盃信笔要书耆硕传老生不敢让非才

题金郡公待月楼卷

晚凉人在画栏东海底金轮涌碧空羽舞霓裳随缥缈仙游环佩飒空蒙葡萄满注香尤烈檀
板轻敲曲未终愿与嫦娥覓灵药奋身同上广寒宫

夜宿谷神道院为吴道纪子璵称壽宴罢作诗以谢并贻同志诸君子

星满银河月上弦玉溪光泛水中天遨游如在珠玑窟燕乐还勤锦绮筵希有年华兼福寿风
流文物总神仙樽余更许明朝醉踏踏空歌夜不眠

和金太守述怀韵

甘棠陰转翠帘虚坐对溪山画不如五彩腾骞阿阁凤九霄变化北溟鱼斯文共覩分符日大
用还夸发轫初可是龚黄循吏传他年弗媿史臣书

每欲挥毫赋子虚非才空愧马相如弯弓却道云无鴈弹铗多应食有鱼芸屋泥香朝雨後竹
牀月透夜凉初诸生沐浴文翁化坐拥皋比听读书

和韵奉答金郡公仲和太守父也

貂蝉七世仰华宗千里南来识郡公庾亮许令延夜月光庭容得坐春风花边雅戏懽娱洽竹
里行庖燕笑同厚德在人须有报广文莫道锦囊空

碧沼涵空石径幽潭潭公府慰相求步兵宠顾多青眼工部愁吟奈白头
蚁榼香倾甘露滑花笺浓染翠云浮芹边笑我清如水有约西风桂子秋

连雨有喜上金太守钱同知李推官

瓣香多见格天心一滴甘霖一滴金■〈亩犬〉亩嘉禾成乐岁乾坤清气涤尘襟
舟移九曲山溪远纓汲千家石甃深太史简书烦志喜广文才浅不成吟

折桂赠金郡公

万里西风桂子秋梯空谁向广寒游曾将姓字通仙籍敢望恩荣赐状头
金粟粧成凉月满麝脐香透晚云浮一枝折赠蓬莱客好约嫦娥共劝酬

寄古芳禅师

上方形胜占祥符矫首灵山似画图火暖云炉然楫枹酒香春瓮胜醍醐
西天教演真乘秘东鲁书探满架储见说夜来禅定起一龕坐对月明孤

送知上人礼补怛

补怛洛迦山在宁波府昌国东大洋海岛上观音示现之地予家四明於大士为同乡弟子
海波险絶不及一至典教广信而铅山上人永智若愚不远千里武拜而前必欲瞻仰慈相而止
予嘉其意之诚志之坚也作律诗为赠按补怛洛迦梵语华谓小白华以山多白华故云

沧海天遥雪浪堆补怛山顶幻楼台多因大士寻常现尽唤游僧自远来
狮子吼林岩壑震频伽出洞树云开袈裟坐向盘陀石认得前身是善财

寄罗信言

道来不肯扣丹扉秋水罗江看夕晖席上香寒花竹谱山中云暖薜萝衣
教儿尽把韦经读作客还夸赵璧归海天遥音问少寸心长与鴈同飞

再用韵

枌榆蔼蔼荫重扉醉倚阑干驻落晖捣月须求双玉杵翦云欲制五铢衣
蓬莱有路须同到灵鹫多年未得归想见家山新孝享慈乌常遶树头飞

靳子英巡检寄赠虎皮作诗以谢

寄来弓箭虎皮斑想像威风百步间肯令戎马夸雪白未容蜀锦炫朱殷寢牀不觉惊魂梦讲席多应发笑颜感荷情亲无以报题诗附与片云还

贺苏如初下第复职

先生试罢早归来春满黉宫讲席开谩道刘蕡犹不第谁知贾谊本多才鲲鹏海上终高奋鸥鹭沙头莫浪猜过眼可应迷五色且须谈笑付樽罍

题南州别墅

闻说南州逸兴饶相期解榻过山腰神仙楼阁还同到使者弓旌不受招云拥重峦乔木暗风随幽径落红飘抱琴谁鼓清商调五色鸾凰下沅寥

送玉山汪生起复入国监端明学士状元拱辰公之後也生号冰玉堂就题

溪山冰玉产魁儒法从恩承秘殿除云匣凝香犹有笏牙籤插架尚多书照人清气寒仍冽满眼睛峯画不如文献百年论嗣续从今鲁宝识璠璵

题监湖晓霁

监湖晴涨白鸥波贺老风流问若何蛮贾趁墟酬市语洞山踏月听空歌夹堤菱芡经时熟入郭鱼虾近日多我亦有心探禹穴须君同赋考盘阿

落第举人南昌张某特恩授温州永嘉县学教谕兼简刘贡禹学正

丹符躬拜御前除试藁犹存棘梠余宣圣殿高瞻袞黼诸生班整肃襟裾华堂击鼓公厨熟彩鷁垂帘海味腴为语睢州刘博士老年易学定何如

题孙氏紫荆堂家在淮安山阳县先七世不分宋南渡思陵尝幸其家

将军堂植紫荆花淮海山阳忆故家奕世云礽同饌席前朝恩宠驻鸾车帘栊晓溥珠露座榻凝香覆晚霞见说孙枝还秀发年来应许着芳华

寄史行可

八行传家盛有人科名青紫不如君契囊错落倾珠斗使节光华拂锦云贾谊有名传洛下王通随意教河汾不才亦有田园兴凝共携樽醉夕曛

昆季从来识二难每从过者问平安久交自许如金石远信何由托羽翰挂笏看山云冉冉研

朱点易露溥溥卦爻会要新传得寄与灯前仔细看

寄史君实

月湖公子泮池深老却平生富贵心宝铗歌残星斗落紫箫吹断凤鸾吟
秫香樽蚁杯频泛烛翦钗虫夜向深若幸广文归去早午风花下定相寻

翠竹窗纱易一编焚香孤坐晤幽玄从知太极原无极始信先天只後天
龙虎风云当盛代貂蝉阅素多贤笑看乔梓青如盖洒洒凉陰雨露边

寄金太守仲■〈曰上州下〉钱同知（阙）时二公得罪屯田天宁卫

身世悠悠任所从要知文武古来同宝装好买千金劔努力须扳两石弓
共说关张多意气要知韩范本才雄淩烟阁上苍空近愿画丹青第一功

当年幕府幸同僚今日兵农塞北遥愿把金貂夸此世好将铁券认前朝
霜天云杳书传鴈水泊风高学射鵄闻道竹筒堪吸酒胸中磊砢且须浇

松亭岭外草如茵部落谁为向日民土屋雨霜寒簌簌石煤然火暖温温
晓厨莫笑畦无菜晚地犹夸麦有粃休道阳和终不到天涯风物也相亲

送董理问

名家勲绩伍公槐前代班行冠上台御赐尚存犀角带军容犹识虎头牌
云仍谁似如今盛风烈何能与物谐天阙入朝归路远也须骑马过茅斋

又

名家乔木藁城深忠孝悠悠百世心盤绶正须传锦绣虎符犹得认黄金
谈经竹屋秋云合听讼槐庭昼日陰忠献只今祠庙在萧萧柏径许相寻

送括苍王罕成母丧归

丹符拜领过长沙老觉萧萧两鬓华圣主恩深频得禄慈亲讵远急还家
仙游怅望云天鹤反哺愁听月树鸦江广岁寒冰雪苦缤纷清淚湿衰麻

问梅江西王参议索赋

玉妃孤住碧岩阿一笑相逢问若何骨格可随凡俗换精神较与向来多
几回姑射山中去何

事罗浮月下过岁晏天寒冰雪苦幽情肯与共婆娑

玉山县学教谕苏如愚先生谦恭乐善待予如师在任四年以母丧去职作诗以赠云

白髮慈亲福寿终家山有赋托冥鸿蓬莱影没仙游旆泮水声残讲席钟萱草生寒愁满眼蓼
莪哀赋泪填胸儒官归去征衫旧须记灯前密密缝

赠俞敬之

早岁亲承古雪公契家三世仰清风芝兰楚楚宾墀近桥梓辉辉旅席同庾岭天高催驿骑稽
山云杳托边鸿青春舞彩如多暇须约斯文赋泮宫

题松竹轩

亭亭华构倚晴空松竹溪山罨画中翠凤羽毛低夜月苍龙鳞甲动秋风三公梦入瑶台远六
逸吟联绮席同笑我同乡须一过倚窗坐对烛花红

寄玉山（阙）知县

君住天台我住明相逢千里亦多情政须苍石铭诗刻不羡铜盘歃血盟潘岳春吟花似海陶
潜晚啸柳如城斯文甚荷风声接比屋弦歌乐治平

满城风雨落花深望望溪山思不禁笑我穷经空白首多君视篆只丹心寿春欲解时苗犊单
父频听宓贱琴谁是玉堂挥翰手墨卿须致竹窗陰

寄玉山董县丞

蝉联华胄本江都三策天人百世余对竹风声来衽席哦松日影过阶除当筵爱饮盃中物成
案宁辞纸尾书笑我山居同濑水少微星动夜牀虚

寄玉山典史

去年竹篙寄曾来老病蹒跚亦快哉长史只应多眷爱教官争奈少舆儻玉溪水影明清鉴婺
女星光毓俊才有约芹边须过我午风香蔼锦莲开

和乌先生见寄韵

贞心澄默与天通虚白凉生一榻中共喜西河尊子夏尽教蜀郡慕扬雄浮尘要刮金篦膜皎
月长吟玉树风江水西流千里隔只将幽意托冥鸿

东南地重四明山人在金堂玉室间彭泽陶潜终勿仕监湖贺老竟辞还学仙志欲求三岛报国心犹恋九关想见水仙湾上路碧云步步逐瑶环

附乌先生诗

谁道西江信不通故人消息坐谈中十年官冷身无恙一郡名高笔最雄仙阙每瞻龙虎气客途长啸马牛风独怜老去年华短空拂春云望断鸿

遥望鹅湖与象山昔人谈道五云间片言共覩遗珠在叔世能追大雅还玉气和烟浮暖谷金精随月到重关先生访古宁无意谡谡凉风响佩环

题五云渔舍卷

越王台外五云低渔隐人家结构齐可是严陵居大泽肯令吕望老蟠溪水蟾照夜珠胎拆琪树生寒翠羽栖隣郡相过如欲赋却须橙蟹捣金虀

予读五云渔舍卷什越中大手笔若赵公待制钱公博士及王公前学正皆先执友而钱公较文瀚江时实有座主门生之契文献老成词极思致兴怀存歿实增敬想欲着赋以续其後而以病弗果口占律诗用期诸异日云

美董县丞孝行

此心纯孝古来同禄养其如拱木风哭笋簇寒惊土迸求鱼衣解讶水融羹墙恍若神灵见泉隧多应祀享通老我儒林当作传史才媿不似诸公

题胡仲厚先生画

楼阁重重最上头石桥有路接蓬洲多才欲着兴公赋适意须招太傅游棘屋半藏岩日晓松关深锁涧云秋郭熙自得忘言趣挂壁争看醉墨流

中秋写怀

客中多病更多愁孤负山城一半秋独处嫦娥空想像老来词客谩风流君山曾奏千年笛牛渚谁乘万里舟想见家人心独苦金波应与泪同流

荅阳外史集卷九十四

卷九十五

●钦定四库全书

荥阳外史集卷九十五

（明）郑真 撰

○七言律诗

寄象山区禅师寰中

尊师不见已多年梦遶蓬莱瀚海天杖锡行随云共远牟尼光对月同圆许询自欲酬支遁韩愈终当友大颠老我归寻丘壑趣灵山席上定参禅

和百户韵

柳营深处绿依依雉堞云屯壮国基誓欲斩蛟临沔水賸夸跃马过檀溪婺城盛说东莱学渭水犹传吕望碑文武一家今有後抚摩戎伍煦寒饥

○七言长律

三月四日会饮於方德贞氏以上已寒食清明比合於两日间要予赋诗成二十韵

春深节序适逢三松竹南窗客聚簪香冽上樽倾凿落珍分列鼎饫肥甘岩花不为人情别海味应当旅思堪誓与阮生同一醉肯如王衍只清谈交亲半世猜嫌絶土俗千年委曲谄道在底须愁俶扰心清自可律顽贪路深凤浦停烟火海濶蛟门息瘴岚声动秋千喧院落影摇舴艋漾溪潭笙歌历历哇淫杂罗绮纷纷富贵酣公子多应联晓骑佳人凝为祝春蚕青精饭熟家人送银烛光分内宠覃祭祀谁能通孝享祓除聊复慰忧惓轩裳分与浮荣弃泉石由来懒性耽虚壁虫飞怜尺蠖画梁燕语听呢喃越中曲水流清浅绵上诸山耸翠嵌逸少立言名不朽子胥守义死何惭氛尘浩荡纷争急戈戟精明祸乱戡未有长材空冀北敢辞微命困周南屋檐柳色宫袍映几席芸香汗简探兴聚笔端诗欲就帘前飞絮落毵毵

寄陈县尹可斋

烂柯仙客思翩翩献赋曾闻近御筵鸾诰香浮朱印湿鸕班光映赭袍鲜生逢明圣焦劳日寿介慈亲喜惧年色养望遥千里道忠心誓答九重天化覃海邑声威肃名动枢廷礼貌专山市春深闻促仗官衙昼静听鸣弦东风柳影青丝扬长日萱花锦绣妍潘岳岂能长作县陶潜未

可赋归田囊中诗帙寻常看肘後医方次第编尚想轩居新画幃依依情动白云篇

寿方时可七十

生年七十正逢春长为湖山作主人黄纸亲承天宠洽禄袍喜动日华新神仙早授长生诀道德常存不老身琼岛云霞酣入眼璇霄风月喜传真五枝挺挺庭前桂一树青青雪里椿地接东溟回造化天开南极烂星辰宗枝展庆威仪接嗣续趋欢礼让均彩胜花翻红影动金觥寿介碧香醇满堂光映珊瑚架拂席寒重锦绣茵顾我诚非朱履客敢因祝颂齿簪绅

春草轩长律用黄仲坝先生韵

芸屋题春笔似椽翠茵蔼蔼欲霏烟悬知生物从元化共说芳心只旧年香吐杂花成百和陰擎低柳候三眠身前正擬春晖报梦後多应晚兴绵上国濠梁随浩浩故乡蓬岛忆芊芊自家意思何人识努力工夫信手编指佞廷阶嗟已矣忘忧杖履觉悠然尽令雨露青青在宁羨繁华绮采鲜

题周府纪善南闽黄昌吾爱日堂

金乌飞驾五云重照见高堂鹤髮翁大化要同归寿域长生久矣得仙风南州天际扶桑碧西海云连若木红笑近榆陰移枕席步随花影遶帘栊綠樽香泛春常满綺彩衣翻年正中寸草芳心终欲报余晖恋恋倚晴空

题庐山图送凤府掾童思谦

年来有梦入匡庐列嶂芙蓉看画图天近云霞浮几席风生涧壑奏笙竽杂花织就千机锦飞瀑倾翻万斛珠鸞鷟出巢翔廓落蜿蜒奋蛰幻虚无草堂正可寻栖隐槐府何烦肃步趋彭泽归来聯法社长庚揽结拟仙都芸香晚砌书连架秫熟秋田酒满壶送子名门双阙下萧萧清思眇江湖

用陈（阙）韵就为荣归之赠盖上饶县丞乃父也

吾家本住海瀛东千里南来语笑同闭户不禁孤榻静隔篱还许一溪通芹香泮藻簪裾集花遶庭除杖履从展席歌残青玉案烧灯光透绦纱笼酒樽泛月频倾蚁劒匣鸣雷欲化龙水宿恍如明镜里山游只在画图中全身自爱归田乐教子长怀报国忠有约重来风雪底飘飘鹤氅讶王恭

○七言挽诗

挽卢承事

衣冠乡社集耆英风月萧然两鬓星禄养已应酬鼎釜恩光终复耀泉扃尘荒夜榻遗编暗云满春山宰树青嗣子相逢恰作客天涯归拟勒新铭

九月廿日夜梦韩生唯传动静如常时而面黄惨臃肿予意传其死者之妄不以为梦也觉後成诗一首时残月印衾鸡声喔喔谯楼已四鼓矣为之凄絕

曾将幽意寄冥冥梦里相逢泪欲倾地下不知成久别人间空复话生平才名每惜邢居实贫病多惭马长卿老我归来丘壑底余哀擬作楚歌声

挽徐方舟先生方舟睦州诗人有瑶林沧江集号沧江散人天大雪独泛舟钓江中寿六十八以卒宋学士铭其墓曰有才不施一发於诗日星月露草木走飞人事变迁可悦可比（阙）入我范围唾咳所及皆成珠玑信乎能诗矣

睦州诗派继前修急雪沧浪一钓舟賸有才华传锦绣终无姓字彻珠旒神鱼入穴江云暮仙鹤抟空海月秋百岁风流那复见薤歌声断不胜愁

挽李廷铉

山人本自号琼台未到琼台忽讣哀太白骑鲸终弗返令威化鹤欲归来海南莫副羣黎望江左空怜太守才尚想芦轩行乐地秋花晚节为谁开

按琼州郡名琼台廷铉得守万安正琼台属邑予尝作书贻之曰公号琼台山人今领州绂乃在琼台岂非佳讖耶

挽王廷采

西风槎上擬张骞留得南行第一编共叹栖鸾空棘枳却怜化鹤渺云烟江湖淚洒丹旌湿广海魂归画簾悬慈母九原如不识遗容须忆画中传（廷采生十月而母死号所居岷思轩）

挽陈惟学

恋主依依盼玉除遗编忽复啓青乌伤心过客空临穴茹素慈亲正倚闾月透虚囊应有劒尘荒故榻尚留鉏淮南九日年年到惆怅黄花酒满壶

少时江海望南游三十年来过涿州诸父相逢心独苦老姑一见涕横流粉榆日薄林泉暮松柏风生涧壑秋千里英魂浑欲返云霄鹤唳不胜愁

按惟学世居涿州东南三里惟学三岁侍父宦游江南克守家牒年三十余际今圣运得授沧州判官以公事至北平取道涿州经故里彷彿记忆驻马邮亭亭长有同姓者须鬓皤然问得

其实知其在从父行廷至上坐拜伏成礼叩其姻族其祖姑尚在相见涕泗入山拜其曾祖元帅公基金时穹碑固在既返自北平为汛扫隧径割牲以祭州长贰乡党父老来享胙皆以为陈氏尚有人焉临别亲族咸致赠遗惟学既得罪其从父迎慰道上复资助路费是其有亲亲之恩者耶惟学谪濠梁每假宿予所寓为一言之惟学已歿无有知其事者特附着挽歌辞後以见追念本始之意而其他出处不得详也惟学有母年七十余寓居湖州尝手书语惟学曰吾茹素期福以待汝归汝好自爱乌乎母子兹不复见矣痛矣哉洪武十二年九月重九日予与惟学饮酒凤阳郡学又一日来寓舍饮酒如平时未几讣惟学死矣是月十七日也年四十有四以是月某日葬於凤阳县月湖西畔棺槨衣衾之具朋友以义助经纪其葬事者天台洪原礼姑苏吴孟周氏其生死尤得其力者则邳州判官山陰陈惟仁云

挽黄仲坝先生

三度科名藹縉紳老来八十际昌辰裸将自许从周祀羽翼终烦列汉臣淮海传经应有子云南作志属何人英魂不返华亭鹤愁絕天涯泪湿巾

哭崔孝子

孝子名某姓崔氏字彦齡嘉禾人幼时失父某母某氏改事同里桑某桑为御史谪海南後以大臣奏还事而死氏嫠居海南孝子徒步只迎不能得归嘉禾逾半载入京师以情叩通政司启闻东宫可其请再走海南得母以还旅次南昌竟以利下疾死识者莫不悲之噫是岂造物者之不仁也耶孝子往返累次假信宿予实馆谷之临别许为着传孝子今死矣存歿之情可终已矣耶因作诗哀挽之并书其槩用窃比挂劒之义云

两渡南溟万里游春晖欲报思悠悠储宫上启恩仍浹慈母同归志竟酬至孝不闻来福寿大招忽复些冥幽九重闾阖何由诉执笔空烦涕泗流

悼罗舜言

闻君縲紲不归来猿鹤声传夜壑哀自信书生无死罪谁知狱吏陷多才弹歌有劒尘藏匣展卷无灯月上台谩道府君灵庙在枉教嗣续罹凶灾

荥阳外史集卷九十五

卷九十六

●钦定四库全书

荥阳外史集卷九十六

（明）郑真 撰

○七言古诗

日食诗（至正二十一年四月朔）

辛丑四月朔日有食之既氛祲烟云相荡摩天地山川忽蒙翳省垣大臣威令传从官车马成纷然正笏褰冠向玉阙瓣香百拜哀吁天嗇夫奔驰庶人走叫啸讴呼亦良久路途错莫若半夜仰见明星大於斗城中编户百万家喧阗金鼓纷相挝何物妖虫肆吞噬奋戈我欲凌云霞人言七政失躔度历家推演错昏暮清台路阻兵革深万里不闻传救护须臾争讶红光还将相公侯开笑颜羲和重整六龙辔夕阳倒景明西山我年三十诚罕见忧国忧家心恋恋九重神圣正当阳天象何为召斯变举头问天天不言人事只今殊可怜圣笔昭然示训戒春秋二百四十年

赠邵景南

甘棠子孙冰雪姿词葩织就云锦机出门一笑天万里翩然直欲登丹梯元戎开藩控瀛海宾幙红莲云蔼蔼貔貅帐里承谋谟匹马山川眩光采三年书考达皇都绫花凤诰承恩除作官何如赋归去春风杜宇声愁予东陵山中瓜早熟翠柳黄花艳华屋良田■〈禾罢〉稴乐年丰石蟹霜橙荐醺醖案头一卷铜人经夜窗坐对灯影青小童侍立不肯去心机脉脉通神灵手拈金针三寸许八法陰阳分处所候气岂知天日昏梦里人听竖儿语回生起死不踰时坐令寿域春熙熙美誉流传满江海声歌错落鸣珠玑我生三十空潦倒庭下秋深书带草先子从游今几人青眼何由长见好

节妇诗

沧海无情波浪急万里胡为远行役北风高高望不归鸳凤惟深淚双滴百年甘作未亡人花香草色空复春容颜惨淡废膏沐粧台明镜荒浮尘孤灯夜长耿不寐皓月当空霜满地矫首沧溟愁奈何化身安得如精卫

送张郎中

仙人高住天台山琅玕苔草怡春颜翩然卖药向城市云裾五彩鸣瑶环晓起苍茫天万里寒
盃倾浥上池水青眼逢人一笑开宁使唇亡露牙齿十年江海鸣征鼙羣黎惨淡愁疮痍神功
安用施刀圭坐令寿域春熙熙

八月中秋日宿郑文中家是夜月食随班行礼次日玩月慨然有怀作古诗一首

团团一轮月飞上黄金阙空斋兀坐悄无言出门一笑天地白银河耿耿蟾宫秋金波穆穆凝
不流安得清风生两腋奋身直上青云游我家本在东海住三岛神仙隔烟雾年年八月看月
明广寒指点无多路去年作客向钱塘翰墨鼓勇登文场嫦娥折赠一枝桂霏霏满袖携天香
郡府工歌听苹鹿春日计偕登上国翩然捧檄濠梁来苜蓿盘空照晴旭凄凉逆旅逢今宵何
用沽酒倾金瓢故乡远隔二千里眼空碧落心飘飘闺中夜凉珠露滴两儿同向楼头立云鬓
玉臂思依依舐犊恩慈怪违膝人生离合非偶然纷纷万事俱由天古云千里同婵娟莫道月
圆人未圆

瀛州夜宴图

十八学士登瀛仙衣冠济济开樽筵银烛高烧照长夜金炉香爇沈檀烟社稷元勲属房杜忠
孝百年论肺腑乾坤醉里暗经纶盛世风云际真主玉京天上非人间瀛洲可望不可攀河汉
秋高月华满清风杂遝鸣瑶环龙凤雄姿天日表策府宏开朝覲早宴娱不敢负君恩周诗正
儼歌天保

和李推官灯夕短歌

玉兔飞昇东海上六鳌驾山压晴浪春风陆地金莲花万里虹桥跨空旷都城萧萧闻马鸣喧
阗鼙鼓轰雷声云中宸游隔人世霓裳一曲歌隆平人言三万六千日百岁欢娱只今夕烹羊
炰羔割素鳞金叵罗深蚁醪碧琉璃隔幔无纤尘鸳鸯绣幕围青春金步轻移翠罗袜绦桃暗
滴胭脂唇老夫门前清似水文献空令嗟宋杞沙糖米果荐时新望乡欲洒江河泪琼台仙人
今有无丹山洞天杳蓬壶采药归来何可得长啸一声天地白

再咏看芙蓉答沈文举

淮海秋高宸阙下客袖飘萧怯凉雨翩然步向庭阶看一笑芙蓉红半吐竭来濠梁今五年繁
华每惜青春前庄周台东芳草绿遶床化蝶成孤眠先生近入簧宫住佩玉花还喜相遇秋色
於人亦有情把酒何辞斜日暮斯文万代肺腑亲食前岂必罗八珍集裳骚客楚天远悠悠江
水空愁人锦城慨想当年事富贵宁为身後计笑谈历历襟怀开会聚风流那复易凤城北风
天早寒物华恋恋良已难拒霜须令慰晚节肯容霜後愁枯乾

题梅花图

我昔达蓬山下住，遶屋梅花千万树。瀛洲仙子日相招，百摺衣裙翻绀素。近年为客淮上山，老来霜雪怜形颜。要与花神同一笑，重重岩壑劳跻攀。疎枝冷蕊孤檐下，妙手凭君写图画。笔法宛如杨补之，笑向樽前索高价。山中佳人白玉肌，岁寒问我何当归。要把长琴作三弄，梦里魂随双鹤飞。

题观泉图

我家四明山谷间，清溪碧涧流潺潺。石床侧目试一听，恍如仙子鸣瑶环。山中夜来新雨足，更上重峦看晴瀑。银河千尺欲飞翻，万鼓雷鸣荡坤轴。汪然下注川渌深，清光一镜明吾心。洗净尘氛百千斛，多情便欲投吾簪。岁月如流吁莫驻，飘飘萍泛淮山住。兴来濯足歌沧浪，白云茫渺知何处。君不见谪仙文章锦绣胸，飞流爱看香炉峯。脱靴捧砚不复顾，便欲此地巢云松。又不見贺监黄冠罢朝谒，扁舟归卧镜湖月。十洲三岛认为家，八极形神纵超越。人生适意非有年老来，只合依林泉。客底清秋见图画，西风梦遶蓬壶天。

题昭仁寺碑

右昭仁寺碑在今幽州宜禄鎮，唐师及薛举战地也。碑为阵亡士荐福而作，世以为虞永兴公书。宋元丰绍圣诸君子题识刻於碑陰，若欧阳公取其字法之精，而不定为何人所书。其余但纪观碑岁月，谓为世南少年书者，河南张威甫也。以予观之，此碑视庙堂碑笔锋为露，而运意略同。至於辞语亦有相类者，亦一时士大夫习气然耶。越章立可自陕右入，覲用以为祝，既装潢成，什摭其指意系长歌於後云。

隋家天子普六茹五儿，一气夸胤祚噬脐。追悔废立乖，忍死空慚独孤误。大业改号朝新君，北南乐土无惊尘。锦帆楼船驾河汴，琼花看遍江都春。春梦繁华眼前别，纵意淫奢宁改辙。乱离四海金铁鸣，杀人如麻川流血。咸阳不见翠华归，独夫剗刃谁其悲。寰宇皇皇望真主，秋风晋水神龙飞。秦王上将天日表，草昧羣雄如电扫。锁枷械钮俘累累，献凯归来京阙晓。曩哉小丑据幽岐，奉将天讨森熊貔。两军一战胜负决，倒戈弃甲愁疮痍。阵前骈首就诛戮，百里僵尸京观筑。惊磷明灭艳青红，长夜冥冥听鬼哭。贞观年来歌太平，恩波直欲流泉局。丹碧楼台五云起，金身宝座聯珠纓。吁嗟死者焉可作，冥福全资大皇觉。茫茫苦海渡慈航，净土西天归极乐。贝叶翻经白马馱，神人现相严撝诃。法师上奏帝颜悦，倾心事佛真如何。龟趺螭首穹碑树，諫议文章重回护。书丹彷彿虞永兴，独怪当时名弗署。银钩铁画覩斯文，摩空鰲背愁斜曛。片言诛意凛斧钺，遐思渺渺凌秋云。自古明王严放伐，汤武吊民宁嗜杀。往事悠悠且莫论，要与书家论波磔。

题山水图

我家四明东海上，万里空青高叠嶂。云霞变幻见天机，谁把丹青写形状。三神蓬岛杳茫中，佳期往往来相从。玉佩玲珑散寥廓，凤箫龙笛鸣春风。试与临流弹绿绮，洗净平生尘俗耳。曲终袖出书一编，妙诀人间夸不死。十年为客向长淮，荆山涂山屏展开。帝乡汤沐视丰沛，仰睇翠

华天上来甲第楼台若云起富贵煌煌耀金紫凭谁共赋考盘阿布林青鞋丘壑底童君高住
五老峯卧看瀑布悬晴空扁舟一叶独归去欲招李白巢云松笑我天涯空落魄已觉丹砂负
然诺尺书渺渺附玄鸿为向山中间猿鹤

洪武癸亥九月二日与府学赖先生登宋相王钦若墓既归作长短歌一首以示

峩峩独山南萧萧白杨树石竈呀然如水深云是宋相王公钦若墓相君逮事真宗朝千载云
龙夸际遇平生赐百结胡然饱奸妬寇公社稷勲谬指为孤注西戎南牧正纷争澶渊雪耻当
用兵逆探上意纵谈说天书封禅夸太平大梁都城千骑出来向西宫祠太乙肆令玄教逞虚
无栋宇煌煌耀丹碧吁嗟匡国无良图九死岂足湔余辜君恩勅葬纪勲绩断碑扛去空龟趺
三百年来子孙絶翁仲无言遭发掘玉鱼金椁出人间伤心忍作狐兔穴石为羊虎卧苍苔斧
凿巉岩留半折春深谁复酌寒浆杜宇斜阳恨流血老翁耕种携鋤来为言过者休悲哀沧海
桑田今几度金谷铜驼安在哉君不闻巩洛山陵一抔土渡江南来荒草莽攢宫古木常冬青
越客扳号泪如雨

墓碑夏英公撰予来时尚可诵今不复存矣题云山图

客行过淮甸示我云山图云山彷彿异人世恍如过海登蓬壶芙蓉幻出青天表苍狗白衣随
缥缈层峦叠嶂深复深人家半出青林杪是时村南春雨多瀑流万丈如悬河岩头花开烂如
锦幽栖奈汝山翁何山上长松山下屋卧榻氤氲清梦熟云深天地两茫茫遥听林丛啼布谷
山田硲确随卑高及时耕稼呼儿曹西成酿秫作春酒太平击壤歌唐尧我家四明岩谷底赤
城天姥犹尺咫兴来欲访安期生指叱烟云平地起十年来作淮山游濠梁渡口呼庄周八公
命驾屡相顾琼璫玉佩凌清秋闻君久住咸阳陌走遍终南历商虢都将形胜属画师携向鄮
城江上宅山中西风吹桂枝白鹤叫啸玄猿悲还君画图三叹息岁寒问我何当归

同郡吴道延氏宦游长安以事过濠梁求予云山图诗用述鄙怀後道延入覲京师出示此图
乃知为其母而作读诸公赞咏有泚其颡矣信手书一絶而前诗不忍弃也复缀诸後云

题曲江饯别图

昔在唐家隆帝业仙李盘根夸奕叶曲江形胜冠名都一镜光涵浪波帖香花节候春日低楼
船载妓如城围公子千金买歌笑酒酣拔劒鱼龙飞太平无事息争战科场妙中穿杨箭金榜
题名鴈■〈土答〉高同向江头赴秋宴是时南苑集旗旌君臣岂乐接镐京霓裳羽衣教法
曲千门万户皆新声鼓鼙动地渔阳变旧日繁华都不见白头愁杀杜陵翁春日潜行泪如霰
桑田悠悠知几年大明赫日当中天方面专城分阃寄红莲幕下罗羣贤吴君惯作都司客啸
歌曾醉长安陌春深修禊濯冠纓爱看江心明月白青云咫尺步亨衢鹏抔万里真雄图羣公
宴饯集冠盖酒酣击碎青珊瑚笑我淮南两相遇矫首咸阳问亲故曲江愿得与同游怅望西
山愁日暮

题青山白云图系广信府同知方公所藏

海国千山列屏嶂万叠浮云滚涛浪云来云去本无心苍狗白衣幻形状长松密竹翠模糊萧萧清籁真笙竽人行问路失南北恍惚越海登蓬壶山中伊谁结茅屋考盘独乐歌在谷酒酣笑倚两崖高万鼓雷鸣泻银瀑琅玕结实瑶草青服食自可通神灵玄猿白鹤成伴侣朝霏夕霭秋冥冥我家四明山水窟十载长淮空窃禄生来懒性合幽栖看山看云嗟不足近来船过严陵滩楼台缥缈虚无间环佩玲珑出林表俨然天上非尘寰黄堂仙人政多暇彷彿乡关阅图画要覓商公与赵公妙笔千金阅高价

送陈大舍

藕堂古云耕战地孤■〈土答〉重重碧云际山川鍾秀产英豪将相公侯夸富贵而翁亲际六龙飞胸中韬略皆神机当年介冑阵前决凯歌夜踏明月归向来介冑云南去花角羣蛮争欵附圣恩建节表殊功万竈貔貅旗鼓树太平鲸岛无浪波吴山满眼浮青螺佳儿省覲拜庭下辕门衍乐当如何彩舞翩跹五云起苍玉盃深浮綠蚁雅歌我欲赋南陔海内同称陈孝子

题胡仲厚先生山水图

范寛笔法夸神妙安定胡君契深要向来赠我山居图恍入蓬莱循海峤只今远作灵峯游层崖叠嶂涵清秋浮岚散尽雨新霁万丈倒挂银河流金碧楼台半天倚下视人间深涧底南扉北崦近相望苍树重重碧云起危桥两两如垂虹跨驴策杖纷相从林深谁怜采樵者双肩轧轧悬崖重浮世光陰去如电往者忧劳来者倦异乡相见只须與礼俗人情空恋恋十洲三岛沧溟天梦回夜半闻啼鹃故园松菊幸无恙挥毫欲赋归来篇寄语当时老丘壑百岁襟期宛如昨安期羡门如可招便与山中侶猿鹤

胡仲厚先生画林塘读书图

按宋宣和画谱河阳郭熙为御画院艺学山水寒林宗李成法得云烟出没峯峦隐显之态布置笔法独步一时後学莫及也吾乡胡先生仲厚为吾儿东昇作林塘读书图形胜宛转识者谓其有千古无穷之趣使郭河阳见之宁不以伯仲推之耶因题诗其上以寄意云

我家住近荆公台天光一监林塘开面面青山如画烟云卷尽空翠来岸头种花还种竹风日芳菲艳红綠珠帘卷起倚危栏生意欣欣快心目锦鱼羣跃双鸥飞俯仰上下皆天机世外游尘飞不到石牀但听声唔呶客来试问茱阳派通德门前长书带青春满架邳侯书觚棱云飞蚤与蚤衣冠想像南渡时琼枝玉树相光辉百年祖考见余庆佩衿济济越庭帙笑我平生探简牘伯仲翩翩期嗣续寒波青影落孤灯风雨潇潇夜深读科名作教淮海壘升除又上江西船玉溪冰雪大於斗广文座冷怜无羶脊令原头声更苦手足摧残愁肺腑不才幸有两男儿玉臂云鬟吟杜甫熊儿欲遣寻归途驢子不来将奚如吁嗟文献犹一线莫令先泽俱荒芜田园欲归看图画胡公胡公神变化何时共坐秋水深诗酒襟怀悦情话

送董理问复职

镇州古称成德军包括燕赵连并汾山川间气产豪杰风云际会成殊勲昔在完颜贞佑日汴蔡南北权驻蹕幹难河上气如虹还塞争传真世出横戈铁骑歌来来两河扫荡氛尘开上将同推藁城董尽忠竭节诚雄哉有子承家諡忠献渡江南来经百战幼孤入覲版图归凯奏彤弓赐周宴文阶武秩夸双全满门金紫何蝉聯百余年来天运改名家乔木青云还公子翩翩富经学河汉天高翔荐鸛除官远向闽海堦玉雪襟怀倚寥廓天颜入覲昭重瞳归来独跨连钱骢笑我黉宫欣一见论谈往事来清风南州狱讼计千百两造情由须别白岁时有暇拜先祠好向庭阶树松柏

又

通印子鱼珍味别石首蛎房同饌列南州海错不论钱公乎归来云日边闽国家家唤郎罢双引旌旗马前迓荔子丹红榕树陰薰风洒洒水雪襟藩閩清平民讼少鸛鵲呼名清梦晓碧箫频劝阿蛮歌问公此乐当如何

用王理问中秋韵

玉盘捧出水天暮霜雪■〈日晃〉然江海路官船面面启篷窗撑入溪流最深处梯空我欲招素娥广寒孤眠奈愁何吴刚斫桂颇惊恐仰天却爱清光多四海一家异风土王事不辞行役苦桁杨讞决镜同明檠戟森严趋閩府盛时乐育如成康仁恩叶律歌清扬桴鼓不惊刁斗静燕乐何愁秋夜长蛟川仙人富词藻诗酒情娱散襟抱旧时曾上虎蹲山笙箫曲奏人间好月光如昼夜如年天涯廓落心茫然愿骑鸾鹤竟归去罡风浩炁天清寒岂不见蓬莱瀛洲东海堦琼琚玉佩多飞仙

用前人青山白云韵

危岑削悬崖长林隐平陆萧萧曲径遶龙蛇千尺飞流深壑谷太虚元气涵鸿蒙日光倒射金芙蓉白衣苍狗时变幻举头疑与天门通山中羽人面曾识枕清流兮漱白石飞行万里只须臾谁道蓬莱沧海隔手招玄鹤骑白骡炯炯双瞳秋水波白日神游呼不醒洞门锁钥扃烟萝百岁光阴只瞬息历历云山长记忆画图移来方寸间试向林泉问遗迹

荅阳外史集卷九十六

卷九十七

●钦定四库全书

荜阳外史集卷九十七

（明）郑真 撰

○同年錄

十一月二十一日明州府以诸进士计偕京师设燕席歌鹿鸣而劝驾是日礼乐备具正位南向者上宾卫阍指挥僉事冯公某张公某坐西东向者漣省宣使汤公某沈公某省委官某卫镇抚某训导胡先生季弘赵先生斯盛为之主者郡同知刘公某通判王公某乡贡进士则郑真郭可学樊余庆黄梦熊顾厪吴振王廷直王用吉孙原仲吴伦陈希贡汪义方何操陈仲贤共十有四人由阼阶升列坐以齿以病弗与者汪瓚罢宴而归於是真口占絕句诗十首以贻同志云

折桂应须到广寒满天清露晓溥溥吾侪当为科名重莫作人间朽物看

鲁史春秋感获麟凄凉篋笥久生尘自知投老成无用空作乡闾第一人

十年剪烛向南窗敢向词坛筑受降今日藩侯亲劝驾爱看公府肃旂■〈施，童代方〉

华堂今日绮筵开济济衣冠进士来矫首遥瞻天咫尺五云红日满蓬莱

插花须向少年头苍鬓簪花不自羞醉後归来清梦远西风万里月宫秋

歌工奏罢鹿鸣诗拍拍盃行到手迟三岁宾兴朝典重诸公何以报明时

请得官钱十贯文化工赐与担头春长风送上青云路同作金门献颂人

千里南都忝计偕不容投老向茅斋文章即是经纶事莫道相如只类俳

三千礼乐擬天人金殿当头定策勲韦布总成金与紫好将功业报明君

萧萧风雨一编书正擬丹梯上石渠祸福总由天所定旁人嗤黠竟何如

○计偕錄（行程日记）

昔卢骧作西征记陆游作征蜀记凡山川道路风土人物远近同异历历备载而其年月时日亦所不遗後之人有考焉真忝以乡贡待选京师足之所经目之所见耳之所闻略记其一二至於情思所不自己者率尔见之咏歌言辞浅陋不足以贻同志始集以示儿侄名曰计偕錄云

洪武五年十二月二十日明州府命里长张孝礼诣诸进士家敦劝上道

二十一日早诣府中拜别同知刘某通判王可大各答拜期望甚至且谓用人之时解元先去可也遂诣先圣庙下祝辞云云

二十二日出甬东别亲友

二十三日别城中亲友拜辞府主殿下祝辞云云因举玦环乞灵卦辞以苏武为言有节毛终见汉君王之句

二十四日告辞城隍庙下见王叔载先生牀头再拜涕泪成别且以青云黄壤之说为赠至於斯文撰述獎厉期待尤见先辈忠厚之意

二十五日午後登舟夜宿西门

二十六日晚饭将戒行是夜三更泊高桥张循王祠下王宋绍兴中兴四将之一高宗为乌珠所逼航海幸台温王用隐士刘相如计驻兵高桥开门迎敌敌至拔寨而去遂为战功第一慨想旧事成诗一首

代马陰山来六飞向南渡北风吹黄沙播荡沧海暮维王奋孤忠甲兵虓虎驻贤哉刘隐君奇谋吐衷慄青野危桥横一战分胜负捷书上行在玉音多獎諭信史直笔书昭然勲烈着荒祠河水湄轮奂成朽蠹值兹艰难时谁能起颓仆我生四十年遗容仰平素计偕京阙游中宵宿霜露福祉思宠绥神灵祈惠顾轻舟暂时移踌躇弗能去

二十七日泊舟西渡吴进士始来同舟者郭可学陈希贡黄自强孙原仲陈仲贤仆从共十余人成律诗一首

轻帆飞去彩云还沙上人呼贡士船敢谓扶摇搏九万政须礼乐对三千风生衣袖寒相讶月透篷窗夜不眠矫首皇都春色近奉天门外听胪传

後舟王用吉汪义方樊余庆吴秉彝迤邐同行赭山风浪汹汹至文亭暮夜待潮成古诗一首

历历川途分悠悠岁华晚简书有程期去去未可返轻舟泝中流越山青在眼隐君近何如毋烦招折简

二十八日早到余姚与诸进士谒考试官刘彦质先生奉书为质先生长身修髯年登八十与先教授为友先生言往岁越守行乡饮酒礼吾与令先尊同燕席因问讯孙正父先生暨家兄动静具汤延坐论场屋事言闽人孙伯延已在第三名言者以其在前朝尝为进士遂以次而改伯延以为当然谢别而去甚称其文且谓其静退次谒王汉章不值阅堂上校官碑遂登舟晚到通明宿上虞河上有怀先壠成古诗一首

亭亭西罍山青乌发奇秘冈峦西北来龙虎相拱卫吾宗今八传妥灵有余地先人尤种德文献承世懿诗书插架横捧诵当弗坠科名诚偶尔何足绍遗志翩然京阙游控辞洒清泪森森竹树深永永泉石閤封殖在後人顾兹宁勿喟竭来百里余音容劳梦寐显亲在扬名不才何得致但愿早归来续嗣贻百世

二十九日除夕遇雨既过曹娥同舟皆起家想成絕句二首

是夜宿东关驿飞雪沾面衣为尽湿风雨舟中过岁除青云矫首望皇都布袍总是同年者江上还能送酒无

小儿捧饭祝添年应道爹爹在客船慈孝由来天所念瀛洲东望思凄然

洪武六年正月初一日早雪饭後行舟暮至越城下律诗一首

曹娥江上渡元朝瀛海家山望眼遥谩道花旛蔽绮彩谁将绿醕醉琼瑶碧厓影动云衣湿银界光浮雪片飘盛代衣冠朝典重九重神圣仰唐尧

初二日入越城见钱启予先生遂登舟出西门有怀旧事成古诗一首晚宿钱清江上

峩峩越州城古称勾践邑风流贺季真监湖有遗迹我行正月初俛仰记畴昔粤惟宋南渡衣冠浩如积穆陵居侧微名映金枝籍吁嗟保长家舅甥定亲戚天意叶人谋大雨遍南隰朝中官客来牲饌罗几席童丱双立侍英姿见歧嶷继宗入沂■〈氏卩〉冕旒正宸极大统四十年基图固宗祏桓桓史相君旗常书伟绩余参适逢辰勲封隆宠锡世运迭移推江山何历历过眼成慷慨清风送舟急

初三日早过西钱清埧晚宿西陵絕句一首

峩峩双叠翠云腰战伐英雄久寂寥惟有一钱刘太守姓名千古揭云霄

初四日风雨渡江寒气凄冽至新宫桥宿旧主人陈店其老姬言吾家代歇举人为省元者前有林温今有官人至夸为异云

初五日见李云仲叶教谕言杭学诸生入试事遂造学中见训导常凌卢三君子及金华进士

贖药与王生及閤汝賢处送书复到叶国亮监宅送书见其壺政云云

初六日到省中先謁左司遂引至堂上大參徐公命予独立去諸人尺余地且言揭曉时有酒相待但得省元亦可何皆不在耶觀汝年紀最长中亦在前有司为不愧矣李大參亦云有福气白衣卿相无疑遂命制貢士詩及甘露詩归成二首見後云云次見宪金杜公刘公庭坐啜茶且再論議訓獎甚至其可为訓戒者有石关尊父一事後見王经历茶歛而归是夜移宿王通判家

初七日到省房見典吏王修索严氏養素軒銘遂到學中見諸訓導求先人挽詩是夜雪

初八日早雪不出諸進士以詩藁見示遂寫養素軒銘令張里長送去

初九日雨出荐稿看所刊程文錄考官批語以凭給据盖省房紅卷为他人持去故也

初十日雨不出寫所中程文

十一日題王用吉所画紅梅送房主人王通判

东风有信过瑶台姑射仙人月下来底事不持冰雪操也将紅粉暈春腮

是日王通判以趙仲穆馬求題

十二日寫詩贊大參徐公李公

貢士詩

某等忝以諸生获与乡选有司敦劝计偕京師進拜省垣大臣承獎厉期待甚至敢率諸進士賦詩各署姓名齋沐上獻用以歌咏朝廷乐育之盛云

周詩久矣咏菁莪恭觀熙朝進士科蘇子可能忘永叔馬生終不负常何桂宮名送金書喜草閣功成铁硯磨礼重藩垣承劝駕春风不日候鳴珂（鄭真）

四十相將白髮新忽聞科詔下丝纶萬言策獻須當宁三載賓興豈乏人折桂已探明月窟看花还待上林春已知发轫从今日愿把丹心答紫宸（郭可學）

丹凤銜書下九天名科三載盛才賢薇垣日近光華接棘屋云開姓字聯鸛荐已应騰仕路鹿鳴还复侈賓筵讀書敢負平生志更待吹噓到日边（黃夢熊）

桂子秋風一榜開傍人还報捷音來敢云鸛荐騰霄漢空愧鶉衣出草萊喜動薇垣尊上宰光

聯奎宿聚羣才同年笑我多迂腐誰識丹衷徹上台（陳希貢）

科詔翩翩下彩雲萬方多士賴陶鈞三千禮樂威儀盛一代文章制作新
兔窟秋攀丹桂月
螽蟴曉宴紫薇春
茅賤士慙無補獨有丹心答聖人（孫原仲）

泰運天開日月明棘闈濟濟集羣英縱橫禮樂三千字浩蕩風雲九萬程
秋榜鹿鳴承錫宴春風
鵷署擬聯名不才何有匡時策千古令人媿賈生（王用吉）

九五龍飛帝業新玉班簪綬盡儒臣棘闈校藝三千士桂籍題名四十人
鶚薦書成云有路
鹿鳴歌罷座生春
奉天門外肅傳日
擬着衣冠拜紫宸（吳倫）

盛時有詔舉才賢奎璧輝輝煥八埏上相恩光垂藻監諸公文采燦瑤編
鹿鳴萃野春聲洽
花映宮袍曉色妍
咫尺龍樓承寵渥不才何補聖朝天（樊余慶）

聖代新開進士科紛紛俊造欲如何高攀丹桂秋風遠坐對青燈夜雨多
仙仗擬聯鵷立署
華筵曾聽鹿鳴歌
五雲門外承恩日
佇看珊珊響玉珂（汪義方）

天子文明并帝堯棘闈采擇及刍蕘衷私未有涓埃報寵渥先承雨露饒
喜聽鹿鳴來畫省
暫隨鶚薦上青霄
書生何有匡時策
會聽鳴珂候早朝（顧璜）

天上煌煌耿璧星賓興有詔待羣英秋登棘院紛雲集春宴槐庭聽鹿鳴
一代詞章成制作
百年禮樂屬文明
致君堯舜須賢佐
會見蒼生頌太平（何操）

盛世文明照上台誕頒科詔聚英才上公喜借薇垣重多士欣逢棘院開
寶玉千金諧美價
錦機五色詫新裁
計偕已覩皇都近
欲頌昇平媿不才（吳振）

天開文運耿奎光大比賓興總俊良四海還宗周禮樂百年復覩漢文章
雲開畫省光華接
春滿金城雨露香
自媿不才無寸補
願將忠義答吾皇（王廷直）

天開文運耿星奎多士紛紛聚棘闈芸草光浮青竹簡桂花香染碧雲衣
百年正遇風雲會
千里還承日月輝
見說上林春似海
杏筵笑看錦芳菲（陳仲賢）

甘露詩

某等忝以鄉試計偕京師進拜省垣大臣承命制甘露詩謹率諸進士同賦各署姓名齋沐上
獻用以詠歌朝廷嘉應之盛云

聖皇盛德動蒼旻湛湛神漿慶澤新仙掌不須夸漢苑絲囊何必詫唐人
雪脂色瑩琮螽蟴滑飴
蜜香傳寶瓮
春想見內朝恩
遍及洋洋歌頌藹楓宸（鄭真）

九重天子正当阳丹禁曾看玉露凉汉史纪年歌有道唐人祝寿庆无疆词臣应喜分琼液尚食还传进玉觞盛世太平端有象敢将直笔着祯祥（郭可学）

圣皇盛德动苍冥两见锺山玉露零絶胜金茎擎碧汉还看宝瓮贡瑶廷九原脉脉融甘醴双阙辉辉现景星盛世祯祥纷莫数史臣转载简编青（黄梦熊）

九天甘露降溥溥应作人间异物看不美蚩方来宝瓮絶胜云表捧铜盘鹄班已遍琼杯赐黼座还传尚食餐下土也应沾润泽便须凝颂上朝端（陈希贡）

圣德明昭日月齐九天零露玉淋漓金盘晓色分琼液宝瓮春香冻石脂喜见两年沾惠泽愿均四海洗疮痍太平气象逢今日自媿无才叶颂诗（孙原仲）

圣化流行海宇安祯祥已得两回看脂凝仙掌神浆滑香满清盃玉液寒万里银河秋湛湛九重丹禁晓溥溥太平气象称歌颂自媿无才沥寸丹（王用吉）

圣皇盛德动苍穹零露灑灑下九重喜看琼脂凝柏叶从教金掌湿芙蓉班行宠赐玻璃碗尚食香传玛瑙钟太史定应书直笔黎民从此乐时雍（吴伦）

蔼蔼瑶天晓色晶纷纷甘露湿珠璣香浮细雪凝来重味比甘飴分外清正是尧廷来宝瓮宁夸汉苑濯金茎谨身殿下衣冠集想见称觞贺太平（樊余庆）

圣皇布德被穹苍天酒淋漓下九霄太史备书青竹简侍臣上颂紫宸朝香浮宝瓮神浆滑色莹金盘玉屑饶泰象昇平先有兆雍熙还复覩唐尧（汪义方）

圣皇盛德洽华夷甘露嘉祥奏玉墀色炫金盘浓似酒香传玉食美如飴景星已见辉双阙嘉麦还看秀两歧行听讴歌兴比屋陶唐政治见今时（顾璜）

太平治象格穹苍两度神浆见帝乡尚食捧盃呈沆瀣词臣执笔纪祯祥松枝柏叶同今古仙掌丝囊陋汉唐指日凝看麟凤至万方歌颂乐时康（何操）

圣德无为被八埏纷纷祥露下瑶天寒香上进琼盃洁晓气轻浮玉珮圆共使羣生沾润泽从知万里格穹玄太平有象书青史何美前朝颂醴泉（吴振）

玉露溥空冻雪脂圣皇道德灿光辉日边湛湛秋初爽云表纷纷晓未曦想见琼盃分馆阁须知玉食奉宫闈书生目覩昇平象賸有诗篇上紫薇（王廷直）

圣皇盛德似唐尧甘露灑灑下九霄宝瓮还多蚩海峤玉杯曾进紫宸朝应知上帝湛恩沛解使吾民渴病消晓日鹄行承宠赐词臣执笔儗歌谣（陈仲贤）

十三日雨不止跋马图与王通判

十四日陰雨不出张里长自省中送解据来就以家书与之晚於街上观灯值雨而归

十五日入学拜先圣值金宪观射遂与末坐与三训导为别得先君挽诗册而归午後於用达胡惟中来访晚与诸进士周旋街上远近高下灯烛荧煌光明如昼口占一诗为之怅然

沙糖米果荐时新今夜吾家少一人客路钱塘相望远小儿灯下问慈亲

十六日到省房催船因到吴山城隍庙暨梓潼祠其籤竹系咸淳年造因问二籤先凶後吉有花锦到平川之句门外宋碑一通载贾太傅似道舍田事大概言神旧祠在蜀中自蜀破後士大夫顺流东下者於行在吴山立祠开庆中太傅督师江上时向士璧驻夷陵北师南伐太傅命士璧援忠南士璧乞灵於神神托巫言看取车攻七月诗士璧曰车攻非七月诗也神言後当有验既而士璧断桥战胜宪宗晏驾太傅班师穆陵书车攻以赐正七月也以为灵验之碑盖高尚书斯得撰陈文龙常楙书篆其序事措辞俱有法度盖宋季文章之杰者碑作於咸熙九年时北师已在江上边报日闻而士大夫犹从容文字若平居无事者可为一慨至於终篇大致指先元为寇为敌然而归附百年过而读者固多而无有碎毁之者其亦未尝有见者耶

是午与原仲至江头访王子远饮酒面且附家书晚与诸进士周旋街上口占一诗

星河移下九天来朵朵金莲遍地开风外玉环声杂遶定应仙子降瑶台

十七日雨与诸进士买舟出北关门登岸过杨左丞营慨然有怀古诗一首

长营何盘盘云是苗獠洞悲哉杨将军纷纷甲兵弄劒粧白玉鐔马鞍青丝鞚短袴百褶裙前
锋夸勇衆战功称上多胡为恣贪纵人心失所归地险焉足用祸机暗中发喧然强敌鬪旁徨
欲何之宛若虫鼠瓮尚能不辱身一死诚足恟伯气久消歇颓基荒草葑我行寒雨中尘沙深
没■〈革邑〉过眼阅盛衰春风吹过梦

十八日以不得船钉靴步入省中往返三十余里劳倦之甚

十九日晴复自北关门入省中索船帖晚宿馆伴余安道家

二十日得顺带船帖以军粧船迟缓不及遂议买舟

二十一日买舟宿德胜门外是夜雨

步出北关门风云壮行色草枯荒垒深将军有遗迹十年兵甲余人烟渺萧飒际今明盛时车
书成混一儒科急需贤山川记游历买舟问前途风波如矢激

二十二日飯後戒行

二十三日舟行崇德界中吳人多以船為家成詩一首

吳船輕輕泊淺沙春風水上長為家吳娘少女雙髻丫浮生不解蠶與麻隔岸兒男十餘歲慣看波濤作平地船頭日日兩相看船上招呼作夫壻夫壻不比輕薄兒風雲千里長相隨明日掛帆向京口擬向江樓共沽酒

二十四日過崇德縣成律詩一首

扶桑日出曉冰消滄海東州望眼遙孤堞云低開百室夾河水滿接三橋樽筵歌舞繁華歇兵甲紛爭俊傑銷老嫗舟中作吳語官錢四百荷相饒

二十五日雨中入嘉興城學中見鮑仲孚馬新仲二先生馬先生贈羊背皮官酒二瓶與諸進士共享作古詩三首

嘉禾古名郡春秋稱槁李遐哉烏喙徒紛紛兵衅起薪胆良苦心足洗會稽耻勝負勢不常聖筆昭麟史功成不自安安能謹終始扁舟五湖游千古高范蠡

曉憩北麗門高下望阡陌曩聞嘉禾生祲祥照圖牒煌煌宋阜陵名藩記潛躍懷哉崔府君神靈何赫赫寒雨從天來鳥鳴泥滑滑往事且勿言吁嗟遠行客

恭惟陸宣公異才鍾間氣浩蕩風雲期君臣魚水契奏牋千萬言正色抗廷陛風流今尚存像貌嚴享祭我欲往拜之風波恐留滯絲綸五色文千古有余意

二十六日過太湖七十二祠入旁出湖至蘇州入城過鶴山書院因訪魏俊民彥莊先生書院已廢惟門樓岿然獨存其文靖諸孫四壁蕭然所見彥莊族兄好古略言書院興廢之由問虞學士所制碑則斷仆為戍士擡去已久转过一巷造彥莊家不值過三讓至德廟迫暮不入為之悵然出閨門失船所在遂訪本地鎮撫借宿僧舍

二十七日登舟而行賦懷古一首

闔廬城上姑蘇台東風三月春華開華車紅幃輪轍動滿街人看西施來傾國傾城好顏面笙管酣歌情戀戀卧薪嘗胆良苦心誰道強鄰有勾踐三千鐵甲聲如雷重重樓閣飛塵灰黃池霸氣盡銷歇甬東乞死空徘徊往事悠悠竟千古豪傑紛爭何足數假王來卧齊云樓傲睨凶強卒為虜只今疆宇歸聖明鼓桴息警風烟清上國輸肝天不遠東風一棹扁舟輕吳中山川看春色美人不見空相憶尚憐三讓有遺風江上黎民歌至德

二十八日早到無錫縣

二十九日晴至常州入城出西门登舟

吴船团团如屋里数尺芦帆挂烟水船头乌鹊声喳喳纷纷行客青天涯天涯怅望知何处玉京咫尺无多路天风杂佩鸣琼瑶云中仙子纷相招沧海瀛洲重回首莺燕春风自花柳夜深千里梦还家山妻抱子愁窗纱

三十日舟行常州界是日风水如驶行百余里成海堤一首盖临行孔昭兄所命也云云

二月初一日陰飯後到丁阁既登岸以王仆失物转去船上寻索遂独看行李王仆既至而诸进士已前行矣既而王仆辞以担重予分背席包行四五里许得见诸人同税车子各载一箱至於乡三十余里所过无高山而平冈远绕山田野水参错掩映夹路新松长可五六尺许远近高下苍翠蓊然时日已暮人踪希絶四望无际遂至埠头寻宿农家夜半风雨大作愁思不寐遂成古诗

舍舟问前途长天正寥廓平冈周四围隐隐若城郭山田随地成野水浮空濶我行随辙迹犬牙路参错仆夫已云痛顾步前复却买车载行李崎岖经涧壑前登松林重飞来双鸛鹤人踪何悄然同行叹萧索黄昏扣人门铺茅暂栖泊夜深寒梦醒愁听风雨恶

初二日雨不行

初三日自於乡买舟主仆二人用三百六十文盖自德胜坝起程用千余文而行囊已云罄矣

初四日至京师小南门登岸买饭而食店中暂泊行李夜宿罗信言官舍与楼知县汉原同宿

初五日移宿陈知事叔明家遂造部中

初六日雪中到部投供状詹吕二尚书公略问所业

初七日雪中到部见乡人王敬中蒋子■〈术上灞下〉及陈廷学夜宿信言所寓时楼汉原将官肇庆高要知县以诗留别信言遂用韵以赠

碧云卧蓬岛共说观光好偶然遇计偕悠悠即长道东风春及时望乡渺天涯故人幸相见足慰千里思楼公世家子文献谁与比炯炯岁寒心冰壶贮秋水年华四十霜作县游南方轻车度梅岭山川鬱苍苍流光若飞梭此别当如何愿言树声教江汉传讴歌

初八日到部中有旨以举人年少者於监学培养山西十五人瀾江十九人乡中孙原仲何操吴振王廷直汪义方吴伦陈仲贤皆在其列见奉化知县洪某因附家书

初十日入吏部见马易之子及林原公恭

十一日入吏部值雪而归

十二日大雪笔砚成冻送诸进士入学见王彦南夏景文二先生彦贞言孔昭所索文字候成寄去

十三日雪後寒甚郭可学陈希贡黄自强来就歇

十四日雪霰交作寒气益甚缺

十五日为人上天师求籙其词曰

彩云深处鹤翩翩星弁霞裾拥汉仙中使承宣催玉佩礼官奉旨秩琼筵篆炉香爇三天启金劒光开七宿悬下土皈依今已久愿求宝籙养残年

十六日雪中杜元亮来得家书

十七日入吏部再点过

十八日夏尚忠来得家书李云仲言别因附家书题赵贵伯扇面一首

千里京华客青山入梦来抱琴归去早流水认天台

十九日到国子监宿罗先生所寓

二十日乡中诸友入试吏部诗题甘棠首章书极之敷言是训是行以近天子之光至为天下王易飞龙在天利见大人诸友文皆可读

二十一日陰晴题梅一首贻陈知事造都督府因见王伯恭遂入吏部

山人岁暮雪中归折得春红第一枝莫作寻常桃杏看调羹正在太平时

二十二日过神策卫因观虎豹豺狼孔雀之属

二十三日入吏部与徐尚裡叶有常罗振初郭可学游蒋山登宝公■〈土答〉问一身大槩得八十籤云宿雾浮云蔽日明回风扫荡迴然清共欣险难今消散事灭安生福可膺寺僧以为吉卦■〈土答〉系匡正宗所造周回深邃清气逼人大士金铜为之被千佛绣衣登其■〈土答〉者生敬想次入崇禧寺见西番所谓帝师者下山驻二碑亭有李阳冰石篆宋孝宗御书张魏公撰宝公行业虞黄二公碑文二通其外一碑亭有赵世延虞伯生所着皆在载碧珠在栞铄事然求之钟上则无有岂岁月既深为铜花所蚀耶

二十四日与朱德常相遇德常以公事暂寓西华门因过其处

二十五日定海某主簿行附家书午後与夏尚忠范敬中游天界寺周观画壁辉耀遂造国学而归

二十六日

二十七日乡人陈思礼等入国学举人至堂上点过

二十八日寻史恒可闻已归为之怅然遂造朝天宫登冶亭山问飞龙亭则毁弃久矣

二十九日夜宿舜言处

三十日

三月初一日忆表兄蒋升忠忌日为之泫然

初二日戎盟鲁许和来知崔先生动静喜甚

初三日与福建省元陈珪闲坐言本省春秋题两王所两公如楚其破题云覲王而霸业盛事夷而霸业衰珪系前朝淞江举人与周佑同榜旧名元珪

初四日遇江西省元夏元震治春秋年五十六岁其言试题两虎牢破云春秋予霸主之服貳始以责一国之失地利而终罪诸侯之紊王制其阙名饶季让云春秋罪诸侯之不能保其险而责诸侯之据其险其十八名刘季鹏年最少系公是先生子孙破云诸侯之失地固春秋之所讥霸主之据险亦春秋之所责其十一名陈贤云在已者其险不当失在人者其地不当专

初五日同乡进士顾厔除给事中因见乡人契旧自濠梁来者刘子中宗纪道善原之章起潜

初六日见卜元吉

初七日乡人试吏部春秋题于洮翟泉诗干禄百福书肇十有二州易八卦成列章

初八日送编修张思鲁庐陵张思鲁寓居河南以进士计偕京师授翰林国史编修官未及三月奉旨归庐陵上冢赋诗赠别期後会云

玉堂新赐上方衣江上扁舟许赋归想见芳筵成孝享青山宰木炫春晖

初九日见宋景濂赞善先生晚遇答禄御史知屠养浩动静泛论马易之及诗文遂宿王伯恭

家草屋二间卮酒留欸侵草一饭而去

初十日王仆病腹夜半呻吟不已

十一日

十二日入礼部见宋先生是日罗振初除济南肥城县主簿王振辰除平原县主簿

十三至十八日以来但为王仆所苦

十九日早访乡诸粮长与韩惟善郡公同宿

二十日

二十一日

二十二日

二十三日礼部谒贝廷仁诸先生不值

二十四日雨不出

二十五日到国学见赵本初钱子予贝廷仁诸助教

二十六日先君忌日以不得在家与祭涕泣呜咽饭後到部闻有中都临淮教官之除益重远想

二十七日到馆闻甫家某人死辽东妻守寡而贫云

荣阳外史集卷九十七

卷九十八

●钦定四库全书

荥阳外史集卷九十八

（明）郑真 撰

○濠梁錄

三月二十六日吏部尚书詹公奉旨注擬淞江进士八人为中立府所属教官盖以诸进士辞以不能居州县之职故优待之且以濠梁为国家兴王之地教育之职必慎选进士为之者欲其养成人才也於是中立府临淮县儒学教谕郑真首授是选洪基定远县教谕胡惟中五河教谕王景彰怀远教谕郭可学宿州灵璧县教谕陈希贡徐州萧县教谕既准所擬

四月初八日於指挥司请文引

初九日早衣冠入吏部谢别晚搬行李於王伯恭家候可学希贡同行伯恭馆谷三日复於信言处就宿

十二日早与信言为别饭後与希贡出北门伯恭令仆送行李至龙江午後渡江舟中口占一首

扁舟同过大江来浩浩天风泼浪开矫首濠梁三百里皋比掌教媿无才

既渡江至浦口巡检司批引遇巡检俞氏系同乡奉化■〈土答〉山人极蒙温存出示婺人姓某自牧斋记求为铭诗是夕风雨袭人景色凄然十三日早雨霁议买车以价穹不就予为仆人分背行包之轻者遂行希贡轻健追之不及道逢乡人毕子方王用和等至五十里宿歇十四日行滁州界中作古诗二首

长淮古形胜山川何远哉凌晨驾言迈浩浩风云开十年兵燹余田庐尽蒿莱居人事烟火相逢絕嫌猜俘囚亦何者累累有余哀同乡异颜面问我南京来教官固多幸所媿非贤才

莘莘冈上石累累道旁堠客程间劳逸於焉憩奔走空林人迹希垣墙穴狂飈荒凉抚遗迹尚想承平旧沽酒御渴饥仆夫频问扣前行沙路湾瞥然雉飞雘

是日暮至滁州城下问军舍宿歇适希贡亦在沽酒共饮有於滁城河新得鱼者买而烹之用以侑饭劳苦饥渴之际觉其味絶甘美夜梦王叔载先生借■〈彡夔〉于山学士文集予答

以马易之家有之觉後不知所谓口占二诗为之凄絕

蓬莱海上别经年星斗离离夜满天梦里不知身是客文章却詫玉堂仙

牀头拜别思离离千载斯文付与谁客路滁州风月夜梦中祇似在家时

十五日自滁州东门起行望琅琊山近在咫尺土人谓醉翁亭遗迹尚在慨然成诗时希贡奔驶而去自是不复相遇矣

峩峩琅琊山近在滁城东人言醉翁亭余迹荒榛丛粤昔承平时淮海消兵戎风流贤太守宴游日从容座中尽冠带谈笑生清风喧然觥筹错宁畏樽罍空酒阑衆客散鸟声斜日中雄文纪苍石山水同无穷肆令後千载俛仰欧阳公冈峦一长望佳气何葱葱灵飈飒然至彷彿精神通

午後二十里至清流关关内外左右两山迤■〈迤里〉相对中夹清涧滁州诸山此为最高当冲要之地故为形胜大槩如吾定海凤浦岭而危峻不及岩峦坚硬如湖州石有宋淳熙绍熙间名刻淳熙磨灭不可读绍熙则赵思宰与太守莫洸以虑囚来游纪岁月後一石则莫太守劝农复来刻诗其上诗云病起衰翁形似木情多老叟醉如泥麦残雨剩水鸣陇月里农忙云破犁溪柳带愁知客意山禽解事向人啼明年此日花时节我亦东归君亦西关下小沼广不四尺深不二尺而水清如醴尤甘冽有元皇庆延佑间达噜噶齐玛哈穆特以劝农至此觉石上微润意有泉源命掘之果得泉因甃为沼以济行者之渴仍刻石其中此皆有志於民社而图为不朽者也欧阳公云昔宋太祖以周诗破李景兵十万於清流关下生擒其将皇甫晖姚凤於滁东门外遂以平滁即其地也慨怀旧事率尔成诗

峩峩清流关形胜壮淮甸南来入江海北去通颍汴粤昔五代余诸侯日酣战蟠李有余技遐陬寢席奠设险御中州纷纷甲兵繕传呼点检来威声炎火煽良将致生擒面缚辕门献一笑滁州平凯歌锡芳宴肆令欧阳公登高情眷眷我行入濠梁居然腰脚倦前登最上头目力穷视盼前修有佳句凿凿苍石片风流今百年有如亲覩面临流一徘徊栖栖云物变仆夫催进程山风急於箭

是日宿山农家道有广德粮长家人怜予力倦为挑行李数程既得所寓沐浴酌酒就睡两足已成胝矣次日问程时蚕麦将成禽鸟上下作家家锻磨之声因起江南之想

黄云覆陇将登麦白雪盈筐已熟蚕山鸟争鸣人欲去离离情思渺江南

十六日行至池河驿复遇广德人夫顾挑担过大枪铺登山脊行十里复下平地过清涧铺复登山而行山中多檉槭木蓊鬱深茂四望无际下至酒家寓宿传闻山中有藁葬者是乡人卢义云

十七日行三十里而止

十八日闲良官吏自陕右来者迤■〈这里〉不絶多濶东故识若蒋均章董道传云

十九日到濠梁城外十里舖宿歇

二十日早入城道逢於用达先生入府学访梁先生伯益早饭继谒赵先生木仲遂见府县诸公至五月二日供职县令乐公以下毕集府学梁先生暨睢宁知县叶彝仲亦至同乡长者则卓枢司彦明倪都司可伯与周彦高夏敬中陈敬本祝文纪陈可明汪均保也

答孟教授见寄

瀛海家千里淮山客半年日餐荒学廩月给待官钱问道多琼佩游心有锦编故交逢谏议书枉满怀賸

老大成苍鬓悠悠四十年匿藏怜宝玉囊罄惜金钱礼乐天人策春秋法律编斯文当未坠随意掷金賸

附録孟教授诗

迁时罹重譴谪地度流年每就广文饭曾分司业钱资身无长物贮腹有残编欲写农书进难凭尺素賸

附録赵木仲先生和诗

垂老逢迁谪相看又六年屠龙空有技对菊笑无钱琴冷陶潜趣堂孤鲁叟编故人多念我垂意寄蛮賸髮短乌纱帽飘零属暮年还乡那得策买酒不论钱孤馆惊秋至新诗带露编应怜尔同疾离思绕吴賸

七月九日台州秀才戴起南以授真定元氏县丞过临濠与沧州南皮县主簿越人郑汝贤见过十日回谒而河间东光县丞陈鼎赵州宁晋县丞项真皆在二人亦濶彦皆年五十以上矣出除目知乡人夏阅景文授饶州浮梁知县王仲桓贞陕州卢氏知县方彦修浚州南平县丞史文可平乐立山县丞韩原礼贺州富川县丞乌择善开封许州偃城县丞胡惟喆归德鹿邑县丞李惠吉真定阜平县丞是日午後择善惟喆惠吉来明日早饭後别送至淮河上

内殿除官奏日开诸公衮衮尽贤才十年苦志垂编简一日恩光被草莱野涧晴波踰絶涧山低赤日冒炎埃同乡故旧多怜我为向临濠市上来

七月十三日早梦小儿复昇

驢子怜渠少依依梦寐频膝前从伯父乳下赖慈亲梨栗何从得诗书及早亲我如犹未死当见尔成人

十四日渡淮河谒前枢密院都事李子云得马易之海云清嘯集子云言易之大致甚的初易之以代祀海岳复命於京时僧格实哩以枢密院同知领军东蓟州易之以编修保充从事官後廷命枢密公移军直沽易之以老病军旅中艰於行履日以为忧子云尝譬解之子云未几以军事前去既归而易之已病风不能言矣盖医者不识症误为伤寒以承气汤下之大小便不知所出後易之有着作之除含糊微笑而已盖子云与之同居多视其汤药至死迄无一言戊申五月十一日也次日棺殮葬於静明寺栖霞亭松林中其友危於幃陈伯刚杨松实为用力遗衣散与力士所齎文籍事文类聚文献通考各一册为梓北山取去海云集及着作郎勅牒留子云家兵至内府勅牒付诸火子云居濠梁与予相遇既以海云集见贻且云其墓军旅数经恐已不可保矣

○出使錄

洪武七年甲寅七月十六日奉中京太守张公檄命於泗州虹县王庄驿盘量官贮米菽予不得辞次日渡淮河历虹县境六十里慨怀张魏公命李显忠出师事继而成咏

泗州跨长淮属邑名虹县在昔承平时民物实丰美迩来二十年适值兵革变广亩失耕耘连天荒草遍烟火茅屋低林深随隐现居然十里间突兀耸邮传忆昨宋金时封疆界南北民生百战余髑髅深水窟桓桓李将军提兵志恢复庙堂议金币下策甘屈辱奇功滋不成於焉罹挫衄谋谟纷异同悲哉诸相国往者战争场今实兴王地煌煌帝者居廷阙瞻象魏扶桑晓出日丹青焕佳丽父老对我言白髮逢圣际向来目所见恍惚如梦寐长淮古河山铭功书带砺皇家基壮图千秋并万岁王庄驿亭亭

王庄驿

栋宇如飞翬旭日晓东出黑白争光辉枌马噉刍莖振风一长嘶使者奉王命捧檄来如飞庙堂重机事山川急程期

苜蓿园

青青苜蓿园浩渺苍云重守臣奉上旨耘植资人功柰何秋月交阳日愁蘊隆既失雨露濡况乃伤螟虫骅骝待朝秣曷奉天驷供兹焉惧获戾中心鬱忡忡予生忝教席每媿朝盘空俛怀天地间生意无无穷抚事一长叹萧飒来西风

王庄驿吏徐永吉长沙人尝为湘陰县学训导谪吏於兹与予邂逅间历道汨罗遗迹及近代成败事即予画扇作诗以示予识其意遂用韵

淮上山川如画屏太平久已息边声驿亭借榻西风夜唤起在牀天未明
日落山西一片霞愁来有路不容遮秋风三径陶彭泽正待南归看菊花
北来有客正思家梦断西窗月未斜征雁不来秋欲老湘山湘水渺天涯
怜君苍髮已萧疎万里风云失壮图莫道长沙南国远秋深归擬问耕渔
用徐永吉六言韵

庭下秋风带草灯前夜雨檐花客路三千余里西窗梦里还家
影动月中丹桂香传径里黄花怅望瀛洲何处白云即是吾家

驿中书事示古驿丞仲彬

铜铃响奏候前驱王事恭承使者需晋国不须夸屈乘汉家何必数宛驹凉风庭院梧桐落早
日园篱苜蓿枯闻说山中传枣酿秋深肯寄草堂无

将归学中怀周彦高

凉风早已入衾裯半榻萧萧蟋蟀秋庖爨一瓢传客饕仓储千担唱官筹天低庭阙皇城近云
渺山川驿路悠明日振衣归去早隔隣呼语夜灯幽

洪武八年乙卯承奉府檄差委馆伴国学小秀才分教所属州县泗州三人温州孔希直士清
王吉保宗义支中思中邳州三人温州方季先金华杨思庆包宗达徐州四人明州陆文敏尤
恭彦戴庄陈孟雍宗穆廿二日於广运桥府仓谒太守张公告行廿三日给驿驿中题画三首

兰石山禽

荒藓石嶙峋幽花似故人翠禽枝上语遥忆上林春

红梅

一点胭脂晕玉腮分明仙骨换凡胎絶怜姑射山中客也向瑶池赴宴来

梅

山中忆昔友羣仙夜色如银月满天图画相逢成一笑岁寒冰雪想娟娟

是日午後问程行九十里至五河驿约二鼓矣廿四日饭後至龙窝驿一百二十里又一百二十里午後至泗州致命州学正陈楚宾置酒知州王某及同知节判来见是日宿学中廿五日早谒大圣寺於州学生端严家饮酒仍於学中早晚

大圣寺

百尺浮屠上碧空玲玲金铎响天风昼檐争讶琉璃碧宝柱犹夸玛瑙红莲座旛■〈施，童代也〉严像设范粧丹碧焕神功扁舟飘荡天涯客一炷炉燂肸鬣通

是日午宴州後厅遂别晚过龟山舟师言上有深井树屋覆之面构巨石击之闐然有声殆铜支析所耶泗州学训导郭某为予言泗苦水患故老相与立神以祀之以水为陰类故以母称後世附会有泗州大圣破水母娘娘之说此足以破千古之惑矣是夕星月昏暗风浪奔驰四顾茫然罔知所在登岸问居人以驿尚远抛碇止宿

青山如伏龟巨石压晴浪冈峦相起伏隐隐城郭状忆惟南渡余金戈严保障封疆南北分放歌一凄怆铁锁固支祁禹功千载上吁嗟水母称谁能辨诬谤

铁佛

弥陀色相本来空金铁何须火冶功莫似铜仙辞汉室潜然铅泪洒秋风

廿六日早行至洪驿驿计一百二十里饭後至清河驿计六十里又六十里至桃源驿访分教小秀才温州林式安严州徐汝玉知县殷某亦四明人因与教谕姜某同为谒见殷亦与县丞徐某答礼舟中且有鸡酒之饷廿七日早过宿迁计一百二十里太守王某与吏目某同出迓五骑同入内馆驿中廿八日早太守暨僚属同至置酒而别见睢宁知县叶彝仲复置鸡酒道旧而去圯桥

暮雨荒城二尺泥山人骑马过桥迟山川风土元非昔空忆留侯进履时

叹息秦坑一烬空谁知授受有儿翁汉家三百年天下都在残编断简中

黄河上衆小秀才索赠赋律诗一首

天子在位之八年春三月命国子生分教天下於是上舍生四明陆文敏尤恭戴汝庄陈孟雄入试春官中上考赐寒暑衣各二袭拜恩礼毕乘驿诣中都凤阳之徐州某忝教临淮奉府檄馆伴以同乡之谊赋诗以赠云

风流文采属英髦上国翩翩步武高日射丹山翔彩凤云开沧海现金鳌成均讲侍皋比座尚局恩承锦绣袍分教不辞千里远长淮一舸泛晴涛

廿九日五更到房村驿一百二十里早饭过吕梁洪登岸读赵吴兴所着吕梁庙碑其神盖关羽尉迟敬德云午後抵徐州州判黄文博出迓跨蹇入城宿察院西房

六月初一日入徐州学饭後与诸秀才谒指挥诸公因出南门登亚父冢千佛岩入黄茅冈循戏马台而回

黄茅冈头苍石拥野色微茫云影动千年亚父骨已灰莎草残阳卧荒塚项王本是叱咤夫凶强不义非良图咸阳三月火不灭归来却作彭城都鸿门玉斗散如雪举手空持双玉玦貔貅万竈困成皋奇谋弗遂身殒绝窀穸悠悠不复朝白杨夹路风萧萧昆吾铁冶资盗窃宝气宁复冲云霄楚汉纷争一抔土往事空嗟锋镝苦英雄半世死即休翁仲荒郊泣秋雨

戏马台（上有驻蹕亭以今上位所尝巡幸也）

彭城古名郡城南屹荒台吁嗟叱咤夫霸气何雄哉名雅不复逝悲歌有余哀乌江百战死余迹伤芜莱寄奴亦王者登高荐徘徊晋祚既已移老奸恣雄猜公议纷是非墨客诚多才於今天下平车书同九陔梯空一长望浩浩风云开岵兹驻蹕亭重望鸾车来

初二日早饭黄州判家午饭饶原德馆中陈希贡继至意气洋溢後会饮州厅至暮而回初三日会饮江中归与希贡诸小秀才酌别初四日早到徐州午後至房村

吕梁洪

大河西北来飞淙相喷薄岩崖刀劒攒神功伟疏凿舟师力挽絙顾步恐前却夷然脱险艰呼酒倾凿落中原疆土深尘沙藹冥漠冈峦相经亘隐隐若城郭清风何飒然翩翩下双鹤

峩峩吕梁山形胜跨千里乱石激奔流纷纷浪花起睠兹南北冲舟来纷若蚁仓皇卜安危樽俎设牲醴神灵古名将盛德百世祀精诚一念通惠然锡福祉共惟吴兴公卓哉古良史文章千载传矢言同此水

初五日早到邳州陈州判惟仁请早饭晚到宿迁驿见方继先而别至下邳旧城

泛舟下长河山川记游历荒城烟火稀尘沙暗荆棘忆昨汉运衰藩臣构强敌明星耀长戈震雷轰巨石智力相长雄危亡期日夕布也善解纷一箭中鸣戟阿瞞终不容辕门就维繫丈夫事慷慨杀身何足惜亟呼大耳儿缚虎怪绳急英雄荒战争浮云翳白日仰视天茫茫风波如矢激

挂劒墓

世情生死漫悠悠许与谁知死後酬珍重延陵吴季子劒光千古照清秋

初六日飯後到桃源驛見分教嚴州徐汝玉溫州林式安晚到清河驛阻風夜泊

初七日五更早行午到洪驛見分教婺州李希文阻風夜泊登淮渚神祠其神劉李二姓內有元朝加封官爵小碑刻一片鐵瓶系故宋物皆網戶得於淮河中香爐有大宋國號究而觀之蓋龍鳳紀元云

長淮浩千里形勝天下壯明神有攸司斯民聳瞻望棟宇嚴神栖輕颺颿虛曠彩旂欲飛揚靈舟駕晴浪紫鳳及天靈導迎紛下上精忱肸蠁中惠然錫嘉貺

初八日早行晚登（缺）山入人家問酒無有

初九日早到盱■〈日台〉登岸入學中謁教諭周伯虎及小秀才王宗善伯虎早飯遂登淮山書院在半山中凿岩石為梯徑山勢四重樹屋其上四望无际山光水色儼如圖畫下有玻璃泉凿作獅子口流注前後上覆以亭下注以池陂以磚石隔分之實為絕勝地米元章第一山真刻遠近傳摸外有四明鄉先賢名諱若林公某史公弥大皆以館伴金使至此又足以發當時南北之一概是日過泗州見二小秀才及學正陳楚賓而別

初十日至五河驛中驛丞孫行簡以詩鳴要至遠碧亭求題遂至南門入學中見同年友胡惟中五河知縣許某置酒惟中復以雞酒分餉十一日晚後回臨淮

十二日入皇城復命府中是夜宿國學

十三日歸洪

武九年閏九月奉鳳陽府檄齎擎諭旨至懷遠縣壽州六安州開讀是夕登驛舟發淮河翌日到懷遠賦律詩一首

長淮曉霧散氤氲海日遙升五色雲玉帛舊曾夸禹貢絲綸今復覩堯文佩瑤聲合朱衣動錦綺光開彩仗分宣詔廷墀癯老听山呼齊祝聖明君

是日開讀禮畢宴罷登舟中夜不寐咏懷古迹四篇

抱璞岩

抱璞當年泣卞和繽紛汨雨洒烟蘿篆文刻得先秦玺從此人間戰伐多

夏貴城

淮源桐柏來浩然滄海注荆塗界東西屹若龍虎踞憶昨建炎初六飛向南渡淮海為邊疆兵

家争胜负壮哉怀远军大将旗鼓树对垒彼何人使节严备御版筑劳人功用以宽北顾胡然
阳罗败凛凛生死怖束身归异朝衰老复荣遇盖棺公议定斧钺诚可惧白骨葬青山声名同
朽腐荒城尘土深草蔓亦多露我行览遗迹踌躇不能去

夏贵既死将葬有僧祝之曰今年八十三何不七十九白骨葬青山万古名不朽而世指谓吕
文德非也

荆山

荆山面长淮清光醺空碧众峰相低昂巨石作人立辉辉秋月寒霏霏晓岚湿泓然寒泉流玉
坑见陈迹世尘珍砮砮巨宝谁复识山空夜闾寥如闻卞和泣

涂山禹庙

淮海南来翠辇遥丹青遗庙倚云霄山川久据千年胜玉帛曾闻万国朝古柏森青深劒戟灵
泉浅碧莹琼瑶山前欲问神明胄草屋荒烟暮寂寥

十九日至寿春有怀旧事

寿春古名郡形胜壮淮甸士马精且强风寒当一面忆昔梁齐间封疆日酣战向背吁不常版
图朝夕变民生良亦艰流言竞嗟怨王琳亦烈士众情独趋羨谅其忠所事忍死艰难遍来奔
非本心假息命如綫胡然兵刃加恟哭同贵贱苍茫十里余呜呼淚奔轂尔来数百年纷争几
兵燹山川风气殊古人那复见仰视八公山尘昏双目眩西风天山来淝水疾於箭

八公山

八公山青孱颜岩崖■〈山含〉岬（阙）浮云白日时往还秋风落叶红飞翻八公山人竟
何往鸿飞冥冥不可攀河汉天高月华白如闻玉佩声珊珊长淮东西渺千里云涛雪浪淝河
水符秦倾国来百万貔貅甘送死草木风鹤皆晋军倒戈弃甲若山委腥风吹血川原丹雨湿
天寒泣殇鬼捷书露布俘累累东山碁奕如平时入门不觉屐齿折矫情镇物将奚为山川风
物成今古豪杰纷纷何可数东鸟西兔流年度苍鸟悲啼如泣诉人间成败本由天当时却笑
袁公路八公山天险据寿阳城深秋日暮晋代衣冠成古丘淮南宾客谁能赋

二十日夜宿安丰城

浮云苍野雨连空寒草凄凉一望中跨鹤愿随王子晋骑驴谁识杜陵翁征衫湿透潢污水短
席寒生破壁风可是董生多孝行客途犹喜过安丰

二十一日过芍坡

荆尸跨乘广睥睨周鼎器叔敖为辅相诸姬肆吞噬孰知芍坡塘乃为吾民利吁嗟不朽功斯足传後世长堤茫茫西风秋方渠曲堰通清流原隰粼粼犬牙错金穰〈禾罢〉稔黄云收堤上人家住林麓土塹围墙草苫屋一身只作屯田夫名隶旗头载军牒太平久矣无战争牵牛日日勤稼耕西成酿秫作春酒衣食自可全余生去年坐为官长累幼女鬻钱当租税牀头愁妇伤别离夜雨残灯背垂泪今年霖潦伤秋禾日食岁计愁无多明明天日照下土军中幸喜无徭科天宇秋高气萧索苕花芦花如雪白雉声格格饥鹰呼鹤驾入云飞帖帖我家本住东海头三年远作淮天游茫茫芍坡水六月荷花如锦绮惜予不向南薰来洗尽平生炎俗埃

廿二日晚至白沙城

天低旷野旧城空红叶飘萧晚照浓故老惯经兵革遍太原欣覩紫泥封

廿三日入六安州开读

草木城深晓寂寥风流犹复仰皋陶浮光西望羣山出桐柏东来一水遥汉阙勲臣终忌布宋家科甲尚闻焦（宋有焦炳炎兄弟）龙廷呼舞听颁诏礼乐从今识治朝

廿四日回程廿五日行六安寿州道中有怀夏原威

使命匆匆马上归淮天空濶思离离兔园有册频怜我甌石无储欲问谁雪白芦花堪作絮霜红柿叶好题诗独怀夜雨灯前客想像商岩咏采芝

廿五日遇雨过安丰止宿

野水寒深二尺泥斜风吹雨湿征衣淮乡城郭愁中过海国林泉梦里归沙马籥云宁复驻渚禽拖水不停飞荒垣咫尺安丰近擬向邮亭候落晖

廿七日回至寿州与国学生高允昇同携鸡酒至真珠泉

荥阳外史集卷九十八

卷九十九

●钦定四库全书

荥阳外史集卷九十九

（明）郑真 撰

○进牌録

洪武十七年三月初六日该奉吏部符文中外教官九年考满从本取正官考核三年一考必合进牌二十五日交割条记五月初三日给由到临淮县张泰考核本官任内行过事绩并无粘带不了事件及训诲生员果有成效允称前职知凤阳府事王某考核得本官经学渊源育才有道似此掌教允为称职七月初三日给张字一百三号纸牌一面及半印勘合批文限十五日赴部初七日早拜辞先圣与吴教授先生义孚起程府县学训导及衣冠士友暨诸生送者四十余人十里铺酌酒为别晚宿三十里店成五言诗一首

步出清流门疾风炎火煽游子慎行役中情见颜面同袍皆巨儒礼重斯文饯蚁香进樽壶饌羞列庖传握手劝加餐重来慰深愿芹边风月清青氍心恋恋进牌有常程云霄快良便行当覲天颜拜舞黄金殿

初八日至张家店铺憩陶叔睿家叔睿见其妻女出家酿烹鸡鹅早饭

驿路萧萧水竹村故人相见蔼春温通家自有三生契知己难忘一饭恩客况多年荒楚甸仙游何处覓崑仑举头但觉青天近玉殿行当奉至尊

是日午过红心驿炎暑少憩出逢王叔润陈仲良割肉沽酒及见县吏钱某驿丞姓某复烹鸡设饌夏原威适在座礼毕而别晚宿黄连店铺亭

亭红心驿翬飞耸华构使者咏皇华秣马纷在廐憩坐中庭深水泉汲寒螯秋暑盛余毒甘冽资盥漱故人幸相逢鸡暑延日昼以兹顿踣余欣然为相就

初九日自黄连店铺起程午过池河憩贺大舍兼善家酌以阿剌吉酒晚宿大山店铺

池河亘淮海沙水白弥漫天高风日清白鸟鸣相唤长桥卧垂虹行李若鱼贯邮驿官道傍丹青何炳焕使骑悬旆旗咫尺上霄汉我行慎修途赫日昼过半道逢贤主人恭敬何敢玩芳冽出名酒软香炊白粲宁知困踣余值此青眼盼意欲厚报之媿乏锦绣段踟蹰忍言别冉冉日云宴

大山

大山高崔嵬鬱为淮海壮诸峯如儿孙罗列星拱向云烟倏变幻昏旦千万状猛兽向人号
陡觉心神丧向来争战场弦歌敦礼让恭惟圣人出高视千载上朝贡集京华犬牙错平壤我行
崖谷深振衣一长望夕阳渺前林樵牧沸清唱

初十日早饭仙居涧店俗称牵驴儿坂遂过柳滩驿至大枪巡检司批引宿清流关下

梯空下山来云是牵驴坂顿踣险且艰有若度危栈山翁唤我来一笑捧双盞何人问出处抚
席觉颜赧老来合投闲尚复占仕版家山渺蓬瀛客行安得返试问仙涧居何当招折简

大枪岭

峩峩大枪岭倏忽十余里自通驿道来铲削平如砥恭惟神圣出夷险同一轨寨官司徼巡干
戚间弓矢宁知王道正文武合张弛太平衢路清乐哉远游子

清流关

清流关上云陰陰清流关下溪深深轻车快马日驰逐险艰殊觉劳人心旧日争夸走小月健
卒生兵纵超越南兵败走寺钟鸣落马桥边歌凯捷端明殿高云蔽天宋家帝业三百年南渡
区区保形胜中原北望空垂涎两淮遥指东西路颍寿茫茫隔尘雾太平尚忆战争时冈陇高
低暗烟树圣皇御极天下宁龙蟠虎踞朝神京周家岐雍汉丰沛向来险阻何足凭两崖壁立
苍石古山风萧萧不知暑西南更望琅琊山太守风流仰欧五

十一日行十里买饭至滁州过葛城驿憩午至茅堂买鱼沽酒行十里宿乌衣店

滁州翼翼滁水阳淮南古名郡膺运启文明大哉天子圣睠兹帝业居允为民社庆封疆隶中
都汤沐夸巨镇贤才集时髦三接承宠命宝马青丝纆累累佩新印既醉歌太平悠然播周咏

葛城

古城何峩峩云是孙吴旧诸葛彼何人史家纷莫究想当鼎峙时烽火严斥堠地利屹如山犄
角势相救北兵忽飞渡版筑计何繆荒凉泥土深纷纷穴狂飈过眼阅废兴俛仰慨宇宙

十二日自乌衣店行十里早饭晚宿客店成诗二首

今夕复何夕憩此嘉树陰明月自东出照见千里心美人期不来忧思邈悵悵山中万籁寂凄
凄猿夜吟风生海上波露下淮南树愁思不成寐耿耿河汉曙寂寥山谷秋怀人怅迟暮百年
一瞬间永言保贞固

十三日行十里至骆驼岭早饭午後至浦子口造江浦县学访林教谕子实题画二首以赠遂访武德卫知事陈可明乡友因见其父实日宾割鸡鹅具果核以待沾醉而归

题菊花一絕

采采黄花雨露繁秋香不肯老霜根朝京若得归来早篱落西风共酒樽

题小景一絕

为爱茅堂傍水开百年空老栋梁材山翁遇我还相笑何苦骑驴冒热来

十四日早饭後絕江攀船而登既渡跨蹇入会同馆首见孙大雅先生许廷慎给事遂泊客店诣殿廷仪礼司报名以见

承天门下晓闻钟一介臣微忝会同晚岁莫殫忠力报此生多幸姓名通旌旗高拥彤墀日笙管清谐宝殿风听彻静鞭容缓步佩裾声散玉玲珑

十五日早朝奉天殿行五拜礼既出诣通政司附簿遂至考功监进牌後署年月日姓名画字其公使一人引至通政司附进牌簿遂通名入吏部参官部郎官略问所由答云云部官王郎中等有言公辈来良误已改正符凤阳府矣

吏部符文趋进牌青云步武上天阶久推宗伯声名重多美宾僚德望偕俊造成周严黜陟贤良先汉慰招怀铨司公选明如镜却媿相如祗类俳

十六日

十七日入吏部进供状

二十日入朝奉天殿通门籍

二十一日随衆朝华盖殿行一拜礼给事中张某请为奉天殿早朝诗吴教授义孚云铜壶银箭晓星催金阙千门次第开云集衣冠瞻御座星聯劔佩拥仙阶韶钧近自中天奏象贝遥从外国来何幸小臣逢圣际欲陈美颂媿庸才陈学正楚宾云紫陌才分海曙红九重闾阖自天通簪裾列陛千官肃玉帛来庭万国同风合八音和舜乐云舒五色绕尧宫微臣何幸逢今日沾沐皇恩雨露中郑教谕真云钧天九奏合云韶万国衣冠候早朝日拥龙帷明袞黼风生螭陛飒琤瑤象琛久已通南徼干羽重逢格有苗正遇君臣千载会不才何以颂唐尧吴教谕焕云金铺鱼钥启晴雷闾阖重重次第开袞冕光浮龙日现箫韶声奏凤凰来衣冠载拜传胪唱纶綍多扬属圣裁自媿衰年谬通籍同聯鵷序上蓬萊胡教谕士安云钟鼓声催冠佩集五云深处望蓬萊六龙近自层霄出七象遥从外徼来礼乐熙熙昭治化衣冠济济总贤才黄金阙

下初朝散带得天边雨露回教谕周伯虎云金门九重启玉帛万方朝旭日明丹阙祥云会紫霄衣冠沾雨露乐舞奏箫韶喜有夔龙会赓歌赞帝尧

二十二日至二十六日并朝华盖殿

二十七日朝华盖殿是日单主事仲修来与之饮酒

二十八日正朝奉天殿有旨再朝华盖殿

八月初一日正朝奉天殿

初二日朝武英殿是日夕以上丁宿国子监

初三日朝奉天殿与赐早饭

早朝口占

柳拂星河露未曦扶桑天近烂朝晖武英殿下朝参散劔佩风流马上归

初四日朝奉天殿随班奏事

初五日朝奉天门是日赐早膳口占一绝

重重仙仗拥天阶玉座云移雉扇开禋祀告成颁福胙殽珍送出御厨来

初六日朝奉天门

初七日朝奉天殿赐酒饭

初八日初九日俱朝中右门

初十日朝中右门起居华盖殿东宫文华殿行慰礼赐粉汤馒头酒肉

十一日朝华盖殿

十二日朝奉天门题（阙）堂赠王通判复职

燕寝怡然衽席间彩衣长得奉慈颜翠帘影动微薰入锦瑟声迟白昼闲寿考久闻登宝籙懽娱况复对青山满城父老来相贺应为佳儿入覲还

十三日大朝奉天殿以祀先代帝王传制闻明经秀才听选文华殿年皆近七袞东宫意悯其老姓彭名敬初者捋髭须对以臣老当益壮遂除大理评事姓刘名伯原者对以为臣尽忠为子尽孝臣不敢辞遂除江西蒲圻知县传者颇以为笑

十四日朝奉天门

十五日上祭祀还宫朝奉天殿赐酒饭

十六日至十八日朝奉天门

十九日朝华盖殿

二十日朝奉天门

二十一日雨奏事免朝

二十二日斋戒免朝

送僧归莆田

袈裟惹得御炉烟笑指长江万里船老我欲闻真实谛多师久悟上乘禅墨花散彩经翻贝云锦生香鉢吐莲飞锡归来闽峤远一龕坐对月中天

二十三日至二十五日斋戒免朝入部进供状

二十六日行礼

二十七日正朝奉天殿百官谢成礼

二十八日朝奉天门入部中余尚书详询九年考满缘由令换供状

送僧归莆田

祖关直上透玄机妙悟真空万法归自许金绳开觉路谁将玉带解腰围山中出定双龕后阙下来朝一锡飞笑我亦居三佛地相逢客馆愿留衣

二十九日朝华盖殿吏部员外郎兰景芳延入公署共坐论经学文章之懿因求着监思堂记

三十日朝华盖殿入吏部进考核呈子

九月初一日大朝奉天殿司天监进大统历是日与陈楚宾胡士安徐景颜周伯虎入吏部说书而余为首唱余尚书问出处大略

初二日朝华盖殿

初三日朝华盖殿得吏部手本过仪礼司谢考核称职

初四日与徐景颜胡士安入谢华盖殿是日吏部王郎中令入内听除

初五日朝奉天殿千秋节与赐酒麴

初六日朝华盖殿

怡云轩

为爱山云似画屏禅龕花竹昼冥冥游心物外真无碍沛泽人间信有灵座席氤氲频入定香烟披拂共谈经纳交说有陶弘景日日扶藜唤启扃

见山堂

万叠峯峦气势高碧天空濶见纖毫岩花春暮飞红雨林树秋深滚翠涛帘卷晴岚留客骑履穿虚谷听仙璈知公賸得悠然趣采菊诗篇欲和陶

初七日正朝奉天殿入文华殿听选是日上御西宫大庖吏部尚书余公某引教官九人入见赐宴席上以菊绽西风露脂枫叶为题诸公应制诗凡若干首云云见後

初八日朝华盖殿既出就承勅监重写应制诗再进续御制首句二絶句云云见後

初九日朝华盖殿教官吴烈等九人就版房听选侍仪司序班姓吏部主事张某传旨召入九人於华盖殿东头赐宴叩头谢恩既罢各制诗凡若干首云云

应制赐宴诗什序

上御位十有七年九月初七日驾幸西宫吏部尚书臣余燠以教官九人臣吴烈等入见奏曰此皆九年考满称职者内三人以乡贡进士选余皆明经之士上命臣烈等坐赐宴席以菊绽西风露脂枫叶为题俾制诗以进既而御制诗首句一云碧梧叶老近秋霜一云西风蕊菊露微黄命各续成章臣烈等承命惟谨诗既成冒尘乙览上宣谕再三越二日重九上御华盖殿罢朝命侍仪臣某吏部主事臣张某传旨宣臣烈等九人上殿东阶赐宴席既罢臣烈等拜恩以出咸赋诗以侈盛事既録成什俾臣真为序臣真惟自古君臣际遇之盛宴赐之厚莫过於

周小雅鹿鸣之诗始曰示我周行终日宴乐嘉宾之心是人君待下之礼为甚至天保之诗始曰天保定尔亦孔之固终日如月之恒如日之升如南山之寿如松柏之茂是人臣报上之心为甚厚君臣上下交相亲爱此所以为成周盛世也仰惟皇上励精图治仄席求贤而臣烈等末学浅识辱承恩宠鹿鸣天保何以加诸粤在宋时进士及第上巳日与赐赏花钓鱼宴诗在当时以为美谈矧今明良际会秋高气清重阳令节雨露之泽系千载一时之逢者乎臣烈等惧不能报称万一安可不见诸歌咏以传示无穷诗凡若干首皆有思致而忠君爱上之意溢於言外其得性情之正哉而臣某以浅陋之辞亦得厕於其列何其幸耶按九人出处略同皆以流品常调升一等臣吴烈以凤阳府教授授宁波府教授鄞县主簿臣陈楚宾由泗州学正授南昌府教授臣朱景夔由陈州学正授东昌府教授臣陈孟敷由宿州学正授瑞州府教授臣徐景颜由颍上县教谕授卫辉府教授臣吴涣由泰和县教谕授安庆府教授臣周伯虎由盱眙县教谕授台州府教授人以为斯文之庆云九日赐宴诗九首

九秋佳节属重阳金阙天开乐事长丹陛晓班联玉笋银罍春酿赐琼浆酙颜频记乌纱整老鬓盈簪黄菊香惭媿小臣何补报山呼万寿祝吾皇（臣吴烈）

华盖殿前蒙赐宴赐筵特许傍金扉光摇绮席联云气色照龙颜近日晖白首一时成遇会黄花九日共芳菲文光此日应天上太史占星识少微（臣陈楚宾）

九日承恩华盖殿自怜蓬鬓已萧骚满斟绿醕浮金菊细缕红丝切蜜糕宴赐儒臣传特旨诗联御制受荣褒时人漫说登高去谁似青云步最高（臣朱景夔）

华盖重重宝殿高绮宴恩赐忝同袍琼盃满泛黄花酒玉饌香分紫粉糕共喜镐京成乐岂谁歌湛露擅风骚午门归步天街濶缥缈西风落凤毛（臣郑真）

菊节承宣到玉京叨陪燕集预公卿九重圣主施恩泽一介书生被宠荣奉勅屡传光禄酒分甘更锡太官羹独惭未有涓埃报但作歌谣颂太平（臣徐景颜）

君王开宴赏重阳特召儒臣预宠光玉盞频斟光禄酒雕盘满贮太官羊龙楼日霁浮佳气宝殿风清散异香报效未能惟祝颂皇图圣寿与天长（臣陈孟敷）

（阙）（臣胡士安）

随班朝舞奉天时宠锡欣逢九日期袞冕再升华盖殿绮筵特命太常司黄花盃泛黄金液白玕盘登白玉脂岂料（阙）（臣吴涣）

应制诗一十八首

菊绽西风

西风菊绽万枝黄佳色新沾雨露香令节近逢重九日要从金阙寿君王

露脂枫叶

丹枫万叶绚胭脂晓色瀼瀼玉露滋粧点秋容益奇特分明云锦出天机（臣吴烈）

菊绽西风

秋高万木俱摇落篱下黄花只自芳不是深恩私雨露宁存晚节耐秋霜

露脂枫叶

一着微霜已自红晓看重浥露华浓天工似与添秋色独向西风逞艳容（臣陈楚宾）

菊绽西风

内园粲粲吐金英分得清秋雨露荣近侍当筵承赐予寒香满泛玉盃清

露脂枫叶

宫树秋高玉露浓天阶深处锦重重人言二月花相似尽在皇家化育中（臣朱景夔）

菊绽西风

秋葩剪刻见神功风送天香入九重有勅御园迎风辇上樽玉醴拜恩浓

露脂枫叶

千枫高映绮袍红都在天家雨露中秋色常如春色好彩云深处锦重重（臣郑真）

菊绽西风

西风佳菊吐金钱正在重阳令节前采泛玉卮为圣寿天长地久万斯年

露脂枫叶

玉露凝寒枫树枝鲜鲜万叶染胭脂料知造物多深意要使春容满四时（臣陈孟敷）

菊绽西风

凉风从西来吹嘘苑中菊满树吐奇花粲粲照人目香浮白玉墀影照黄金屋托根固已佳异彼凡草木毅然坚贞姿晚节愈芳馥（臣吴景颜）

菊绽西风

清商布律荐新凉节近重阳菊正黄露下九天滋玉液风扬万舞绚金裳芳姿不免寻常色余韵应浮异样香上苑花神承渥重高枝奉献万年觞（臣吴焕）

（阙）（臣胡士安）

菊绽西风

赭黄相间锦红鲜香蔼天家雨露边愿祝君王千万寿花神长得奉樽筵

露脂枫叶

宫树丹红映锦袍灊灊露浥九天高秋光正似春光好解使词臣发兴豪（臣周伯虎）

续御制成章一十八首

西风蕊菊露微黄采采金英满殿香拟献圣皇天寿节莫言开早近重阳

碧梧叶老近秋霜玉砌阴清昼日长正是文明开景运喜闻鸣凤在朝阳（臣吴烈）

西风蕊菊露微黄天阙秋高满地香凝泛玉卮称万寿喜逢佳节近重阳

碧梧叶老近秋霜玉干凌云色愈苍鸣凤翩翩联杂佩飞翔应不恋高冈（臣陈楚宾）

西风蕊菊露微黄霭霭天香近帝傍满泛金盃成宴赏微臣亦得预恩光

碧梧叶老近秋霜云锦重重晓日光生意本来天造化凉声先得间丝簧（臣朱景夔）

西风蕊菊露微黄缥缈花香入帝傍见说花神承宠顾画栏深护翠云凉

碧梧叶老近秋霜五色翩翩下凤凰传得教坊新乐府试将歌管叶宫商（臣郑真）

西风蕊菊露微黄粲粲金英冠众芳承得九天恩泽重玉阑干外散清香

碧梧叶老近秋霜百尺乔枝拂汉长清晓九天红日照翩翩鸣凤集高冈（臣陈孟敷）

西风蕊菊露微黄秋艳盈盈出异芳自是培蓂深得地金英不老愈生香

碧梧叶老近秋霜疎影常分玉井旁喜有凤凰来止集翩翩仪羽五云翔（臣吴焕）

西风蕊菊露微黄粲粲金英喷异香正色居中深得所花开长得奉君王

碧梧叶老近秋霜照耀彤墀色焜煌会见春风承雨露绿陰深处宿鸾凰（臣徐景颜）

（阙）（臣胡士安）

西风蕊菊露微黄玉殿清秋阵阵香绮席长承天语笑繁华何必慕春芳

碧梧叶老近秋霜殿角陰移月转廊圣代承平鸾凤下卷阿亦得咏朝阳（臣周伯虎）

初十日朝奉天门起居文华殿行慰礼赐宴席

十一日朝华盖殿

十二日朝华盖殿赐酒饭引入奏除而罢

十三日至十四日朝华盖殿

十五日正朝奉天殿

十六日至十七日侍立文华殿朝华盖殿

十八日万寿节赐宴

十九日至二十一日随班华盖殿

题画送樊推官

通家气谊复同年淮海相逢日月天何日振衣归去早瀛洲海上问神仙

题昼送卢太守

重重金阙五云飞太守来朝赐宴归从此声名登史册斯文千古有光辉

二十二日华盖殿亲擢大小官四十二人臣真等九人咸预其列吴烈授潮江宁波府鄞县主

簿陈楚宾江西南昌府教授陈孟敷江西瑞州府教授郑真江西广信府教授朱景夔东昌府教授徐景颜初除某府为有见职改除卫辉府教授胡士安湖广汉阳府教授吴焕安庆府教授周伯虎台州教授

二十三日奉天门外榜示是日於吏部进供状送徐主簿奉职太和县

谬通门籍上金坡殿角清风送佩珂瞻仰共承天宠洽别离争柰客情多霜晴红树淮山晓风飒黄芦颍水波归见凤阳洪博士教疆新复果如何

二十四日随班谢恩於吏部进状并告假上冢

二十五日除门籍招单仲修陈叔明二乡友同饮入吏部令考历代东宫僚属史官典故

二十六日朝华盖殿

二十七日入午门关符契谢恩行一拜礼到考功监销牌

二十八日大朝奉天殿谢恩就辞给凭而出午後陈叔铭招饮

二十九日单主事招饮

题永思堂卷

堂上年年看椿树百岁栽培深雨露冰霜老却栋梁材凤雏切切空悲哀岁月繆悠长慕恋下土茫茫那得见悄然独坐中堂深音容恍惚思悵悵锦萱花开成五采高堂但愿春如海

题爱日堂

白日高堂春蔼蔼东望扶桑隔沧海堂上双亲七十余白髮朱颜长不改丰姿玉雪认佳儿云霞五色老莱衣百年鞠育恩罔极寸草欲报三春晖冠佩翩翩登上国仕版登名夸得禄笑看落照在桑榆鼎养欢娱当秉烛流光天上如飞梭浮世人生能几何床前定省夜复旦六龙整驾随羲和为语羲和须暂驻子孝亲慈慰迟暮举盃唤却蓬莱仙岁岁年年庆初度

荥阳外史集卷九十九

卷一百

●钦定四库全书

荥阳外史集卷一百

(明) 郑真 撰

○归程錄

十月初一日搬行李单主事家国监生陆好德韩护李侑同置酒为别晚过国子监见姜敬章田子真及龚司业先生题云山赠别图与徐景颜

瀛洲望近白云飞山雨初晴翠湿衣想见家人闻鹊报白头领取一官归

初二日自国子监归伏覲纳币礼容之盛前代莫及日午饭单主事韩护陆好德送出土桥一里挥泪而别行四十里宿管头记诗一首

末学亲承教职除南州还复送归途云囊尚宝传家秘丹匣重械内府符恋主犹应瞻象阙承宗深欲续基图旧时弟子来相别挥泪依依向国都

初三日早过淳化关批引跨蹇过句容入县学见车和仲教谕蒙酒饭相待晚遇雨宿十里店

初四日早起程至白兔雇车行四十里晚至丹阳买舟而行律诗示胡知事吴主簿先生

十年淮客向为羈何意丹阳问道归山鸟旧曾闻杜宇家人应复叹蜉蝣险经丘壑纡前骑怪见泥沙污满衣幸有同袍相慰藉买舟河上看斜晖

初五日过奔牛吕城晚宿无锡县西门

初六日自无锡起程饭後过虎丘晚宿姑苏城下虎丘寺

山径重重磴道悬千章乔木蔼云烟劒光下蘸深潭水■〈土答〉影潜通小洞天古佛谁修清淨供老僧独悟上乘禅宗门亦荷斯文力来看诸公石上镌

初七日饭後入苏州府晚至海宁县界

初八日入嘉兴府至府学附国学録项叔范书蒙胡教授孟节待早饭

初九日早登（阙）晚至会安坝

初十日早搬行李至後朝门

十一日入杭州府至友人叶有常家知其判官山西某州见其母八十余而强健如五六十岁云

十二日自後潮门起程过西兴晚宿钱清

十三日自钱清起程晚宿绍兴城下是日五更时分踪迹赵国祥家其子以舟来迎与胡知事吴主簿同过割鸡醵早饭出其甥陈氏求着其父小传

十四日自绍兴起程过曹娥见传宪史夜宿余姚西门

十五日入余姚见王汉章知县蒙赐酒而别及借掖垣类藁晚宿明郡西门

十六日早到家告祠堂祝文云真向以乡贡去家十二年今自临淮教官考满入朝九月初四日谢称职恩廿二日华盖殿擢广信府儒学教授廿七日内府关符契廿八日给凭吏部谒告上家赴任以兹吉日到家敢告

题求源堂

君家得姓本岐邨世远须知一派分乃祖移居成别墅诸孙力学踵清芬有怀远寄吴江月托兴频招渭水云撰述幸凭燕许笔老成真足张吾军

○上任錄

洪武十七年闰十月十八日告辞先祠与家人大小为别母舅蒋子通父送至社坛桥出西门亲友俎宴乌继善先生知县家在座者乌先生父子及朱刚中徐公义宋廷臣夏尚忠陈思礼叶某管敬仪表弟蒋信忠舍亲单彦高王中传吴子浩黄取友徐仲威仲章昆季酒罢廷臣公义送至大卿桥再拜为别柴允可後至题诗以致惓惓晚宿徐仲威家饮酒史君实以酒果来论旧踌躇而去以事不至者吴主簿纪亲家云

十九日早饭仲威家出数步见黄尚綱遂与登舟至吴使君祠与张则存先生为别至望春桥见马鼎携其乃父易之饶歌集而行壁上危太仆张仲举二元老诗揭以为赠晚泝江宿鹤浦

二十日早与舍弟千祥许某黄尚綱幼男复昇入永乐寺谒淬禅师论四十年之契延欸素饮出水陆荐疏具列先生及教授名位爵号盖以师生之契故也思慕不已再登雨微峯见阐国师登後阁上周览形胜下入淬公房午饭以青蚨二緡及茶酒酱醋相赠友人余知县伯熊陪

游终日贈以律诗

玉山云外碧崑迢冲雪宁辞去路遥西狩获麟传旧学朝阳鸣凤属新朝客羶犹带水霜苦讲席仍沾雨露饶枳棘暂栖黄主簿乡心应托甬东潮

二十一日五更早行过余姚以不得见王汉章深为怅然饭後过通明暮过曹娥夜行通关数十里成律诗一首

扁舟薄暮过曹娥古往今来感慨多风满沙汀翔观鹤潮深窟穴吼鼃鼃巡防星聚军依律团竈烟飞国有科倦客思家还作梦隔船听得唱蛮歌

二十二日入绍兴城早饭许二官家至山陰会稽二县学访教官不遇见学生数人而已晚到赵国祥家蒙贈鸡酒饭米出其甥陈氏再拜请着其父小传益勤予不能拒也夜过东西二堤

二十三日渡江到杭州後潮门

二十四日与舍弟千祥鸡酒为别出■〈土册〉门登六和■〈土答〉遂登舟

六和■〈土答〉

孤■〈土答〉危栏薄暮登重重铃索絙觚棱上方自可通天阙下界谁能送佛灯於越山川迷远近子胥涛浪怒凭陵纷纷历劫尘遮眼试数前朝几废兴

二十五日过富阳县晚宿阳家埠

扁舟轻趁富阳潮路转长江百里遥月射珠宫纷变怪风生琼壑奏钧韶离家因为官期迫久客悬知物累消明日严陵滩下过汉廷节义仰云霄

二十六日过黄山巡检司批引晚泊洞庐

二十七日早自七里湾起程问严陵则已过矣怅然久之作上滩歌一首是日午过严州晚宿乡头

碧水清清深见底白石团团露牙齿轻帆一幅挂长风恍惚人行明镜中篙工睥睨怕船破努力撑向山湾过夜来竟上严陵滩滩前古木明月寒人生古来重高节慨我犹能想余烈梦中如复见音容独鹤不来江水空起来谩听舟人语试问前滩渺何许云台何似钓台高吁嗟此土真英豪天地茫茫重回首蜗角蝇头竞奔走浩歌下瞰长波流不尽人间今古愁囊中百钱问沽酒醉笔纵横落星斗沙头儿女笑相看尘土可怜行路难

二十八日过兰谿县晚宿源潭

二十九日过龙游县晚宿野狐塾

轻帆双幅挂长风碧水光寒一镜空叠嶂青霞来缥缈太虚元气浥空蒙淮天城郭神游外海
国林泉梦寐中五十年来长作客放歌欲效杜陵翁

十一月初一日甲子冬至行龙游界中上滩为衢州界晚宿衢城下上滩歌

白石凿凿流水声大山小山遥送青寒天日短问无酒何似三闾恨独醒

年年至日淮水涯今日三衢又忆家漫道人生如梦寐谁知岁月换龙蛇

霜鴈叫云愁远天浅水沙湾人放船滩头玉石作碁子好寄烂柯山上仙

水上明灯点点红夜寒直欲破鱼龙浮屠法教真儿戏苦海谁云济度功

鸬鹚捕鱼鱼满船朝来沽酒要烹鲜撑近滩头笑相问恰有青铜数百钱

滩水潺潺日夜流严陵过了又衢州山人赤脚岸头立蛮语蛮言相唤酬

上滩下滩复上滩重水重山罨画间西江早得仙舟便上清宫阙许跻攀

水轮声转似游龙草屋无人碓自舂蓬户暂开闻语笑分明机巧见神功

片帆遥指大江西回首千岩落照低久客天涯筋力倦只消归老故山栖

吴头楚尾路悠悠水宿风餐可自由故园暂到仍轻别辜负小山丛桂秋

初二日过石塘桥晚至常山埠头

初三日早入迎薰门至常山县学附徐景颜书见教官徐允明先生训导江仲允先生徐某先生教谕割鸡为黍及见前鄞县尹陈可斋先生送出通远门外行三十里至白头石铺徐氏店宿歇

初四日自白石起程午后至玉山造县学见程训导允明先生过夏氏留饮就宿学中夏氏系英公之後

初五日玉山知县徐懋和招早饮回县学中题画三幅赠徐知县张县丞及程训导又题菖蒲

画赠山陰胡则方

古木画三首

山中古木倚嶽崑漫说风霜老不禁过眼繁华浑似梦凭谁同守岁寒心

长松千尺是谁栽频听鸾笙谷口来幸遇明时终大用风霜莫老栋梁材

碧云双树倚嵯峨百岁山中柰老何恐化蛟龙上天去莫教风雨夜来多

题菖蒲

山人本爱北山居种得仙家九节蒲服食可应资寿考便须骑鹤上清都

初六日早登舟晚至沙溪镇夜泊

初七日饭後至广信东城训导傅先生原纲周先生宗文上饶县学教谕徐先生仲告训导游先生用文欧阳先生君谟诸生十余人远送至学见府太守王公同知方公而退

初八日徐观道先生及诸公见访

初九日上任望阙五拜礼先圣殿四拜礼诸生以序见县学徐先生仓使饶某等以酒果相贺府太守同知亦以礼来就请宴席诸生割羊豕为饌在座者徐观道先生教谕府县学训导先生四人云

题菖蒲四首

九节长幽妍从来石水便筒编灯火夜烦尔为收烟

石上发幽馨仙蒲九节青山翁资服食百岁纪修龄

苍石种仙蒲分明认虎须太阳方卓午点点露成珠

清波护浅沙劒节长灵芽百岁蓬莱客青春早见花

题古柏图

古木与云齐亭亭舞翠旗莫令霜雪重老却凤凰枝

题枯木图

霜雪若为容萧萧涧壑中美材终大用披拂待春风

题枯木竹石

晚过碧山阿萧萧竹树多隐君泉石意霜雪果如何

题枯木

南来为客过常山古木萧萧岩谷间早晚明堂要梁栋冰霜何事苦摧残

题古木图

偃蹇老龙形灵根长茯苓萧然岩谷底霜雪饱曾经

冰雪岁寒心萧萧涧谷阴却怜风月夜来听凤凰吟

题菖蒲图赠上清吴道纪

上清岩谷列仙家灵草春深长翠芽解使身轻如羽翼飘飘万里御云霞

枯木竹石赠祥符寺主古芳禅师

苍石玉玲珑萧森竹树丛老禅初定起林杪一龛风

又

苍龙蟠涧壑翠羽出林栖为唤潇湘客来寻石上题

菖蒲图

九节苍龙脊葱茏石上青轻身资服食飞步上空冥

题枯木

涧谷碧云深贞哉百岁心多怜风雨夜翻作老龙吟

题画松寄弋阳林敬伯主簿

山中古木倚云高缥缈天风滚翠涛花县重逢鲸岛客只须剪叶酿春醪

又题古木五首

生来不得大夫封老矣宁甘涧壑中物外繁华休着眼任教桃李笑春风

山中偃蹇似游龙夜半声寒万壑风祇恐春来成变化滂沱雷雨暗浮空

大材不用复谁怜老矣孤根托九泉独有女萝相倚附誓同冰雪过年年

阅尽冰霜老不知栋梁久矣负前期吹嘘尚待春风到谷口来听叫子规

偃蹇宁为世所怜冰霜岩壑不知年古来材大难为用休问荣枯雨露偏

题竹

翠竹傍林低毋烦枳棘迷盛时昭美贲须待凤来栖

枯木竹石

石林斜透玉玲珑万代秋高古木风帝子不来愁日暮飘飘遗佩响浮空

荅阳外史集卷一百

附录

附录：

郑真荥阳外史集一百卷（字千之慈溪人乡试第一授临淮教谕秩满入京赐宴陞广信教授引年归）（四库全书·史部·目录类·经籍之属·千顷堂书目卷十八）

荥阳外史集六十卷（成化四明郡志郑真着字千之鄞县人）（四库全书·史部·地理类·都会郡县之属·浙江通志卷二百四十九）

郑真

真字千之鄞县人洪武壬子乡试第一授临淮教谕秩满入京赐宴陞广信教授引年归有荥阳外史集

（诗话千之文极为宋潜溪推重裴典簿中尝属其撰着存堂记别请潜溪为之千之记先成潜溪见而叹曰人徒慕吾名尔使我执笔焉能过之後数年典簿复请於潜溪荅曰有郑先生记在发明洞彻使之独步可也千之既领解与计吏偕除临津儒学教谕历九年进牌朝於奉天门七奉天殿十四华盖殿二十七文华殿三武英殿一中右门二赐酒饌者十一命赋早朝赐宴及续御制菊绽西风露脂枫叶等诗微员之受恩遇至矣考明初士子举于乡者例称乡贡进士樊余庆诗云圣代新开进士科而千之送闽人黄彦机诗亦云两省同年进士科是也如南海孙蕢番禺李德皆乡贡进士而辑地志者削去乡贡字竟称进士後人因之不察遂谓蕢中洪武三年进士不知洪武三年第下科举之诏以是年八月为始未尝会试天下士後虽下三年叠试之诏惟辛亥有登科进士尔此一误也嘉兴湖州二府明初属之直隶故实録於洪武九年十二月书直隶湖州嘉兴诸府水灾遣户部主事赵乾等赈给十一年五月敕工部定岁造军器之数其书湖州嘉兴亦冠以直隸字至十四年四月复置巡检司嘉兴府一嘉兴县之杉青牐湖州府三乌程县之後潘德清县之下塘新市仍以直隶文冠之考是年十一月始以二府改隶浙江布政司故千之跋同年録云洪武壬子秋浙省承诏旨合九郡之士试之得四十名上诸京师又送何本道还金华序云洪武五年诏命三年叠试於是浙江所属九郡以其名上之行省而金华何本道与焉其云九郡者嘉湖二府斯时尚属南畿不在其内也庚戌乡试中式相传嘉兴则有许信孚俞志文马思明王镛毛永昇潘椿年朱楨王贞海盐则有盛潜德清则有王軫此当载於南国贤书不当载於浙江登科録顾张氏朝瑞宜书而不书陈氏汝元不当书而书又一误也壬子浙闈千之名居第一是科四十人中式故王用吉诗云桂籍题名四十人明州自郑真外有郭可学樊余庆黄梦熊顾厘王振王廷直王用吉孙原仲吴伦陈希贡汪义方何操陈仲贤汪瓚共一十五人若陈氏所载鄞县王藹王道显二人明州府鹿鸣宴不之及我不敢信也又黄自强王景何本道见於千之他文上虞李继先乌程陈咨见於府县志余若王麟王骥赵惟一杜谊沈新民徐思诚翁希顔俞尚禔骆文凯吴佐俱载陈氏録中姓名可知者三十人顾陈氏以真伦元仲义方希贡余庆属之辛亥科此又一误也草昧之初旧闻放失总缘修地志者不得其人於古事则芟除之於近事则混书之譌以传譌若非

得荜阳外史百卷某何由订其实乎)